




2.7.

~~11.3.F.16~~

4-5, C. 6.

№ 2460 М. н. а. н. 8-5.





~~XXXXXX-11~~
~~XXXXXX-12~~

XXXII. II. 124.

LES OEUVRES
& Meſlanges Poetiques
D'ESTIENNE IODELLE
SIEVR DV LYMODIN.

Premier Volume.



BIBLIOTECA NAZ.
ROMA
ATTORNI EMANUELE



A PARIS,

Chez Nicolas Chefneau, rue ſainct Iacques
à l'enſeigne du Cheſne verd:

ET

Mamert Patiffon, rue ſainct Iean de Beauuais,
deuant les Eſcholes de Decret.



M. D. LXXIIII.

AVEC PRIVILEGE DV ROY.

THE NEW YORK PUBLIC LIBRARY


ASTOR LENOX TILDEN FOUNDATION

500 FIFTH AVENUE, NEW YORK

1900

1900

1900



1900

1900

1900

1900



DE LA POESIE

FRANCOISE, ET DES OEUVRES

DE D'ESTIENNE IODELLE,

seigneur du Lymodin.



Nos vieux Gaulois faisoient grand cas de la Poësie: & entretenoyent les Poëtes, non pour la volupté, mais pour la police, & pour l'érudition, les estimans les vrais & premiers Philosophes. Ceux qu'ils appelloient Bards, louoyent, ou blasmoient envers Gaulois les personnages illustres, vians ou trespassez (ainsi que Diodore, Strabon, & Lucain tesmoignent cela auoir duré en Gaule iusques en leur temps) & les Semnothees mettoient en vers les cantiques de leur Religion, & les Druides leurs loix. Pource l'histoire de Louhier, & de Betit (que les Romains appelloient Rois des Auvergnats) n'est remarquée par Strabon, & Athenée (qu'il ont extraite de Possidoine) que pour le grand accueil, & pour l'honneur qu'ils faisoient au Poëte, suruenant en leurs festins tant renommez: Et non seulement Diodore fait cas (pour le plaisir) de la mélodie inuentée dès lors par ces Bards, de chanter leurs



SAW 107
poèmes avec l'instrument (que le fragment que nous auons d'un des liures des Origines, lequel on attribue à Caton , dit auoir esté imité par les Romains long temps depuis en leurs jeux & banquetts) mais aussi, pour la police, il assure que quand un Poëte Gaulois suruenoit au milieu de deux armées aduersaires, & au fort du combat, il auoit bien ceste autorité de faire arrester les vns & les autres, & de iuger leurs querelles, Tāt (dit-il) le Mars Gaulois respectoit les Muses. Cōme aussi, pour l'erudition, les historiens ont noté que tous les enfans des Gaulois, principalement les nobles, estoient premierement instituez à la Poësie, & par icelle aux autres sciences. Or puis que la renommée de ces Bards, & Semnothées, a précédé l'aage des plus vieux Poëtes Grecs, & par conséquent aussi des Latins: mesme que les auteurs Latins n'ont peu taire que Stace Cecile Poëte Gaulois; precepteur d'Ennius, porta premierement la Comedie à Rome, & que luy, & Valere Caton aussi Gaulois, firent les premiers Poëtes que Rome euz: On peut donc presumer que les Grecs, & les Latins ont appris des Gaulois (domteurs alors des vns, & des autres) ce qu'ils ont sceu de poësie: aussi bien que de la Philosophie, que les Grecs receurent des Semnothées, comme Aristote a confessé au Magiq, ainsi que Laërce a bien noté. Mais l'ancienne haine, & l'enuie des Romains contre les Gaulois furent si extrêmes, que rauageans les Gaulois ils supprimèrent les liures, & quasi toute la me-

moire de ces Semnothees, Bards, & Druides. Et
 Tibere sous feintise de deffendre les sacrifices des
 Druides, & pour abolir le reste de l'honneur Gau-
 lois, voulut chasser tous ces Poëtes, qu'il appelloit
 Deuineurs, & sorciers. Toutesfois pour cela, luy ny
 les autres Empereurs suiuaंस, ne peurent en venir
 à bout, voire ne peurent oster les Colleges reprenez,
 qui estoient de l'ancien establissement des Bards,
 en aucunes principales villes de Gaule, c'est à sça-
 uoir, à Treues, Authun, Besançon, Tholose, Mar-
 seille, & Lyon l'ancienne: seulement ils les ada-
 pterent à leurs louanges, principalement les
 Ieux-Meslez de Lyon, que Auguste premieremēt
 & Caligule apres, auoyent tourneez en leur adora-
 tion. Si est-ce que tant par la continuelle oppres-
 sion Romaine, que par le changement de la Reli-
 gion, ayans esté la langue & les mœurs des François
 latinisez, se perdit quasi l'usage de poetiser en Gau-
 lois: & les Colleges tomberent en ruine: comme
 lon en voit vne plainte en vne oraison dictée par
 le Rheteur Eumene, à vn gouverneur de la Gaule,
 sous l'Empereur Constace, pour le College d'Au-
 thun (que Rhenā par erreur a expliqué de celuy de
 Treues, lisant *Augustodunensium*, pour *Augustodunen-
 sium*). Aussi les Gaulois estoient tant addonnez
 à leur grand ligue de la Franchise, pour s'affranchir
 du ioug Romain, qu'ils laisserēt quasi tous les Mu-
 ses, pour les armes: Exceptez quelques Euesques,
 comme saint Hilaire, qui est remarqué le pré-
 mier entre les Catholiques, d'auoir composé en

vers, des Cantiques, & des Hymnes de l'Eglise. Prosper aussi, & plusieurs autres, qui affectans la façon de la Poësie Gauloise, rymoyent la plus part leurs vers Latins: mesme nostre saint Remy (à qui les François doiuent tant) en son testament recueilli par l'historien Floard, fait mention de ses Epigrammes. Et dès lors reuindrent encor en vusage les vers rymez, tât en Latin qu'en François (que les autres nations voisines ont long temps depuis appris d'eux) principalement lors que les François furent paisibles de leur Monarchie: car la Poësie retourna en si grand credit, que les Rois & les Princes s'y estudioyent, & employoyent. Haudry troisieme du nom, Roy de France (que par corruption lon appelle Childeric) composa plusieurs liures en vers, qui ne plaisoyent gueres à Gregoire Archeuesque de Tours; par ce qu'ils n'estoyent mesurez par pieds à la Latine, mais rymez à la François. Fortunatus en louë aussi le Roy Cherbert, ou Herbert: Charles le grand s'y adonnoit beaucoup, & y auoit fait instruire aucunes de ses filles: & fit faire à Aléuin vn liure de vers Morauls rymez, dont Loup Abbé de Ferrieres fait mention en vne de ses Epistres. Son filz l'Empereur Loys, s'en delectoit tant, qu'il pardonna à Angers à l'Euesque d'Orleans Thiedouil, vne offense irremissible, seulement pour l'auoir ouy chäter des vers Latins rymez, qu'il auoit composez, ores que ce Loys fust d'vn naturel tres cruel, & quelque tiltre de Debonnaire ou de Pieteux, que fust semēt Guetard, histo-

rien de son fils Charles, & son cousin germain, luy
aye le premier donné : car le liure d'Eghinard a
esté corrompu par les Alemans ; si du tout il n'a
esté supposé. Pareillement le Roy Robert se
plaisoit fort en ceste science, comme en toutes
autres esquelles il auoit bien estudié ; ainsi que ses
Chroniqueurs Glaber & Odoran ont escrit. Thie-
baut. quatrieme Roy de Nauarre, & Comte de
Champagne, estoit tresbon Poëte François : &
de luy, pour vne Duchesse de Lorraine, & de Gil-
les Chastelain de Coucy, pour la dame du Fayer, se
treuue encor vn gros volume de diuers poëmes
François. Geoffroy Plâtegenet Comte d'Anjou par-
donna à plusieurs seigneurs Poicteuins qu'il auoit
pris en la bataille de Chef-boutonne, & les deliura
de prison à Tours, pour vn seul present de vers fran-
çois rymeux qu'ils luy enuoyerent. Philippe Auguste
fit mettre en vers François & Latins, la victoire de
Bouuines, par maistre Guillaume le Breton prece-
pteur de son fils Charles, Euesque de Noyon. Et
depuis ce temps là eurent grand bruit Guy de Lor-
ris, Jean Clopinel de Meun, Pierre d'Auuergne,
Geraud, Floquet, Raimbaud, Geoffroy Rudel,
Emery, Bernard, Hugues, Anseume, & plusieurs
autres Poëtes de siecle en siecle, tant qu'aucun aage
ne s'est passé depourueu de Poëtes François, qui
tousiours de mieux en mieux ont enrichi nostre
langue de maints bons escrits. Mais depuis que
la chiquanerie Italienne eut abusé les François par
la curiosité de la Comtesse Mahaut, & de son Er-

nier, ou Garnier, les bons esprits se corrompirent,
& les bonnes sciences, mesme nostre Poësie Fran-
çoise, tomberent en abiection, n'osans les doctes
plus escrire qu'en Latin: & n'estant decent à aucun
(fors qu'aux farceurs du peuple) de rymen en Fran-
çois: Si voyoit-on toutesfois entre les Nobles cet
amour de la Poësie Françoisse tousiours durer. Car
il y auoit bien peu de seigneurs aisez, qui n'eust vn
Clerc, qui mettoit en ryme Françoisse la plus part
de leurs Romans, desquels on en voit encore plu-
sieurs escripts de cét temps là en aucunes maisons de
France. Certainement cet abus nuisit plus à la Poë-
sie, que n'auoyét fait les oppressions des Romains,
& le changement de la Religion: Et en France elle
eust esté du tout abolie, si en cet aage dernier le
Rôy FRANÇOIS premier, reestablisant les bon-
nes lettres, n'eust incité plusieurs esprits excellents
qui sourdirent en la fin de son regne, & au com-
mencement de celui de son fils HENRY: lesquels
reprenans ceste ancienne vigueur Françoisse, remi-
rent sus la docte Poësie en leur langue. De ceux là
le premier & le plus hardy fut Pierre de Ronsard,
gentilhomme Vandomois, qui se fit auteur &
chef de ceste braue entreprise, contre l'ignorance
& rudesse de ne sçay quels Chartiers, Villons, Cre-
tins, Ceues, Bouchers, & Marots, qui auoyét escrit
aux regnes precedés: & a tracé le chemin aux autres
qui l'ont suiuy. Le premier qui après Ronsard se fit
cognoistre en ceste nouuelle façon d'escrire, ce fut
Estienne Iodelle, noble Parisien: car dès l'an 1549.

lon

lon a veu de luy plusieurs Sonnets, Odes, & Charonrides; & 1552. mit en auant, & le premier de tous les François donna en sa langue la Tragedie, & la Comedie, en la forme ancienne. En ce tēps là aussi apparurent Baif, & du Bellay, tresdoctes Poētes, & autres en grand nombre, lesquels ont de leur vivant publié leurs escrits, ce que Iodellene voulut oncq faire: mais apres sa mort, ses amis plus soucieux de sa mémoire que luy mesme, & pour l'honneur de la France, ont recueilly ce qu'ils ont peu de ses œuvres égarees, & de partie d'icelles ils ont fait imprimer ce premier volume de Meſlanges, pendant que lon preparera autres volumes de choses mieux choisies & ordonnees. Car expressement lon a meſlé en ce volume plusieurs pieces faites par l'autheur aux plus tendres ans de sa ieunesse, comme la Tragedie de la Cleopatre, & la Comedie d'Eugene, & quelques Chanſons, Sonnets, & Odes que lon pourra discerner plus foibles que plusieurs autres faites depuis, afin que lon cognoiſſe quel a esté l'autheur en ses escrits, & en son adolescence, & en la suite de son aage plus viril. On y a mis aussi aucuns poēmes imparfaits, par ce que lon n'en a encore peu recouurer le reste: Et a lon pensé (quelques imparfaits qu'ils ſoyent) que ce qui y est ne laissera de plaire, & profiter aux Lecteurs. De ceux-là sont les Contr'Amours, qui doiuent contenir plus de trois cens Sonnets: les Discours de César au passage du Rubicon, qui se doiuent monter à dix mille vers pour le moins,

la Chasse qui n'est ici a moitié, & contre la Riere-
Venus, que l'auteur pour sa maladie ne peut par-
faire. Au recueil de ses œuvres nous ont aidé Mes-
sire Charles Archevesque de Dol, de l'illustre mai-
son d'Espinay, qui estant en Bretagne comme un
Phare éclairant par ses vertus ceste coste de la Fran-
ce, a fait tousiours cas des poësies de cet auteur,
iusqu'à faire quelquesfois représenter somptueu-
sement aucunes de ses Tragedies: Messire Philippes
de Boulainuillier Côte de Dampmartin, seigneur
tres-vertueux: & l'ancien ami de l'odelle, Henry Si-
mon: Aussi le sieur de Brunel, qui par la felicité de
sa memoire & de son esprit, y a restitué quelques
vers oubliez. Iouisse donc le Lecteur de ceci ce pen-
dant: Et auant que iuger de ceste Poësie, ie le prie
de noter deux choses: l'une, que ores que par icel-
le lon peut bien apperceuoir que l'auteur auoit
bien leu, & entendu les anciens, toutesfois par vne
superbe assurance ne s'est oncques voulu assuiet-
tir à eux, ains a tousiours suiui ses propres inuen-
tions, fuyant curieusement les imitations, sinon
quand expressement il a voulu traduire en quel-
que Tragedie: tellement que si lon trouuoit au-
cun trait que lon peut recognoistre aux anciens,
ou autres precedens luy, ç'a esté par reueche, non
par imitation, cōme il sera aisé à iuger en y regar-
dant de pres. L'autre, que qui remarquera la pro-
preté des mots bien obseruee, les phrases, & figu-
res bien accommodees, l'elegance & maiesté du
langage, les supriles inuentions, les hautes cour-
3

ceptions, la parfaite suite & liaison des Discours,
& la braue structure & grauité des vers, où il n'y a
rien de cheuillé; se trouuera si affriandé en ce sty-
le d'escrire singulier, & possible encore non ac-
coustumé entre les François, que si après il prend
les ceuures de plusieurs autres, il s'en degoustera
tant qu'il ne voudra plus lire ny estimer autres
escrits que de Iodelle. Mais outre cela qui par
la lecture de ses ceuures se peut recueillir, nous ne
pouons celer aux Lecteurs vne chose quasi in-
croyable, c'est que tout ce que lon voit, & que
lon verra composé par Iodelle, n'a iamais esté
faict que promptement, sans estude, & sans la-
beur; & pouons avecques plusieurs personna-
ges de ce temps, tesmoigner, que la plus longue
& difficile Tragedie ou Comedie, ne l'a iamais
occupé à la composer & escrire plus de dix mati-
nees: mesmes la Comedie d'Eugene fut faite en
quatre traittes. Nous luy auons veu en sa pre-
miere adolescence composer & escrire en vne
seule nuit, par gageure, cinq cens bons vers La-
tins, sur le sujet que promptement on luy bail-
loit. Tous ses Sonnets, mesmes ceux qui sont
par rencontres, ils les a tous faicts en se prome-
nant, & s'amusant par fois à autres choses, si sou-
dainement que quand il nous les disoit, nous
pensions qu'il ne les eut encore commencez.
Bref, nous ne croirons iamais qu'aucune autre na-
tion de tout le temps passé ait eu vn esprit natu-
rellement si prompt & adextre en ceste science.

Il a beaucoup escrit en l'une & l'autre langue,
& plus que autre Poëte Grec ou Latin, moderne
ou ancien, que nous ayons: car nous esperons
faire mettre en lumiere encor quatre ou cinq
aussi gros volumes que cestuy cy. Et outre cela,
plusieurs avec nous, certifieront que nous auons
veu perdre de ses œuures non recueillies, plus que
six tels volumes que cestuy cy ne pourroyent con-
tenir: Il a escrit aussi plusieurs oraisons françaises. Et
certainement Iodelle n'excelloit pas seulement en
l'art de la Poësie, mais quasi en tous les autres: Il
estoit grand Architecte, tresdocte en la Peinture,
& Sculpture, treseloquent en son parler, & de
tout il discouroit avec tel iugement, comme s'il
eust esté accompli de toutes cognoissances. Il e-
stoit vaillant & adextre aux armes, dont il faisoit
profession. Et si en ses mœurs particulieres il se fust
autant aimé, comme il faisoit en tous ces exercices
de son esprit, sa memoire eust esté plus celebre
pendant sa vie, & il eust plus vescu pour son pais,
& pour ses amis qu'il n'a fait: Mais mesprisant phi-
losophiquement toutes choses externes, ne fut co-
gneu, recherché, ny aimé que malgré luy, & se fia
trop en sa disposition, & en sa ieunesse. Si est-ce
que les Roys Henry deuxieme, & Charles neuwie-
me, l'aimerent & estimerent. Charles Cardinal de
Lorraine le fit premierement cognoistre au Roy
Henry: la Duchesse de Sauoye sœur de ce Roy,
& le Duc de Nemours, sur tous le fauoriserent
grandement. Or il mourut l'an mil cinq cens se-

plante trois, en Iuliet, aagé de quarante & vn an,
ayant encor en son extreme foiblesse faict ce
Sonnet (qui est la dernière chose par luy compo-
see) qu'il nous recita de voix basse & mourante,
nous priant de l'enuoyer au Roy, ce qui ne fut pas
fait, pour n'auoir eu besoin de ce que plus par
cholere, que par necessité il sembloit requerir
par iceluy.

*Alors qu'un Roy Pericle Athenes gouuerna,
Il aima fort le sage & docte Anaxagore,
A qui (comme un grand cœur soymesme se deuore)
La liberalité l'indigence amena.*

*Le Sort, non la grandeur ce cœur abandonna,
Qui pressé se haussa, cherchant ce qui honore
La vie, non la vie, & repreffé encore
Plustost qu'à s'abaisser, à mourir s'obstina:*

*Voulant finir par faim, voilla son chef funeste.
Pericle oyant ceci accourt, crie, & deteste
Son long oubli, qu'en tout reparer il promet:*

*L'autre tout resolu luy dit (ce qu'à toy, SIRE,
Delaisfé, demi-mort, presque ie puis bien dire)
Qui se sert de la lampe aumoins de l'huile y met.*

Facent les mespriseurs de la Poësie, & les enuieux
de Iodelle, tel iugemét de luy & de ses escrits qu'ils
voudront, si auront ses vers de soy assez de force

& de valeur, pour emporter le los qu'ils meritent,
& en ce siecle, & aux autres qui nous suiuent. Et
quant à luy, tant que les François se souuiendront
de leur vieil honneur, & merite vers les Muses
(desquelles ils ont esté de tout temps nourrisiers)
ils ne deuront estre ingrats à la memoire de cestuy
leur nourrisson, possible le plus agreable qu'elles
ayent eu depuis les Bards, & qui tousiours ses œu-
ures n'a dressé qu'à la gloire de la France.

CHARLES DE LA MOTHE.



EXTRAIT DV PRIVILEGE
DV ROY.

IL est permis à Nicolas Chesneau Libraire iuré en l'Vniuersité de Paris, imprimer ou faire imprimer, & exposer en vente en vn ou plusieurs volumes, *Les Oeuvres Poëriques d'Estienne Iodelle Parisien.* Et sont deffenses faictes à tous autres Libraires ou Imprimeurs, n'en vendre sinon del'impression dudit Chesneau, ou de son consentement: Et ce iusques à six ans entiers & consecutifs apres la premiere impression qui en sera faicte, à peine de confiscation, & d'amende, comme plus àmplement il est porté és Lettres sur ce donnees à Paris le 24. Septembre 1574.

Signé, Par le Conseil,

LE COINTE.

*Ce volume a esté acheué d'imprimer le 6. iour
de Novembre 1574.*





LES AMOVRS

D'ESTIENNE IODELLE

PARISIEN.



SONNETS.

I.



ADAME, c'est à vous à qui premièrement

J'ay voué mon esprit, & ma voix, &
mon ame,


A qui i'offre ces vers, que d'une
saincte flamme

Amour mesme inspira à maint & maint amant:
Vous lirez sous le nom de quelque autre comment
L'amour de vos beaux yeux la poitrine m'enflame:
Vous verrez sous le nom d'une autre belle dame
De vos rares beautez le plus riche ornement.
Que si mon amour n'est par eux bien peint encore,
Que si vostre beauté assez ne s'y decore,
Excusez: car Amour n'a peu si ardemment
Qu'à moy, ardre leur cœur d'un sujet si louable:
Il ne fut oncques Dame, il ne fut oncq' Amant,
A vous de la beauté, d'amour à moy semblable.

Des astres, des forests, & d'Acheron l'honneur,
 Diane, au Monde hault, moyen & bas preside,
 Et ses cheuaulx, ses chiens, ses Eumenides guide,
 Pour esclairer, chasser, donner mort & horreur.
 Tel est le lustre grand, la chasse, & la frayeur
 Qu'on sent sous ta beauté claire, promit, homicide,
 Que le haut Iupiter, Phebus, & Pluton cuide,
 Son foudre moins pouuoir, son arc, & sa terreur.
 Ta beauté par ses rais, par son rets, par la craincte
 Rend l'ame esprise, prise, & au martyre estreinte:
 Luy moy, pren moy, tien moy, mais hélas ne me pers
 Des flambeaus forts & griefs, feux, filez, & encombres,
 Lune, Diane, Hecate, aux cieux, terre, & enfers
 Ornāt, questāt, gēnant, nos Dieux, nous, & nos om-
 (bres.

De quel soleil, Diane, empruntes tu tes traicts,
 La flamme, la clarté de ta face diuine:
 Le haut Amour grand feu du monde, où il domine
 Luit sur toy, puis sur nous luire ainsi tu te fais.
 Pour toy les beaux pensers, les parolles, les faicts
 Il cree en nous par toy, ny iamais trop voisine
 Ne voile son beau feu, qui sans fin enlumine
 Nos cœurs, faisant passer par tes yeux ses beaux rais.
 Sans cesse il te fait donc autour de luy tourner,
 Pour oblique te luire, & t'armer & t'orner
 Chāgēāt ses rais en trais, pour meurtrir ce qui t'aime:
 Tu fais prendre sans prendre en toy son aspre ardeur,
 Avec l'ardeur aussi i'en pren l'aspre froident:
 Car l'une vient de luy, l'autre vient de toymesme.

IIII.



Encor que toy Diane, à Diane tu sois
 Pareille en traicts, en grace, en maïesté celeste,
 En cœur, & hault, & chaste, & presqu'en tout le reste
 Fors qu'en l'autorité des virginales loix.
 La riche & rare fleur, qu'en tout ton corps tu vois,
 Ton en-bon-point, ta grace, & ta vigueur atteste,
 Que puis qu'un autre Hymen a desnoué ton ceste
 Virginal, en veuuegē enuiellir tu ne dois.
 Que donc l'an nouueau t'offre un espous qui contente
 De tes valeurs la France, & d'amours ton attente:
 D'un tel vœu ie t'estrene, & si ton nom si bien
 Ne te conuient alors, toy qui n'es pas moins belle
 Que Venus, pren son nom, & le meslant au tien
 Fay que Dione ensemble & Diane on t'appelle.

V.

Si quand tu es en terre, ô Diane, ta face,
 De ta face qui luit dans le ciel, presqu'esteint
 L'argentine blancheur, si sur ce blanc ton teint
 Plein de roses, l'Aurore au teint rozin, efface:
 Si deux flambeaux du ciel les plus vifs ont pris place
 Dessous ton front, s'il fault que quand le soleil ceint
 De rais, ses cheveux blons, & que les cieux il peint
 De son or le plus beau, ton poil honte luy face:
 Si Diane & Dione en l'air de toutes pars.
 Une odeur d'ambrosie, & nectar tu espars,
 Si tu as tout ce qu'ont les deesses supremes:
 Si ton esprit ressemble un Dieu logé dans toy,
 Je croy tous nos esprits, t'apprehendans en soy,
 Dans la terre iouir de tout l'heur des cieulx mesmes.

A M O U R S.

V I.

*Quand ton nom ie veux faire aux effects rencontrer,
 De la sœur de Phebus, qui chaste, & chasseresse
 Est tant au ciel qu'en terre, & aux enfers Deesse,
 Elle fort dissemblable à toy se vient monstrier.*
*Diane les chiens mene, & aux pans fait entrer
 Ses cerfs: tu peux mener les grans Heros en lesse,
 Ains les prédre en tes rets: son arc le seul corps blesse,
 Tes traicts peuuent au fond des ames penetrer.*
*De son frere elle emprunte en son ciel la lumiere:
 Dedans tes yeux flambans & rayonneux son frere
 Prendroit ce qui croistroit sa lumiere & ses feux.*
*Aux enfers elle n'a que sur les morts puissance:
 Sur nous, ains sur les Dieux, parrigueur & clemèce
 Faire en la terre. Vn ciel, ou vn enfer tu peux.*

V I I.

*Quelque lieu, quelque amour, quelque loy qui t'absente,
 Et ta deité tasche oster de deuant moy,
 Quelque oubli qui cōtraint de lieu, d'amour, de loy,
 Face qu'en tout absent de ton cœur ie me sente.*
*Tu m'es, tu me seras sans fin pourtant presente
 Par le nom, par l'effect fatal qui est en toy,
 Par tout tu es Diane, en tout rien ie ne voy,
 Qui mon ail, qui mon cœur de ta presence exemte.*
*En la terre, & non pas seulement aux forests
 De moy viuant l'obiet continuel tu es,
 Estant Diane: & puis si le ciel me rappelle,*
*O Lune, ton bel ail mon heur malheurerà:
 Si ie tombe aux enfers, mon seul tourment sera
 De souffrir sans fin l'ail d'une Hecate tant belle.*

VIII.

Si quelcun veut sçauoir qui me lie, & enflame,
Qui esclauē a rendu ma franche liberté,
Et qui m'a afferui, c'est l'exquise beauté
D'une que iour & nuict i'inuoque & ie reclame.

C'est Le feu c'est Le nœu, qui lie ainsi mon ame,
Qui embrase mon cœur, & le tient garotté
D'un lien si serré de ferme loyauté,
Qu'il ne sçauroit aimer ny seruir autre Dame.

Le feu le
nœu, de-
uise de la
Dame.

Voila le Feu, le Nœu, qui me brusle, & estraint:
Voila ce qui si fort à aimer me contraint
Cellē, à qui i'ay vouē amitié eternelle:
Telle que ny le temps ny la mort ne sçauroit
Consommer ny dissoudre vn lien si estroit
De la sainte union de mon amour fidelle.

IX.

Amour vomit sur moy sa fureur & sa rage,
Ayant vn iour du front son bandeau delié,
Voyant que ne m'estois sous luy humilié,
Et que ne luy auois encores fait hommāge:
Il me saisit au corps, & en cest auantage
M'a les pieds & les mains garrotté & lié:
De l'or de vos cheueux plus qu'or fin delié,
Il s'est voulu seruir pour faire son cordage:
Puis donc que vos cheueux ont esté mon lien,
Madame, faites moy, ie vous pry, tant de bien,
Si ne voulez souffrir que maintenant ie meure,
Que i'aye pour faueur vn brassellet de vous,
Qui puisse tesmoigner d'oresnauant à tous,
Qu'a perpetuier vōstre esclauē demeure.

Ou soit que la clairté du soleil radieux
 Reluise dessus nous, ou soit que la nuict sombre
 Luy efface son iour, & de son obscur ombre
 Renoircisse le rond de la voulte des cieux.
 Ou soit que le dormir s'escoule dans mes yeux,
 Soit que de mes malheurs je recherche le nombre,
 Je ne puis couter a ce mortel encombre,
 Ny arrester le cours de mon mal ennuyeux.
 D'un malheureux destin la fortune cruelle
 Sans cesse me poursuit, & rousiours me martelle
 Ainsi iournellement renaissent tous mes maux.
 Mais si ces passions qui m'ont l'âme asservie,
 Ne soulagent un peu ma miserable vie,
 Vienne vienne la mort pour finir mes trauaulx.

Passant dernièrement des Alpes au traüers
 (I'entens ces Alpes haults, dont les roches cornües
 Paroissent en hauteur outrepasser les nues)
 Lors qu'ils estoient encor de neige tous couuers,
 I'apperceus deux effects estrangement diuers,
 Et choses que ie croy iamais n'estre auenues
 Ailleurs: car par le feu les neiges sont fondues,
 Le chaud chasse le froit partout cet uniuers.
 Autre preüue i'en fis que ie n'eusse peu croire,
 La neige dans le feu son element contraire,
 Et moy dedans le froit de la neige brusler,
 Sans que la neige en fust nullement consummee.
 Puis tout en un instant cette flamme allumee
 M'environnoit de feu, & me faisoit geler.

XII.

Madame, j'ay regret de quoy ie n'ay cet heur
De trouuer le moyen de vous faire connoistre
De quelle affection ie desiré vous estre
Perpetuellement fidelle seruiteur.
Ma grand' affection est au comble Et hauteur
De sa perfection, elle ne peut plus croistre,
Raison en fut la mere, & d'elle elle fit naistre
Ce desir que ie porte enclos dedans le cœur.
L'amour qui engendra ce desir la, Madame,
Se fait maistre de moy, se saisit de mon ame,
Dés lors que vos beautés que lon doit admirer,
Furent sans y penser de mes yeux apperceuës,
Soudain que par les yeux le cœur les eut receuës,
Il n'a depuis rien fait sinon les adorer.

XIII.

Plus tost la mort me vienne deuorer,
Et engloutir dans l'abysme profonde
Du gouffre obscur de l'obliuieuse onde,
Qu'autre que toy l'on me voye adorer.
Mon braslelet, ie te veux honorer
Comme mon plus precieux en ce monde.
Aussi viens tu d'une perruque blonde,
Qui pourroit l'or le plus beau redorer.
Mon braslelet, mon cher mignon, ie t'aime
Plus que mes yeux, que mon cœur, ny moy mesme,
Et me seras à iamais aussi cher
Que de mes yeux m'est chere la prinelle.
Si que le temps ny astra amour nouvelle
Ne te feront de mon bras dela scher.

A M O U R S.

X I I I I.

J'aime le verd laurier, dont l'huyet ny la glace
N'effacent la verdeur en tout victorieuse,
Monstrant l'eternité à iamais bien heureuse,
Que le temps, ny la mort ne change ny efface,
J'aime du houx aussi la tousiours verte face,
Les poignans equillons de sa fueille espineuse,
J'aime le lierre aussi, & sa branche amoureuse
Qui le chesne ou le mur estroitement embrasse.
J'aime bien tous ces trois, qui tousiours verds ressemblent
Aux pensers immortels, qui dedàs moy s'assemblent,
De toy que nuict & iour idolatre j'adore,
Mais ma playe, & poincture, & le Nœu qui me serre
Est plus, verte, & poignante, & plus estroit encore
Que n'est le verd laurier, ny le houx, ny le lierre.

X V.

Jusqu'aux autels ie n'iray seulement
Me presenter victime au sacrifice,
Plus outre encor pour vous faire service
J'iray, Madame, affectionnément.
Je suis à vous dedié tellement,
Que ie ne crains gesne, mort, ou supplices,
Ce m'est assez, mais qu'en mourant ie puisse
Vous apporter quelque contentement.
Long temps y a que ie porte, Madame,
(Vous le scauez) ce desir en mon ame,
A tout le moins vous le deuez scavoir
Je suis tousiours en ceste mesme enuie,
Et si ne puis autre vouloir auoir
Que d'employer en vous seruant ma vie.

Que

XVI.

Que n'ay-ie mes esprits vn peu plus endormis,
 Mon cerueau plus pesant, & l'ame plus grossiere,
 Pour ne sentir si fort vne douleur meurtriere,
 Qui fait que sans repos languissant ie gemis.
 Mes sens sensibles trop ce sont mes ennemis,
 Qui espointés iusqu'au vif d'une douceur trop siere
 Ont perdu le repos, la liberté premiere,
 Pour trop sentir le mal qu'en eux ils ont permis.
 Si ie n'eusse à clair veu ta grace & ton merite,
 Mon mal seroit legier, & ma peine petite:
 Mais pour voir, pour cognoistre, & sentir iusqu'au fôs
 Ta grace, ta valeur, ta rigueur ennemie, (promts,
 Mes yeux, esprits, & sens, trop clairs, trop vifs, trop
 Sont meurtriers, sont tyrâs, sont bourreaux de ma vie.

XVII.

Maudiray-ie, Madame, ou le sort enuers moy
 Cruel & inhumain, ou ma triste auenture,
 Qui fait que de tout temps miserable i'endure
 Mille & mille tourmens sous l'amoureuse loy?
 Maudiray-ie l'amour, maudiray-ie de toy
 La grace ou la rigueur & trop douce & trop dure?
 Maudiray-ie de moy vne encline nature
 A suiure & receuoir le mal que ie reçoys?
 Ha non! ie ne scaurois autre chose maudire
 Que ce mesme qu'en moy de plus rare i'admire,
 C'est mon affection, ma constance, & ma foy.
 Car tout aussi soudain qu'une maistresse i'aime
 D'une ferme constance, & d'un amour extreme,
 Soudain le sort cruel la retire de moy.

A M O U R S.

X V I I I.

*Avec ton cher pourtraict, qui dans mon ame esprise
 Est mieux peint qu'il n'est peint d'as tō present si cher,
 Tu fis sur le dehors tailler vn dur rocher,
 Deuise que la foy constante a tousiours prise.
 Le flot, le vent, le foudre, vn dur rocher ne brise:
 Ta foy du temps faucheur fait l'acier reboucher:
 Mais lors il me fallut d'autres marques chercher
 Pour ma foy, qui l'acier du mesme temps mesprise.
 Avec mon pourtrait mesme en basse taille doncq'
 Des figures tu vis, qui ne furent adoncq'
 Selon mon vray projet par vers bien decouuertes.
 Pour renfort des premiers, ces vers cy que tu lis,
 Puissent rendre enuers toy ces choses que tu vis,
 Avec ma foy, mon ame, & mon cœur, plus ouuertes.*

X I X.

*Afin qu'en cet ouurage, aux faces de dehors
 Selon l'art l'une à l'autre accordante se treuve:
 Dans deux temples diuers se fait la double espreuue
 De deux effects d'aimer, plus estroits & plus forts.
 De Pylade & d'Oreste vn debat sur leurs morts,
 Dans le temple Taurique, vn extreme foy preuue:
 Dans le temple Troyen d'un Chorebe s'espreuue
 L'amour, qui fait son cœur n'auoir soin de son corps.
 Ouurant l'ouurage, on voit une foy plus estreinte,
 Qui à toy par Diane en l'un des costez peinte,
 Sur vn autel de Foy, quand mesme il se feroit
 Pour elle autel de mort, iusqu'à tout est iuree:
 Et qui là sur toute autre amour fort asseuree,
 De mort, & de toute autre amour triompheroit.*

X X.

Des trois sortes d'aimer la premiere exprimee
 En ceci c'est l'instinct, qui peut le plus mouvoir
 L'homme enuers l'homme, alors que d'un hautain deuoir
 La propre vie est moins qu'une autre vie aimee.
 L'autre moindre, & plus fort toutesfois enflammee,
 C'est l'amour que peut plus l'homme à la femme auoir.
 La tierce c'est la nostre, ayant d'un tel pouuoir
 De la femme la foy, vers la femme animee.
 Que des deux hommes donc taillez icy, les nœus
 Tant forts cedent à nous. Que sur tes ardens feus
 (O amour) cet amour entier, soit encor maistre.
 L'autel mesme de mort feroit foy de ceci,
 Quel autel de Foy monstre. A iamais donc ainsi
 Diane en Anne, & Anne en Diane puisse estre.

X X I.

Je viuois, mais ie meurs, & mon cœur gouuerneur
 De ces membres, se loge autre part: ie te prie
 Si tu veux que i'acheue en ce monde ma vie,
 Ren le moy, ou me ren au lieu de luy ton cœur.
 Ainsi tu me rendras à moy-mesme, & tel heur
 Te rendra mesme à toy: ainsi l'amour qui lie
 Le seul amant, lira & l'amant & l'amie:
 Autrement ta rigueur feroit double malheur.
 Car tu perdras tous deux, moy premier qui trop t'aime,
 Et toy qui n'aimant rien voudras hair toy mesme:
 Mais, las! si lon reproche à l'un & l'autre un iour
 Et l'une & l'autre faute: à moy qui trop t'estime,
 A toy qui trop me hais, plus grand sera ton crime,
 D'autant plus que la haine est pire que l'amour.

A M O U R S.

X X I I.

*Quel humeur, mais quel crime alors qu'on se dispençe
 D'euenter les faueurs qu'on reçoit en amour: (tour
 Qu'on ouvre au bruit la voye, & que d'un heureux
 Moins que du bruit de l'heur estre heureux on se pèse:
 Qu'on rait, sacrilege, à l'amour le silence,
 Qui le garde & l'escorte, épiant tout autour:
 L'odeur qu'au iour on met se perd de iour en iour:
 Le descouuert thresor souuent son maistre offence.
 Par cet heur, par cet art, de celer & tâcher
 Que tel bien puisse mesme à Phebus se cacher,
 Qui voit, comme il vit Mars & Venus, toute chose,
 On bannit hors d'amour tout mal qui luy fait tort,
 Dol, blasme, change, enuie, effroy, remors & mort,
 Et des deux parts, maistresse, on double l'ardeur close.*

X X I I I.

*Quel heur Anchise à toy, quand Venus sur les bords
 Du Simoente vint son cœur à ton cœur ioindre!
 Quel heur à toy Paris, quād Oenone un peu moindre
 Quel autre, en toy berger chercha pareils accords!
 Heureux te fit la Lune, Endymion, alors
 Que tant de nuiçts sa bouche à toy se vint reioindre:
 Tu fus, Cephale, heureux quād l'amour vint epoinde
 L'Aurore sur ton veuf, & palle, & triste corps.
 Ces quatre estans mortels des Deesses se veirent
 Aimez: mais leurs amours assez ne se couurirent.
 Au silence est mon bien: par luy, Maistresse, à toy
 Dans mon cœur plain, content & couuert ie n'egale
 Venus, Oenone, Lune, Aurore: ny à moy
 Leur Anchise, Paris, Endymion, Cephale.*

X X I I I I.

Je te ren grace, Amour, & quiconques des Dieux
Fauorise aux amans, non de la Dame acquise
Par moy, qui de vous Dieux deuoit estre conquise,
Tant sa grace & beauté se rend digne des cieux.
Non pour l'esperoir que i'ay qu'elle, qui par ses yeux
Pleins de rays & de feux mon cœur sans cesse attise,
Pourra mieux appaiser la flamme en l'ame esprise,
Pour mesme en l'appaisant l'attiser encor mieux.
Tels biensfaits enuers vous estreignent mon seruice:
O Dieux, ô cher amour, mais plus grand benefice,
Ce m'est q vous couurez ma flâme aux yeux de tous.
Mon heur estre celeste & diuin ie proteste:
Si donc à tous mortels vous cachez l'heur celeste,
A tous mortels cachez l'heur qui m'egale à vous.

X X V.

La Roche de Caucaſe, où du vieil Promethee,
L'aigle vengeur ſans fin va le cœur bequetant:
Et la Roche où Sifyphe en vain va remontant
Lâchant touſiours au haut ſa pierre en vain portee,
Vont à pluſieurs amans, dont l'ame eſt tourmentee,
Ou bien ſe feint de l'eſtre, vn ſuiet apportant,
Monſtrant qu'ils vont encor la peine ſurmontant,
Qui aux deux roches fut à ces deux arreſtee.
Moy qui ne veux point ſeindre vn tel mal, pour obiet
De mes yeux, pour ſeul but de mon cœur, pour ſuiet
De mes vers i'ay la roche, où d'une ardeur extrême
Je preten tout ainſi qu'on feroit au ſommet
Du rocher eſpineux, où la vertu lon met:
Auſſi ſi i'y attein, i'attein la vertu meſme.

A M O U R S.

X X V I.

Des maux qu'un desespoir, ou qu'un espoir contraire
 Coup sus coup dedans moy l'un de l'autre naissans,
 M'enflammans de desirs, & de peurs me glaceans,
 Par frissons, par braziers continus m'ont peu faire:
 Des maux que j'ay soufferts, pour voir maint aduersaire
 S'opposer à mon but: & des maux plus puissans,
 Dont tes beaux traits sans fin dās mon cœur repaßās,
 Semblent en luy ma vie & defaire & refaire:
 De mes ennuis, chagrins, regrets, fureurs, douleurs,
 Lāguez, pleurs, & sanglots enfans de mes malheurs,
 Ny du cruel delay, sil faut encor attendre,
 Je ne me plains, pourueu qu'un Ouy, qu'un Nenni
 Me face heureuse vie, ou mort heureuse prendre,
 Mort qui de vie egale à cent morts m'ait banni.

X X V I I.

En ce iour que le bois, le champ, le pré verdoye,
 Et qu'en signe d'un verd tant desirable & gay,
 Auec maint ardent vœu l'amant plante son may,
 Pour marque que l'amour reuerdissant flamboye.
 Le ciel au lieu de moy dedans ton cœur enuoye
 Pour may vn bon vouloir, & verdoyant, & vray,
 Ayant vraye racine, & qui sans long delay
 Porte à tous deux vn fruit d'heur, d'amour, & de ioye:
 En vn Printemps d'amour l'egard trop froidureux
 Des biens, ne face naistre vn hyuer malheureux.
 Aux riches nonchalans on voit les biens decroistre,
 Au cœur & noble & vray par peine le bien croist:
 Si par l'egard des biens le cœur des tiens decroist,
 Par tel may fay leur cœur & mon espoir recroistre.

X X V I I I.

Et quoy? tu fuis *Amour*, dis tu pas: & pourquoy?
 Et n'est-ce pas celuy qui regne & qui domine
 Brauement par dessus ceste ronde machine,
 Et qui tient tout le monde esclaué sous sa loy?
 Est-il Prince qui viue, Empereur, ny grand Roy,
 Qui dessous son pouuoir humblement ne s'encline?
 Et tu dis que ton cœur obstiné determine
 De fuir cet amour, le chassant loing de toy.
 Contre toy, contre amour, feras tu la rebelle?
 Tu n'es mesme qu'amour, & l'amour ie t'appelle:
 Il se campe, il se sied dedans toy ce vainqueur.
 Helas! ie le sçay bien, ie l'ay veu en ta face
 Decocher mille traiçts de tes yeux en mon cœur:
 Et quoy le voudrois-tu deloger de sa place?

X X I X.

Celle qui est au vif de quelque amour atteinte,
 Quel Dieu, ou quel *Argus* empescher la pourroit
 D'accomplir vn amour mutuel qu'elle auroit?
 Amour donne tousiours moyen à la contrainte.
 Mais qui a la vertu dans son cœur bien empreinte,
 Et qui ne veut aimer fors que ce qu'elle doit,
 Quel Dieu, quel *Iupiter* rallumer luy feroit
 D'un autre amour le feu de sa poictrine sainte?
 Que sert donques le guet, ou *Argus* aux cent yeux?
 Le fort de la vertu immuable vaut mieux.
Argus s'auengla bien par le saint caducee.
 Doncques ie ne croy pas que la plus forte tour,
 Ny vne pluie d'or ou giron amassée,
 Puisse contraindre, ou vaincre un vouloir en amour.

A M O U R S.

X X X.

Comme vn qui s'est perdu dans la forest profonde
 Loing de chemin, d'oree, & d'adresse, & de gens:
 Comme vn qui en la mer grosse d'horribles vens,
 Se voit presque engloutir des grans vagues de l'onde.
 Comme vn qui erre aux chäps, lors que la nuit au mode
 Rait toute clarté, i' auois perdu long temps
 Voye, route, & lumiere, & presque avec le sens,
 Perdu long temps l'obiet, ou plus mon heur se fonde.
 Mais quand on voit (ayans ces maux fini leur tour)
 Aux bois, en mer, aux champs, le bout, le port, le iour,
 Ce bien present plus grand que son mal on viët croire.
 Moy donc qui ay tout tel en vostre absence esté,
 I'oublie en renoyant vostre heureuse clarté,
 Forest, tourmente, & nuit, longue, orageuse, & noire.

X X X I.

En mon cœur, en mon chef (l'un source de la vie,
 L'autre siege de l'ame) vn amour haut & saint
 Vostre sacré pourtraict a si viuement peint,
 Que par mort ne sera sa peinture rauie.
 Car l'une n'estant point a la mort asseruie,
 Ce qui est peint au vis dedans elle, & empreint
 Au cœur dans le desir (qui ne peut estre esteint
 Sans l'ame) en l'ame vit, bien que le corps deuie.
 Mais, las! l'œil de mon corps, qui ne se peut passer
 De voir incessamment ce que voit son penser,
 Fait qu'avec telle ardeur ie vous requiers tel gage.
 Vostre image, de grace, au corps ne refusez,
 Ou bien tost par langueur si de refus usez,
 Il verra l'ame au ciel emporter vostre image.

Allez

X X X I I.

Allez mes vers, enfans d'un dueil tant ennuyeux,
 Que mon pleur plus que l'ancre àmoitist ceste carte,
 Las allez, puis qu'il faut que mon Soleil s'escarte,
 Accompagnez la nuë espesse de mes yeux:
 Allez mes pleurs, sourdans d'un cœur tant curieux
 De ces beaux rais, qu'il faut qu'avecques eux il parte:
 Allez donques mon cœur, l'ame feroit la quarte,
 Mais dans moy ce Soleil veut s'en servir bien mieux.
 Or puis qu'il faut que vif, en mourant, ie demeure,
 De peur que le renom d'un si beau feu ne meure,
 Allez tous trois, au moins dire iusqu'en ce lieu,
 Dont le vers, l'œil, le cœur, & l'ame attend sa force,
 Le triste mot, hélas! vous ne pouuez, qu'on force
 Ce qui nuit, dites donc, adieu, mon dieu, adieu.

X X X I I I.

Il faut que pour ton may quiconques soit celuy,
 Madame, qui plus digne en son esprit t'adore,
 D'un verd & grand laurier à ta porte il honore
 Ton beau nom, tes beautez, tes vertus aujourd'huy.
 Si mon double laurier seiche presque d'ennuy,
 Dont ce tēps, dont mon sort, dont mon aigreur deuore
 Sa verneur & grandeur, si croy-ie faire encore
 Qu'Apollon & Mars mesme auront hōneur en luy.
 Mais il faut que cet autre en plantant ce may braue,
 Ces vers ci pris de moy dedans l'escorce il graue.
 A v nom qui pour l'honneur des FRANÇOISES fut tel,
 Aux beautez, aux vertus, de nostre temps la gloire,
 Pour trois couronnes faire à la triple victoire,
 Voüé, sacré, planté fut cet arbre immortel.

A M O U R S.

X X X I I I I.

*Recherche qui voudra cet Amour qui domine,
 Comme lon dit, les Dieux, les hommes, les esprits,
 Qu'on feint le premier né des Dieux, & qui a pris
 Eternellement soing de ceste grand' machine:
 Dont l'arc, le trait, la trouffe, & la torche diuine
 N'a rien que la vertu pour son but & son pris,
 Sans passions, douleurs, remords, larmes & cris:
 Quant à moy, ie croiray que tel on l'imagine,
 Et qu'au monde il n'est point: quant aux faulses amorces,
 De l'autre aueugle Amour i'en depite les forces.
 Mais ie croy si Amour aucun nous vient des Cieux,
 C'est lors que deux moitiéz par mariage vnies,
 Quittét pour l'amour vray dont se païsét leurs vies,
 Tout amour fantastique, & tout amour sans yeux.*

X X X V.

*Pourrois-ie voir l'heureuse & fatale iournee,
 Où deux ames, deux cœurs, & deux corps enlacez
 Dans le beau ret d'amour se verront caressez,
 Egalement tous deux du doux bien d'Hymenee:
 Lors qu'estant avec Anne, Antoinete enchainee,
 Tous nos esprits seront l'un de l'autre embrassez,
 Et meslez l'un dans l'autre, & sans estre lassez,
 De cognoistre l'autre ame estre pour l'autre nee?
 Plus tost que ce doux bien m'eschape hors des mains,
 Et qu'amour & les Dieux me soyēt tant inhumains,
 Ie desire, ô Amour, que tu changes ta fleche
 A celle de la Mort, à fin de m'en tuer:
 Mais si tu fais ce bien que pour perpetuer
 Ton fait, i'amaïs la Mort n'y puisse faire breche.*

X X X V I.

Tout cet hïuer par l'aspre & l'aigre vehemence
 De longue maladie, a sur moy tempesté
 Plus que sur un vaisseau dans la mer tormenté,
 N'eust fait son orageuse & froide violence.
 Mais de mes maux le pire estoit la dure absence
 De mon soleil, sans qui ie hairois la clarté
 De l'autre, qui m'ayant son Printemps présenté,
 De ma Dame me rend quant & quant la presence.
 Mais comme de l'hïuer la queuë on voit durer,
 Le Printemps fait mon corps aussi bien endurer
 Que l'hïuer, & le ciel de mes maux ne se lasse.
 Or si ma faute, hélas! faite en mon long séiour,
 De ne voir mon soleil le rend trouble au retour,
 Mon malheur du Printëps mes maux de l'hïuer passe.

X X X V I I.

Sans pleurer (car ie hay la coustumiere feinte
 De nos amans, qui n'ont que leurs pleurs pour sujet)
 D'un cœur ardent, dolent, deuot, soumis, abiet,
 Je me iette aux saints piez de toy, maistresse sainte:
 La feinte n'a mon ame à tel acte contraincte,
 Tel esprit ne peut estre à la feinte sujet:
 Mais ia depuis cinq mois i'ay tousiours pour obiet
 Ma faute, qui s'est mesme à telle amende estreinte.
 Pardonne donc, Deesse, accuse mon malheur,
 Non pas moy, dont le ciel ialoux empesche l'heur,
 Si tu dis mes malheurs chasser ta bien-vueillance.
 Veu qu'on ne doit l'amant si malheureux aimer,
 Vien ton cœur pour mon bien contre mon mal armer,
 J'auray du bien le comble, & du mal la vengeance.

A M O U R S.

XXXVIII.

Quand ton nom ie veux feindre, ô Françoise diuine,
Des Françoises l'honneur, ie puis bien te nommer
Venus pour tes beautez, mais ta façon d'aimer
Ne conuient point au nom de Venus la marine:
De l'Attique Pallas ta vois & ta doctrine
Merite encor le nom, mais tu ne veux t'armer,
Fors des rais de tes yeux, dont tu viens enflammer
Dans mō cerueau mon sens, mō cœur dās ma poitrine.
Diane Delienne vn presque pareil port
Te peut faire appeller, mais l'aigre ou le doux sort
Dessous le ioug d'Hymen dés long tēps te rend serue.
Je veux (laissant aux Grecs, dont ces noms sont venus,
Leurs Deesses) te dire & Françoise Venus,
Et Françoise Diane, & Françoise Minerue.

XXXIX.

Admirant ta blancheur, beauté, maiesté, gloire,
Qui sur ton front placee, orgueillit tout ton port,
Et ce qui de l'esprit comme vn oracle sort:
Car c'est vn Dieu reclos qui meut ce corps d'iuoire.
Digne de te seruir ie ne me scaurois croire,
Eusé-ie vn cœur plus haut & tout vn autre sort,
Et mon corps logeast il pour te venger de mort,
Quelque grand Muse fille & mere de Memoire.
Comme de te seruir indigne ie me sens,
Ie sens pour te louer incapables mes sens,
Si faut-il que ie t'aime, & faut que ie te chante.
Ta faueur, qui fera mon humbleesse hausser,
Ta deité qui fait mon esprit renforcer,
Rend mon seruice digne, & ma Muse puissante.

X L.

De moy-mesme ie suis deuotieux, Madame,
 C'est d'ou me vient vers toy telle adoration:
 Mais ce saint iour requiert autre deuotion,
 Si mon amour pour toy n'occupoit toute l'ame.
 Ce prompt Damon qui voit que mon zele i'enflame,
 Baisant la croix, oyant la sainte passion,
 De sa flamme ialoux, vient par tentation
 Mon esprit retirer de l'autre sainte flame.
 Il m'offre helas! la croix qu'il me faudroit porter,
 Si tu me viens ta grace & ta presence oster,
 Me faisant de ton ciel redescendre en la terre.
 Ja la peur mon tyran crucifier me veult,
 Et ma croix enserrer, dans vn enfer me peult,
 Au lieu que l'autre croix hors d'enfer nous desserre.

X L I.

Sapphon la docte Grecque, à qui Phaon vint plaire,
 Chantant ses feus, de Muse acquesta le surnom:
 Corinne vraye ou faulx aux vers a pris renom,
 Dont le Romain Ouide a voulu la pourtraire.
 Petrarque Italien, pour vn Phebus se faire,
 De l'immortel laurier alla choisir le nom:
 Nostre Ronsard François ne tasche aussi sinon
 Par l'amour de Cassandre vn Phebus contre faire.
 Si tu daignes m'aimer, Delie, si tu veux
 Chanter ta flamme ainsi que docte tu le peux:
 Si ie chante, Delie, vn pris nous pourrons prendre,
 En hauteuse d'amour, en ardeur, & en art,
 Sur Sapphon, sur Ouide, & Petrarque, & Ronsard,
 Sur Phaon, & Corinne, & sur Laure, & Cassandre.

A M O U R S.

X L I I.

*Je me trouue & me pers, je m'assure & m'effroye,
 En ma mort ie reui, ie voy sans penser voir,
 Car tu as d'éclairer & d'obscurcir pouuoir,
 Mais tout orage noir de rouge éclair flamboye.
 Mon front qui cache & monstre auec tristesse, ioye,
 Le silence parlant, l'ignorance au sçauoir,
 Tesmoignent mon hautain & mon humble deuoir,
 Tel est tout cœur, qu'espoir & desespoir guerroye.
 Fier en ma honte & plein de frisson chaloureux,
 Blasmant, louant, fuyant, cherchant, l'art amoureux,
 Demi-brut, demi-dieu ie suis deuant ta face,
 Quand d'un œil fauorable & rigoureux, ie croy,
 Au retour tu me vois, moy las! qui ne suis moy:
 Oclair-voyant auenue, ô amour, flamme & glace!*

X L I I I.

*Je ne suis de ceux la que tu m'as dit se plaindre,
 Que leur Dame iamaïs ne leur donna martel:
 Veu l'ame vehemente, un dur martel m'est tel,
 Qu'il peut plus à la mort qu'à l'amour me cōtraindre.
 S'il peult doncques l'amour auec ma vie esteindre,
 En tout amour ie chasse un poison si mortel,
 Puis ayant mon sujet haut, celeste, immortel, (dre?
 Humble & petit, pourrois-ie en moy tel mal emprain-
 Mais las! d'auoir peur d'estre en ton cœur effacé,
 Craindre qu'un Delta double en chiffre entrelacé,
 Ne soit plus pour mon nom, craindre qu'en tō absence
 Tu ne me faces plus tes lettres recevoir,
 Ce n'est pas un martel, c'est d'amour le deuoir,
 Qui monstre en froide peur l'ardente reuerence.*

XLIII.

*Aux communes douleurs qui poindre en ce iour viennēt
 Tous cœurs chrestiens, Petrarque alla chāter qu'il print
 De ses douleurs la source, & par là nous aprint
 Que les ruzes d'amour depourueus nous surprennent.
 En ce iour où les cieus, la mort, les pleurs, retiennent
 Nos cœurs ardens, quel lieu reste au feu qui l'éprint?
 Il ne se gardoit pas du laqs qui le surprint,
 Non plus que moy des rets qui plus forts me reprēnt.
 Bien qu'amour sçache assēz qu'il est en moy trop fort,
 Pour croistre du tourment, non du desir l'effort,
 Il arme la peur froide, & l'aigre deffiance.
 Petrarque à l'heure eust peu perdre sans grand' douleur
 L'heur incogneu: ma perte auroit las! ce malheur,
 D'auoir de l'heur perdu si haute cognoissance.*

XLV.

*Par quel sort, par quel art, pourrois-ie à ton cœur rēdre
 Au moins s'il peut vers moy s'engourdir de froideur,
 Ceste viue, gentille, & vertueuse ardeur,
 Qui vint pour moy soudain, de foy-mesme s'éprendre.
 Et quoy? la pourrois tu comme au parauant prendre
 Pour fatale rencontre, & parlant en rondeur
 D'esprit, comme ie croy la iuger pour grand heur,
 Qui plus à ton esprit contentement engendre.
 Tel que ie m'en sentoie, indigne ie m'en sens,
 Mais de ta foy ma foy s'accroist auec le tems,
 Quel moyen donc? si c'est par grandeurs, ie le quitte:
 Si par armes & gloire, au hant cœur nos malheurs
 S'opposent: si par vers, tu as des vers meilleurs:
 Ton hault iugement peut sauuer seul mon mērite.*

A M O U R S.

X L V I.

Chaque temple en ce iour donne argument fort ample
 De ioye, refaisant son haut feste sonner,
 Et d'un chant gay son chœur & sa nef resonner,
 Où chasque image à nu découuerte on contemple.
 En l'eglise ie pren de l'eglise l'exemple,
 Je veux le dueil, la peur, la peine abandonner,
 Et en blancheur soudain telle noirceur tourner,
 Si ie te puis sans robe adorer dans ton temple.
 Le grand iour de demain disposé d'estre beau,
 Peut avec un Printemps me tirer du tombeau,
 Si de vaincre ma mort tu prens soudaine enuie:
 Je diray, sans vouloir rien à Dieu comparer,
 Que si l'on peut reuiuant nos vies reparer,
 Reuiuant par toymesme, à toy ie rendray vie.

X L V I I.

En tous maux que peut faire un amoureux orage,
 Pleuvoir dessus ma teste, il me plaist d'asseurer
 Et serener mon front, & sans dueil mesurer
 De l'ame l'allegresse à celle du visage.
 Ta fille tendrelete admirable en cet âge
 Où elle tette encor, vient tes coups endurer
 Sur ses petites mains, sans crier, sans pleurer,
 Sans frayeur, sans aigrir visage ny courage.
 Pour te baiser son col alonger tu luy vois
 A chasque coup de bust qu'elle sent sur ses dois,
 Quand mauuaise tu fais un ieu de luy mal faire.
 De geste tout pareil quand tu viendras user
 De rudesse enuers moy, ie veux tes mains baiser,
 Si un baiser meilleur au moins ne te vient plaire.

CHAPITRE DE L'AMOUR.

A M O U R qui quelquesfois emportes sur tes aisles
 Mainte ame viue, & haute, & d'un instinct celeste
 L'emplissant, luy fais voir les choses les plus belles:
 Quand la guidant dans l'air, dans le ciel, dans le reste
 De ce grand monde uni par ta sainte harmonie,
 Que nul ne le corrompt, ny change, ny moleste,
 Luy monstres ce qu'en tout ta sainte main manie
 D'amoureux entretien, tirant de la discorde
 De tout, la paix qui est par l'amour seul unie:
 Et fais voir que par toy tout cela qui n'accorde
 Ensemble, se recherche, & dessous ta puissance
 Se mesle, & se meslant engendre par concorde:
 Et voir qu'ainsi c'est toy qui donnes toute essence,
 Tout mouuement, tout cours, cōme estant la grand' ame
 Du grand Tout, maintenu par durable alliance:
 Que c'est toy seul par qui reluit, tourne, & s'enflamme,
 Tout rond, & feu celeste, & que sous les cieux mesme
 La terre se maintient, l'onde, l'air, & la flamme:
 Que de toy seul depend toute basse & supreme
 Ame, vie, & vigueur, & croissance, & duree:
 Car riē ne dure en rien, que d'autāt qu'il s'entr'aime.
 Et des lors que ta force amoureuse inspiree
 Dans quelque chose, en sort par discord ton contraire,
 Soudain son estre & forme est d'elle retiree:
 Tu fais donc voir alors que lon ne peut forfaire,
 Quand sous ton nō d'amour nostre ame viēt entendre
 Ce seul grand Dieu, qui peut par union tout faire:
 Qui à ses œuvres fait tout tel entretien prendre

A M O U R S.

Qu'il luy plaist, & autāt qu'en eux cet Amour dure:
 Qui est en tout, & mesme en soy peut tout comprēdre.
 Voila cela que peut telle ame viue & pure,
 Hautaine, & sur ton vol hautain plus haut rauie,
 Cognoistre en ta plus haulte & plus saincte nature:
 Te faisant celuy seul, par qui desasseruie
 Fut la confusion, qui empeschoit le monde
 D'auoir en son Chaos forme, ornement & vie.
 Ou si auant le ciel, & cette terre ronde
 Rien n'estoit, ce fut lors l'amour d'un tel ouurage
 Qui fit faire de rien ce qui en tout abonde.
 Cet amour nous fait naistre, accroist, nourrist, soulage,
 Par maisons, par citez, par peuples nous allie,
 Conseruant tout cela qu'il seit pour nostre vsage.
 Cet amour mesmement à soy mesme nous lie:
 Et si le faux Discord de luy nous vient distraire,
 A soy doux & benin, il nous reconcilie..
 L'antiquité s'en sceu couuertement pourtraire
 Pour tel Dieu, te faisant du Chaos premier naistre,
 Que tu creuas, dormant Discord, ton aduersaire.
 Ce que par tes noms mesme on veut faire cognoistre,
 T'appellant premier-né des Dieux, forme & idee
 Souueraine de tout, & l'estre de tout estre.
 Par qui fut toute chose en ordonnant guidee,
 En son lieu le plus propre, & par force amoureuse,
 Sans que rien restast vain, l'une de l'autre aidee.
 Tu es de tout la source & l'origine heureuse,
 L'unité, le principe uniq' de la machine,
 Et de tous sēs effets la cause plantureuse.
 Son essence cinquieme, & sa chaisne diuine,

Qui tout embrasse & tient, restaurateur des choses
Que la visssitude en les changeant termine.
Dessous maints autres noms sont tes puissances closes,
Que telle ame rauie en toy trouue en toymesme,
Contemplant les secrets qu'à ses yeux tu proposes.
Mais la mienne ne veut dessus ton vol supreme
Ores si haultement te suiure, tu la fiches
Ça bas sur vn obiect en raritez extreme.
Et bien que ce ne soit qu'un seul de tes plus riches
Effets, vn seul subiect de ta vertu plus ample,
En qui de tous tes dons, tes mains n'ont esté chiches:
De toy vn seul chef d'œuure, vn seul petit exemple
De tout ce que tu peux infiniment, si est-ce
Que ton los en cela plus qu'en rien se contemple.
Et moy ie recognoy dans si haute deesse,
Qui est l'œuure & sujet où mon ame se range,
Et de tes raritez la rarité maistresse,
Je ne sçay quoy tant beau, tant diuin, tant estrange,
Qu'auèques toy, ie croy, ie suis forcé la dire,
Le mieux de tout ton mieux, le plus de ta louange.
Il ne faut donc qu'au ciel ton vol ailé me tire,
Pour voir rien de plus grand, ie voy la chose en terre,
En qui auèques toy ton ciel courbé se mire.
Je voy ça bas la chose en qui le plus s'enferme
Ton thresor le plus cher, & qu'expres voulus faire,
Pour plus à ton saint ioug de grands ames acquerre.
Tu l'as faicte, ie croy, comme pour sanctuaire,
Pour retraite & palais où le plus tu seiournes,
Pour à toy les grands cœurs par tel organe attirer.
Car en tous les beaux dons, dont si bien tu l'atournes,

d ij

A M O U R S.

Amour & deité se retrouuent ensemble,
 Tesmoignans q̃ toy Dieu peu souuent t'en destournes.
 Si ie veux raconter chasque don, qui s'assemble
 En son seul chef diuin, ie ne suis pour descrire
 Ce beau poil seulement, capable ce me semble:
 Ce poil diuin n'est tel que lon le puisse dire
 D'or, ou d'ebene, encor que sur vne albastrine
 Blancheur, l'ebene, & l'or des cheueux on admire:
 Mais tel que iustement l'une & l'autre diuine
 Cheueleure, soit celle excellemment doree,
 Que du chef d'Apollon on feint l'ornement digne:
 Ou soit celle qu'on donne à Venus Cytheree,
 Luy cedant en beauté, qui rendroit bien captiue
 De ses beaux næus, d'un Dieu l'ame plus asseuree.
 Ce beau poil couronnant ceste blancheur naïfue
 De ses tortis meslez, d'une cresse friseure,
 Et l'oreille ombrageant, tant mignarde & tant viue,
 Empestre en soy les cœurs, qui de telle lieüre
 Sentent accompagner deux maux qui les ataignent,
 Qui sont de ses beaux yeux la blessure & brulure,
 Ces liens precieux si fortement estreignent:
 L'œil naure, & ard si fort, que næus, playes, & flames,
 Se rompent peu souuent, se guerissent, se steignent.
 Oeil, œil, le plus bel œil, qu'eurent oncques les Dames,
 Qui comme vn fer arlant (car de l'amour les fleches
 Portent & fer, & feu) nous perces & enflames:
 Bien que le coup, l'ardeur, les amoureuses meches,
 Nous tourmētent, tu viēs pourāt nos cœurs cōtrain-
 De te laisser sans fin renoueller tes breches. (dre
 Car avec tel plaisir tu nous viens ardre & poindre,

Que quād gros, grād, brillāt, rayōneux, plein de fiere
 Douceur, dardant l'esper, & la crainte nō moindre,
 Tuournes, & répans dessus nous ta lumiere,
 Tu sembles nous ouurir tout vn ciel, aussi est-ce
 Vn ciel, estant d'un Dieu retraite coustumiere.
 La vouste de ce ciel, vers qui nostre œil se dresse
 Tout esblouy de voir ceste torche iumelle,
 Qui saintement se fait de nos sens charmeresse,
 Se decore à l'entour de l'arcure tant belle,
 D'un sourcil delié, portant rigueur & grace,
 Comme tirant des traits sortans des yeux d'icelle.
 Diray-ie un front serain, dessus lequel se place
 La maiesté hautaine, un teint qui de l'aurore
 Et de Phebe les teints meslez ensemble efface?
 Un nez de beau pourfil, mesme une bouche encore,
 Petite & coraline, & par qui l'ame toute
 Au parler, au chanter, au baiser se deuore?
 Car quant à l'un des trois, diuine elle se boute,
 Lemusc, le miel coulant, & l'harmonie estrange
 Se fait, quand on la touche, ou soit que lon l'escoute.
 Dedans elle des dents le double rang se range,
 Qui blanches feroient honte à l'albastre, à l'iuoire,
 Et claires osterioient aux perles leur louange.
 Ce brauc chef celeste, enuironné de gloire,
 De Graces, & d'Amours, & qui nous espouuante
 De rais, d'esclairs, de foudre, à ses amans notoire,
 Et porté sur son col, semblable à l'excellente
 Colomne, droicte, ronde, albastrine, & polie,
 Sur qui un chapiteau, riche & orné se plante.
 Ceste gorge de marbre assez grasse & unie,
 d iij

A M O U R S.

Se flaque d'une double & ronde montaignette,
 Dont l'amour pour deffence a la place munie.
 Toute force approchant de la force secrette
 De ces deux ronds, se sent pousse & reculee
 Si fort, qu'elle s'en rend & confuse, & muette.
 Que diray-ie du reste? ha grand beauté voilee,
 Que l'esprit par le reste imagine & regarde,
 Mais las! qui est aux yeux par trop long temps celce.
 De descrire & chanter par mes vers ie n'ay garde
 Cela: car l'honneur mesme y mettant couuerture,
 Ne permet qu'à l'oster nostre voix se hazarde,
 Je diray seulement, que toute la structure
 De ce beau corps parfait, est en port & en taille
 Tant admirable aux Dieux, que rare en la nature.
 Ce corps enclost une ame: Ha Dieu fault il que j'aie
 Avec toy sur ton vol, Amour, ou bien sur l'aile
 De ceste ame, tant hault que du corps il ne chaille?
 Fault il aller chercher la grand' cause eternelle
 D'un tel esprit, tiré du pur de la substance,
 Sur qui se formeroit toute forme plus belle?
 Contre ce mien dessein, contre ton ordonnance,
 Sur ce chant me fault il laisser la terre basse,
 Pour voir le plus parfait de ta sainte puissance?
 Toutes perfections que cet esprit embrasse,
 Tant d'instincts, graces, dōs, qui de toy luy prouienēt,
 Font comme on dit voiler d'Agamemnon la face.
 Tout est inexprimable, il fault que tes mains tiennent
 La bride a ce haut vol, m'arrestant sur la chose.
 Terrestre, qui pourtant (affirmer ie te l'ose)
 Ne cede à rien de tout ce que les cieux contiennent.

CHAPITRE D'AMOUR.

JE croy lors que nostre ame est au ioug afferuie
 D'une beauté farouche, & superbe & rebelle,
 Qu'amour de mille morts tourmente nostre vie.
 Je croy celuy-la serf d'une peine eternelle,
 Qui serf d'une maistresse inconstante & volage,
 Ne peut ny la lier ny se deslier d'elle.
 Je croy qu'amour fait naistre encores plus grand' rage
 Dans l'esprit, qui ialoux d'une beauté conquise,
 Fait au milieu du port luy mesmes son naufrage.
 Je croy le mal que sent l'une & l'autre ame esprise,
 Quand on ne peut trouver l'occasion fuyante,
 Qui tant plus est suiuite & moins peut estre prise.
 Je croy le mal que sent toute ame violente,
 Lors que de sa moitié par force se retire,
 Se repaissant de pleurs, & de songe, & d'attente.
 Mais ie croy mieux encor que c'est plus grand martyre
 D'aimer, & de penser l'amitié mutuelle,
 Sans que les deux amans osent se l'entredire.
 Je croy certainement ceste ardeur estre telle,
 Que le feu qui sans air se cache sous l'escorce,
 Consummant presque l'arbre auant qu'il'estincelle:
 Ou bien comme la glace, alors que plus s'esforce
 L'hiver de retenir le cours d'une riuere,
 Fait perdre au fil de l'eau son apport & sa force.
 Celuy-la qui glaissant sa liberté premiere,
 Et qui craintif dans soy son desir emprisonne,
 Perd avec son espoir sa force coustumiere.
 Tous ces deux sont en moy, l'amour le feu me donne,
 La peur tous mes esprits engourdit de sa glace,

A M O U R S.

Et sens deux ennemis regner en ma personne.
 L'un graue en moy ton nom, l'autre ton nom efface:
 L'un me sert d'esperon, l'autre me sert de bride:
 L'un me volte dans l'air, & l'autre me terrasse.
 L'un me dit que l'amour ainsi que moy te guide:
 L'autre me dit que non, & tous deux entretiennent,
 Bien qu'ils soient ennemis, l'espoir mon homicide.
 Par l'un le plus souuent les parolles me viennent
 Jusqu'au bord de la langue, & par l'autre au contraire
 Mon bon heur & ma vois prisonniers se retiennent.
 O malheureuse peur, qui seule peux distraire
 Le cœur des bas humains des entreprises hautes,
 Monstrant que l'homme seul rien de bon ne peut faire.
 C'est toy qui vas guidant nos desirs & nos fautes,
 Qui poursuivant l'orgueil d'une immortelle guerre,
 Et le vouloir ensemble, & le pouuoir nous ostes:
 C'est toy qui fais sentir que nous sommes de terre,
 C'est toy dont le brandon, le fleau & la tenaille,
 L'ame des criminels brusle, assomme & enferme.
 C'est toy dont le venin court d'entraille en entraille,
 Et qui de peur qu'on entre en lumiere & mémoire,
 Nous sers incessamment d'une horrible muraille.
 Mais hélas! si tu veux rabaisser toute gloire,
 Pourquoi est-ce que tant à l'amour tu t'attaches,
 Veu que l'humilité des amans t'est notoire?
 Il faut que seulement tes fureurs tu delasches
 Sur le vice, & non pas sur la sainte puissance
 D'amour, qui onc n'entra au cœur des homes lasches.
 Amour est vertueux, diuine est son essence,
 Essence qui se fait de toute essence mere:

Car

Car amour est de tout l'eternelle alliance.
 Amour de ce grand Tout se peut dire le pere,
 L'ame, le gônd, l'appuy, l'entretien & la vie,
 Qui tout par la Discorde accordante tempere.
 Amour tous ses effects diuersement allie,
 Amour est le plaisir de ses causes secondes,
 Soit que lon aime bien, soit qu'on aime en folie.
 Amour darde ses traiets iusqu'au plus creus des ondes,
 Il balance son vol dessus le vol des nuës,
 Et se fait mesme craindre aux abysmes profonds.
 Si donc mes volontez ne sont de nul cogneuës,
 Si les affections que maintenant i'embrasse,
 Me sont plus tost pour bien que pour un mal venues,
 Qui sera celuy-la qui prendra ceste audace
 De m'accuser d'aimer, & pourquoy la peur mesme
 Me renuersera elle au milieu de la place?
 Arriere arriere peur, furie maigre & blesme
 Destourne toy de moy, laisse moy l'amour suiure,
 Puis qu'amour mon obiet est de tous biens l'extreme.
 Je veux aimer ma Dame, en elle ie veux viure,
 Et luy ouure mon cœur auecques ma parole,
 Tel amour ne peut-il de crime estre deliure?
 Je veux que ceste voix iusques vers elle vole,
 La peur s'en est fuyee, & si veux qu'elle sente
 Qu'un amour vertueux folastrement m'affole.
 Et si quelque hargneux apres s'en mescontente,
 Disant, que si l'amour estoit honnestes & bonne,
 Que la peur si long temps ne m'eust esté presente.
 Il fault que seulement responce ie luy donne,
 Qu'on voit le plus souuent telle langue & enuie.

A M O U R S.

En chemin vertueux destourner la personne.
 Et toy, Dame, ie croy parauant asseruie
 A la peur, comme moy, suy telle hardiesse,
 Comme tu peux long temps ma peur auoir suiuite.
 Car ie croy qu'en aimant vne telle maistresse,
 Faudra qu'enuie cede à ses vertus tressainctes,
 Comme a faict à l'amour la peur enchanteresse.
 Et lors qu'en nous seront ses flammes bien empreintes,
 Nous nous rirons de ceux qui en diuerse mine
 Portent leurs passions sur leurs visages peintes:
 Et sur le haur assis aux flots de la marine,
 Nous verrons le reffus, le tort, la ialouzie,
 L'attente, les regrets dedaigneux de leur vie,
 Bayer apres le bien de ceste amour diuine.

C H A N S O N.

POVR LE SEIGNEVR DE BRVNEL.

Esp'rit auquel les Dieux, & la Nature,
 L'astre benin, la sage nourriture,
 L'art, & l'experience
 Ont fait tant d'heur, que son desir suprême
 Recherche en tout la perfection mesme,
 De qui tient son essence.
 Bien qu'en son choix tantost il se propose
 Pour obiet l'une, & tantost l'autre chose,
 Variable en son change,
 (Comme de tout le cours est variable)
 Il est pourtant en son but immuable,
 Et iamaïs ne s'y change.

C'est son seul but que d'aimer, & de suiure
L'obiet parfait, & en luy tousiours viure,
Tant que parfait il dure:
Mais quand l'obiet se change avecques l'âge,
De changer lors ce n'est de luy l'outrage,
Mais c'est du temps l'iniure.

Je ne veux point prendre tant d'arrogance,
Que de vouloir que parfait on me pense:
Mais il faut que ie die,
Que rien ne peut fors la chose parfaite,
Ny me raurir, ny rendre au ioug sujette
Ma raison & ma vie.

Celuy qui sçait l'architecture antique,
Corinthienne, Ionique, Dorique,
Aussi tost qu'il decæuvre
Quelque Palais où l'ordre & où la grace
Est offensee, aussi tost il se lasse
Du regard d'un tel æuvre.

Et quand le temps rauisseur, qui deuore
Tout æuvre beau, nous laisse voir encore
Dedans quelque ruine
La beauté grande, & l'art d'un edifice,
Qui par les traits de quelque frontispice
Tout entier se deuine:

On iuge bien pour lors que chose telle
Durant son temps fut parfaitement belle:
Mais quant à la demeure,
Nul en ce lieu ne peut choisir son aise,
Et n'y a nul à qui tout ce lieu plaise,
Si ce n'est pour vne heure.

AMOURS.

Celuy qui sçait l'architecture vraye
De cest amour, que ma loy veut que i'aye,
Du defaut se retire:
Et quand il voit des choses les mieux nees
Par tant de temps de graces ruinees,
Sans aimer il admire.

Je sçay fort bien recognoistre vne Dame,
Soit quant au corps, soit mesme quant à l'ame,
Quelle les Dieux l'ont faite:
Je sçay encor les fautes mieux cognoistre,
I'en ay l'Idée, & sçay ce qu'il faut estre
Auant qu'estre parfaite.

Viuant tousiours en la constance vraye
De n'aimer rien, que parauant ie n'aye
Des perfections preuue:
Je sçay choisir, ou bien reietter celle,
Qui est parfaite, ou vulgairement belle,
Sans que pris ie me treuue.

Ayant choisi, moy-mesme me viens rendre,
Et en prenant moy-mesme me sens prendre
Si fort, que l'ame mienne,
Ayant trouué le bien qu'elle desire,
Ayant atteint le but où elle tire,
Se fait serue à la sienne.

Tout autant vit l'affection extrême
Dans moy, que vit la perfection mesme:
Mais avec la ruine,
Tant des beautez, qui tout le corps decorent,
Que des beautez, qui tout l'esprit honorent,
L'affection decline.

Je ne fay plus que remarquer les traces,
 Où i'auoy veu parauant tant de graces,
 Et louant tout l'ouurage,
 Je suis marri que nostre grand ouuriere
 Ne fait durer la beauté iournaliere
 Contre l'effort de l'âge.
 J'accuse encor la celeste ordonnance,
 D'auoir comblé d'une telle abondance
 Et ce corps, & ceste ame,
 Pour tout soudain ses biens faits en retraire,
 Et leur laisser seulement au contraire
 Le regret & le blasme.
 Lors en gardant ma constance premiere,
 Je fors de là pour ietter ma lumiere
 Sus quelque autre excellence
 Car de vouloir tant seulement pour vne
 Garder en moy la constance commune,
 Ce seroit inconstance.
 Lors que premier de moy tu fus choisie,
 Tu enflambois le ciel de ialousie,
 Tant tu estois parfaite:
 Alors tu fus digne objet de mon ame,
 Puis que le Ciel ne vent qu'elle s'enflame
 D'une chose imparfaite.
 Mais maintenant que lon voit inconstante
 Ceste beauté, & qu'on voit permanente
 Dans moy la braue chasse,
 Dont ie poursui tousiours vn bien supreme,
 Change auec moy en accusant toymesme,
 Le cœur comme la face.

A M O U R S.

Tel sans raison le plus souvent accuse,
 Qui a beaucoup plus de besoin d'excuse.
 M'accusant de la sorte
 Tu dois penser puis que mon ardeur viue
 S'étend, qu'il faut que mon mal qui arriue,
 De toy non de moy sorte.
 S'il sort de toy, tu es seule coupable,
 Et moy ie reste encore plus louable
 D'auoir telle constance,
 Que mon amour, qui fut vers toy si grande,
 Sur l'autre amour, qui sans fin me commande,
 N'a point eu de puissance.
 Toy donc au lieu de souffrir quelque peine,
 Soit du regret de ceste beauté vaine,
 Soit de moy qui se change,
 Rejouy-toy d'auoir esté serui
 D'amy parfait, puis que toute sa vie
 Au seul parfait se range.
 Et t'enrolant au nombre des parfaites,
 Moque toy lors de tes beautez defaites
 Ainsi que de fumees:
 Et croy que Dieu toutes beautez volages
 Eust fait durer, s'il vouloit qu'en tous âges apuies
 Nous vous eussions aimees.
 Car, quoy qu'on die, il faut que lon confesse,
 Que quand on met l'amour en sa maistresse,
 La beauté le fait faire:
 Si la beauté de son sujet s'estrange,
 Il faut qu'amour avec l'objet se change,
 C'est chose necessaire.

Et quand quelqu'un de sa maistresse âgée,
 Ne veult en soy voir la flamme changée
 Jusqu'à la sepulture,
 Il n'en faut pas une constance faire:
 C'est s'obstiner, Et se rendre contraire
 Aux loix de la Nature.
 Et si tu dis que ie t'aimois à l'heure
 Pour le seul corps, & que l'amour meilleure
 Ne se voit si legere,
 Ie le veux bien: Mais s'il faut que ie t'aime
 D'esprit, encor ie t'aimeray de mesme
 Que i'aimeroy ma mere.
 Mesmes encor (qui est-ce qui l'ignore?)
 Leur âge vieil, qui les femmes dedore
 Tout ainsi qu'une image,
 Leur oste aussi de l'esprit l'allegresse:
 Appelle donc l'amour vers la vieillesse,
 Aveuglement, & rage.
 Si tu me dis que tout ce discours monstre,
 Que ie fay cas de la seule rencontre
 Sans en aimer pas une,
 Veu que i'aimais on ne vit en ce monde
 Rien de parfait, & veu que là ie fonde
 Ceste amour non commune
 J'enten d'autant que l'homme on peut cognoistre,
 J'enten d'autant que parfaite peut estre
 Nostre essence mortelle,
 Autant qu'estoit parfaite en tout la tienne,
 Et autant qu'est parfaite encor la mienne,
 Aimant d'une amour telle:

A V T R E . C H A P I T R E . D ' A M O U R .

QUAND en espoir & peur, par les vers que ie châte,
 Par ma parole encore enuers toy plus hardie,
 Et par l'ame en toy seule & vivante & mourante,
 Par tous tesmoins del'ame, ardente & engourdie,
 A qui l'espoir douteux sert de flamme & de glace,
 Et par service autant long & cher que ma vie,
 J'auray monstéré l'amour qui peint dessus la face,
 Se graue au cœur, s'epand dans les os, dans les veines,
 Et repos & raison hors de mes esprits chasse.
 Si alors toy, peut estre, impitense à mes peines,
 (Ce que le ciel ne vueille) accusois de folie
 Et d'audace mes feus, & mes attentes vaines.
 Si sans auoir égard quel'amour souuent lie;
 Brusle, & naure les cœurs, sans que le nœu, la flamme,
 Et la sagette puisse estre de nous fuyre,
 Et sans égard encor qu'en auenglant nostre ame,
 Ainsi qu'aucugle il est, selon qu'il luy peut plaire,
 Non selon qu'il nous plaist, il nouë, ard, & entame,
 Sans égard qu'un desir, encor qu'il fust contraire
 Aux loix, à la raison, & loix, & raison force,
 S'il est tel qu'on ne peut qu'en mourant s'en distraire.
 Tu voulois nonobstant, te moquant de la force
 Dont tu pourrois un iour à ton dam faire preuue,
 Te rire du doux mal qui de ma mort m'amorce,
 Si tu trouuois mauuais que sans que rien m'émueue,
 Fors qu'un desir estrange à rechercher la grace,
 A rechercher cet œil qu'en mon grand mal ie traite,
 Je ne puisse pourtant ni l'ame iamaïs lasser,
 Ni l'œil de mon esprit, ni ma voix, ni ma plume

Detourner

Detourner de l'objet, qui tout seul par eux passe.
 Si tu trouuois mauuais que contre la coustume,
 Homicide d'amour, & aux beautez cruelle,
 Apres estre ia pris vn nouueau feu m'allume:
 Et qu'estant ia lié par liaison nouuelle,
 Bien qu'amoureuse, & vraye, & loyale, & contente,
 Non sans danger, peut estre, à tel bien ie t'appelle.
 Il ne faut point qu'excuse à tes yeux ie presente,
 Ou deffense, ta grace & tes beautez regarde:
 Cela seul m'est excuse & deffense presente.
 Car si te contemplant à cela tu prens garde,
 Que la beauté se fait de nos raisons maistresse,
 Comment, las! penses tu que la mienne se garde?
 Veu que soit ce bel or de l'une & l'autre tresse,
 Soit ce teint blanc-vermeil qui fait honte à l'aurore,
 Soit ce front qui te monstre en maiesté deesse:
 Soit ces sourcils deux arcs du Dieu que plus i'honore,
 Dont il tire les traits pris dedans l'œil folastre,
 Ains plus tost les rayons des soleils que i'adore:
 Soit la bouche rosine, ou soit le col d'albastre,
 Soit la taille, le port, où ces beautez encloses,
 Qu'en moy ie voy sans voir, & rai i'idolâtre.
 Soit la langue diserte, & dessus toutes choses
 Cet esprit vif, gaillard, admirable, & celeste,
 Digne du vaisseau riche, où ses graces sont closes:
 Soit brief, ce qui de toy peut estre manifeste,
 Soit ce que plus ie pense, imagine, & desire,
 De qui l'heur incroyable est tesmoigné au reste,
 Tout cela tel en toy vrayement se peut dire,
 Qu'ainsi que mon amour tout autre amour efface,

f

A M O U R S.

Nulle beauté ne peut deuant ta beauté luire:
 Si doncques ta beauté qui toutes beautez passe,
 Peut dessus les raisons prendre tant de puissance,
 Et mon amour sur moy tant de force & d'audace,
 Comment penserois-tu qu'à telle violence
 De ces deux, qui n'a point au monde de pareille,
 Ma raison, ny la loy face la resistance?
 Que doncques de ces deux la forçante merueille
 Te force comme moy, pour un grand bien extreme
 De donner à mes vers & l'excuse & l'oreille.
 Amour qui est de tout le seul ouurier suprême,
 A d'éternelles loix les choses perdurables
 Estreintes, s'exemptant de toutes loix soy-mesme?
 Mais les choses qui sont mortelles & muables,
 Amour les affranchist des loix de la constance:
 Constance seroit elle en subiets variables?
 Le desir, qui dans nous incessamment élance
 Nos raisons, pour courir vers toute chose belle,
 De l'ame des humains ne fait iamais absence:
 Aussi le desir est la tierce part d'icelle,
 Qui dedans elle ouurant d'action continue,
 Sans cesse nous éprand d'affection nouuelle.
 Car nostre desir meurt en la chose obtenue,
 Lors qu'il se foule, & noye en iouissance pleine:
 Et où le desir meurt amour ne continue.
 Au moins si le danger, la peur, l'heure loingtaine,
 L'espoir secret, ne donne au desir nourriture,
 Le desir ha l'amour, & ha la foy certaine.
 Tant qu'en cela qui n'est que demi nostre, dure
 L'amour par le desir, qui d'autant renouuelle

Sa force, que luy fait l'empeschement d'iniure.
 Ainsi doncques l'amour se fait perpetuelle,
 Qui est penible & libre, & non plaine & contrainte:
 Car tousiours nouveauté se fait compaignie d'elle.
 Mais aux amours bridez lors que lon sent esteinte
 Avec le temps la soif, cela qu'on y peut prendre
 N'est pas plaisir, mais bien acquit de l'ame estreinte.
 Outre l'amour qui vient doucement nous esprenre,
 Sans tels liēs de fer, n'a point maint & maint trouble,
 Par qui les feux d'Hymen se reduisent en cendre:
 Comme est le dur souci, qui de iour en iour double
 Debats, controublemens, hargnes, & ialousies,
 Dont telle amour contraint se regesne & retrouble:
 Puis les deux ames sont d'humeurs diuers saisies
 Souuent: car l'Androgyné est tousiours separee:
 Et de nous nos moitiēz sont peu souuent choisies.
 La moitiē quelquesfois autre part egaree,
 De son autre moitiē sans y penser se treuve,
 Et lors l'une est de l'autre ardemment desiree.
 Que donc est malheureuse, ainsi comme ie preuve,
 L'humaine loy par l'homme aveuglément forgee,
 Qui de soy aduersaire & bourrelle se spreuve:
 Voulant non seulement rendre l'ame rangee
 A vn seul ioug, souuent sans desir ne sans flame,
 Ains dedans mesme fosse à tout iamais plongeée.
 Cruelle nous armant contre chacune Dame,
 Des esprits, Nouveauté, Beauté, Grace, Plaisance,
 Et dans l'ame tuant ce qui plus nourrit l'ame.
 Voulant forcer des cieux toute gaye influence,
 Et de tous yeux plus beaux la force plus celeste,

A M O U R S.

Et de ce Dieu puissant sur les Dieux la puissance.
 Forçant Nature à qui le temps rend tout moleste,
 Si la diuersité tousiours ne la soulage,
 Mesme vn grand bien qui soit seul & long, se deteste.
 Forçant mesme le temps dont le change volage
 Force tout à changer, & voulant (ô folie!)
 Commander par nos loix aux fortes loix de l'âge.
 Rendant vaine du tout la faueur departie
 Des Dieux, des cieux, de l'art, de nature, & fortune,
 Et des sens plus aigus la puissance amortie.
 Imaginant à tort que chacun pour chacune
 A esté fait de Dieu, bien qu'on voye le nombre
 Confus, & la mesure en rien n'estre toute vne.
 Donnant l'espouuentail d'un beau mot, & d'un ombre
 De reigle & de police, à fin que la personne
 Prenne pour amour haine, & pour iour la nuict sobre.
 Car tel est tout esprit qui si fort s'emprisonne,
 Que sans aimer il sert chassant tout gay seruice,
 Et voyant n'ose voir tout bien qui l'éguillonne.
 Tâchant que l'impossible ainsi se conuertisse
 En possible, & que l'homme en qui sans fin domine
 Tout diuers mouuement, sans mouuoir s'élourdisse.
 Ordonnant qu'un chacun en cela s'imagine
 Trouuer sa moitié vraye, & iuste & sortissable,
 Bien que rien de pareil le sort ne luy assigne.
 Mais qui plus est, voulant à l'Amour indomtable,
 Et seul domteur de tout, donner loix, & enfreindre
 Sa loy, qu'il rend tousiours dessus toutes loix stable:
 Qui est, comme i'ay dit, qu'Amour ne peut se straindre
 D'aucune loy, mais bien son vol leger l'eslongne.

De nous, tout aussi tost qu'il s'est senti contraindre.
 Non pas que ce qui fait à nature vergongne,
 Ne le doive aussi faire à l'Amour: car nature
 Par l'Amour, & l'Amour par nature besongne.
 Tant que tout ce qui est de nature l'iniure,
 Ainsi que tout inceste & toute flame enorme,
 Amour doit l'exempter de sa liberté pure.
 Mais quand on veut gesner la nature par forme
 Et coustume, l'Amour doit tout rompre, & deffendre
 Nature, & sa franchise à nature conforme.
 C'est là la vraye loy, eternelle, & qui rendre
 Peut seule entre les loix l'homme mortel capable
 De la garder, sans elle & sans soy-mesme offendre.
 Car toute loy n'estant de nul homme observable
 En tout, & en tout temps, ou se fait force en toute,
 Et ceste naturelle en tout se rend gardable.
 Or toute loy se fonde, ainsi que nul ne doute,
 Sur raison, ceste ci naturelle, eternelle,
 Et faite d'un tel Dieu, la raison ne deboute.
 Mesme toute raison est iuste, vraye, & telle
 Qu'elle doit deffous soy toutes raisons abbatre,
 Quand elle suit la loy plus haute & naturelle.
 On ne peut doncques plus encontre moy debatre,
 Qu'en ce fait ci les loix & la raison ie fausse,
 Car Amour pour ces deux me fait deuëment cōbatre.
 Arriere donc la loy qui est vulgaire & faulse,
 Pour le peuple grossier lourdement inuentee,
 L'autre raison & loy sur toute autre se haulse.
 L'ayant donc avec moy, pour cela reiettee
 Ne peut estre ma voix, que la raison ie blesse,
 f iij

A M O V R S.

Et la loy, si ma voix est par ces deux portee:
Voire bien mieux encor que quand ie prins adresses,
Pour brider mes amours, voulant la loy vulgaire
Par vulgaires raisons, rendre d'amour maistresse.
Promettant faulxement ce qui ne se peut faire,
Qui monstre la loy faulse & la raison peu vraye,
Puis qu'elle trouue Amour & Nature contraire.
Tant s'en faut que besoin doncques enuers toy i'aye,
De m'excuser, ou bien qu'au lieu de moy ta grace
Et ta beauté forçante a m'excuser s'essaye,
Qu'il ne faut point d'excuse en ce que ie pourchasse,
Ayant pour moy la loy des loix victorieuse,
Prise de deité, qui tout autre surpasse.
Comme celle d'Amour & de Nature heureuse,
Mere & guide de tout: car toute chose cede
A la loy de ces deux durable & amoureuse,
Et dont l'eternité toutesfois ne procede,
Que de leur changement: car par le diuers change
Ces deux ont de leur fin trouué le seul remede,
Au lieu donc de donner à mon feu qui estrange m'embrase
Semble du premier coup, vne excuse inutile,
Vien donner ta raison à la loy qui m'érange:
A ma mort vne vie, à ta flamme gentile
Le plaisir, au plaisir longue perséuerance,
Tant qu'un desir faussant ailleurs nostre constance,
Sans fin, malgré l'encombre avec nos ans se file.

A M O U R S.
C H A N S O N.

27

L'aspre & l'estrange flame
Qu'amour me fait sentir,
De tout cela sen flame,
Qui deuroit l'amortir.

M A trop longue souffrance,
Ma trop vaine esperance
Font que ma raison s'arme

Encontre ma poison:
Mais mon feu charme charme
L'effort de ma raison.
L'aspre.

Mon esprit se propose
Sans cesse toute chose,
Qui moindre puisse faire
L'iniuste affection:
Mais par l'obiet contraire
Croist l'apprehension.

L'aspre.
Tel qu'il est i' imagine
L'amour, qui me domine,
Et si ne puis pas estre
Aueugle en ses effects:
Mais cet aueugle maistre
M'aueugle en tous mes faits.

L'aspre.
Discourant la naissance
D'amour, & sa puissance,
Bien que ie ne l'approuue,

A M O U R S.

Ny Dieu, ny fils des cieux,
Dessus moy ie le trouue
Plus fort que nul des Dieux.

L'aspre.

Comme sa geniture

Ie congnoy sa pasture:
Nostre esprit seul l'engendre,
Seul le paist nostre cœur;
Qui seul force fait prendre
A son propre vainqueur.

L'aspre.

Mes vrais discours le peignent

Autre que ne le seignent
Les vers, ou la peinture,
Ou les discours des Dieux:
Mais les maux i'en endure,
Qui se seignent par eux.

L'aspre.

Il n'est enfant volage:

Car dedans mon courage
Il s'obstine sans cesse:
Aux asles & au vol
Ne conuient sa paresse,
Nyl'enfance à son dol.

L'aspre.

Si l'estoit Dieu, la bande

Des Dieux qui me commande,
Ne lairroit ses outrages
Si long temps triomphans
Sur les esprits plus sages,

Qui

Qui sont leurs vrais enfans.

L'aspre.

Ou bien s'il estoit mesme

Des Dieux le Dieu suprême,

Qui tout ce monde accorde,

Qui rompit le Chaos,

Il romproit ma discorde

L'eschangeant en repos.

L'aspre.

Mesme aux Dieux la malice,

L'arage & l'iniustice,

Et cet ardeur de faire

Outrage aux innocens,

Ne peut plaire, mais plaire

A luy seul ie les sens.

C H A N S O N.

Pour respondre à celle de Ronfard qui com-
mence, Quand i'estois libre.

SANS estre esclaue, & sans toutes fois estre
Seul de mon bien, seul de mon cœur le maistre,
Je me plais à servir:

Car celle la que i'aime, & sers, & prise,

Plus que tout bien, plus que toute franchise

Me peut à soy raur.

La liberté si chere se doit rendre,

Que pour tout or ne se doit iamais vendre:

Mais la mienne ie vens,

D'un plus cher pris, que n'est toute richesse.

AMOURS.

*Car ta beauté, qui mesme en est maistresse,
Est le pris que i'attens.*

*C'est peu de cas qu'un tant aisé service,
Pour meriter par ta faueur propice,
De ta beauté le pris:*

*Ce pris si grand ne peut pas estre mesme
Pris de service, ains c'est un don extrême
Qu'un service auroit pris.*

*Sous un tel ioug i'accours de franc courage,
Ma liberté se trouue en mon seruage:
Et quand mon cœur voudroit
Sans tel lien viure en la seruitude
De l'amour faux, un ioug cent fois plus rude
Endurer luy faudroit.*

*L'ardeur, le soin, la pieuse esperance,
Les chers presens, l'aigreur, la repentance,
Et la honte, & la peur,
Le martel aspre, & le volage change,
Le vain plaisir: c'est le ioug où nous range
Tout tel amour trompeur.*

*Tousiours l'amour dans nostre ame s'enflame,
Car le desir (tierce part de nostre ame)
Est pere des amours:
Mais celuy-là sage & heureux me semble,
Qui en lieu seur tout son desir rassemble,
Sans l'écarter tousiours.*

*Celuy, ie croy, qui est né pour poursuiure
Plusieurs amours, semblable n'a peu viure
Aux farouches poulains,
En dédaignant les beautéz & caresses,*

*Veu que nos cœurs sont mesme en nos ieunesse
De tel desir tous pleins.*

*Moy maintenant (combien que passé i'aye
Des premiers ans la saison la plus gaye)
En mes ans les plus forts
Non au poulain semblable ie veux estre,
Mais au cheual, qui braue sert son maistre,
Et se plait en son mords.*

*Ayant henni de ioye apres sa bride,
Cognoist la main qui adroite le guide:
Le peuple à l'environ,
L'orgueil premier de son marcher admire,
Et plus encor quand on le volte & vire
Au gré del'esperon:*

*Laisant ce peuple en vn moment derriere,
Comme vn vent vole au bout de sa carriere.
Les courbetes, les bonds,
La bouche fresche, & l'haleine, à toute heure
Vont tesmoignant, qu'en œuvre encor meilleure
Il est bon sur les bons.*

*Doux au monter, & plus doux à l'estable,
Au maniment, & craintif & traitable,
Aux combats furieux,
Sans cesse il semble aspirer aux victoires,
Presque iugeant, que du maistre les gloires
Le rendront glorieux.*

*Jene suis pas presumptueux, de sorte,
Que tout ceci, ie vueille qu'on rapporte,
D'un tel cheual, à moy:
Mais ie diray que l'Amour qui commande*

A M O U R S.

*A mon esprit, autant comme il demande
 Le sent prompt à sa loy.
 Tel frein luy plaist, tel esperon l'excite,
 Il s'orgueilleit sous l'Amour, du merite
 De son gentil vouloir.
 Portant l'amour, sa charge il ne dédaigne,
 Ains volontaire en sa sueur se baigne,
 S'en faisant plus valoir.
 Il braue, il vole, & dans moy bondit d'aise,
 De ce qu'amour a fait qu'il te complaise,
 Toy qui és son seul but.
 Bien qu'il soit doux, l'amour à la victoire
 Val l'animant, compagnon de sa gloire
 Comme auteur il en fut.
 Si beau sujet luy double son courage,
 Le cœur doublé luy fait dans le visage
 Plus d'audace porter.
 La raison marche avecques son attente
 D'un mesme pas, puis qu'il croit que contente
 Tu veux le contenter.
 Alors du tout sur luy tes deux beaux astres
 Luiront sans cesse, écartans tous desastres:
 Et perdre il se viendra
 (O perte heureuse!) en tes lis, en tes roses:
 Car pour tousiours l'heur de si rares choses
 Plus captif le rendra.
 J'ay fait assez à ma franchise apprendre
 Par meur discours, que c'est d'ainsi se rendre
 Aux beaux réts que ie voy:
 Mais i'aime mieux estre encor ton esclau.*

Que de ce monde auoir le Roy plus braue
 Esclaue deffous moy.
 Or adieu donc tout faulx Amour, qui menes
 Aux ceps, aux fers, aux gesnes, aux cadenes,
 Trop impiteux vaincueur:
 Mon ame n'est forcere ou prisonniere,
 Ma Dame n'est corsaire, ny geoliere,
 Mais garde de mon cœur.
 Elle voudra, ie croy, sur mon chef mettre
 Le Myrte heureux, qu'amour me veut promettre,
 Non le pié rude & fier.
 Peut estre encor elle qui éguillonne
 Dans moy l'honneur, & l'audace me donne,
 Y mettra le laurier.
 Si donc pour toy ie méprise & abhorre
 Toute autre amour, qu'en moy ie puis enclorres
 Si i'ay les yeux tousiours
 Sur ton pourtrait, que mieux que dans une onde
 Ie voy dans moy, fay que ton cœur réponde
 Du tout à mes amours.
 Fay qu'en mon-sort ie ne rende vangee
 Toute autre amour, par moy tant estrangee,
 Comme Narcisse fit:
 Mais qu'à Pelee on me nomme sans cesse
 Semblable en heur, dont Thetis la Deesse
 Ne dédaigna le lit.
 Aux nopces soit present & fauorable
 Chacun des Dieux: mais de si sainte table
 La Discorde soit loin.
 Comme Thetis, ton ventre apres fertile,

AMOURS.

Dés l'an premier porte un petit Achile,
Ton plaisir & ton soin.

CHANSON.

BRANLE L.

Ma passion qui a peur
Qu'on la iuge feinte,
Veut se couvrir dans le cœur,
Sans souffrir par plainte.

SI mes vrais maux vous sçavez,
Vous qui causez les auez
Vray Amour, vraye Venus,
De ma foy constante,
Rendez les travaux connus,
Sans que ie les chante.

Ma passion.

Ouurez à l'œil, & au cœur,
Qui du mien s'est fait vainqueur,
Ma plainte, qui vaudra mieux
Par vous bien ouverte,
Que par moy mesme à tous yeux
En vain découuerte.

Ma passion.

L'esprit haut inspirez en
De celle pour qui ie sen
Mon esprit serf de vos loix,
Qui pour recompense
Requiert, que faciez sans voix
Penser ce qu'il pense.

Ma passion.

Puis pour faire à tous chercher

Le mal, qui se veut cacher
 De tous bons yeux attifez
 De l'amour plus vraye,
 Chasque beau trait éguisez
 Pour sonder ma playe.

Ma passion.

Cet œil tout divin s'il veut
 Et l'œil des autres s'il peult
 Verront ce mal qui se taist,
 Non pas pour se faire
 Plus grand: mais souvent on est
 Plus creu pour se taire.

Ma passion.

Mon amour n'est pas tant haut,
 Tant subtil, estrange, & chaud,
 Que pourtraire il ne se peüst:
 Mais pour bien se peindre
 Il n'est pas tel qu'on le creust
 S'estre peint sans feindre.

Ma passion.

Il faut en ces hauts discours,
 De tous nos chanteurs d'amours,
 Et aux amours qui naïss
 Parnous se pratiquent,
 Chercher les traits vrais & vifs,
 Sont ceux qui me piquent.

Ma passion.

Or suppléans en cela,
 Ma vois ailleurs tournez la,
 Vous deux qui dans moy l'émeu.

A M O U R S.

*Attachez de sorte,
Qu'il faut qu'il se tienne en moy
Renclos sans qu'il sorte.
Ma passion.*

*Aidez nous avec ces deux
Vous les trois compagnes d'eux,
Graces, qui m'avez appris
Si bien vos cadences,
Qu'osterie vous puis le pris
De vos propres dances.*

Ma passion.

*Vous donc qui si bien parlez,
Sonnez, ballez, carrollez,
Entendez chanter, parler,
Dancer sur les peines
Des amours perdus dans l'air,
Par leurs chansons vaines.*

Ma passion.

*Des forts amours les mieux faits
Vous cognoissez les effects,
Car l'amour seul vous hantez:
Jugez donc, de grace,
Si par tant d'amours chantez
Mon amour sefface.*

Ma passion.

*Dançans en rond avec moy,
D'une gaye & docte loy
Arondir vous me verrez
Par mainte maniere
De branles que vous orrez,*

Ma

Ma Carrollle entiere.

Ma passion.

*Qu'en ces gais branles nouveaux,
Les Ieus, les Cupidineaux,
Et les Ris viennent aussi,
Non pas pour y estre
Folastres, mais pour ici
Leurs vrais faits cognoistre.*

Ma passion.

*Tous les chants des amans sont
Pleins d'un mal que point ils n'ont,
Pleins de tourmens, & de pleurs,
De glaces, & flames:
Mais feintes sont leurs douleurs,
Ainsi que leurs ames.*

Ma passion.

*Sices amans enduroyent,
Tant de maux, & s'ils pleuroyent
Vrayment du cœur & de l'œil,
Non par plainte fole,
On leur verroit plus de dueil,
Et moins de parole.*

Ma passion.

*S'ils pouuoient de peur geler,
Oubien de desir bruler,
L'un engourdissant feroit
La voix lente & morte:
L'autre étouffant boucheroit
Aux pensers la porte.*

Ma passion.

A M O U R S.

*Mais au rebours leurs propos
Sont enfléz de tous gros mots,
Que lon voit plustost sortir
Pour monstre & brauade,
Que non pas vrayment sentir
Leur ame malade.*

Ma passion.

*Je ne di pas que d'entre eux,
Mille beaux traits amoureux
Ne puissent souuent couler,
Mais c'est auenture:
Car des blessures parler
On peut sans blessure.*

Ma passion.

*Aussi leurs Dames ornant,
Tous mesme ornement donnant,
Tâchent faire un tableau faux
Des beautez & graces,
Comme des pleurs, & des maux,
Des feus, & des glaces.*

Ma passion.

*Tous en leurs pareils sujets,
Prenans semblables obiets,
Vfans de mesmes couleurs,
Dorent, albastrinent,
Ornent de perles & fleurs;
Teignent, coralinent.*

Ma passion.

*De mesme les emmiellans,
De mesme les ensiellans,*

Leurs bourrelles ils en font,
 Basilics, tygresses,
 Mots qui doux & facheux sont.
 Aux vrayes maistresses.

Ma passion.

Combien que la femme soit
 Piquee, s'elle se voit
 De tels mots iniurier
 Son la dit cruelle
 Elle s'en fait plus prier,
 Et s'en plaist dans elle.

Ma passion.

Sil'amour simple estoit d'eux
 Bien cognen, ces mots hideux
 Ils fuiroient, desquels l'horreur
 Nuit beaucoup, & monstre
 Que des plumes non du cœur.

Le mal se rencontre.

Ma passion.

Les noms d'elles inuentez
 Les traits sans fin empruntez
 Ces mots, Deesse, moitié
 Brief, ceste amour sole
 N'est qu'un autel dédié
 A l'ombreuse idole.

Ma passion.

La cruelle ayant pouuoir
 De faire leurs yeux plouuoir,
 Quand viuante elle seroit
 Pour leur pluye toute

A M O U R S.

De leurs yeux ne tireroit,

Peut estre, vne goutte.

Ma passion.

Telle peut les vns bruler,

Gesner, meurtrir, bourreler,

Qui n'auroit rien de leur sang,

Fust pour sa querelle,

Ny mesme d'un cœur bien franc

La moindre estincelle.

Ma passion.

Tous leurs souspirs & sanglots,

Plus grands que les vens renclos

Qu'Ulysse auoit en sa nef,

Sont vens de leurs dames

De beaux vens sortis du chef,

Non du creux des ames.

Ma passion.

Ces dames pour qui souffrir

Ils sont forcez, & offrir

Leur vie, & leur sang, n'auroient

Souuent de leurs bourses

Ce, dont (peut estre) ils pourroyent

Les voir moins rebourses.

Ma passion.

Or si leurs dames ainsi

De leurs dons n'auoyent souci,

Il les faudroit raur mieux

Que d'une furie,

Qui tout-vne presque en eux

Paroist singerie.

Ma passion.

Vous donc qui les tours auez
 De ce mien branle acheuez,
 Iugez qu'ils se monstrent pleins
 D'ardeurs furieuses
 Pourneant, sans estre atteints
 D'ardeurs amoureuses.

B R A N L E II.

*Aux fables ma passion
 N'est point comparable,
 On la croiroit fiction
 Ainsi que la fable.*

POVR enrichir leur dessein
 De masque, & de sçauoir plein,
 Les fables d'horreurs, fureurs,
 Malheurs, sont extraites
 Des vieux, qui n'ont ces erreurs
 Dans leurs amours faites.
Aux fables.

Ces anciens écriuoient
 Les biens & maux qu'ils auoyent:
 Mais sans nul égard ceux ci
 Des maux nous écriuent,
 Qui onc à eux, ni aussi
 Onc à nul n'arriuent.
Aux fables.

Je sçay qu'Amour peut bien or
 Des vieilles fables encor
 Les maux faire naistre en nous:

A M O U R S.

Mais quand un seul plaindre
Se voit ensemble de tous,
Tous se voyent seindre.

Aux fables.

Souuent la feinte oste à soy,
Voire aux veritez la foy.
Quand avec elle on les dit:
Qu'est-ce donc qu'il semble,
Quand sans verité lon lit
Cent feintes ensemble?

Aux fables.

Tous vieux maux de playe, & ceux
D'aspre langueur sont en eux,
De liens, angosse, arrest
D'un cruel martyre:
Mais leur plus grand' peine c'est
D'inuenter leur dire.

Aux fables.

Sur ce lon voit ramassé
Le Philoctete blessé,
Le Phinee languissant,
L'étreinte Andromede,
La Niobe gemissant,
L'occis Palamede.

Aux fables.

Ou si de ce dernier Grec
La mort ne suffit, avec
Tous ces tourmens sera mis
L'hostelage iniuste
De Diomedes, & Scinis,

Scyron, & Procruste.

Aux fables.

Tous les perils d'un Iason
 Nauigant à la toison
 Se voyent d'eux retirer,
 Toute horreur estrange
 Qu'il peut voir ou endurer
 A leurs doigts demange.

Aux fables.

Je croy toute horreur aussi,
 Qu'Homere ou Virgile ainsi
 Peignent, aux feintes qu'ils font
 Estre ramenee
 Parces amans, qui en sont
 L'Vlysse & l'Ænee.

Aux fables.

Mesme pour tragiquer mieux,
 Ils recourent furieux
 La cité, race, & maison
 Thebaine ou Troyenne,
 Sur tout pillans à foison
 La Mycenienne.

Aux fables.

Ces trois grands maisons estans
 Celles, dont presque sortans
 Sont tous les diuers sujets
 Des fables tragiques,
 Ce leur sont riches obiets
 D'amours fantastiques.

Aux fables.

A M O U R S.

Tout autre exemple de maux,

De morts, remords, & trauaux

Rend leurs écrits embellis,

Mesme on leur voit prendre

Les Iphis, & les Phyllis

Tous prests à se pendre.

Aux fables.

Comme Narcisse expirer,

Comme Didon se tirer

Par glaiue le double feu

D'amour & de vie,

C'est en leur feint & fou ieu

Leur commune enuie.

Aux fables.

Si tel desespoir saisit

Tous ceux qu'aujourd'huy lon lit,

Que non l'amour, mais du nom

Le bruit fait écrire,

Tour le iardin d'un Timon

Ne leur peut suffire.

Aux fables.

Mais au lieu d'en auoir bruit,

Auec un chacun s'en rit

Leur dame, si vraye elle est:

Ou en farce telle,

Si elle la croit, se plaist

De se voir cruelle.

Aux fables.

A ce bisarre animal

Il ne faut monstrier son mal,

Mais sans monstre & fiction
 Luy faut faire office
 D'ardente deuotion,
 Et de gay seruice.

Aux fables.

Mais ceux ci ne sont contans
 De tous les maux tourmentans
 Les chetifs humains ici:
 Mais aux enfers sombres,
 Ils cherchent les maux aussi
 Des peruerfes Ombres.

Aux fables.

Là le Tityan vantour,
 Et là l'infini retour
 D'Ixion se voit, en l'eau
 Se voit le Tantale,
 Et celuy dont le fardeau
 Sans fin redeuale.

Aux fables.

Afin que leurs malheurs tels
 Se seignent d'estre immortels,
 Ces tourmens là bas sont pris:
 Mais la dame sage
 Veut l'homme, non les esprits,
 Le dueil, non la rage.

Aux fables.

Seulement continuel
 N'est pas ce mal eternal,
 De leurs vers les changemens,
 Et leur foymal seure,

A M O U R S.

*Font de leurs déguisemens
L'épreuve à toute heure.*

Aux fables.

*Tous l'un l'autre ressemblans,
Et tous cent fois redoublans*

Ces mesmes traits langoureux,

Font voir que leur ame

Trop plus d'écrits amoureux

Que d'amour s'enflame.

Aux fables.

Tous chargeans mesmes fardeaux,

Alterez de mesmes eaus,

De mesme rouë emportez,

Et en leur mensonge

D'un Vautour mesme empietez,

Mais tout n'est qu'un songe.

Aux fables.

Tous ces amans pleins de cris,

Et ces infernaux esprits,

N'ont rien du tout, qui entr'eux

Commun se propose,

Fors qu'en vain, sans fin les deux

Refont mesme chose.

Aux fables.

B R A N L E I I I.

Quand nostre passion craint

Qu'on la trouue estrange,

De soy tout cela qu'on feint

D'estrange elle estrange.

A PRES ces maux, ces tourmens,
 Trauaux, erreurs, damnnemens,
 Je vous prie à ceste fois

Amour Venus, Graces,
 De resuiure encor ces trois,
 Leurs pleurs, feus, & glaces.

Quand nostre.
 Sans estre glacés, ardens,
 Ny pleurans, tous impudens
 Font par mainte estrangeté
 Diserte, mais lourde,
 Leur iugement singeté
 Empirer la bourde.

Quand nostre
 L'estrangeté qu'en tout point
 Ils resingetent, n'est point
 Sur les seuls braziers, glaçons,
 Larmes, qui leur viennent,
 Mais sur tous noms & facons
 Qu'estranges ils prennent.

Quand nostre
 Seulement prises ne sont
 Ces estrangetez qu'ils font
 Des fables : mais d'autres cas
 Tels qu'il faut qu'on voye,
 Qu'euxmesmes ne veulent pas
 Que leur songe on croye.

Quand nostre
 Qu'ils mesmes ne veulent pas
 Que leur songe on croye.

AMOURS.

CHANSON

Diuisée en trois Airs, & chacun Air en
six Stanfes.

AIR PREMIER.

MAISTRESSE, que sans fin ie doüe
De tout mon cœur, que ie te voüe
D'un vœu qui est & stable & saint:
N'atten point que ma Chanson suiue
Quelque amant, qui sa flame écriue
Trop disertement, plus atteint
D'une ardeur que sa chanson viue,
Que de toute autre ardeur qu'il feint.

Car outre encor qu'à la feintise
Ne fut oncq ma nature aprise:
Lardente & vraye affection
Etreignant sans fin mon seruice
A ta faueur, qui m'est propice,
Sort de plus sainte intention
Que tout amour naissant de vice,
Et s'apâtant de fiction.

Tels amans d'estranges louanges,
De peines, & plaintes estranges,
Font retentir presque tous lieux:
En tâchant de rendre immortelles
Leurs Dames, qu'ils peignent tant belles,
Que toutes Deesses des Cieux

Deuroyent quitter, ce semble, à elles,
Ce que Nature a fait de mieux.

Comme aussi par tout où ils seignent
L'horrible mal, dont ils se pleignent,
L'amour ils déguisent, larmans:

Et tout de mesme armans leurs Dames,
De mortelles fleches, & flames,
Qui entamans, qui consumans,
Voire & empoisonnans les ames,
Retuent sans fin ces amans.

Ainsi ce grand Dieu, qui suprême
Fait faire ioug aux grands dieux mesme,
Par son arc diuin surmontez,
Ne se voit pas seulement faire
Boute-feu, meurtrier ordinaire,
Traistre, & bourreau des cœurs dontez:
Mais leur Dame se voit pourtraire,
Vraye Furie en cruautez.

Lors qu'ils l'admirent & l'adorent,
Aueuglez, ils la deshonent
Indignement de ce nom là.

Car sans que bailler il luy faille,
Serpent, brandon, fouët, & tenaille,
Les gesnes, les chaines, qu'elle a,
Et tous faits cruels qu'on luy baille,
Sont plus encor que n'est cela.

AMOUR SA

AIR SECOND.

MAIS d'où nous viennent tant de feintes
Des rares beautez tant de plaintes,
Des tourmens que feignent ceux ci?
Le premier vient de flaterie,
Et d'indiscrete singerie:
De ce vice dernier aussi,
Vient le mal, la forcenerie,
Que leurs chants contrefont ainsi.

Ou si tant soit peu veritables
Sont leurs maux: C'est qu'ils sont coupables
Dans soymesme d'un lâche tour:
En tâchant leurs Dames seduire,
Et trop plus que la mort leur nuire,
Par un leger & faux amour,
Qui veult leur cher honneur destruire,
Pour au triomphe en rire un iour.

Ceux dont la constance naïfue
Fait que sans cesse se poursuiue
La course qu'ils veulent courir:
Soit qu'au mariage ils pretendent,
Ou à ce que les loix despendent,
Seurs & secrets iusqu'au mourir,
Sans monstrier tant de rage, attendent
De iouir, mourir, ou guerir.


Mais pour tout autre, qui forcene

En sa courte & volage peine,
 L'amour ce celeste vainqueur
 (Sçachant bien son ame estre telle)
 Dans luy, hors des enfers, appelle
 Megere, ou l'une ou l'autre sœur:
 Qui, pour le temps perdu, bourrelle
 D'heure en heure ce lâche cœur.

Car voyant delayer la gloire
 Del'inique & faulx victoire,
 Et toutesfois s'y obtenant,
 Creue, de voir perdre toute heure
 Propre à quelque queste plus seure,
 Sans fin se rongean & gesnant:
 Mais tousiours l'amour la meilleure,
 Sans telle peine va peinant.

Car encores que malheureuse
 Fust telle poursuite amoureuse,
 Qui n'a pour son but que l'honneur:
 L'esprit frustré de son attente,
 En souffrant beaucoup, se contente
 A la fin d'auoir ce bon heur,
 Que de sa poursuite s'absente
 Et tout crime, & tout deshonneur.

AIR TROISIEME.

 R quant aux louanges, MAISTRESSIE,
 Que pour toymesme à tous i'adresse,
 D'un chant diuersement chanté,

AMOURS.

Sur tes beautez qui m'ont sceu prendre:
Et quant aux plaintes que peut rendre
Mon cœur pris de telle beauté:
De moy tu ne peux rien entendre,
Qui hors du vray soit inuenté.

Car puis que l'heureuse iournee
En qui i'espere, qu'Hymence
Nous ioindra d'un sacré lien,
Est le seul but de ma poursuite:
Il faut que ma chanson conduite
Soit du tout selon le cœur mien,
Qui toute feinte a interdite
De l'ardeur qu'il a d'estre tien.

Si est-ce pourtant, que sans feindre,
Sans trop louer, sans trop me plaindre,
Pour la louange, ie diray,
Que l'air, & les traits de ta face,
Ton port, ton esprit, & ta grace
Que sans cesse i'admireray,
Par amour, dans mon cœur efface.
Tout ce que i'amaïs i'admiray.

Qu'ay-ie pour tes beaux yeux pourtraire,
Des rayons du Soleil affaire?
Ou qu'ay-ie affaire de chercher
L'albastre, le corail, la rose,
L'or, les perles, pour telle chose
Aux autres beautez attacher:

*Si ce qu'en toy ie me propose
M'est plus excellent & plus cher?*

*Diray-ie apres la peine dure,
Qu'estant absent de toy, i'endure,
En l'attente de mon seul bien?
Lequel si par quelque inclemence
Du ciel, n'est tout tel que ie pense,
Ma vie pour morte ie tien.
Or ta grand' grace en ton absence,
Tourne souuent ma peine en rien.*

*Ainsi qu'en rien ie tourne encores
La plainte que i'en ferois ores
Contre l'aspre longueur du tems.
Que doncques le ciel equitable,
En ta beauté tant souhaitable
Rende tous mes traux contens:
Faisant honte par l'amour stable,
Aux amours faux, ou inconstans.*

CHANSON

*Pour respondre à celle de Ronfard, qui com-
mence, le suis Amour le grand
maistre des Dicux.*

A M O U R n'est point ce grand Dieu, qui sous soy
Tient l'univers gouverné par sa loy:
Et qui enfant, anime, agite, enflame,
Ainsi qu'un corps, tout le ciel qui nous luit,

A M O U R S.

*Que par accords discordans il conduit:
 Vn corps si grand n'auroit si petite ame.
 Ce n'est celuy qui premier-né, rendit
 Ordre & lumiere au Chaos qu'il fendit:
 Et qui depuis hommes & Dieux maistrise.
 Vn autre Dieu ce grand œuvre a basti,
 Et à son vœu a seul assuieti
 Toute ame au ciel & en terre comprise.
 Premier ce Dieu (puis qu'il fait tout parfait)
 L'obscur Chaos & confus n'auroit fait,
 Pour en tirer & l'ordre & la lumiere:
 S'il pouuoit tout de ses formes orner,
 Il peut à tout les matieres donner,
 Estant des deux seule cause premiere.
 Pour tel ouurage, il luy falloit auoir
 Non l'amour seul, mais l'infini sçauoir,
 La pouruoyance, & puissance infinie,
 De tout l'idée, & aussi prompt l'effet
 Que la voix mesme: Amour donc en ce fait
 N'est qu'un seul nœu de si grande harmonie.
 Encores c'est le prendre improprement.
 Pour l'accordance & sans commencement,
 J'aimerois mieux faire eternal le monde,
 Que faire un Dieu d'un seul effet diuin,
 Tant qu'un principe & suprême & sans fin
 On establisset d'une cause seconde.
 Amour pourroit (si c'estoit quelque Dieu
 Naissant en nous, prenant au cœur son lieu,
 Et de nos sens tirant sa nourriture)
 Estre un archer, dont nous n'euterions*

Le plaisant trait, & ne résisterions
 Au feu, qui prend de nostre vueil pasture.
 Doncques tout nû ses guerres il feroit,
 Car sans nos sens force aucune il n'auroit:
 Encor nous seuls ses dignes sujets sommes:
 Tous animaux qu'on voit voler en l'air,
 Marcher sur terre, & nager dans la mer,
 Ne sentent point cet amour propre aux hommes.
 Si nos desirs, dont sortent nos amours,
 Sont tousiours ioints aux sens & au discours,
 Ce naturel qu'on voit aux bestes estre,
 Ne peut (encor qu'il les vienne enflammer)
 Ce mesme Amour encontre elles armer,
 Qui par raisons de nos raisons est maistre.
 Sa paix, sa guerre, & sa treue se sent,
 Selon qu'il est, & selon qu'on consent,
 Ou qu'on résiste à ses forces couuertes:
 Son feu caché dedans le fond du cœur,
 Faisant monter au cerueau sa vapeur,
 Tient de nos pleurs les fontaines ouuertes.
 Il semble bien sans la vie épargner,
 Dans nostre sang ses deux aisles baigner:
 Mais c'est souuent la Haine son contraire,
 Qui s'acouplant à ce mutin petit,
 Soule de sang son meurdrier appetit:
 S'il est donc Dieu, Deesse il la faut faire.
 Parle dehors on ne pare les coups
 De ce guerrier, qui combat dedans nous;
 Que seruiroit ou rondache, ou cuirace?
 Nostre ennemi de nos armes armans,

A M O U R S.

Flatans la playe, & mesme nous charmans,
 Enflons encor de la honte l'audace.
 Bien que ce mal ait fait diuersement
 Mainte ruine, & maint grand changement,
 Il ne faut pas en faire un Roy suprême.
 Les Rois n'iroient deffous son ioug captifs,
 Au moins gésnez, palles, transis, chetifs,
 S'ils se pouuoient faire Rois de soy mesme.
 On pourroit bien un trophée dresser,
 De l'arc, des traits, dont il vient nous blesser,
 Et de la trouffe, & de la torche sienne:
 Mais il ne faut que luy seul de nos cœurs,
 (Qui pour luy sont de soy mesme vainqueurs)
 Approprier le trophée il se vienne.
 Outre que c'est une fable, des Dieux
 Qu'on feint en mer, & en terre, & aux cieus,
 Et iusqu'au fond de l'enfer implacable:
 Quand ils seroyent, leurs amours seroyent saints,
 Tres-hauts, trespurs, de nul effort contrainsts:
 Tout Dieu se rend tousiours à soy semblable.
 Laisson Iupin, Pluton, Neptune aussi,
 Mars & Phebus: comme cet Amour ci
 N'a pas le vol si hautain & si roide,
 Qu'il aille au ciel, il ne descend en mer,
 Pour les Tritons & poissons faire aimer,
 Telle amour est trop stupide & trop froide
 Et plus stupide encor l'homme seroit,
 Vray bois, vray roc, qui point ne sentiroit
 Cet amour propre à sa haute nature,
 Qui seulement comme aux bestes ne naist

Du sens du corps, mais qui dedans nous est
 De nostre esprit la propre geniture.
 Bien que l'esprit de sa flame alumé
 En soit courtois, hardi, prompt, animé,
 Il ne faut pas si grand maistre le feindre:
 Car plus souuent que nostre esprit ne doit,
 Par nostre esprit maistriser on le voit,
 Mesme avec luy l'honnesteté s'éteindre.

CHANSON.

EAVT il, Chançon, que ie des emprisonne
 Mon mal dans moy prisonnier si long temps?
 Faut-il, Chançon, qu'ores par toy ie donne
 L'air à ce feu, bourreau de tous mes sens?
 Faut-il restreindre aujourdhuy par mes plaintes
 La crainte, hélas! qui les tenoit estreintes?
 Faut-il encore, ô Chançon, que ie pense
 Que tu peux bien porter si loing mon dueil,
 En iouissant pour moy de la presence
 Decelle, hélas! dont i'ay banni mon œil?
 Te vantes tu qu'en pouuant voir sa face,
 Tu pourras voir d'elle sur moy la grace?
 Ainsi qu'on voit deffous les nuicts plus sombres,
 Les voyageurs endurer mille ennuis:
 Ainsi qu'on voit souffrir là bas les ombres,
 Des pauures morts aux infernales nuicts
 Et comme au cul des fosses plus obscures
 Les prisonniers souffrent cent peines dures.
 Depuis le temps que i'ay senti retraire
 De moy les rais d'un flambeau n'pareil:

A M O U R S.

Depuis le temps que j'ay laissé ma CLAIRE,
 Dont la clarté sert d'un second Soleil,
 Je sen tel dueil, ie sen telles tenebres,
 Que mes beaux iours ne sont que nuicts funebres.
 Encor ceux là, qui sous la nuict fouruoient,
 Vont esperant de l'aube le retour:
 Encor ceux là, qui aux fosses larmoyent,
 Esperent voir de iour en iour le iour:
 Mais, las! mon ame errante & prisonniere
 N'ose esperer liberté ne lumiere.
 Ainsi des trois qui sont tous misérables,
 Estans errans, ou captifs, ou damnez,
 Les deux ne sont du tout à moy semblables,
 N'estans du tout d'esperoir abandonnez:
 Reste le tiers qui me semble de mesme,
 Puis que l'amour est un enfer extrême.
 Helas bons Dieux, faut-il que ie condamne
 A tout iamais mon œil d'estre privé
 De son obiet! faut-il que ie le damne
 Avant qu'auoir tout moyen éprouué!
 Si mon forfait sans fin d'elle m'exile,
 L'arracheray mon œil comme mutilé.
 Car sans voir, CLAIRE, un plaisir desirable
 A tout iamais luy seroit déplaisir,
 Et me sentant estre tant misérable
 Des deux enfers i'aimerois mieux choisir
 L'enfer dernier où la mort nous engoufre,
 Que mon enfer, que sous l'amour ie souffre.
 Si donc, ô CLAIRE, ains ô clarté diuine,
 Le mien forfait n'est fait pour t'offenser,

Et si le temps, qui tout amour termine,
 Ne peut le mien tant seulement blesser:
 Si i'aime mieux mes deux enfers ensemble,
 Que faire rien qui déplaisir te semble:
 Appaise toy, & te monstrant Deesse,
 Ainsi qu'on voit le grand Soleil des cieux
 Enluminer ta tourbe pechereffe,
 Tout aussi bien que les moins vicieux,
 Fay qu'en m'aimant & luisant sur ma face
 De tel enfer un paradis se face.
 C'est fait c'est fait, ô bien-heureux augure,
 Je voy à gauche un pigeon blanc voler,
 Signe d'amour: pendant qu'encor' i'endure
 Un peu, Chançon pousse toy dedans l'air,
 Ton vol me soit & ton retour prospere,
 Autant qu'au vol de ce pigeon i'espere.

CHANSON

Pour la deffense de l'Amour.

DES vers des amans
 (O Amour) s'armans
 Contre toy de cris,
 De reuolte, & d'ire,
 Ne nous font que rire,
 Comme d'eux tu ris.
 Un qui sous ton nom
 Enroulé, tient bon,
 Soldat vieil, & fin,
 Fuit toutes parolles

A M O U R S.

De reuoltes foles,
Et en craint la fin.
Tel encor captif,
Malade, ou chetif,
Feint sa liberté,
Et par son langage
Dement son visage,
Ou sa pauvreté:
Qui dedans tremblant,
En ce faux semblant,
Sa vie sent bien
Peu franche, peu saine,
Peu riche, qui traine
Son plus fort lien.
Un vaincu, trainé,
Enfermé, gesné,
Soit dans la prison,
Soit dans la galere,
Captif, ou forcere,
Perd crainte & raison.
Ne pouuant tenir
Son dur souuenir,
S'attaque au geolier,
L'argousin irrite,
Et en vain depite
Et chaine, & colier.
Mais se repentant
Soudain, & sentant
Moquer par ces deux
Sa colere éprise,

Mal

Mal à propos prise,
Contre l'excez d'eux.
Sans rien proffiter,
Fors que d'augmenter
L'apprehension,
Accroist par batûres,
Outrages, naurûres,
Son affliction.
Par les sangliers vicius,
Des trenchans épieus
La pointe se voit
Souvent dédaignée,
Bien qu'en la seigneurie
Entree elle soit.
Mais de quoy leur sert
Ce gros cœur, qui perd
Force avec le sang?
Leur double deffence,
Ne peut par nuisance
Garentir leur flanc.
Plus vont sallumant,
Plus vont écumant,
Voire tant plus fort
Ils vont par secousse
Poussans, plus se pousse
Dans leur corps la mort.
Tes traits defferrez
(Amour) sont ferrez,
Ainsi que souloyent
Les fleches Angloises,

AMOURS.

Qui sur les Françoises
 Campagnes gréloyent.
 Lors avec soudain
 Mépris, & dédain,
 Que sert d'arracher
 La fleche sur l'heure,
 Si le fer demeure
 Dans l'os, dans la chair?
 Tel souuent médit,
 Deteste, & maudit
 Vn, dont il depend,
 Qui mesme en l'outrage,
 Dedans son courage
 A merci se rend.
 Tel veult s'affronter,
 Charger, surmonter,
 Comme braue il feint,
 Quelqu'vn trop plus roide:
 Mais vne peur froide
 Au seul nom l'atteint.
 Toy Amour, de nous
 Pren les vains courroux,
 Et soudains mépris:
 En mépris extreme,
 Sur nous par nous mesme
 Regaignant ton pris.
 Et puis que des cueurs
 Des plus forts vainqueurs,
 Vainqueur tu te rends,
 De nos forces vaines

(Sans que tu te peines)
 Plus grand' force prens.
 Souuent on te fuit,
 D'autant plus qu'on fuit:
 Et souuent tu fais
 Sur ceux qui s'ennuyent
 De ton ioug, qu'ils fuyent,
 Redoubler ton fais.
 Que craindre il te faut,
 Pour tout aspre assaut
 Naissant des desirs!
 Qu'aimé tu dois estre,
 Pour l'heur que font naistre
 Tes diuers plaisirs!
 Ainsi nostre cœur
 A l'amour, & peur,
 Est estreint par toy:
 Quel haut pouuoir doncques
 Sur nos faits peut onques
 Avoir plus de loy?
 Si tu n'as rien mieux,
 Qui dedans les Cieux
 Te face estre Dieu,
 Tell' amour & crainte,
 Voire en nous contrainte
 Ty donne ton lieu.
 Quand donc en tel rang
 Des Dieux le haut sang
 Ne t'auroit point mis,
 Quand les doctes plaintes,

AMOURS.

Ou pietez feintes,
 T'en auroyent démis.
 Quand ton arc si fort,
 Que tout autre effort
 Luy cede en tous lieux,
 Ne t'auroit sceu faire
 Comme Hercule attraire
 Dans ce rang des Dieux:
 Les vifs sentimens
 D'aises ou tourmens,
 Que presque à nous tous
 Plus grands tu fais prendre,
 Que rien qui s'engendre
 De nous, dedans nous.
 Puis l'égard, qu'il faut
 Qu'un pouuoir soit haut,
 Pour si puissamment
 Agir sur une ame,
 Qu'il ment & enflame
 Plus qu'humainement,
 Feroient * *

CHANSON.

J'AY sans nulle occasion
 De chanter affection,
 Je veux me plaire, & ne puis
 Voir autour de moy qu'ennuis:
 Mon cœur tâchant d'enchanter,
 L'ennuy me force à chanter:

Mais l'ennuy se rend vainqueur
De mon chant & de mon cœur.

Je sen de mes maux le cours
Egal au cours de mes iours,
Triste, & seule souffre é moy,
Pour un qui m'est plus que moy,
Qui non plus que moy iamaïs
N'eut de repos ny de pais,
Duquel pourtant l'heur & bien
Peut tout seul faire le mien.

Mesmement le tems se voit
Extremement triste & froid:
Et qui pis est, de ce tems
Les miseres que ie sens,
Viennent par indignitez,
Soties, meschancetez,
Plus que tous mes maux diuers,
Aigrir mon fiel & mes vers.

Si n'est-ce pas la façon
D'une gaillarde chanson,
Propre à chanter, à sonner,
A baller, & à donner
Relache à nos durs travaux,
Que semplier de tous ces maux,
Qui l'ennuy n'esteindroyent pas,
Ains luy seruiroyent d'appas.

Si ne voy-ie proprement
De mes chants autre argument,
Qui s'abhorre toutes fois
De mon cœur & de ma vois:

A M O U R S.

*Quelque part que mon penser
 Diuerti s'aïlle adresser,
 Rien ne voit qui propre soit
 A ce que chanter il doit.* •

*S'il pense à l'œuvre, à l'honneur
 Des Cicux, de Christ, du Seigneur,
 Il trouue que c'est tout l'art,
 La couuerture, & le fard,
 Dont ce temps seditieux
 Masque son trouble odieux:
 Du bien on se diuertit,
 Qui en mal se conuertit.*

*D'auantage il n'est celuy
 Qui n'en remplisse aujourd'huy,
 Iusques aux plus vils faquins,
 Leurs chants, & lourds, & mutins,
 Sans fin l'aureille on m'en ront:
 A ceux qui degoustez sont,
 Comme moy, iamais ne plaist
 Ce qui trop commun nous est.*

*Si ie veux chanter des Rois,
 Des meurs, des vertus, des lois,
 Le malheur nous remet là,
 D'estre aujourd'huy sans cela:
 Voulant chanter nos debats,
 Nos troubles, & nos combats,
 Ce seroit me plaire au sang
 Coulant de mon propre flanc.*

*Si ie chante les grandeurs,
 Puis qu'elles ne sont qu'aux cœurs*

Vertueux, & grands, & francs,
Non pas aux biens, ny aux rangs,
Veu ce que sont nos François:
En ce temps peruers ma vois
Ne plairoit, ains au rebours,
Ie ne chanterois qu'aux sourds.

Puis c'est vn dur souuenir,
Que voir ce qu'on doit tenir
Tout le plus cher entre nous,
Se laisser presque de tous:
Quant à chanter les grands biens,
Les rangs, faueurs, & moyens
Des grands, soit tel argument
Propre aux flateurs seulement.

Tout autant m'est n'auoir rien
Qu'vser comme ils font du bien,
En leurs hauts rangs ie les voy
Estre trop plus bas que moy:
Ie dédaigne tous les heurs,
Tous les moyens, & faueurs
Naissans du hazard, & non
Du merite & du renom.

Fi des vertus, qui aux Cours
Ont maintenant plus de cours:
Comme de tout ignorer,
Et nonobstant s'asseurer
A donner effrontément
De tout vn lourd iugement:
Ou bien par mine valloir
Faire vn silence valloir.

A M O U R S.

De mesme façon morguer,
 Et de mesme haranguer,
 Par tout en tout n'ayans qu'un
 Geste & iargon pour chacun,
 Selon que differemment
 S'offre à leur courtoisement
 Masqué, apparoisstre accords,
 D'habit, de cœur, & de corps.

Jaqueter, & bouffonner,
 Sur autruy se patronner,
 Singes en dits, & en faits,
 Jusques aux gestes mauuais
 De ceux qui ont vogue & bruit:
 Carces deux tous seuls on suit,
 Estre à tous serf, toutesfoi
 Se morguer en petits rois.

Auancer le nez, souffler
 Ses plumes, sa voix enfler:
 Et puis soudain, s'il le faut,
 Larabaïsser de bien haut,
 Laradouciissant d'un ris
 Qu'on a tout exprez appris,
 Qui souuent entre eux s'émeut
 Sans sçauoir qui les y meut.

Carce qui plaist, à l'enui
 Est à tout propos suiui.
 La Court est sans iuste choi,
 Iuste raison, iuste poi,
 Qui pis est, sans amitié,
 Sans droit, sans foy, sans pitié,

Chacun

Chacun à son proffit tend,
Faisant trafique du vent.

Le vent est souuent loyer
De celuy, qui employer
A voulu ses ans entiers
A tels indignes mestiers.
Si est-ce que viure ainsi,
Ce leur semble, c'est d'ici
La vertu seule, l'honneur,
L'accortesse, & le bonheur.

Toute leur vie & façon
N'est point propre à ma chanson,
Soit pour flater les prisant,
Ou soit en leur déplaisant,
Me déplaire en mon discours,
En me les peignant si lours,
Tant loing de toute valeur,
Et n'estimant que la leur.

Quant à chanter des secrets
Que les Romains & les Grecs,
Ou mes discours plus gaillards,
En tant & tant de beaux arts
M'ont peu sans cesse enseigner,
Ils seroyent à dédaigner,
Estans enuers tous sans bruit,
Estans enuers moy sans fruit:
N'estoit que mon esprit tend
De sy rendre seul content,

* * *

AMOURS.

CHANSON.

O bel œil, ô blanc tetin,
Teint albastrin,
Rouge bouchette

DA l'Aurore au teint vermeil
Dans sa rosine charrette,
Sortoit auant le Soleil,
Pour chasser la nuit fréchette.
O bel œil.

Le verdoyant mois de May
Plus propre à toute amourette,
Rendoit tout esprit plus gay
De ce que plus il appetite.
O bel œil.

Le temps estoit frais & beau:
Car lors le Soleil nous iette
De sa maison du Toreau,
Vne ardeur freche & doucette.
O bel œil.

Les bois, les champs, & les prez
Couverts de verte herbelette,
Estoyent par tout diaprez
De mainte, & mainte fleurette.
O bel œil.

L'amour à l'occasion
De l'heure aux amans secrette,
En mon assignation
Me chassa hors ma chambrette.
O bel œil.

Tout le ciel sembloit semé
De mainte rose clairette,
Tout l'air estoit embasme,
Toute voye verdelette.

O bel œil.

Des jeus, & des gais amours
La bande gaye & saffrette,
Auoit ia fini les tours
De sa dance sur l'herbette.

O bel œil.

Tout autour de moy, ie croy,
Chacun d'eux tourne & volette;
Tournant & menant dans moy
Mon ame à leur loy sujette.

O bel œil.

Mon chemin estre plus court
Cent & cent fois ie souhaite,
Tant en ma memoire court
Le plaisir que ie proiette.

O bel œil.

Près du iardin suis venu,
Où ma Deesse est seulete,
Et l'huis desia bien cogneu
Sans faire bruit ie crochete.

O bel œil.

Elle deslors m'attendant,
Escoutoit la chansonnette
Du Rossignol, accordant
Ses amours de sa gorgette,

O bel œil.

AMOURS.

Dans un cabinet bien verd,
 Que ia par mainte branchette
 Le lasmin auoit couuert
 De sa petite fueillette:
 O bel œil.

Je trouue cet obiet beau,
 Qui sur sa chair grassellette,
 N'auoit sous vn long manteau
 Qu'un cresse pour chemisette.
 O bel œil.

Son aise & sa crainte font
 Qu'un teint plus rosin se iette
 Sur ses iouës, sur son front,
 Lustre de blancheur si nette.
 O bel œil.

Mais, ô Dieu, quel doux recueil
 Sa voix tremblante & foiblette
 M'a fait avec son doux œil,
 Forçant mon ame pauurette:
 O bel œil.

Dérober las ie me sens
 D'une force doucelette,
 M'a plus grand' force & mes sens,
 Et rendre ma voix muette.
 O bel œil.

Mon œil rauis éblouit
 En richesse si parfaite,
 S'éblouit & s'éjouit
 D'un œil qui si bien le traite.
 O bel œil.

Mon cœur, mon sang est saisi,
 Et mon ame toute atraite
 Par l'ame d'elle, quasi
 N'en peult faire sa retraite.
 O bel œil.

Voyant ne pouuoir vser
 De mon ame, la recepte
 C'est de me mettre au haïser,
 Qui mon ame en fin racheppte.
 O bel œil.

Pressant & repressant fort
 Ceste leure tendrelette,
 Auecques mon ame en sort
 Son ame mignardelette.
 O bel œil.

Seulement ne m'a repeu
 Sa leure chaude & molette:
 Mais tout cela que i'ay sceu
 Baïser sur sa chair doucelette.
 O bel œil.

J'ay cent fois baïse ce teint,
 Ceste bouche vermeillette,
 Cet œil qui tout astre esteint,
 Et l'une & l'autre pommette.
 O bel œil.

Que de rayons precieux,
 Mais que de coups de sagette
 Entrent en baïsans ses yeux
 Dans ma poitrine tendrette.
 O bel œil.

A M O U R S.

Que d'autre riche thresor
 J'ay sur sa gorge grassette.
 Amassé, mais plus encor
 Sus sa double montagnette.
 O bel œil.

Que de roses, que de lis,
 De ma bouche trop solette
 Ay-ie sur son teint cueillis,
 En sa blancheur rougelette.
 O bel œil.

Quel musc, & quel ambre gris,
 Ay-ie entre mainte perlette
 Dedans ses deux leures pris,
 Entr'ouurant sa bouchelette.
 O bel œil.

Du reste ie me tairay,
 Le Rossignol, la logette,
 Les jeux, & les amours i'ay
 Pour témoins d'amour bien faite.
 O bel œil, ô blanc tetin,
 Teint albastrin,
 Rouge bouchette.

CHANSON.

JE suis parmi le trouble, & le soin, & l'apprest,
 Dont un iuste deuoir rend ici chacun prest.
 A repousser l'erreur, qui renouuelle
 De nous, sur nous une guerre cruelle.
 Mais ie pourrois plustost, au moins si au bésain

Se pouuoit écarter de moy si iuste soyn
 Mettre en oubli tout tel deuoir de guerre,
 Pris pour mon Dieu, pour mon Prince, & sa terre.
 Que le deuoir extreme auquel l'amour vainqueur
 A tellement pour toy soumis mon libre cœur,
 Qu'il faut durant tous les soucis d'ici,
 Que toy sans fin sois son plus grand souci.
 Car combien qu'au premier mon País & mon Roy,
 Et mon Dieu mesme, étreigne & requiere ma foy:
 Elle n'est point à ces trois plus astreinte
 Que ie la sen s'estre à ton ioug étreinte.
 Car pour semblable cause & par pareilles lois
 Tu as pris dessus moy tel pouuoir que ces trois;
 En te faisant de mon ame sans cesse
 Le seul seiour, la royne & la Deesse.
 Doncques non seulement de toy se resouuient,
 Mais bien en mon absence en toymesme se tiennent.
 Elle te sert comme royne, & encores
 Comme Deesse apres son Dieu t'adore.
 Mais, las! dans toy logée & suiète sous toy,
 Mesme enuers toy deuote, il faut pourtant qu'en foy
 Durant la guerre vne guerre elle voye,
 Dont pour loyer ta beauté la guerroye.
 Et ne faut point qu'Amour luy preste pour cela
 L'arc, la trouffe des traits, ny le flambeau qu'il ha:
 Car contre moy d'incessables alarmes
 Elle me fait combattre de mes armes.
 De l'œil, le sens subtil, qui le premier recourt
 Dans foy telle beauté, que pour obiet il eut,
 Est celuy-là qui dedans l'ame mienne

A M O V R S.

Assault ses sens avec la raison sienne.
Le soudain iugement que mon œil tout épris
Feit prendre à mon esprit, dans tes nœus déjà pris,
Qui est pour vray, que grace & beauté telle
Passoit en tout grace & beauté mortelle,
Est vn fort champion, qui sans fin retournant
En l'assault, & dedans sans cesse redonnant,
Force cela, qu'en si roide rencontre
Peut la raison opposer à l'encontre.
Puis l'apprehension qui par tel iugement,
Imagina dans soy l'obiet si viuement,
Qu'elle engraua dans mon cœur, dans mon ame,
Pour son trophée vne eternelle flamme:
Est celle qui encor par vn droit bien acquis,
Veult sans cesse r'auoir le fort qu'elle a conquis,
Si tant soit peu mon ame & mon cœur ose
Apprehender quelque contraire chose:
Si tant soit peu le loisir l'engourdit,
Si tant soit peu la peur le refroidit,
Ou si quelque autre égard, plaisir, affaire,
Le vient de toy par reuolte distraire.

E L E G I E.

MA D A M E, si iamais ma douce liberté.
 Dessous ta dure main esclaué n'eust esté,
 Si t'aimant seulement d'une faulx apparence
 Je n'eusse esté captif au vray sous ta puissance,
 Estant en ton endroit feint & de double cœur,
 Plus tost que vray ami & loyal seruiteur:

Estant

Et si sans me piquer & sans iamais me prendre,
 I'eusse voulu tacher amoureuse te rendre,
 Tousiours feignant beaucoup & n'aimant que fort peu,
 Bruler dedans la glace, & glacer dans le feu,
 Ha ie serois encor bien-heureux en ta grace,
 Comme i'estois auant que si fort ie t'aimasse!
 Ou ne serois à toy si fort assubietti,
 Que ie ne puisse prendre ailleurs autre parti:
 Ains demeurant tousiours mon cœur en sa franchise,
 Sans que i'eusse esté pris, ie te tiendrois éprise.

Mais d'autant que i'ay mis sans fait, sans fiction,
 En toy seule mon cœur & mon affection:
 D'autant que ie me suis d'un cœur trop volontaire
 Rendu à toy captif plus que n'est le forsaire,
 Et que tu ascogneu que ie n'auois en moy
 Autre espoir, autre amour, autre desir qu'en toy,
 Tu as soudain de moy destourné ton courage,
 Et ce qui te deuoit encore d'auantage
 Esmouuoir à l'amour & ton cœur enflammer,
 Cela t'a fait du tout delaisser à m'aimer.

En toy, qui parauant m'estois si fauorable,
 I'ay veu un changement si bisarre & muable,
 Que de ton feu premier ie n'ay point apperceu
 Rien que la cendre morte en la place du feu:
 Et ce qui t'a ainsi legerement changée,
 Ce dont tu t'es sentie estre plus outragée,
 Et ce qu'à mon amour m'a fait un plus grand tort,
 N'est sinon mon amour trop ardent & trop fort.
 Si ie t'eusse porté l'amitié froide & lente,
 La tienne en eust esté beaucoup plus violente,

A M O U R S.

*Sibien que sans aimer i'eusse aisément acquis
 Ton amour, qu'en aimant acquerir ie ne puis:
 Et si i'eusse voulu dissimuler & feindre
 D'un cœur traistre & meschant & d'un parler nō moin-
 Je n'eusse esté de toy aimé tant seulement, (dre,
 Mais ie t'eusse trompee aussi bien aisément.*

*Ie sçay ce quel'on dit, ie sçay ce qu'il faut faire
 Pour pouuoir laschement les courages attirer:
 Je sçay la sottise, le langage commun,
 Et les traits deceuans desquels vse vn chacun:
 Qu'il ne faut que iamais l'amant se passionne,
 Et que pour estre aimé il ne s'affectionne.
 Je croy bien que cela peut entrer dans le cœur
 D'un lâche, d'un meschât, d'un traistre, & d'un trôpeur:
 Mais moy, qui ne suis né avec si meschante ame,
 Qui te voulois aimer & non tromper, ma Dame,
 Je pensois conseruer ton amour par amour,
 Et non pour te brasser & faire un meschant tour,
 Et croyois en suiuant la loy de la nature,
 Que l'amour de l'amour receust sa nourriture.*

*Mais quoy? ie ne te fui iamais si odieux,
 Qu'en ce temps (ô bon Dieu!) que ie t'aimois le mieux:
 Je sçay que rien en moy ne t'a peu tant déplaire,
 Que tout ce que l'amour me contraignoit à faire:
 La peur, la ialousie, & les mortels soupçons,
 Que tu nommois en moy si mauuaises façons,
 Qui te déplaisoyent tant, n'estoit-ce l'amour mesmes,
 Qui causoit en mon cœur ses furies extremes?
 Et si ie n'eusse esté d'amour espoinçonné,
 Je n'eusse aussi de toy rien craint ny soupçonné,*

*I'en auois bien raison: car desia toy legere
 Commençois à changer ta volonté premiere,
 Et si mal satisfaire à l'amour mutuel,
 Que tu n'auois plaisir qu'à me donner martel.
 Que si lors i'eusse esté quelque trompeur ou traistre,
 I'eusse bien fait semblant de rien n'y recognoistre:
 Mais me sentant ainsi moquer & outrager
 I'eusse espié le temps propre pour m'en vanger:
 Ie nel'ay pas voulu, & pour toute vengeance
 Ie ne t'ay rien caché ny passé sous silence:
 Et t'ayant decouvert mon amour librement,
 La crainte & le soupçon d'où venoit mon tourment,
 Ie n'ay veu que l'amour & mon libre langage
 Qui t'ayent hors de moy diuertí le courage.
 Et si c'estoit amour, qui sans dissimuler
 Conduisoit mes façons, & me faisoit parler,
 Alors que ma façon t'a esté déplaisante,
 Mon amour t'a despleu sans fait trop violente:
 Car ma vois & mon geste estoient tant seulement
 D'une si grand' amour l'organe & l'instrument.*

*Donques pour bien aimer ie suis hors de ta grace?
 Et donques mon amour de ton amour me chasse?*

O destin malheureux! ô dure cruauté!

*Malheureux fut le iour que ie vey ta beauté,
 Malheureux fut le lieu de nostre cognoissance,
 Et moy plus malheureux d'estre sous ta puissance.*

*Car ie ne puis, Madame, ores me delier,
 Ie ne te puis laisser, ie ne puis t'oublier,
 Et malgré tes rigueurs cruelles & estranges,
 Ie ne te puis changer, encor que tu me changes:*

A M O U R S.

*Il ne peut dans mon cueur entrer autre que toy,
 Et tousiours solitaire à part ie ramentoy
 Tes gracieux propos, & le priué langage
 Que tu tenois auant que changer de courage.
 Il me souuient encor du bien & du bon heur
 Que i' auois tous les iours receuant ta faueur,
 Quand ta main me serrant d'une estroite caresse,
 Me faisoit les sermens d'une sainte promesse:
 Ou alors que ton bras, en gage de ta foy,
 Tant amoureuxment s'étendoit dessus moy:
 Ou quand ton ris, ton œil, & tes leures vermeilles
 Doucement me baisant me promettoient merueilles:
 Ou bien en ce tems là que ie chassois d'autour
 De toy ceux qui venoyent pour te faire l'amour.*


*Ha que ne suis ie mort en ce tems là, Madame,
 Que nous estions tous deux esprits de mesme flame,
 N'estant pas moins aimé que i'estois amoureux,
 Ha que ie fusse mort, content & bien-heureux!*

*Je n'aurois veu au tems de ma grand'esperance,
 De ton plus grand amour & plus grand'assurance,
 Où plus ie deuois estre en ta foy assuré,
 Vn autre ami à moy si soudain preferé,
 Ny ie ne t'auroy veu d'un cueur pariure & traistre,
 A moy ton seruiteur telle faute commettre:
 O qui seroit celuy qui de ce souuenir
 De point ne larmoyer se pourroit contenir?
 Je dépite le ciel, la fortune cruelle,
 Le destin, & le sort, qui pour estre fidelle
 M'ordonnent maintenant d'endurer plus grand mal,
 Que si i' auois esté pariure & desloyal.*

*Je dépite l'enfer, car il n'est pas possible
 De me faire souffrir un tourment plus horrible,
 Pour le iuste loyer d'un damnable forfait,
 Que cèluy que ie sens, pour auoir satisfait
 Au deuoir, à l'amour, & à ceste promesse
 Que ie dois, que ie porte, & garde à ma maistresse:
 Et faut sans trouuer foy en elle ny amour,
 Que ieluy sois fidelle & l'aime sans seiour:
 Et que sans nul espoir de recouurer sa grace,
 En ce cruel enfer ma ieunesse se passe,
 Sans pouuoir reliaer ma desiointe moitié,
 Ny sans pouuoir ailleurs chercher d'autre amitié.*

O D E

Sur la deuise De Nœu & de Feu.

 V A N D ce grand Macedon laissa son Emathie,
 Pour renger sous sa main l'vne & l'autre partie
 De ce grand vniuers,
 Et borner les confins de sa terre natale,
 En tous lieux où Titan sa sommité décale .
 Aux deux poles diuers:
 Animé du desir des victoires futures,
 Et d'en estre asseuré par la voix des augures
 Et oracles des Dieux:
 Veit le temple d'Hammon sur les chaudes arenes
 Del'Egypte brulante, outrepassant les plaines
 Des plus estranges lieux.
 Il veit de Gordian la royale charrette,
 Qui estoit de son heur la fatale prophete,
 Et le nœu merueilleux:

A M O U R S.

Nœu tellement féé qu'il promettoit le sceptre
De l'opulente *Asie*, à qui seroit le maistre
De son tour cauteleux.

Mais le fils de l'Olympe impatient d'attendre,
De pouuoir de ce nœu les cordelles estendre,
Fit que le coustelas

Termina le destin iusqu'à lors inutile,
Tranchant le labyrinthe, & la corde subtile
Du facheux entrelas.

Estant le nœu deffait, il peut aussi deffaire
La Persienne armee, & les forces de Daire,
Et de Pore Indien,

Poussant outre le Tygre, outre Euphrate, outre Gange,
Et outre Tanaïs la fameuse louange
Du Macedonien.

Ce nœu refit depuis le Feuvre, qui martelle
Dans l'*Æthnean* fourneau la brulante estincelle
Du foudre rougissant:

Lors que le Dieu guerrier de la belle Cyprine
Pressoit l'iuoir blanc, le sein, & la poitrine,
Sur le liêt gemissant.

Cupidon l'eut apres, Cupidon qui en lie
Les cœurs des amoureux en sa douce folie,
En sa folie douceur:

Et ce nœu est si fort, qui captifs les peut rendre,
Que pour le délier d'un second *Alexandre*
Cesserait la valeur:

Nœu qui tousiours est nœu, & pour croistre sa force
Il le voulut doüer d'une nouuelle amorce,
Et luy donner le Feu:

*Feu qui brule sans cesse & ne se peut esteindre,
Ne pouuant toutesfois avec la flamme atteindre*

Au Dedale du Nœu.

Seroit-ce point ce Nœu qui te sert de deuise ?

Seroit-ce point ce Feu qui ta cordelle attise ?

Ouy, mais autrement.

Car la seule vertu est le Nœu Gordien,

Qui à ton ame sert d'un immortal lien

Plein de contentement.

Sile Feu est d'amour, c'est d'un amour honeste,

Amour qui est liee & du nœu & du ceste

D'une chaste Venus:

Aussi ton Nœu ton Feu tousiours auront duree,

Tandis que lon verra en la voûte etheree

La clarté de Phebus.

EPITHALAME

De Madame Marguerite sœur du Roy Henry II.

Tref-chrestien, Duchesse de Sauoye.

Q*U'IL te deplaiſt, DEESSE, en qui tellemēt viuēt
Vertu, Sciēce, amour de ceux qui ces deux ſuiuēt,
Que les deux nous deueroiēt cōtraindre à t'adorer,*

L'autre eſmouuoir les Rois de ces deux honorer:

Qu'il te deplaiſt (ie croy) quand les ingratitudes

Qu'on fait, ſoit aux vertus, ſoit aux diuers eſtudes

Des grans hommes, leur ſont rapporter ſeulement

D'un trauail vn trauail, d'un merite vn tourment:

Et penſe que tu crois ces graces plus diuines

Ne pouuoir tant en nous aſſeurer leurs racines,

E P I T H A L A M E.

*Qu'on n'en perde souuent le desir ou l'effet
 Pour le tort qu'à ces dons auuglement on fait,
 Lors qu'aux uns de mépris sert vne ame bien nee,
 Aux autres d'une enuie, aux autres de fumeé,
 Et de regret à soy iustement se fachant
 D'estre nee au pouuoir du sot ou du méchant:
 Pitié dont tellement la constance s'ébranle
 Qu'elle met à tous coups toutes vertus en branle,
 Nonobstant ce confort fantastiquement pris,
 Que la vertu foulée en fin retient le pris.
 Car puis que nostre vie est tant douteuse & breue,
 Et que l'iniquité tousiours l'équité greue,
 Tant qu'en perdant plaisir & proffit bien souuent
 Nous perdons mesme encor du renom le seul vent:
 Qui ne croira (bons Dieux!) telle cause estre forte
 Pour mouuoir la personne en son mestier accorte,
 De suiure vne plaisante & seure oisieté,
 Ou par vn desespoir quelque autre volonté,
 Aimant mieux peu ou prou deffous vn hazard viure,
 Qu'un bien qui se fait mal obstinément poursuiure.
 Mais si iamais (tousiours la vertu qu'on estrange
 Nous laisse vn vain espoir ou vn regret pour change)
 Quelque ame ainsi bien faite, apres auoir laissé
 L'heur qui la nourrissoit, pour le voir offensé,
 Par raisons, par remors, maistres de sa pensée,
 Et par occasions se vit iamais forcee,
 C'est la mienne auiourdhuy. J'auois quitté ce bien
 Qui outre mille maux ne rapporte ici rien,
 Voulant, si Mars tousiours eust l'Europe troublee,
 Rendre nulle ma vie ou ma gloire doublee,*

Pour

Pour en fin reioignant & l'un & l'autre effort,
Pars Mars vaincre mes maux, & par Phebus ma mort:
Mesme ce saint retour de paix, puis que l'un manque
Comme l'autre, à tous deux m'auoit fait quitter banque,
Pour viure au sentiment de l'heur qui m'est presté,
Et sans le sentiment du malheur arresté,
Ains garder tout ainſi le char de l'ame mienne,
Que ſ'elle eſtoit deſia ſous l'ombre Elyſienne:
Mais un remors me prend, l'amour accouſtumé
M'attire mon eſprit à plus grand choſe né,
Me force, & dedans moy ne peut iamais conclure,
Que Dieu m'ayant fait tel inutile m'endure.

Je ſonge à ceſte loy, qui naturellement
Ne permet que pour moy ie ſois né ſeulement:
Ie ſonge, ſi ie veux ſuiure le plaifir meſme,
Qu'en ceci ie me puis ſeindre vn plaifir extreme:
Ie ſonge à l'heur que c'eſt de viuant depiter
Les riches ignorans, & mort les ſurmonter:
Ie ſonge aux changemens, au temps, à l'eſperance,
Que ton accroifſement donne aux eſprits de France,
A mon Prince, à toy meſme, à la poſterité,
A qui ie ſay, peut eſtre, vn tort non merité,
Aux amis, & à ceux qui bons me fauoriſent,
Qui n'auront rien de moy contre ceux qui mépriſent,
Aux ſinges, aux pedans, aux flatteurs, aux vanteurs,
Que mon ſilence aura rendu ſur moy vainqueurs:
Ie ſonge meſmement bien que ie ne ſois point
Si fier de m'égaler à ces deux de tout point,
A la faconde heureuſe, à la Muſe fluide
Du grand Tulle Arpinois, du Sulmonois Ouide,

E P I T H A L A M E.

Dont l'un absent vn peu, l'autre sous l'Aquilon
 Trainant ses derniers iours, escriuoient, Apollon
 Hors du ciel rauissoit à soy les champs d'Amphryse,
 Ayant au lieu du Luth la cornemuse prise,
 Sans qu'un depit de voir blesser leurs deitez
 Rendist ces trois en vain contre eux mesme irritez:
 Bien qu'en cela plus iuste argument les peust poindre
 Que moy, qui n'ay leurs maux, & qui me sen biẽ moindre,
 Qui mesme en mon païs plein de repos & d'heur,
 Neme puis plaindre en rien que du vulgaire erreur,
 Qui de tout temps cruel aux vertus, ne doit faire
 Que tuant mon honneur ie me sois si contraire.

Je voy, si l faut au grand le moindre apparier,
 Scipion ce me semble à soy contrarier
 Cent fois dans son Linterne, alors que son inique,
 Voire à son seul sauueur ingrate Republique,
 Voulant forcer au conte vn, auquel on deuoit
 Et la ville & la vie & tout l'heur qu'on auoit,
 Fit là ce grand vainqueur solitaire se rendre,
 Arrachant au païs sa vieillesse & sa cendre.
 Ores ie pense voir l'amour enraciné
 D'un chascun vers la terre en laquelle il est né:
 Ore vn desir plus grand (car desir nous r'enflame
 Sans cesse, comme estant vne part de nostre ame)
 Vouloir donter l'esprit, donteur des Africains,
 Ardant de croistre encor par conseil & par mains,
 Et sa Romme & sa gloire, or' les fieres tempestes
 Qui de ses citoyens menassoient ia les testes,
 Or l'ennuyeux defaut des honneurs journaliers,
 Or les parens absens, & les Dieux familiers,

Or mille occasions qui s'offroient de bien faire,
 Et or la palme aux mains de l'enuie aduersaire,
 Qui fait de nos courroux son triomphe plus grand,
 Ore les chers amis, & tout obiet qui rend
 Et memoire & remors retentoient ce grand homme,
 Monstrans qu'auant la mort le soing ne se consomme,
 Qui soit que nous cherchions ou le iour ou la nuict,
 Iusqu'en la nuict mortelle incessamment nous suit:
 Si se vainquit-il lors sçachant que la vaillance
 Plus grande, c'est donter les sens & l'inconstance.

Mais reuenant à moy, qui voulois de mon gré
 Quitter du tout les Rois, & l'Helicon sacré,
 Dont ie puisois deuant vne liqueur tant belle,
 Pour arrouser le plant de leur gloire immortelle,
 Encor qu'un cœur trop haut qui me rend plus sujet
 Au malheur, que tous ceux qui ont un cœur abjet,
 S'efforce me donner ceste loy domageable,
 D'estre plustost chetif que d'estre variable:
 Maugré ce cœur ie pren la resolution
 De ne m'obstiner point, comme un grand Scipion,
 Puis que ma petiteffe & l'iniure petite
 Ne peuuent égaler son tort ny son merite,
 Et qu'ores plus qu'à luy d'occasion ie voy,
 Pour changer mon dessein, se presenter à moy.

Icile soïn des Dieux, & la sainte alliance
 Que le ciel à l'Europe, & l'Espagne à la France,
 Voire tous quatre ensemble ont peu si bien iurer,
 Que deux peuples unis semblent deja tirer
 Tous nos peuples en paix, & qu'Europe ses guerres
 Garde au barbare seul, & le ciel ses tonnerres.

EPITHALAME.

*Ici ton Hymence & l'heur qui t'estoit deu
 Avant que naistre, l'heur & l'esper qu'en ont eu
 Les tiens, ma ioye extreme en qui ie sens mon ame
 D'autant passer chacun, que toy sa seule Dame
 Outrepasser les Dieux, & les Rois au pouuoir
 Que ta vertu te fait deffous ceste ame auoir.*

*Ici ta vertu mesme & les biens ordinaires,
 Dont à iamais tu rens les Muses tributaires,
 S'offrent, & d'autre part les liens saincts & forts,
 Dont par miracle Hymen garrotant nos discords,
 Ta Niepce accouplant: les vœus qu'à ton seruice
 I'ay cent fois repetez, mon ancien office,
 Qui veut boüillant dans moy m'étoufer au sortir,
 Voyant avecques Mars l'autre office amortir:
 D'autre costé l'humeur qui bisarre secouë
 L'ame des eschauffez Poëtes, & s'en iouë
 Plus que iamais, pour faire accorder à ce son
 De nopces & la docte & l'indocte chanson:
 L'assurance que i'ay de te pouuoir bien plaire,
 Si ie me puis au moins moymesme satisfaire,
 Et l'esper de gaigner mon Roy, puis que le mieux
 Qu'on face, c'est de plaire aux Rois nos seconds Dieux,
 Me rallument mon feu, que ie rembrase encore
 Des merites premiers que ia l'oubli deuore.
 Le besoing de charmer par mes vers les ennuis
 Que i'ay, pour n'estre veu iamais ce que ie suis,
 Ains que sincere & sain de crime & conscience
 Ie voy chasser mon heur, tacher mon innocence
 Par l'iniquité mesme, ou mesmement par ceux,
 Qui, las! m'honoreroient si i'estois comme d'eux:*

La crainte du reproche & le iuste argument
 Que l'enuieux prendra si ie fais autrement,
 Combien qu'en le faisant ie n'aye point d'attente,
 Qu'autre que mon deuoir enuers toy me contente:
 L'amour de la vertu & ce cœur vrayment mien,
 D'aimer & faire en tout le bien pour le seul bien,
 Qui sur soy mesme tient sa recompense assise:
 Car sans fin la vertu sert de chasse & de prise.
 Bref, mille autres raisons m'ont en ce changement
 Rendu l'art, le vouloir, l'esperoir, & l'argument:
 Dont l'une qui se naist de toy dans mon courage,
 Languissant parauant m'anime d'auantage
 Qu'Achille depité pour s'estre veu rair
 La veuve de Lyrnessse, & voulant asseruir
 Tant les destins des siens, que sa hayne ennemie,
 A vn iuré courroux, encor qu'avec s'amie
 On luy offrist des dons, ne fut alors forcé
 De reuoler aux coups, quand Patrocle percé
 Tout outre par Hector dedans ses mesmes armes,
 Luy fist changer au fer & sa lyre & ses larmes.
 Il est vray que ie suis renflambé d'un grand heur,
 Et ce Pelide estoit rembrasé d'un malheur:
 Aussi ie ne repren les armes, mais la lyre,
 Comme luy quand premier il digeroit son ire.

Il faut donques sortir, & comme celuy-là
 Qui dedans sa maison si long temps se cela
 Ace Thebain Adraсте: il ne faut que la crainte
 De tout prochain danger rende ma force estreinte,
 Me deust l'ingratitude & l'enuie engloutir
 Comme la terre l'autre: il faut donques sortir,

EPITHALAME.

Et quand ie n'aurois point d'occasion meilleure,
 La furieuse ardeur qui s'empare à ceste heure
 De moy, dedans l'horreur de ces bois où laissé
 D'auoir en ces chaleurs si longuement chassé,
 Lassé du vain souci que ie rechange en ioye,
 Riant des biens, des maux que le hazard enuoye,
 Trouuant maugré fortune en ces lieux écarté
 Le repos, le plaisir, l'heur, & la liberté.
 Je refreschi au bord secret d'une fontaine,
 Tant le corps comme l'ame, & reprenant l'aleine,
 Auecques les zephyrs & l'odeur de ce lieu,
 I'ay respiré dans moy vn ie ne sçay quel Dieu.

L'antiquité dit vray, que les forests plus sombres
 Cachent en soy des Dieux, des Demons & des Ombres,
 Aux lieux secrets se fait maint mystere sacré,
 Non plus qu'à moy le peuple aux Dieux ne vient à gré:
 Quiconque soit ce Dieu qui tous mes sens domine,
 D'une folastre humeur remplissant ma poitrine,
 Rend la conception que i'enfante pour toy,
 Tant estrange, tant belle, & tant nouuelle à moy,
 Que combien qu'elle soit trop tarde & inutile,
 L'en pense bien pourtant mouuoir l'ame gentille
 De ta diuinité, comme esmeu ie me sens
 Or que telle fureur se fait plaie à mes sens.

Il me faut donc par force entreprendre, ma Dame,
 Ce que i'ay commencé de ton Epithalame,
 Auec vn autre chant pour la solennité
 D'autres nopces desia dedans moy proietté,
 Et force escrits plus grands, dont mes Muses trop vaines,
 Ont tché ces trois mois de soulager mes peines,

*Dans lesquels assurez de l'immortalité
Le los de ceste Paix prend vne eternité.*

*Au lieu de ces labeurs ma libre fantasie
A d'une gaye humeur la peinture choisie
D'un docte, d'un bisarre, & superbe appareil,
Que dans moy i imagine estre du tout pareil,*

*

*

*

*Tes merites pourtant au vif y seront peints:
Ce songe en verité se fust changé, peut estre,
Son pouuoit, son daignoit en France me cognoistre.
Vn appareil plus grand les autres t'auront fait,
Moy ie te paye ici du vouloir pour l'effet,
Et loing de toyn'ayant du vray la pourtraiture,
Mon ardeur me fait plaire en la feinte figure,
Comme lon voit souuent dans ces cerueaux plus creus
Errer ces beaux discours, propres à leurs humeurs.
L'un dans l'esprit se peint d'estre Roy, Duc ou Conte:
L'autre mille ennemis dans vne heure surmonte:
Le moyne est Cardinal, l'apprentif est ouurier,
L'asne se fait docteur, l'aduocat Chancelier:
L'un se fait ou Cresus, ou Crausus, & se ronge
L'entendement, pour estre Irus au bout du songe:
Cent beaux chasteaux en l'air s'est iabasti cestuy,
Qui sa pauvre chambrette empruntoit auiourdhuy:
L'autre feint enuers soy les amours des plus belles,
L'autre (les fictions des fiances sont telles)
Auec soy sa moitié s' imagine d'auoir,
Qui n'embrasse en la fin que le vent & l'esperoir:*

E P I T H A L A M E.

*Moy, qui te cognoissant Deesse, ne puis ore
Avoir plus grand desir, sinon quel on t'honore
Ainsi que ie voudrois d'un infertile soing.*

*Ie suis dedans Paris encor que i'en sois loing,
Où ie dessaine, & taille, & charpente, & massonne,
Ie brode, ie pourtray, ie coupe, ie faconne,
Ie cizele, ie graue, émaillant, & dorant,
Ie griffonne, ie peins, dorant & colorant,
Ie tapisse, i' assieds, ie festonne, & decore,
Ie musique, ie sonne, & poëtise encore:
Et en ne faisant rien ie fais tous ces mestiers,
Comme pour te servir i'eusse fait volontiers,
Et m'oserois vanter si tous mes beaux nuages
Remplissent ce papier, que les riches ouurages,
Quia u vray ce beau iour de nopces orneront,
Cent fois moins que mon songe au monde dureront.*

*Mais quoy, en doy-ie donc remplir ces vers? il semble
Qu'il suffist me pener, sans en voir mille ensemble
De faueur courtisane éplucher à loisir,
Et se pener en vain de ce qui m'est plaisir:
Ie ne le veux donc point: Il vaut mieux que i'acheue
Ton saint Epithalame, ou que ie me releue
Du tout de toute peine, & que tous ces vers ci
Ne soyent qu'une promesse, ainsi que font ici
Plusieurs, qui prometteurs d'histoire ou d'œuvre feinte,
Font naistre la souris ou la corneille peinte.
Ie ne le veux point donc: quoy? le malin diroit
Qu'apres la ville prinse au secours on iroit:
L'autre avec un sou-ris estranglé dans la gorge,
Louant l'ouurier, viendrait blâmer l'œuvre & la forge:*

L'autre

*L'autre plus dangeux, plaindroit que ie ne puis
Estre aussi sage & dous que bon ouurier ie suis:
L'autre diroit vrayment ce songe estre agreable,
Et qu'il espere voir ce ieune homme metable:
L'autre au rebours diroit, que ie croy, faire mieux,
Orgueilleux & trompé, que les plus studieux,
Et iugera de moy, qui suis humble & facile,
Que souuent mon orgueil rend mon ame inutile:
Qu'il eust trop mieux valu chanter ce qu'un grand Roy
Fait apprestier de grand, que ce qui vient de moy,
Tant que ie vois finir apres que i'auray dit
Que ce que mieux iamais Hymen au monde fit:
C'est ceste couple sainte, & grande, & vertueuse,
Que la faueur des Dieux face encor plus heureuse.
Ainsi ma seule, ardante & pure volonté
Rendra ton iugement sans rien voir contenté:
Toutesfois ie ne puis: ce Dieu qui me vient mettre
Ceste manie au chef, ne me veut point permettre
Que ie cede & desiste, & veut, ie pense, à tort
Me faire croire ici que des Rois le discord
Esteint, & leur enuie au fond d'oubli ietee,
Ont Discord & Enuie à leurs suiets ostee.
Et puis ie respondray qu'il n'estoit point besoin
D'offrir ceci plustost, sçachant qu'on a le soin
De chose encor plus grande, & qu'un sort aduersaire
Se rend souuent à l'heur de mes desseins contraire:
Aussi que le dessein plaire ie ne pensois,
Qui vient d'un homme docte, ou qui viêt d'un François:
Nostre peuple se sert à soy-mesme de rire,
Et comme Dieux nouueaux les estrangers admire.*

EPITHALAME.

*Je respon que bien tost mes œuures seront foy,
 Sans qu'on s'attache à tort, de ma vie & de moy:
 Je respon que l'orgueil ne me fait onc rien faire,
 Et qu'ore mon seul but c'est d'humble pouuoir plaire.
 Tousiours la modestie accompagne un cœur haut,
 Qui ne se hausse en rien, sinon quand il le faut:
 Et faut que sans blesser l'honneur & la noblesse,
 La vertu face à tous & support & caresse:
 Lon m'a tousiours veu tel, qui ne me di pourtant
 Ny grand ny vertueux, mais ces deus souhaittant.*

*O miserable terre, hélas, qui tes sens boûches
 Au bien, pour les ouurir aux medisantes bouches!
 O peuple vil & sot, qui sans fin hais le plus
 Ceux qu'honneur & vertu tient d'avec toy forclus!
 O Rois, ô siecle, ô Court, où l'ardeur sainte & gaye
 Pour le bien contre tous résister ne s'essaye!
 Je puis respondre encor, que si i'eusse peu voir
 Ce que de riche & grand ce saint iour doit auoir,
 Que i'eusse mieux aimé chanter l'honneur du Prince,
 Ton honneur vray, l'honneur de Paris ma prouince,
 L'honneur de ton Espoux, que pour un Dieu ie tien,
 Tant pour son propre los que pource qu'il est tien,
 Que non la vaine ardeur qui rien ne nous rameine,
 Qu'à moy d'escrire, à toy de la lire la peine.
 Mais qu'eusse-je peu voir, quand estant innocent
 Je suis du lieu par force & sans raison absent?
 Je n'ay pourtant nul soin de mon mal, l'innocence
 Rompt tout mal & souci, remors & penitence:
 Je n'ay iamais encor importuné mon Roy
 Soit de grace ou de biens, ie n'ay encor dequoy*

L'importuner de l'un, tant pour sçauoir cognoistre
 Comme il faut en la fin son droit faire paroistre,
 Que pour l'aise & le bien qu'aux lieux ausquels ie suis,
 I'ay receus, & qu'assez publier ie ne puis:
 Et pour sçauoir desia, tousiours ne mord l'enuie,
 Qu'on commence à cognoistre & mon droit & ma vie.
 Pendant donc que le vray deuiner ie n'ay sceu,
 Et que ce que i'escri s'executer n'a peu,
 Au lieu d'un vray present de chose plus aimee,
 Laisse toy doucement encenser de fumee,
 Digne offrande des Dieux, avec un tel encens
 Ma volonté plus sainte au ciel voler ie sens,
 Qui porte dessus soy ses honneurs, ce merite,
 Ce grād nom que Pallas eschange à MARGVERITE,
 Et ce nom PHILEBERT, qui tous deux apres eux
 Ayant le monde orné feront honneur aux cieux:
 Vn cœur deuot se feint la presence en absence,
 Iettant l'œil & la foy hors de son apparence.
 Mais pourquoy si long temps semblé-ie marchander?
 Il semble que ie vueille en vain recommander
 L'ouurage par l'attente à l'ame desireuse:
 La chose delayee apparoit precieuse.
 Qui que tu sois pourtant Dieu, qui me faisant gros
 De charge en vain germee, & qui mouuant mes os,
 Tendrant mes nerfs, bruslāt mon sang, renflāt mes veines,
 Comme si ie souffrois à ton sortir les peines
 De la femme accouchante: Ore sors sors dehors,
 Tu es trop gay pour estre étouffé dans mon corps:
 Je retien ta fureur en moy si long temps close,

*

*

*

p ij

EPITHALAME

Dont l'opinion faulſe & deſia le long temps
 Qu'enuers ceſte Deeſſe en reſte ie me ſens,
 Me chargeoient l'eſtomac, ou pour uſer d'une autre
 Comparaiſon plus gaye en ceſte longueur noſtre.
 Ie te manie ainſi que quand vn bon piqueur
 Sur la carriere eſſaye vn cheual belliqueur,
 Si toſt piquant au vif & luy lâchant la bride
 Ne luy donne carriere, ains en brauant le guide
 Pas à pas, fierement d'un orgueilleux dédain,
 Le faiſant ſe iouer de la charge & du frein,
 Compaſſer hautement ſa pompeuſe pennade,
 Sans ſault, & ſans gallop, ſans bond & ſans ruade,
 Eſcumer, ſe gourmer, & d'un braue hennir
 Monſtrer prendre courroux qu'on le vient retenir,
 Puis adroit roidement ſa carriere luy donne,
 Puis il l'arreſte, & puis de rechef luy redonne,
 Puis plus folleſtremement le volte à toutes mains,
 A courbettes, à bonds, tant que de ſueur pleins
 Le maiſtre & le cheual rapportent ceſte gloire,
 De n'eſtre faits tous deux ſinon pour la victoire.

A toy gaye fureur i'ay long temps retenu
 La bride, & ne ſembloit eſtre en ce champ venu,
 Sinon que pour brauer & partir ſans rien faire
 Comme ſi ſans donner plaiſir ie voulois plaire.

Or ſus donc, vie-vie eſſorce maintenant
 Ta courſe, & fay ſi bien qu'on aille ſouſtenant,
 Que d'emporter le prix indignes nous ne ſommes:
 Toy de beaucoup d'eſcris, & moy de beaucoup d'hommes.
 Celuy qui a le cœur plus deuôt en tels lieux,
 Face qui voudra faire, il fait tousiours le mieux.

Carcela qu'il a moins qu'un autre d'excellence,
 L'ardeur le luy fait prendre ou bien le recompense.
 Me voila donc, i'y suis, bien tost tu m'as porté
 Dans ma ville où ie voy, ce qui est appresté,
 Par moy, sous le vouloir de mon Roy, ce me semble,
 Ioignant l'honneur, la grace, & la richesse ensemble.

Ia l'Aurore laissant son Tithon endormi,
 Chasse la nuit ombreuse, & reseme parmi
 L'air tranquille & serain des roses qu'elle appreste
 Pour les faire pleuvoir sur
 Dedans la maison iointe au temple principal,
 Où mon Prince est couché, i'oy l'accord musical
 Des Chantres & sonneurs plus diuins, qui reueillent
 Deçà delà ces Dieux, qui ce matin sommeillent,
 Fors les Amans assez reueillez de l'amour,
 Qui les fait souhaiter le soir de ce beau iour.

I'ay bien d'autre façon habillé telle bande,
 Quel'usage commun grossier ne nous commande,
 Guillaume, Iean Dugué, Charles, Mitou, sont ceux,
 Que de nom & d'habit, i'ay fait Princes d'entr'eux:
 L'habit fait qu'assez bien à ces noms ils conuiennent,
 Leur son fait que ces noms pour iamais ils retiennent.
 Guillaume est un Phebus, Charles tant de la main
 Comme du reste imite un Amphion Thebain,
 Iean Dugué fait le Pan, Mitou qui l'accompagne,
 Le Thracien Orphee, & pour ce coup dédaigne
 Son luth, ayant aux champs Elysiens appris
 D'un gentil instrument, qu'il a maintenant pris.
 Les deux dessus le luth, dont comme Dieux ils sonnent,
 Doucement un Sonet doux & hautain fredonnent,

EPITHALAME.

Que sur ce iour i'ay fait: les deux autres suiuaus
 Accordent au sonet & au son, émouuans
 L'ame plus aigrement: l'un touche ses regales
 Aux sept tuyaus de Pan Archadien égales:
 Et l'autre vn clauecin accorde gayement,
 Et selon sa partie avec l'autre instrument.
 Deuant chacun des deux, par enfans de la sorte
 Quelon peint les Amours, leur instrument se porte,
 Et tous ces quatre ensemble ont sur moy tel pouuoir,
 Que ie pense ces Dieux, & non ces hommes voir,
 Quand l'un d'eus tient le plain, l'autre dessus fredonne,
 Et le tiers fredonnant, le quart plainement sonne:
 Puis rechantent soudain, & se iouans de nous
 Avec vn dous réueil donnent vn sommeil dous,
 Et sans la prompte ardeur en chacun embrasée,
 Ie croy que lon lairroit en son liét l'esposée.
 Ces quatre donc tous seuls des autres à l'écart
 Se faisans rois de sens font leur musique à part.

Ie voy là d'harmonie encore vne autre bande,
 Qui guere moins aux sens de nous tous ne commande,
 Ce sont Muses, parmi ceste troupe i'ay mis
 Deux de ces trois enfans Italiens transmis
 Non de Rome, ains du ciel, pour adoucir la peine,
 Que toute affaire apporte au Prelat de Lorraine.
 En vn autre troupeau de Chantres on peut voir
 Leur frere plus âgé faire vn autre deuoir:
 Mais quant à ce saint Chœur, qui si bien se deguise
 Et de port, & d'habits, sur tout vne Denise,
 Denise Muse vraye ores que mieux ie l'oy,
 Avec sa voix hautaine emporte hors de moy

Mon ame dedans l'air: les six autres pucelles
 Se sont en tous estats choisies des plus belles,
 Ou qui pouuoient au moins avec quelque beauté
 Ioindre ce diuin chant dont ie suis enchanté:
 Les oyant tant au vif représenter l'antique,
 Qu'elles nous semblent rendre encor la chromatique:
 Chacune tient en main vn instrument diuers,
 Que les vnes vont bien accordant aux saincts vers;
 Dont i'ay loué les Dieux auteurs de l'alliance,
 Aux autres il ne sert sinon de contenance.

Vne autre troupe encor des Chantres mieux appris,
 A qui donne la Court l'entretien & le pris,
 Marchent tels que lon peint les poëtes antiques,
 Entre lesquels on voit les huiët sçauans Lyriques,
 Sapphon est autre part, & tant d'autres bien nez,
 Vestus en long, & tous de laurier couronnez.
 Ces grands Demons humains, ces Chantres & Poëtes,
 Vont chantant d'un ramas des choses que i'ay faites
 Sur le los de la Paix, les traits les mieux tirez,
 Ausquels on a des chants celestes inspirez,
 Comme l'ame des vers. Vne bande confuse
 D'autres musiciens tous enfans de la Muse,
 Serompt deçà delà portant diuersement
 D'homme ou de Dieu si bien le vieil accoustrement,
 De femme, & de Triton, de Seraine, & Satyre;
 Que leur son fait mourir, leur gaye façon rire.
 Leurs chants sont fort diuers, folastre est leur accord,
 Hors des vulgaires loix, mais pourtant sans discord:
 Aussi tous separez, trois à trois, quatre à quatre,
 Ne souffrent le plaisir par le discord combattre:

EPITHALAME.

Trois beaux enfans qui sont, & femmes & poissons,
Des Seraines encor vont imitans les sons.

Voila vn petit mont, qui porte sur sa pente
Mercure encor assis, qui maintenant n'enchanté
Nostre lumiere, ainsi qu'il fit d'Argus les yeux,
Sa flutte nous réueille, & si peut tous les deux.
Mon Anglois qui chez moy m'a cent fois de sa harpe
Recréé les esprits, l'ayant ore en écharpe
Contrefait Arion, sur des flots cheuauchant
Son Dauphin, & sauuant sa vie par son chant.
Sapphon sur vn rocher, qui enleué la porte,
De son cistre & sa voix ses amours reconforte:
Le Centaure Chiron sagement compassant
Sa marche de cheual, & son arc delaisant
Qu'il porte dans le ciel, tient la lyre diuine,
Dont il apprist au fils de Thetis la marine,
Et sonnant fait le quart. Entre ceux ci voila
Quatre autres qui vn peu s'écartent de ceux-là,
Qui d'une aigre musique & gaillarde & hautaine
Font retentir le ciel à grand' force d'haleine:
Vn Triton embouchant vn gros instrument creus,
Trompe des Dieux marins retorse en plusieurs nœus,
Porté dessus des flots de toque blanche & bleüe,
Dieu vieillard par le haut, & poisson par la queue,
Sert d'une basse-contre à ces quatre. Vn Triton
Plus ieune que cetui, d'un plus mesuré ton
Va remplissant sa trompe, autrement retournée
Que celle que son pere a si bas entonnée.
Deux Satyres plus haut & plus clair que ces deux,
De cornets à bouquin éclattent avec eux,

La-Mare, que premier entre ceux-ci i'estime,
 Vn ton perçant & dous si viuement anime,
 Que les plus endormis soit d'ici, soit d'autour,
 Se iettent hors du liect, beniffans ce beau iour
 Où le ciel se deccœure à leurs yeux favorable,
 Autant qu'est cet accord à l'aureille agreable.
 Voila, ie voy sortir encor de ce degré
 Trois pasteurs, qui tantost iouoient tant à mon gré
 D'un flageol, d'une fluste, & d'une cornemuse,
 Qui m'ont fait souuenir de la rustique Muse,
 Qui ne dedaignant point les troupeaux & les bois,
 Ny la chanson champestre, enflamba quelquefois
 Tytire Mantouan, Damete de Sicile,
 Et l'Ergaste gentil de Naples la gentile:
 Darinel en est l'un, qui bourdonne si bien,
 Qu'aux chants Arcadiens le Poictou ne doit rien.
 Toutes ces bandes sont de gens excellents pleines,
 Soit en esprits, en mains, en vois, ou en haleines,
 Mesmement quelques uns qui de nom & d'honneur,
 Dédaignent le nom vil de publique sonneur,
 Se sentent trop heureux pour toy qui es Maistresse.
 De la troupe sçauante, & troupe chanteresse,
 D'honorer ce saint iour, comme feroient ces Dieux,
 Comme feroient aussi ces saints esprits des vieux,
 Contrefaits par ceux ci, si ces gaillardes bandes
 N'approchoient de si pres de leurs graces plus grandes:
 Ou si eux-mesme au ciel, ou là bas dans leurs champs,
 N'auoient à rejouir aujourdhuy de leurs chants.
 Les Ombres & les Dieux, pour les saintes concordés
 Qui nous accordent mieux que n'accordent leurs cordes.

EPITHALAME.

Je ne voy point ici ce bien sonnante *Albert*,
 Heritier de l'honneur de son pere: *Lambert*,
 Ny tant d'autres encor que nostre Court renommie,
 D'estre nés à tirer à soy l'esprit de l'homme,
 Comme *Orphee* les bois, ne sy sont point trouuez,
 Et croy que pour la chambre ils se sont reseruez.
 Ton *Francisque* est absent que ie plain d'auantage,
 Sois *Deesse* enuers luy, & pardonne à son âge.
 Je ne voy plus ici de bande, dont le son
 Et l'habit represente vne antique façon:
 Les bandes de hauts-bois, & clérons, & trompettes,
 Aux autres faisans place & iusqu'ici muettes,
 Ont bien sceu qu'il est iour ici de tout costé,
 Que toute dame ioint la pompe à la beauté,
 Qu'on leue les deux Rois, que desia lon habille
 Ces trois Roines, la Meré, & Fille, & Belle-fille,
 Et que sur toutes, toy (de ce iour le Soleil)
 Tu vas faire enrichir d'un éclat nompareil,
 D'or, d'argent, de flambeaus, qui par tout illuminent,
 Dessus lesquels encor tes deux beaux yeux dominent.

De tous cœurs se saisit l'allegresse, & le soing
 Avec le vent qui sort, & emporte bien loing.
 L'accoustrement d'eux tous, sans qu'on leur accommode
 Quelque antique personne, est fait à nostre mode,
 Que fort riche d'étoffe, encor mieux façonné
 De tes couleurs, tu as à chacun d'eux donné.

Tous ces gais violons sont de mesme liuree,
 Et maints autres desquels nostre Court se recree,
 Qui veut, ie croy, ce iour, ven ces seules merueilles,
 Souler tous grands esprits, tous yeux, toutes oreilles.
 Sus enfans, sus amis, sus sus troupeau diuin,
 La musique est la sœur de la ioye & du vin:
 Du vin la fureur sainte égayant par mesure,
 Fait mesme souuent vaincre & l'art & la Nature:
 Allez, dessemblez-vous, le vin frais vous attend,
 Desjunez, rendez-vous l'esprit libre & content,
 Et puis demi-repens de legere viande,
 Que chacun plus dispos se retrouve en sa bande,
 Afin que quand le iour se monstrera plus haut,
 Et que le Roy voudra qu'on marche, comme il faut,
 Par ordres & par rangs vos troupes ie dispose
 Pour marcher, sans confondre en vous la moindre chose,
 Par ceste grandeallee que i'ay fait ordonner,
 Ce qui peut tout ce peuple & moy-mesme étonner.
 Cesteallee à main dextre au long du mur menee,
 Et selon les retours par compas retournée,
 Tantost baissant plus bas, & tantost se levant,
 Sans perdre pourtant grace, & tousiours ensuiuant
 Sa hauteur, sa largeur, & l'art qu'on y contemple,
 Presque iusques aupres des portes du grand Temple
 Commence, à l'huis duquel tous ces Dieux sortiront,
 Qui sous elle à couuert iusques au temple iront.

Ie l'ay presque en façon de longue gallerie
 Fait fonder, & leuer sur la charpenterie,
 Qui se suit, baisse, hausse & tourne par endroits,
 Par espaces, gardant ses allignemens droits:


E P I T H A L A M E.

Car tantost à niveau tout droit se continue,
 Puis tantost la mesure & grace retenue
 Peu à peu fait son fais deualler contre-bas,
 Puis peu à peu le monte encore par compas:
 I'ay toutesfois par tout de gros festons de l'hierre
 Reuestu tous les bords, & mesme iusqu'à terre
 Couuert & enrichi tout ce qui la soustient,
 Tant que rien en tout l'œuure offenser ne nous vient.
 Sur ce bois donc qui sert à tout l'œuure de ferme,
 De huit piedz en huit piedz on voit vn double terme,
 Duquel la hauteur va le naturel passant,
 Qui en deux chefs humains par le haut finissant,
 Dont l'un monstre au dehors, l'autre au dedans la face,
 Dont l'un est masle, & l'autre a de vierge la grace,
 Se couple dos à dos, & tousiours au milieu
 De sa hauteur ioignant les deux nombrils au lieu
 De iambes & de piedz, il s'amortit en pierre,
 Qui large par le haut descendant contre terre,
 Tousiours se ramenuise, & au pied seulement
 S'eslargit, se plantant ainsi plus fermement:
 Ie les ay fait, à fin que chasque terme ensemble
 Sans differer d'un trait l'un à l'autre ressemble,
 Tous mouler de papier, qui cache dans le creux
 Ce qui soustient le fais qui repose sureux:
 L'artisan studieux a d'une grace telle
 Dans son moule exprimé l'action naturelle,
 Qu'à les voir on diroit qu'ils ahanent bien fort,
 Et que presque leur corps raccourcit sous l'effort,
 Tant bien pour soustenir chasque arcade voutee,
 Mesme la voute aussi des arcades portee:
 Ils renfoncent les yeux, ils referrent les dents,

Ils replissent le col, & retenans leurs vents
 Ils se font arondir le ventre & la poitrine,
 Ils renflent les tetins, & renfrongnent la mine:
 Je les eusse bien fait au lieu de les brunzer,
 En toutes les couleurs de marbre déguiser,
 Et prendre leur poli, ou bien en pierre nostre,
 En serpentine, albastre, ou porphyre, ou quelque autre,
 Mais la façon du brunze est haute, & se peut mieux
 Representer au vif & contenter les yeux:
 Ce qui s'est si bien fait, qu'on ne scauroit cognoistre
 Lequel des deux ouuriers s'est monstre meilleur maistre,
 Le sculpteur, ou le peintre: ils sont ainsi qu'alors

CONTR'AMOVRS.

I.

 O V S, ô Dieux, qui à vous presque égalé m'auez,
 Et qu'on feint comme moy serfs de la Cyprienne:
 Et vous doctes amans, qui d'ardeur Delienne
 Viuans par mille morts vos ardeurs écriuez:
 Vous esprits que la mort n'a point d'amour priuez,
 Et qui encor au frais de l'ombre Elysienne
 Rechantans par vos vers vostre flamme ancienne,
 De vos palles moitez les ombres resuiuez:
 Si quelquesfois ces vers iusques au ciel arriuent,
 Si pour iamais ces vers en nostre monde viuent,
 Et que iusqu'aux enfers descende ma fureur,
 Apprehendez combien ma haine est equitable,
 Faites que de ma faulx ennemie execrable
 Sans fin le Ciel, la Terre, & l'Enfer ait horreur.

CONTR'AMOURS.

I I.

O Toy qui as & pour mere, & pour pere,
 De Iupiter le saint chef, & qui fais
 Quand il te plaist, & la guerre, & la paix,
 Si ie suis tiën, si seul ie te reuere,
 Et si pour toy ie dépîte la mere
 Du faux Amour, qui de feux, & de traits,
 De paix, de guerre, & rigueurs, & attraites
 Tâchoit plonger ton Poëte en misere,
 Vien vien ici, si venger tu me veux,
 De ta Gorgone éprein moy les cheueux,
 De tes Dragons l'orde pance pressüre:
 Enyure moy du fleuve neuf fois tors,
 Fay-moy vomir contre vne, telle ordure,
 Qui plus en tache & en l'ame, & au corps.

I I I.

Dés que ce Dieu sous qui la lourde masse
 De ce grand Tout brouillé s'écartela,
 Les cieux plus hauts clairement étoila,
 Et d'animaulx remplit la terre basse:
 Et dés que l'Homme au portrait de sa face
 Heureusement sur la terre il moula,
 Duquel l'esprit presqu'au sien égala,
 Heurant ainsi sa plus prochaine race:
 Helas ce Dieu, helas ce Dieu vit bien
 Quel deniendroit cet homme terrien,
 Qui plus en plus son intellect surhausse.
 Donc tout soudain la Femme va bâstir,
 Pour asservir l'homme & l'aneantir
 Au faux cuider d'une volupté faulse,

IIII.

Je m'étoy retiré du peuple, & solitaire
 Je tâchoy tous les iours de iouir sainctement
 Des celestes vertus, que iadis iustement
 Iupiter retira des yeux du populaire.
 Ja les vnes venoyent deuers moy se retraire,
 Les autres i'appelloy de moment en moment,
 Quand l'Amour traistre, hélas! (las trop fatalement!)
 Te fit, ô ma Pandore, en mall' heure me plaire:
 Je vy, ie vins, ie prins, mais m'ouurant ton vaisseau,
 Tu vins lâcher sur moy un esquadron nouveau
 De vices monstrueux, qui mes vertus m'emblèrent.
 Ha, si les Dieux ont fait pour mesme cruauté
 Deux Pandores, aumoins que n'as-tu la beauté,
 Puis que de tout leur beau la premiere ils comblèrent!

V.

Myrrhe bruloit iadis d'une flamme enragée,
 Osant souiller au liét la place maternelle:
 Scylle iadis tondant la teste paternelle,
 Auoit bien l'amour vraye en trahison changée:
 Arachne ayant des Arts la Deesse outragée,
 Enfloit bien son gros fiel d'une fierté rebelle:
 Gorgon s'horribla bien, quand sa teste tant belle
 Se vit de noirs serpens en lieu de poil chargée:
 Medee employa trop ses charmes, & ses herbes,
 Quand brulât Creon, Creuse, & leurs palais superbes,
 Vengea sur eux la foy par Iason mal gardée.
 Mais tu es cent fois plus, sur ton point de vieillesse,
 Pute, traitresse, fiere, horrible, & charmeresse.
 Que Myrrhe, Scylle, Arachne, & Meduse, & Me-

CONTR'AMOURS.

V I.

O traistres vers, trop traistres contre moy,
 Qui souffle en vous une immortelle vie,
 Vous m'apastez, & croissez mon enuie,
 Me déguisant tout ce que j'apperçoy.

Je ne voy rien dedans elle pourquoy.

A l'aimer tant ma rage me conuie:

Mais nonobstant ma pauvre ame afferuie

Ne me la feint telle que ie la voy.

C'est donc par vous, c'est par vous traistres carmes,

Qui me liez moy mesme dans mes charmes,

Vous son seul fard, vous son seul ornement,

Ja si long temps faisant d'un Diable un Ange,

Vous m'ouurez l'œil en l'iniuste louange,

Et m'aveuglez en l'iniuste tourment.

V I I.

Combien de fois mes vers ont ils doré

Ces cheueux noirs dignes d'une Meduse?

Combien de fois ce teint noir qui m'amuse,

Ay-ie de lis & roses coloré?

Combien ce front de rides labouré

Ay-ie aplani? & quel a fait ma Muse

Ce gros sourcil, où folle elle s'abuse,

Ayant sur luy l'arc d'Amour figuré?

Quel ay-ie fait son œil se renfonçant?

Quel ay-ie fait son grand nez rougissant?

Quelle sa bouche, & ses noires dents quelles?

Quel ay-ie fait le reste de ce corps?

Qui, me sentant endurer mille morts,

Vinoit heureux de mes peines mortelles.

CON-

CONTRE LA RIERE-
VENVS.

PVISQVE tu veux qu'ici ta sainte ardeur,
ô Muse,
A detester une orde & sale ardeur s'amuse,
Dont l'infete vapeur peut presque empuantir
L'odeur du feu qu'en moy tu fais du Ciel sortir,
Il faut que dans ces vers ta flame eclaire en sorte,
Qu'elle rende en la fin l'enorme flame morte,
Qui d'un prodigieux & stygien flambeau
Tâche amoindrir l'amour, l'autre feu clair & beau,
Et qui honte du Ciel, des Dieux, & d'Amour mesme,
Deuroit d'aboremment & contre-cœur extreme
Nous faire oster le feu qui de l'Amour nous vient,
Par qui Nature ici nostre genre entretient:
Ains d'erreur, de hideur, & d'horreur deuroit faire
Perdre aux flambeaux du ciel leur lumiere ordinaire,
Faire aux Dieux retirer la flame d'entre nous,
Qu'apporta Promethee aux vsages de tous:
Faire plus qu'un repas de Thyeste en arriere
Aux cheuaux du Soleil rebrousser leur carriere,
Et nous priuer en fin de la flame du iour,
Nous frustrant des effets du flamboyant Amour,
Qui premier eclarcit la masse tenebreuse.
Plein donc d'un ardent fiel contre l'ardeur hideuse,
Mesme ayant commencé par tant de feus diuers,
Ie veux que de feu mesme apparoiſſent mes vers,
Afin que si la France à tel monstre pardonné,
Auant qu'en tant de chefs serpentins il foisonne,

C O N T R E

*S'il ne doit que par feu comme l'Hydre perir,
 Sauué du feu public vienne en mon feu mourir.
 Iamais ne fut assez en son vray los tenuë
 Ny pratiquée au vray, ny mesme au vray cognë
 D'amour la claire torche : & ce noir brandon ci
 Ne peut estre aborré, ne peut estre obscurci
 D'une execration, qui assez pour luy vaille,
 Puis que contre les loix de Nature il bataille.
 Si tout bien de Nature est sur tous biens sacré,
 Tout mal contre elle soit sur tous maux exécré:
 Quoy que ie couure ou monstre amour, iamais n'appaise
 Au foyer de mon cœur l'aspre & l'occulte braise,
 Dont l'effort plus contraint se rend d'autant plus chaud:
 Et comme ces Demons qui sont du rang plus haut,
 Et qu'on croit dans le feu dernier element viure,
 Mon esprit, qui leur haut naturel semble suiure,
 Deust-il sentir son corps consumer peu à peu,
 Brulant d'amour ne peut viure ailleurs qu'en son feu.
 La flame aux cieux volant, viët des cieux, & nostre ame
 Est plus celeste alors qu'elle enclost plus de flame:
 Mais comme ie me laisse à toute heure attiser
 Tel foyer qui prochain vient mon ame embraser,
 Aimant mesme vn amour qui agreant moleste:
 Cet autre amour contraire à l'amour ie deteste,
 Ie hay, ie fui, j'aborre vne Riere-Venus,
 Dont les feus puis n'aguere en France sont cognus.
 Car le brandon qu'un cœur sous nostre Amour endure,
 S'allume dans le ciel de flame haute & pure,
 Telle, comme ie croy, que peut auoir aux cieux
 Pour les Dieux & pour nous le seul œil de tous yeux:*

Le ciel, le feu, l'air, l'eau, la terre, & ce qui mesme
Ou dans nostre bas Globe ou dans tout rond supreme,
Discourt & sent & croist, fait hommage au brandon
D'amour, & ce grand Tout n'est rien sans Cupidon,
Qui seul fait & repare & maintient ce qu'enferme
En soy le ciel, le feu, l'air, & l'onde, & la terre,
Au rebours du brandon horriblement infet,
Qui ne fait aucun œuure issir de son effet,
De Nature la haine & l'outrage execrable:
D'autant qu'à celuy-là de Megere semblable,
Il fallume là bas aux brandons inhumains,
Fumeus, puans, sanglans, dont s'horriblent les mains
Des sœurs, qui pour cheueux sur leur chef amoncelent
Leurs hideus couleureaus, & qui tantost bourrelent
Les coupables esprits de ces serpens rongeurs,
Arrachez d'un tel poil, ou de ces feus vengeurs,
Qui vn poison de rage & puanteur font prendre
Au brandon qu'Amour faux dessus eux fait épandre:
C'est pourquoy son effet des faux cœurs enchanteur,
Leur fait d'une orde rage aimer la puanteur.
Lâche & vilain se voit le desir qui endure
Son contentement propre, auoir pour but l'ordure,
Et que cela qui mesme au contentement sort,
Doiue avecques l'ordure aller au lieu plus ord:
Qui telle Venus monstre estre d'embas yssue,
Puis qu'au fond de la terre elle est encor receue.
Que donc l'Amour hautain mette en cendre mon cœur,
Non pas une infernalle & furialle ardeur.
Comme maint oisillon approchant d'auantage
L'ardent Soleil, son chant en son chaud encourage:

C O N T R E

Comme vn Grillon nocturne est au chant enflammé,
 Tant plus il sent au soir son foyer allumé:
 Et comme la Cygale au fort de l'Esté chante,
 Tant plus la chaleur est & brulante, & sechante:
 Sur mes heurs malheureux, sur mes gayer douleurs,
 Je fay maint chant diuers au milieu des chaleurs,
 Et sans fin pour l'amour, qui ses cruels alarmes
 Refreschit dans mon cœur, ie pren mesme les armes
 Deffendant mon tyran: mais ne pouuant aimer
 L'autre amour, contre luy ie veux mes chants armer
 De plus fort en plus fort. Car tout bon cœur ne souffre
 Ce feu, non plus qu'un feu se degorgeant du souffre
 Que la bouche du mont Sicilien rendroit
 Alors que plus de souffre en son ventre fondroit:
 Non plus que des serpens chaque espee prochaine
 Du Basilic, ne peut endurer son haleine,
 De l'haleine & non pas du regard, comme on feint,
 Ce royal serpenteau la vie en eux esteint:
 Non plus que l'air sortant des mares groupissantes,
 Ou l'air plus corrompu des cloaques puantes:
 Non plus que la fumee emmi les champs sortant
 D'un feu fait de toute herbe & tout bois mal sentant,
 Ou ces fortes vapeurs par medecines extraites
 Des drogues que lon trouue entre autres plus infetes:
 Non plus que des serpens plus chauds & plus vilains,
 Les repaires qui sont d'estrange odeur tous pleins,
 Ou des porcs engressez le tet plus ordinaire,
 Ou d'autres animaux plus puants le repaire:
 Et non plus qu'un amas charongneux de ces corps,
 Soit d'animaux puants, ou soit de serpens morts,

Horreur mesme aux oiseaux & bestes carnacieres,
 Ne peut estre enduré par les plus charongnieres.
 Mesme à fin qu'en laissant toutes autres senteurs,
 I'approprie à tel fait ses propres puanteurs,
 Non plus que cela mesme en qui souuent se souille
 Ce crime, qui l'ordure aime, recherche & fouille
 De fort près, & long temps ne peut estre souffert
 D'un, qui par punaisie au moins tel sens ne perd.

- L'ame aimant les vertus abomine le crime
- Plus qu'un bon nez l'odeur ne reiette ou estime.

Si donc tel monstrueux & sale échauffement
 Hors mon ame amoureuse encor plus ardemment
 Par un beau contre-feu de mon amour se chasse,
 Qu'ardemment mon amour par elle ne s'embrasse:
 Il faut bien que mon chant, puis qu'en ces vers tousiours
 I'oppose l'amour nostre aux monstrueux amours,
 Face prendre à tous ceux qui hayent telle peste,
 Vn si grief contre-cœur du mal que ie deteste,
 Qu'il puisse encor passer la pitié, la faueur,
 La iuste bien-vueillance & l'ardente ferueur,
 Qu'en écriuant d'amour ie veux grauer en celle,
 Qui fait, qui sçait mon feu, qu'en decourrant ie cele.
 En ceci ie l'implore, elle qui iuste doit
 Par pitié bienheurer ma ferueur, qu'elle voit
 Si bien à la chaleur de ma vie estre estainte,
 Que l'une en moy ne peut se voir sans l'autre esteinte:
 Si bien qu'un tel tortis se croisant, se laçant
 De cent nœus, & dans l'air en ma mort se haussant,
 Fera voir tout d'un coup mon amour & ma vie
 En deux pointes de feu iusques au ciel rauie.

C O N T R E

Je voudrois qu'en voyant bouillir mon fiel si fort
 Contre un forfait, qui fait aux Dames tant de tort,
 Et qui peut mesme faire aux François de nostre âge
 Trop plus qu'à la Nature & aux Dames d'outrage,
 Elle vint tout ensemble ici favoriser
 Ce qui peut & mon fiel & mon cœur attiser,
 Mon fiel tout plein de haine encontre ceci forte,
 Mon cœur tout plein d'amour qu'immortel ie luy porte,
 Et qu'avec moy iurant en mon mesme dessein,
 Elle fist plus que moy, qui suis de courroux plein:
 Si bien qu'en se ioignant aux Deesses plus belles,
 Se voilans de ces noms Dames ou Damoyelles,
 Elle fist que chacune vst du haut pouuoir
 Qu'on leur voit contre nous en nostre amour auoir:
 Au moins si leur bel œil & leur pudique oreille
 Pouuoient ouir & voir ceste horreur nompareille,
 Par l'eclat de leurs yeux qui peut mesme eclaircir
 Tous les cieux; & d'eclairs toute flamme obscurcir,
 Raur soudain du ciel des Dieux l'ame immortelle,
 Et des humains porter au ciel l'ame mortelle,
 Forcer mesme aux enfers Pluton de les aimer:
 Pour amortir ce feu qui nous vient diffamer,
 Elles viendroyent estans iustement irritees,
 Et dans ces vers encor par mon ire excitees,
 Estindre telle rage: en faisant par beaultez
 Tel obscur brillement ceder à leurs clartez,
 Voire armant pour chasser telles forceneries,
 Au ciel, terre & enfers, Dieux, & Rois & Furies.
 Mesme aux premiers arrests par leur grandeur donnez
 Contre ceux qu'on verroit du crime soupçonnez,

Elles les priueroient pour iamais d'auoir place
En leurs yeux, en leur cœur, en leur memoire & grace,
Tant qu'elles, que lon croit de Nature l'honneur,
De son beault plus beau, l'heur plus grand de son heur,
De Nature les fleurs, & plus dignes richesses,

De Nature par moy se feissent Vengeresses:
Mais elles ne voudroient honteuses en ceci
Entendre le seul nom de ceste hideur ci.

Tout François vrayment noble, à qui la force grande
Des Dames & d'Amour par son vray sens commande,
Du nom & plus du fait prendra, ce croy-ie, horreur,
Sans me lire & sans prendre en mes fureurs fureur:

Moymesme ie ne puis dans vn tel chant me plaire,
Qu'à bon droit & pour bien ie suis contraint parfaire
Sans peine & sans plaisir. Souuent l'aspre courroux
Maint discours prompt & haut peut pousser hors de nous.

La prestresse à Phebus quand ce Dieu la possède,
Par force à la fureur de ses oracles cede:

Elle sent en sa langue vn forcé mouuement,
Changement en son corps, nouueau transportement,

En son esprit prophete, en sa poitrine enfleure,
En sa face, en ses yeux mesme, en sa cheueleure,

Paleur, terreur, meslange, & sans aucun plaisir
Met hors ce qui luy vient esprit & corps saisir.

C'est malheureux sujet que de voir ou d'entendre,
D'écrire ou de parler, ce qui l'horreur engendre.

Tout ord & vilain vice en soy tousiours a eu
Deplaisance estant dit, & croissance estant teu.

Quand l'instinct de l'Amour ranimant dans moymesme
L'autre ardeur de chanter l'embrasement extreme,

C O N T R E

*M'offre ainsi double feu: l'un dont l'amour nous ard,
 L'autre dont Apollon nous échauffe en son art,
 Faisant au feu premier si viue clarté rendre,
 Qu'il puisse apres la mort éclairer nostre cendre.
 Je m'égaye en ces feus, bien qu'ils m'aillent brulant,
 Comme sur le mont d'Oete vn grand Hercule allant
 Par brulement au ciel, lors qu'une flame telle
 Purgeant sa chair diuine eust brulé sa mortelle:
 Ou comme cet oiseau, qui pour renouueller
 Sa vie vient soy mesme apres mil ans bruler.
 Car telle ardeur d'amour qui aux grands cœurs viët nai-
 Rencontrant l'autre ardeur chasse le mortel estre, (stre,
 Nous porte dans le ciel, gaignant par vn tourment
 L'éternité qui sort d'un hardi brulement,
 Tant que de nostre cendre à la mort afferuie,
 De siecle en siecle on voit renouueller la vie,
 Qui se rend par pareil & perpetuel cours
 De memoire aux deux noms, aux vers, & aux amours:
 Ce qu'attendre ie puis, non ceux dont on decœure
 Auant la mort mourir les vers, l'amour & l'œure,
 Bien qu'il se vantent tous, singes de haults esprits,
 D'éterniser leur nom, leur Dame & leur escrits:
 Ce cher loyer des Dieux, de Nature, & des astres,
 N'est pas pour les labeurs des malings poëtaïstres.
 Moy donc estant épris de ces deux diuins feus,
 Je donne à l'heure vn stile aux vers tel que ie veus,
 Pouuant tourner ma Muse en mainte & mainte forme,
 Comme quand vn Prothee en cent façons se forme,
 Comme Achelois sentant l'effort Herculean,
 Comme Thetis fuyant l'autre effort Pelean.*

L'ample

L'ample sujet d'amour presque encloist toute chose,
 Que tout autre suiet à nos discours propose:
 Luy des Dieux premier né, nous fait parler des Dieux,
 Rechercher leur substance & compasser les cieux
 S'accordans par luy seul, tellement que sans peine
 Là haut de cercle en cercle un haut sens il pourmeine,
 Pour commencer l'essence & les cours & les rangs
 Des astres arrestez, & des astres errans:
 Luy qui est tout flambant & nostre flame eglise,
 Nous porte dans la flame apres les cieux assise
 Au plus haut de son monde, & luy seul inspirant
 L'air, que nous respirons, en l'air nous va tirant,
 Puis sur toutes les mers nous dresse un nauigage,
 Où souuent nostre espoir par luy souffre un naufrage,
 Il rompt son vol & vient sur terre se ficher;
 Pour dedans & dehors la flame rechercher:
 Soit tel qu'on feint ou non, proffitable est la feinte
 Par qui presque de tout la science est attainte.
 Luy donc qu'on fait aussi de toute vie autheur,
 Comme on le feint aussi l'autheur & le moteur,
 Fait que l'aigu discours sous sa guide decœuvre
 De Nature tout art, toute cause, & tout œuvre,
 Toute matiere & forme, & donne tant d'objets,
 Fait prendre un diuers stile en si diuers sujets,

* * * * *

St

f. VI

SONNETS.

Des guerres du Roy Henry deuxiesme, contre
l'Empereur Charles cinquiesme, apres le
siege de Metz leué.

E dol long temps couué, la surprise, & l'audace,
Tombent en contreruse, en repousse, & rabais:
Quiconque hait les siens, leur repos, & leur pais,
L'estranger, le trauail, la guerre le terrasse,
Celuy n'est plus qu'un songe, va tronc, & une glace,
Qui veilloit, florissoit, & bruloit en ses faits:
S'on veut vaincre, enrichir, reuiure par meffaits,
La dépouille, la perte, & la mort nous menasse.
Malheur quand l'âge vieil, le trouble, & la froideur
Rencontre vne ieunesse, vn accord, vne ardeur:
Par ces trois l'heur passé, l'effort, & l'esperance
Se tournent en malheur, foiblesse, & desespoir,
Or' que l'Empereur, l'Aigle, & l'Espagne font voir
Que vaut nostre grād Roy, nostre Lys, nostre France.

A Madame Marguerite sœur du Roy Henry deux
iesme, depuis Duchesse de Sauoye.

I

VOYANT ce iour parler du grād Dieu, dōt l'esbēce
En ce meslant par tout, anime l'uniuers,
Je me souhaite auoir & mille & mille vers,
Que docte i'ay cent fois sacrez à sa puissance.
Et voyant que le ciel pour reuenger la France,
Nous enuoye en ce temps le plus beau des hyuers:
Sur ce temps ie conçois mil argumens diuers,
Pour par un bon augure aider nostre esperance.

Puis ie brusle d'emplir cent papiers écriuant
 L'aïse de nostre Roy, ses enfans receuant,
 L'aïse de toy leur Tante, & l'heur de telle race. *¶*
 Et ne pouuant du tout m'assouuir, ie ne veus
 Me faillir sans qu'aumoins ces petits traits ie trace
 De Dieu, du temps, du Roy, de toy, de tes neueus.

I I .

Dieu, ce Dieu qui promet aux François plus de bien *¶*
 Qu'il ne leur a ces iours permis faire d'outrage,
 De foy, d'œuvre, de sens, de langue, & de courage,
 Doit estre aux biens, aux maux, le seul but du Chre-
 Seule cause de tout, de tout seul entretien, *¶* (stien:
 Tout infini, tout bon, tout puissant, & tout sage,
 L'ame, le gon, l'appuy du monde son ourrage,
 Qu'il fit luy estant tout, & pouuant tout de rien:
 Qui pacifique en tout, par harmonie accorde *¶*
 Des neuf cieux & des quatre elemens la discorde,
 Par son destin certain guidant l'incertain sort: *¶*
 Qui par ordre & raison donne ou ame ou croissance,
 Qui nous sauue par CHRIST, sa race, & son essence,
 Seul fort, & seul vengeur du tort & de la mort. *¶*

I I I .

Ore qu'en ce beau parc pensif, & solitaire, *¶*
 Pour façonner ces vers ie rassemble mes sens:
 Je m'esmerueille en tout de sentir que ce temps, *¶*
 Ce beau temps ne sent rien du cornu Sagitaire. *¶*
 Les Dieux pour nous vèger, ce semble, où pour no^r plaïre,
 A la queue d'Automne ont fait naistre un Printèps,
 Tant quetes Dieux de nous parauant mal contents,
 Ne seront plus nommez Bourguignons du vulgaire.

SONNETS.

Ha ! qu'il me plaist d'aller par un service beau
 Chercher chez l'ennemi la gloire ou le tombeau:
 Tu mens, Iule Cefar, lâche en son infortune
 Le François ne se montre, ains renforçant son cœur,
 Comme l'Hydre, des coups, des playes, du malheur,
 Doit sous mon Roy combattre & les Rois & Fortune.

IIII.

Mon Roy sçait-il pas bien que les destins ont fait,
 A fin qu'un changement maintienne ce grand estre,
 L'un peuple à l'autre peuple, & les Rois aux Rois e-
 Contraires, pour en tout mōstrer tout imparfait? (Stre
 Et mon Roy sçait-il pas aussi que le meffait
 Par le preuoir des Dieux rend le destin fenestre?
 La victoire est tousiours (ô HENRY) dās ta dextre,
 Mais de nous tes sujets le vice nous deffait.
 Le vice & la victoire ont bien peu d'alliance,
 Vertu, valeur, victoire, encor sont en la France,
 Necrain qu'un seul poisson retarde ton vaisseau,
 Ny que la nuict te puisse en ton beau iour te nuire,
 Sois Tiphys, sois Phebus, & pour poursuiure & luire
 La vertu soit tousiours ta voille & ton flambeau.

V.

Troupe d'enfans diuins, soit celle qui arriue,
 Ou bien soit mōsieur mesme, ou l'une & l'autre sœur,
 Vostre mere Iunon vous douë de son heur,
 Vostre tante Pallas de sa vertu naïfue:
 Mars ce prince Lorrain, qui ja sous soy captiue
 Nos ennemis, vous soit de prouësse donneur,
 Mercure ce prelat des Cardinaux l'honneur,
 Vous douë de conseil & d'eloquence viue.

*Ainsi vous serez faits tous sept, ô nombre beau,
 Sept pandores en France, & chacun son vaisseau
 Dans ses mains receura de Iupiter son pere:
 Puis l'ouvrant vous verrez sortir tant de vertus,
 Que les maux de Pandore à la fin combatus,
 L'airront nostre air François sans crime & sans misere.*

AV ROY CHARLES IX. APRES
 la reduction du Haure de Grace.

I.

Si ie t'ay discouru ces iours d'un bastiment,
 Je ne suis pourtant, Sire, vn maistre d'edifices,
 L'heur de Nature & l'art m'ôt pourueu d'exer-
 Plus grās, pour au pais rēdre vn autre ornement. (cices
 Non que ie refusasse à mesler dextrement
 D'un si bel art l'estude à d'autres artifices,
 Et pour toy ie seruisse à mes plus grans seruices,
 Si ie pouuois tel art embrasser dignement.
 Mais le bastiment vray qu'il faut qu'un Roy demande
 De moy, c'est de son nom, c'est de sa gloire grande
 L'edifice, à la flamme & au fer resistant.
 Poursuy, CHARLES, l'heureux instinct de ta nature,
 Tant qu'en suiuant tes ans, tes faits, telle structure
 Aille par moy tous ans & tous faits surmontant.)

II.

Sice bien, dont ta race & ta face & ta grace,
 Ton instinct, ton destin, me gardent d'en douter,
 Se peut voir de mes yeux, qui est de surmonter
 Nostre espoir, & passer les gloires de ta race.

SONNETS.

Si tu fais voir que quand en ceste terre basse
 Tout te deplore, alors Dieu vient tout augmenter:
 Bref, si tu es vray Roy (car ie ne puis flater
 Ny mentir) ne crain point qu'aucun ton los surpasse.
 Mon subiet non pas moy tout autre effacera,
 Ia du sujet l'entree assez ample sera,
 Quand ie diray le trouble & l'heur de ton enfance.
 Le trouble empesche l'heur, mais le vouloir des cieux
 Ton conseil, ton esprit & braue & gracieux,
 Font à l'œil ton heur croistre avecques la croissance.

III.

Estre fils d'un HENRY qui fut fils d'un FRANÇOIS,
 Tous deux rares honneurs de la France en prouesses,
 En victoires, grandeurs, sciences & sagesse:
 Estre de sang issu & rang de puissans Rois:
 Estre orné seul des dons que lon a feint aux trois,
 De Venus, de Minerue, & de Iunon Deesses,
 Qui sont les grands beautez, les vertus, les hautez,
 Et en face & façon promettre armes & loix.
 Dés l'enfance auoir veu foudroyer les murailles,
 Ne s'estre point troublé des assaulx & batailles,
 En courant son Royaume auoir molly sous soy,
 Et rembarré les siens, assoupi nostre guerre,
 Et fait chasser l'Anglois dedans son coin de terre,
 C'est ja pour toy grand gloire, & grand sujet pour moy.

IIII.

Mars en guerre effroyable en ses combats tempeste,
 Venus plus douce, tire en l'amour nostre cœur,
 Forcé deffous les loix de son enfant vainqueur,
 Et Diane ses serfs en la chasse conquiste.

Mars te vit en naissant, & souffla dans ta teste
 Je ne sçay quoy, qui doit du monde estre la peur,
 Et Venus t'inspira le meilleur de son heur,
 Diane par les bois t'accoustume à la queste.
 Sous Mars tout ce grand monde au ioug asserviras,
 Sous Venus tous les cœurs du peuple raviras,
 Et pour d'ici chasser le mal qui nous menasse,
 Tout ce rond spacieux te servira de bois,
 Voire & pourras en tout ce que peuvent les trois,
 Mars, Venus, & Diane, en guerre, amour & chasse.

V.

Pendant qu'en mes discours ie ri de l'iniustice,
 Qui à tort s'efforçant m'abyfmer de malheurs,
 Réueille un cœur en moy, qui domteur des douleurs
 Ne permet qu'à mes maux ma constance flechisse:
 Je songe, & contrepoise à mon mal, la malice
 Du temps, qui mesme à tort s'attachant aux grâdeurs
 De nos princes & Rois, monstre que les grands heurs
 Sont enuiez du peuple, & poursuivis du vice.
 Mais le ris de mon mal n'est pas de là sorti,
 Pour voir un mal commun iusqu'aux grâds departi:
 Carriant de mes maux ie pleure des publiques.
 Puisé-ie de ces deux en fin telle fin voir,
 Que l'un engendre en moy l'heur, l'égard, le sçavoir,
 L'autre aux grâds le cōseil, & l'horreur aux iniques.

V I.

C'estoit assez ce semble (ô Dieu) qu'apres avoir
 Au regne de HENRY dix ans nourri la guerre,
 Nous avoir fait décroistre en accroissant sa terre,
 Dont en fin lon ne peut grande croissiance voir:

S O N N E T S.

Faire encor, lors que foible estoit nostre pouuoir,
 Rompre vne tréue heureuse, & puis cōme un tōnerre,
 Qui par un double éclat deux grands sapins atterre,
 En deux batailles presque accabler nous vouloir,
 Nous arracher le pris, le cœur, & l'esperance,
 Si deux prises deux fois n'eussent vangé la France:
 Sans apres vne paix qui nous fait discorder,
 Faire un grand Roy meurdrir, comme en duel, & faire
 (O monstre) le François au François aduersaire,
 Oster un autre Roy, & l'autre hasarder.

Contre les Ministres de la nouuelle opinion.

NE m'est-ce assez, *belas!* puis qu'il faut commencer
 Par regret sur un temps plein de regrets, ma
 plainte,
 De voir par faction nouuelle iniuste & feinte,
 L'vsance & antique & droite & vraye effacer?
 Voir tel erreur sans choix & sans pois sembrasser,
 Par pique, ou dol, ou foy legerement étreinte,
 Et voir la foy, la loy, l'amour, la iuste crainte,
 Presqu' avec tout l'estat des François renuerser?
 Voir les champs, les citez, de leur Roy plus voisines,
 Pleines de sang, de feus, de vols, & de ruines,
 Qu'on couure, à faux, du nom tant de Dieu q̃ du Roy?
 Sans voir, *las!* que desia par deux fois sur sa teste,
 La France ayant bien peu preuoir telle tempeste,
 Sans remede & sans yeux l'attende ainsi sur foy.

Ce

I I.

Ce qui deuoit le plus decouurir telles rages,
 Ce qui deuoit deuant, apres, & à iamais
 Contre les faux desseins de ces gens, & leurs faits
 Animer nos conseils, nos escrits, nos courages,
 Sont les pretextes feints, les faux & sots langages
 Des Ministres leurs chefs, impudents, contrefaits,
 Seurs du martel des leurs, & qui hayans la paix
 Cachent du faux desir d'icelle leurs orages.
 Qu'ores on voye au moins comme ils scauent piper,
 Qui creuans d'auoir veu de leurs mains échapper
 Leur Roy, par les chemins luy tâchant faire outrance,
 Le faisans assieger dans Paris, cottiser
 Ses sujets, ses moulins bruler, ses ponts briser,
 Crient que c'est en humble & vraye obeissance.

I I I.

Apres tant d'autres maux brassiez en d'autres lieux,
 Vouloir ici d'entree & reuolte premiere,
 Rendre il y a sept ans la noblesse meurtriere
 Des parens de leur Roy deuant ses propres yeux:
 Paris couuant, nourrissant leurs feux ambitieux,
 Piquer, pousser, presser leurs fauteurs, de maniere
 Que leur caute simpleesse & leur humblese fiere,
 A son Roy demasqua son front seditieux:
 Nous vouloir cantonner, mettre l'Anglois en France,
 Faire enuahir du Roy la terre & la finance,
 Soudoyer de larcin, de sacrilege aussi,
 En siege & en bataille oser contre un Roy faire
 Par traitre assassinat son Lieutenant deffaire,
 N'estoit-ce pour pouuoir en cela voir ceci?

S O N N E T S.

I I I I.

*C'est aux ministres seuls, ministres des miseres
 (Peux-ie dire) & des maux, & des torts inhumains
 Que nous souffrôs par eux, qui brâlans en leurs mains
 Nostre fatal brandon, se sont faits nos Megeres:
 C'est aux ministres donc que les iustes coleres,
 Soit de moy, soit de tant de diserts écriuains
 Se doiuent adresser, monstrans lâches & vains
 D'esprit tous les fauteurs de si faux ministeres.
 Seuls ils ont machiné, dressé, tramé, conduit,
 Denombré leur pouuoir par Eglises instruit,
 Des viures, des moyens, des surprises commodés,
 Donné le iour auquel le Roy prendre on deuoit,
 Qui des leurs dés long temps & fort loin se sçauoit,
 Mesme c'est ce qu'entre eux ils nommoient leurs sy-*

v.

(nodes.

*Quoy que ces éhontez, qui n'ont eu leurs pareils
 En ce monde, ayent dit que pour sauuer leurs testes,
 De leurs chefs s'assembloïent les forces tousiours prestes,
 Et qu'ils n'ignoroient point de Marcel les conseils:
 Ils en sont dementis par les longs appareils,
 Par memoires trouuez, par mille autres enquestes,
 Que lon peut faire au vray, partoutes sourdes questes,
 Achapts, amas, traffics, & complots nompareils.
 Jel'ay tousiours senti, car telle humeur couuerte
 Ne pouuoit pas faillir d'estre à mes sens ouuerte:
 Mais m'amusant sans fin contre ses Antechrists,
 Aux points de leur doctrine & faulse & obstinee,
 Je laissois là leurs faits: aussi la secte nec
 D'écrits, ne peut mourir iamais que par écrits,*

V I.

Quiconque aura bien sceu de quelles fortes armes,
 En combien de façons, & par combien de temps,
 De quel nombre infini, non de cheuaux & gens,
 Mais d'écrits, qui m'estoyēt & saints & seurs gendar-
 J'ay tché guerroyer l'erreur, le fard, les charmes (mes,
 De ceux qui font trafic d'ainsi piper nos sens:
 Quiconque aura cogneu que sans fin ie pretens
 A ce but, de liurer tout d'un coup mes alarmes:

Quiconque encor scaura que non par mon effort,
 Mais par la verité, contre qui rien n'est fort, (mee,
 Je puis plus tout seul presque encontre eux qu'une ar-
 Se fachera qu'ainsi que le temps triste & faux,
 Contre nostre bien s'arme, au secours de nos maux
 Sa fille Occasion contre moy soit armee.

V I I.

Les hauts esprits, qui mesme offensez scauoient mieux
 En un tel tort aimer, voire aider leur patrie,
 Durant les maux publics par quelque sympathie,
 Tous presqu'auoyent des maux particuliers pour eux.
 Quand un corps est greué d'aucun mal furieux,
 Du mal la plus grand' part est tousiours departie
 A chacune plus viue & subtile partie:
 Car mieux se rend par là le mal victorieux.
 C'est pourquoy demandoit ce Roy Macedonique
 Ces grands chiens gardiēs de leur grand parc attique.
 Moy qui tousiours depuis l'erreur, le mal, l'effroy
 Du païs, n'ay receu que tort & que trauerse,
 N'opposeray-ie point maugré ma chance aduersē,
 Aux infidelles loups mon plus fidelle abboy?

SONNETS.

VIII.

*Que t'ont (ô Dieu) messait, ou ma Frâce, ou mon Prince,
 Que ta messait encor la mesme pieté,
 Qu'estant vtil en tout, inutile i'aye esté
 Au secours de la foy, du Roy, de la prouince?
 Car encor que souuent maint labeur i'entreprinse
 Bien conceu, bien conduit, & ja presqu'enfanté,
 Il falloit par rencontre estrange, ou nouueauté
 De sujet, qu'entre-rompre à tous coups ie le vinse.
 Mais que t'a mon corps mesme à point nommé forcé,
 Qu'estant contraint changer les parolles au fait,
 Les liures aux harnois, les plumes aux pistolles,
 Prisonnier dans vn liét ie sois arresté lors?
 Au moins si tel deuoir tu veux oster au corps,
 Fay vaincre l'ame, & pren victoire en ses parolles.*

IX.

*Je ne crains pas que Dieu, le sçauoir, la vertu,
 Laisent vaincre Satan, l'ignorance, & le vice,
 Ny qu'en tout soit l'estat, le repos, la police,
 Par faux suiets, par trouble, & de sordre abbatu:
 Que ce qui stable estoit, grand, & bon, combattu
 Soit par legereté, petiteesse, & malice:
 Que de l'habit du bien, de simpleesse, & iustice,
 Le mal, le dol, le tort, soit long temps reuestu:
 Mais ie crains qu'un desastre, & honte, & playe cede
 (O Dieu!) trop tard à l'heur, à l'honneur, au remede,
 Quand le rebelle (ô Dieu!) l'heretic, l'estranger,
 Aurent mangé mon Roy, mon Eglise, & ma France.
 Hastenous donc le iour, le sens, l'obeissance,
 Pour de leur nuict, furie, & mépris nous venger.*

X.

Quel destin fait que ceux qui plus aux choses peuuent,
 En soyent par destourbier ou deastre empeschez,
 Que comme un singe au bloc en y voye attachez,
 Pour la plus part ceux là qui moins aptes s'y treuuent?
 Et que ceux bien souuent plus hardiment s'emeuent
 Aux vengeancees d'un tort public, qui lors cachez,
 Deastre, mécongneus, & le moins recherchez,
 Tout seuls en vain dans soy leurs courages éprenuent?
 Par armes, par escrits, de ce siecle l'erreur
 Des doctes & vaillans doit sentir la fureur:
 En l'un bien que malade, & que riche i'egale
 Par vouloir les meilleurs: en l'autre ayant tant fait,
 Voire un peu mieux que ceux qui ont en main ce fait,
 Je meurs d'estre au milieu de mes biens un Tantale.

X I.

Mon but d'ainsi sans cesse apres ces gens brosser
 Par les forts les plus lōgs, plus drus, & pleins d'épines,
 N'est pas pour bruit acquerre en si hautes doctrines:
 Mais pour aider ma France & ces monstres chasser.
 Par leurs doctrines donc il faillloit commencer,
 Non pour monstrier combien on les verroit mutines,
 Mais cōbien ces docteurs par leurs hargnes malignes,
 Auoyent peu l'Euangile & forcer & fausser:
 Puis monstrier que leur masque abiect, & doux, & morne,
 S'échangeroit en face, & cruelle, & difforme,
 Nous ayans fait dedans leur labyrinthe entrer.
 Mais quoy? sentans qu'on trouue un filet de Thesee,
 Ils nous tächent en fin dans leur prison rusée,
 Bon gré, maugré, par meurdre & par flame empestrer.

SONNETS.

X I I.

Qui croiroit de trouuer l'erreur, la barbarie,
 Le deffaut de ceruelle, & l'enuelopement,
 Mais bien le pur mensonge en leur enseignement,
 Dont i'ouuriray l'occulte & riche tromperie?
 Qui eust pensé de voir tant d'aigreur, de furie,
 De vils & ords brocards, d'aboy, de hurlement,
 De vains espouuentaux en leur reuenchement,
 Si tost que lon fait teste à leur affronterie?
 Aux projets qui croiroit tant de traffic & dol?
 Aux exploits qui croiroit tant de sang & de vol?
 Sut tout qui pourroit croire (ô l'impudence extreme!)
 Qu'aux nouuelles qu'ils font pour vanter ou cacher
 Leur bien ou mal qui court, ils semblaissent tâcher
 De se faire ou leur vaincre en impudence mesme?

X I I I.

Je hay qu'estans tous presque arrachez de dedans
 L'eschole pedantesque, ou le cloistre, qu'en haine
 Extreme ils ont, leur face & leur façon soit pleine
 Du pis qu'ayent en eux les moynes, les pedans.
 Je hay que telle humeur les rende en tout ardans,
 Bien qu'ils soyent deguisez d'une attrempance vaine,
 Plus qu'un crapaut creuans d'une enfleure vilaine,
 Plus qu'un chien plein de rage, écumans & mordās:
 Je hay qu'ils rendent tels au soustien de leurs songes
 Les leurs, voire au soustien de tous nouueaus mesonges:
 Mais ie hay plus ceci que quand on les reprend,
 Outrageant, menaçant, leurs doctes aduersaires,
 Ains se faisans Dieu mesme, estans à Dieu cōtraires,
 Ne vont criant sinon qu'à Dieu mesme on se prend.

XIIII.

Un fort & seur esprit se renforce & soulage
 Tant plus son sort ialoux luy presente d'assaut,
 Comme on feint qu'un Hercule en ses diuers travaux
 Contre l'aspre rencueur de Iunon s'encourage.
 Les maux que contre moy de ces maistres l'outrage
 Pourroit brasser de foy, de leurs meurtriers loyaux
 Les aguets, ny l'effroy de nos publiques maux,
 Ny mes malheurs n'ont peu mordre sur mon courage:
 Qu'estant sain & dispos, iusques au bandement
 Entier de tous mes nerfs, iusqu'à l'épanchement
 Dernier de tout mon sang, iusqu'au soupir extreme,
 Je n'y vueille ce corps & ceste ame opposer,
 Et sur tout, qui plus est, toute l'ame épuiser,
 Pour sauuer contre eux tous le sauueur de nous mesme.

XV.

Si tant de mal se peut par bon auis guerir,
 Si par le fer vengeur on peut telle hydre abbatre,
 Si telle erreur on peut par disputes combatre,
 Et si la Muse au cœur peut ces monstres ferir,
 Embrasez-vous, ô vous qui pourrez secourir
 Encor trop mieux que moy la France en l'un des qua-
 Car suiuis de conseil, d'armes se sentans battre, (tre,
 De vois & vers forcez, ils sont seurs de perir.
 Apportez le Moly transformant, que Mercure
 Apporta pour changer des Grecs l'orde figure,
 La masse Herculienne, & l'effort apportez
 Des vieux peres Chrestiens, les fureurs Iambiques
 D'Archiloch, & dessus les honteuses reliques
 De la France un trophée à sa gloire plantez.

SONNETS.

XVI.

Tout mon regret n'est pas que ta durable Eglise,
 (O CHRIST) soit dissipée en nostre France ainsi,
 Je ne plains pas encor tant seulement qu'ici
 Ton regne pacifique & ton nom lon méprise.
 Mais ie plains que la France abolit ou deguise
 Outre la pieté, toute autre forme aussi
 Requise en tout estat: ie plains que ce temps ci
 Toute autre gent Chrestienne, ainsi que nous, diuise:
 Tant que ce mal, par qui nous sommes desunis;
 Nous rend de tant de maux comme à bon droit punis,
 Par nos vices l'amour qu'enuers toy tu commandes.
 Mesmement tout amour d'entre nous estoit mort:
 Tu fais donc à propos, que haine & que discord
 Soyent de l'amour estaint les sanglantes amendes.

XVII.

Des nations que CHRIST à son saint nom soubmet,
 Je tairay chascun vernaturel qui les pique,
 Bien que ma Muse soit quelquefois satyrique,
 Vn fiel pourtant trop aspre en ses vers ne permet:
 Elle aux yeux d'un lourd peuple yurongne ne remet,
 Qu'il noye toutes loix dans l'orde loy Bacchique:
 Elle se taist du peuple & feint & impudique,
 Du peuple enflé le nom & du mutin s'omet:
 Mais ie diray (i'en veux au peuple que plus i'aime)
 Que l'enuie aux François par nature est extreme,
 De là sort ce discord nostre fatal poison:
 Par là le docte est fol, le vertueux inique,
 Le doux prince est tyran, mais las! maint ieu tragique
 Comménçant par enuie achèue en trahison.

XVIII.

Il faut qu'un cours du ciel estrangement contraire
 Au climat de la Gaule, & qui oncques, ie croy,
 Autre part ne s'est veu tel qu'au vray ie le voy,
 Vienne en nos faits ainsi qu'en un iouët se plaire.
 Tout ce que chascque estat veut & doit & croit faire,
 Se fait mesme au rebours: quand on pense du Roy
 Retrencher la despence, on voit venir de quoy
 Rengager, rembrouiller, deplorer son affaire:
 Plus la noblesse veut mesnager, plus se croist
 Par pompe son fardeau: mainte grandeur decroist,
 Voire & se fait vilaine, en pensant faire gloire
 D'avarice & d'acquest: plus se croist la foison
 D'officiers & d'edicts, moins se fait de raison:
 Plus de Dieu lon dispute, & moins lon en fait croire.

XIX.

Que de ce siecle horrible on me peigne un tableau,
 Par ordre y ordonnant l'estrange mommerie
 Où tout vice, tout crime, erreur, peste, furie,
 De son contraire ait pris le masque & le manteau:
 Aux peuples & aux Rois dessous maint faux flambeau
 Qui les yeux éblouit & les cœurs enfurie,
 Soit de ces masques faux l'enorme tromperie
 Conduite, & pour moumon porte à tous un bandeau:
 L'iniustice prendra le beau marque d'Astree,
 En science sera l'ignorance accoustree,
 Sous le masque de CHRIST, d'humblesse & charité,
 Satan, ambition, sedition selonne
 Marcheront, & n'estoit la chance que Dieu donne,
 Leurs faux dez piperoyent tout heur & verité.

S O N N E T S.

X X.

Pour debonder les maux, dont maintenant abonde
 La sainte & iadis ferme & forte Chrestienté,
 Sur tout la France, en qui l'echaffaut appresté
 Ensanglante de loin presque tout œil du monde,
 Ces apostres nouueaux n'ont pas ouuert la bonde
 Tous seuls d'une tant aspre & roide aduersité,
 Auec eux les auteurs du malheur ont esté
 Tant d'abus dont en tous nostre France est seconde.
 Mais cōme en temps mauuais dans l'air on peut biẽ voir
 En grand' pluye creuer vn gros nuage noir,
 Puis voir apres les vents, les gresles, les tonnerres
 Saccager tout l'esperoir des palles vigneron:
 Entre nos maux sans fin ces gens nous marquerons,
 Comme orage & degast de nous & de nos terres.

X X I.

Je sçay que mille escrits, l'apparence du vray,
 Les passages de joints, l'ardeur de contredire,
 L'amour des nouueautez avec excuse attire
 Maint & maint à ces gens desquels i'ay fait l'essay.
 Je sçay qu'en nos Prelats gist force abus, ie sçay
 Quẽ maint qui seulement à son salut aspire,
 Pense d'homme de bien trouuer ce qu'il desire
 Aux autres qu'il n'a pas si bien sondé que i'ay.
 Je sçay que c'est grand bien de bannir de l'Eglise
 Tout abus, iurement, larcin, & paillardise,
 Mais les voyant doubler tant de seditions,
 Je sçay sous ombre sainte en leurs ames s'enclorre
 De tout temps vn orgueil, qui couue & fait eclorre
 Tant de monstres, naissans pour nos perditions.

X X I I.

PiqueZ d'une acree humeur, n'ayans dequoy se plaire
 Aux lieux de leur exil, l'un sur l'autre entasseZ,
 De nombre, de disette, & de remors presseZ,
 Fachez de rien, de trop, de mesme chose faire:
 Car en diuers i'ay veu ce triple dueil contraire,
 Hais des leurs souuent, des leurs mesmes chasseZ,
 D'esperance s'enflans, du ioug facheux lasseZ,
 Sous des loix qu'ẽ ces lieux done mesme un vulgaire:
 Tous hargneux, tous ialoux l'un de l'autre, obstinez
 Pourtant, & ennemis des lieux où ils sont nez,
 Bien que d'y retourner leur desir fut extreme,
 Ont en se ralliant tous conseils assembleZ,
 Pour rendre tous endroits du royaume troubleZ,
 A tout hazard du Roy, du pays, & d'eux mesme.

X X I I I.

En songeant aux moyens qui par eux ont esté
 ProietteZ, pour attirer à ce but d'Euangile
 Tout ce qui entre nous se voyoit plus debile,
 Le tentans d'apparence ou bien de nouveauté:
 Je trouue vn mauvais art d'auoir sollicité
 Le Moynel las du cloistre, & la Nonnain fragile,
 Aux pratiques trouuans l'occasion vrile,
 Qui est la seruitude & la lubricité:
 Comme aussi le pedant debauché, le folastre
 Disciple, l'artizan tant plus opiniastre
 Qu'il est sot: mais ce dol est extreme, qu'ils ont
 Par nos femmes gaigné nostre noblesse: ô ruse
 Antique de Satan. Tousiours Adam s'abuse
 Par Eue, & tels appas tous tels poisons se font.

SONNETS.

XXIII.

*Je m'emerveillois fort, sans penser n'au Papisme,
N'au Calvinisme aussi, de quel humeur épris
En ce faux siecle estoient nos bisarres esprits,
Contre l'humeur Frâçoise & le doux Christianisme,
D'oser contre les grands par un vray satanisme
Tant d'iniures vomir, par dits & par escrits,
Les diffamant: Satan est pere de mespris,
De mensonge, d'orgueil, & d'outrage & de schisme:
Ces mots de sot, meschant, ladre, traistre, poltron,
Sodomite, atheïste, & meurtrier & larron,
Et pour femmes tous mots d'ordure & de fallace,
Sonnent à nostre oreille: or tout essay public
M'a fait voir tel instinct estre huguenotic,
Et voir qu'ainsi ces gens sont de Satan la race.*

XXV.

*Aux plaintes que ma Muse en ces vers cy poursuit,
Soulageant dans un liët mon mal & l'aigreur forte,
Que la publique horreur & la pitié m'apporte,
Je ne rens pas l'erreur par disputes destruit:
Telle victoire ailleurs j'obtiendray, mais le fruit
Que ie quiers en ceci, c'est que leur grand' cohorte
Mise en armes peut bien concevoir de la sorte,
Qu'il faut en quel peril & honte on la conduit:
Sans edict, sans bataille, elle mesme animee
Seroit à bannir ceux qui l'ont tant enflammee,
Qui cruels pour se faire en France retenir,
Sans cesse au sang, au sac, d'un fouët sanglant la chassët,
Et leurs seurtez au dam de sa seurte pourchassent,
La faisans au lieu d'eux son propre honneur bannir.*

XXVI.

Est-ce CHRIST, ou Satan, ambition ou zele,
 Droit ou tort, faux ou vray, discord iuste ou ialous,
 Rage ou sage conseil, haine ou amour de nous,
 Soustien du Prince ou bien sedition rebelle,
 Qui vous pique & vous pousse en vne esmeute telle,
 Et qui vous faites CHRIST le conducteur de vous?
 Ce beau nom d'Euangile, & tous les mots plus dous,
 Dont la faulse apparence est faite & sainte & belle,
 Pouuoient faire cuider que poussez en ce fait
 Vous estiez du meilleur de ceci, mais l'effet,
 Comme imposer, piper, mal-dire, mal escrire,
 Trafiquer, mutiner, chasser, meurtrir, bruler,
 Du Prince les deniers & les villes voler,
 Doiuent faire cuider qu'estes poussez du pire.

XXVII.

Je pense encores voir sous celuy de nos Rois,
 Que pour ses faits du nom d'Auguste lon appelle,
 L'erreur, l'embrasement, la faction rebelle,
 De ceux là que pour lors on nommoit Albigeois:
 Vaincus, chassez, tueZ par nos Seigneurs François,
 Que le Romain Pontife anima d'un saint zele:
 Aux grands eurent tousiours recours de leur querelle,
 Comme au Roy d'Arragon, cōme au Comte de Foix:
 Nos François qui vainqueurs en France retournerent,
 Pour chef de tout le reste un Montfort ordonnerent,
 Qui assiegé, pressé, voulut armer son cœur
 Des mysteres sacrez, puis soudain hors la ville
 Saillant, donnant, forceant, en occit dixhuiet mille,
 Tant la France a tousiours rembarré tout erreur.

SONNETS.

XXVIII.

O moy pourtant heureux de l'heur qu'auroit ma France
 Si ces gens qui se sont contre elle mutinez,
 Si les nostres aussi qu'en fin ces obstinez
 Forceront de venir iusqu'à l'extreme outrance,
 Auoyent ceux la par crainte, & ceux cy par clemence,
 D'un saint & iuste accord leurs cœurs desacharneZ,
 Fuyans le cruel choc où les a destineZ
 La contrainte derniere, & l'ardeur de vengeance:
 Je sentirois fort grand un tel heur pour ne voir
 Ce beau regne noyé dans son sang, & scauoir
 Que ces pipeurs diroyent s'ils auoyent la victoire,
 Dieu venge ainsi les siens en tout temps en tout lieu:
 Et vaincus ils diroyent, sont des verges de Dieu,
 De nostre Eglise vraye & la marque & la gloire.

XXIX.

Ne les a ton peu donc decourrir? au moins ceux
 Qui à leur gloire sote & sanglante pretendent,
 Et vrais Pythons enfleZ d'un ord venin se rendent
 Cōme un Sphinx aguettās par leurs propos douteux,
 Et qui souillans de CHRIST le saint banquet entre eux,
 Sont Harpyes, qui or' pour nous piller se bandent,
 Qui leur baue infernale en Cerberes espandent,
 En Chimeres se font & cruels & hideux,
 Qu'un Phœbus, un Oedipe, un Zetes, un Alcide,
 Un prompt Bellerophon en puisse estre homicide
 Ou domteur, ie ne veux les plus simples blesser:
 Mais les selons qu'on voit pour nous mettre en misere,
 D'enfleure, aguet, rauage, escume, horreur, passer
 Tout Python, Sphinx, Harpye, & Cerbere, & Chi-
 (mere.

X X X.

CHRIST pacifique Roy, qui entre les tiens estre
 Ne scaurois, sans y voir ta compagne la Paix,
 Qui fais naistre entre nous ces troubles & meffaits,
 Pour nous faire tes biens par nos maux recognoistre,
 Et les apprehendans t'en recognoistre maistre,
 Monstre que tous de Dieu les enfans tu nous fais,
 Toy estant nostre frere, & que soyons refaits
 Ton beau corps, que Satan par discord fait décroistre:
 Ou bien si ces errans tousiours obstinez sont
 Contre toy Roy celeste, & l'autre Roy qu'ils ont,
 Nostre cœur, nostre droit, & nos forces prospere:
 Car ie crains veu l'estat où on est, qu'en nos iours
 La Paix ne naisse point, sans qu'elle ait ton secours
 Pour pere, & la victoire ample & iuste pour mere.

X X X I.

Tous les saintés mandemens, que nostre foy Chrestienne
 Commande de garder, sont de la vieille loy
 Fors vn, que I E S V S - C H R I S T à l'exemple de foy,
 Veut que comme à nous seuls particuliers on tienne,
 C'est que nos ennemis nous aimions. Or qu'on vienne
 Surnommer maintenant ces assiegeurs de Roy,
 Ces troubleurs de repos, ces ébranleurs de foy,
 Les vrais restaurateurs de l'Eglise ancienne.
 Reserver la vengeance à Dieu, pour ceux prier
 Qui affligent, sans fin deffous les Rois plier,
 Fussent ils tyrans, est-ce ou s'armer ou écrire
 Cent libelles vilains? se filler son cordeau,
 Se faire des mutins le chef & le bourreau,
 Est-ce suiure de CHRIST & pour CHRIST le martyre?

SONNETS.

XXXII.

Depuis que i'ay leur cause entierement sondee,
 La conferant à l'autre, & tout point epluché,
 Que pour elle & contre elle aux escrits i'ay cherché,
 Je la hay la trouuant & nuisible & fardee.
 Puis voyant leur façon austere, outrecuidee,
 Hargneuse en dits & faits, bien que tout soit caché
 Sous vouloir d'euitier des autres le peché,
 Je la hay comme estant de faux singes guidee.
 Je hay que la pluspart d'entr'eux, sans rien sçauoir,
 Voire sans leurs raisons souuent n'ouir ne voir,
 S'obstinent à credit, leurs flammes ie deteste,
 Mais plus leurs fiers desseins, & plus encor cent fois
 Ces petits libelleurs, de qui les sots abbois,
 Tant le reste est auueugle, embrasent tout le reste.

XXXIII.

C'est horreur, que n'osans brasser telle entreprise
 Du regne d'un feu Roy puissant & redouté,
 Sur les ans d'un Roy ieune, en paix & en seurte,
 Ils ont l'occasion de leur massacre prise:
 Puis se voyans soudain découuerts, par feintise,
 Par harangue emmiellée, & mensonge ehonté,
 Ont tâché pallier l'indigne lâcheté,
 Disans ne conspirer que contre ceux de Guise.
 Et son objecte à l'œil de leur profession
 Le rebours, ils diront qu'il n'est pas question
 De la foy, mais que c'est un fait ciuil: & semble
 Ce qu'ils ne lairroyent pas faire eux-mesme à leurs chiës,
 Qu'un grand Roy doit laisser meurdrir les parës siës
 Par tels iuges, partie, & bourreaux tout ensemble.

Que

XXXIII.

Que ieriquand ie voy ces placarts, ces requestes,
 Où ces messieurs ce font de France les estats:
 Et monstrent que deja c'est sauancer d'un pas
 Contre nos loix, nos Rois, nos repos, & nos testes.
 De France les estats, pour mouuoir ces tempestes,
 A Vuormes, à Geneue, ou ailleurs ne vont pas.
 Auec pitie ie ri, les voyant mettre à bas
 Leurs desseings par leur faute, & s'y cōduire en bestes.
 Je ri d'ouir qu'il faut pour les iustes venger,
 Ceux qui n'en peuuent mais voler & saccager,
 Et qu'ainsi des plus grands la tutelle on pratique.
 Mais las! ie pleurerois quand ils pleurent des feux,
 Pour vne opinion, spectacle trop hideux,
 S'ils n'escriuoyent qu'il faut ardre tout heretique.

XXXV.

L'eternité que CHRIST en l'Eglise a promise,
 Qui tant d'ans a regné sans que fussent ceux ci:
 Les clefs & le pouuoir que saint Pierre eust ici,
 Qu'ils confessent eux-mesme eternal à l'Eglise:
 L'esprit y demeurant pour iamais, qui maistrise,
 Qui inspire & conduit tous vrais pasteurs ainsi
 Qu'il a fait les premiers: les saints peres aussi
 Par quiles saints escrits ont autorité prise:
 Ce que mesme Luther acreu du sacrement:
 Les discors qu'ils en ont: les faux Anabaptistes,
 Les Parfaits, les Dormants, Frerots, & Dauitistes,
 Qui sont engendrez d'eux, est-ce pas argument
 Pour monstrier qu'ils n'ont pas l'esprit ny sa doctrine,
 Mais qu'en se ruinant ils cherchent sa ruine?

SONNETS.

XXXVI.

Que ce conseil me plaist, qu'auant qu'un saint Concile
 Reünisse de CHRIST les membres differents,
 S'on trouue quelques vns de ceux cy conspirants
 Pour la sedition & non pour l'Euangile,
 On les punisse à mort: qu'on mette en chasque ville
 Secrettement main forte, & qu'à tous adherants
 Toute occasion s'oste, & que mille enquerants
 Ayent sans cesse l'œil sur la faction vile.
 Mais ie louë encor plus que cessans tous les feux,
 Puis que le nombre est tel, que si ce n'est par eux,
 Et par la raison mesme extirper ne se peuuent:
 De mille escrits scauans, ingenieux & forts,
 Saints, & pris de Dieu mesme, on face tant d'efforts,
 Que d'euxmesmes d'auoir pitié de soy s'esmeuent.

Pour le iour que la paix fust faicte 1568.

I

Si ta paix est honneste, & iuste, & sainte, & bõne,
 Qu'elle ait heureuse entree, accroissance & seurte:
 Si ton discord n'est pas, comme il faut, garrotté,
 Que ta couronne on voye orner d'autre couronne,
 Qui son rond d'or d'un rond de laurier enuironne,
 Non d'oliue, qui donne & loisir & fierté,
 Et confort au discord, que plus grand' loyauté
 Dieu pour iamais enuers ton beau sceptre nous dõne:
 Qu'il donne à ton Conseil l'adresse, & le bon cuer,
 A tes beaux ans la ioye, & l'heur, & la longueur,
 Sur tous à tes faicts gloire, à ta gloire memoire:

*A moy, qui suis tout tien, grand pouuoir, grand effort,
Tant pour aider, qu'orner ta Paix, ou ton discord,
Ton sceptre, ton conseil, tes ans, tes faits, ta gloire.*

Pour le iour de Pasques ensuiuant.

I I,

*Ce iour que tu viens, SIRE, au saint banquet Chrestien,
Prendre & m'ager de CHRIST le corps que tu adores,
Par qui sans fin la vie en ton corps tu restaures:
Car ce corps reuiuant, fait reuiure le tien.*

*Croy que c'est d'une paix l'infailible entretien
Avec Dieu, par son fils, qu'en toy tu incorpores:
Et sur si sainte paix songe à la paix encores
Que tu as faicte, & l'une avec l'autre maintien:*

*Mais crain tousiours que ceux, qui par fardé men songe
Ont fait vne figure, vne foy vaine, vn songe
De l'union que CHRIST fait ce iour avec toy,
Ne feignent l'union qu'avec eux tu as faicte, (faite,
Trompeuse, & d'un faux masque en leur dam contre-
Rompan en telle paix, comme en l'autre leur foy.*

Pour le iour de la Pentecoste ensuiuant.

I I I.

*Dieu vueille qu'en ce iour, qui du nom de cinquante
Prend son nom, l'esprit saint ausparauant promis
Du Fils, & puis du Pere aux Apostres transmis,
Face en toy quelque occulte, & puissante descente,*

SONNETS.

*Pour ton ame eschauffer, s'elle est encore lente,
 A retenir, & mesme enflammer tes amis:
 A reünir, ou bien domter tes ennemis,
 Car de ce Dieu la force est douce & violente.
 Il voit le plus beau regne où CHRIST ait dominé,
 Aueuglé, corrompu, mutiné, butiné,
 Sans qu'un espoir d'accord iuste & vray sy decæuvre.
 Luy donc Dieu (car des Rois l'effort n'est assez fort)
 Par toy nous möstre à l'œil, pour vaincre un tel discord,
 Qu'en ta parolle il parle, & qu'il æuvre en ton æuvre.*

Pour le iour de la sainct Michel ensuiuant.

IIII.

*En l'autre sainct Michel, ce haut prince des Anges,
 Patron de ton sainct ordre, auoit fait (que ie croy)
 Sur l'autel d'or luy mesme ardre & fumer pour toy
 L'encensoir plein de vœus, d'oraisons, & louanges:
 Puis contre Satan mesme, & contre les estranges
 Complots de ses enfans il s'arma pour la foy,
 Pour la vie & l'estat de toy, qui es vray Roy,
 En t'inspirant qu'il faut que tel mespris tu venges:
 Mais en semblable iour qu'avec si saincts, si grands,
 Si pompeux appareils, tes vœus à Dieu tu rends,
 Et que si grands parfums de prieres s'assemblent,
 Il a trop plus de quoy son encensoir combler,
 Pour impetrer qu'ainsi qu'il fait Satan trembler,
 Satan & tous enfans de Satan sous toy tremblent.*

Pour le iour que Monseigneur partir pour
aller au camp.

V.

Race des Dieux, HENRY, fils & frere de Roy,
Qui retenant le nom & le cœur d'un tel pere,
As l'honneur de tenir la place d'un tel frere,
Qui de si grand' armee a mis le faix sur toy:
Qui mesme ayant l'adresse & la vaillance en soy,
Voudra par sa presence extremement prospere,
Porter sur l'ennemy la peur, le vitupere,
En renforçant les siens, l'heur, le cœur, & la foy:
Va le premier, fay bien, & de cœur magnanime,
De voix, d'effect, de face, & de façons anime
Si bien ton camp, que feinte aucune n'y ait lieu.
C'est grand heur d'estre Chef si grand en sa ieunesse.
Quoy donc? de pouuoir ieune obliger par prouesse
Et l'estat de son Prince, & la loy de son Dieu?

Le iour que l'Authcur a leu le dernier Edict.

V I.

Quel debat sur ceci? ceux qui entre nous celent
L'ardent zele qu'ils ont vers l'autre faction,
Ne se pouuans garder que de leur passion
Les feux secrets sans cesse à tous mots estincellent:
Font bruit qu'en l'autre camp par l'edict ils rappellent
Ceux qui se contenoient: qu'en indignation
De l'edict l'Allemagne est en combustion:
Que les Anglois sur nous leur haine renouellent:

x iij

SONNETS.

Nous disons qu'en tous lieux où ces gens ont esté
 Maistres, ils ont banni l'antique Pieté,
 Et qu'ainsi l'autre Edict par eux sans fin se force:
 Qu'ils ont en pleine paix ruiné les saints lieux,
 O vain debat, tâchons par armes faire mieux
 Que deuant, & la loy prendra des armes force.

Pour le iour que tout le camp partit pour aller
 trouuer l'ennemy.

V I I.

Vous Charles, Catherine, & Henry, qui tenèz
 Nostre fortune en main: Charles les loix nous donne,
 Catherine maintient de son fils la couronne,
 Et par Henry les camps fraternels sont menèz.
 Vous tous qui aux conseils, & aux combats prenez
 A cœur la foy d'un Dieu, qui vostre ame eguillonne,
 A cœur le droict d'un Roy que Dieu sur vous ordonne,
 A cœur l'amour de France en qui vous estes nés:
 S'il n'y a plus d'esper que lon nous pacifie
 De tel accord, que l'une & l'autre part s'y fie,
 Prenez & faites prendre à nous tous plus de cœur,
 D'ardeur, & vnion, de force & ruse encore,
 Sans qu'en trainant tousiours ce Royaume on deuore,
 Le faisant sur soy mesme infortuné vainqueur.

V I I I.

Encor que toy, ta France & tes sujets fidelles,
 Mesmes iusqu'à la mort des Princes bons & preux,
 Par aguët ou hasart de coups malencontreux,
 Tous les iours receuiez quelques playes nouvelles:
 Bien que tu doines estre irrité des nouvelles

Et faux bruits que les gens hargneux forgēt entr'eux,
 Sans qu'en rien Moncontour, Gernac, saint Denis,
 Voire le choc dernier contienne ces rebelles. (Dreux)
 Combien que tout traitté qu'ils font avecques toy
 Ne doive estre dit paix, mais bien pardon d'un Roy,
 Telle paix maintenant est pourtant seure & bonne.
 Si donc vers Dieu, vers toy, ces gens cherchent mercy,
 Pardonne & les reçois: pardonner en cecy
 Plus que vaincre en combat la victoire te donne.

A la Royne mere du Roy.

I.

QUAND ie te voy sur toy porter toute la France,
 Côme Athlas fait le ciel, ton chef Royal baissant
 Sous un fardeau qui va le faix du ciel passant:
 Carl'un d'ordre & d'accord iustement se balance,
 L'autre est plein de discord, de fureur & insolence,
 Abus, erreur, fureur, que tu vas regissant,
 Pourtant deffous ton fils les hauts cœurs molissant,
 Et rabaisant les vils par conseil & prudence.
 Quand ie voy que sur toy toute l'Europe a l'œil,
 Quand ie te voy porter souvent un double dueil
 Du tēps, & de HENRY, quand ie voy qu'on te charge
 T'aboyant des deux parts, ie te plains fort dans moy:
 Mais ie m'appaise alors qu'un tel fils ie te voy,
 Qui ja plein d'heur reprend & raccorde ta charge.

Dieu, MADAME, a permis en vengeant nos malices,
 Nos piques & nos torts, nos abus obstinez,

SONNETS.

*Que deux partis se soyent l'un sur l'autre acharnez,
 Faisant par nous sur nous exercer ses iustices.
 De là les maux, les torts, les hontes, les supplices,
 Les pechez, les prisons, les travaux, destinez
 Estoyent à l'un & l'autre, à fin qu'éguillonnez
 Nous fussions de remords de nos haines & vices:
 Mais la paix, la bonté du Roy, ceste union
 Commune, pour reprendre à ta suasion
 Le Haure, l'estranger chasser hors les prouinces,
 Se desarmans font foy de ton futur bon heur,
 Et qu'au double entre nous resflorira l'honneur
 De Dieu, du Roy, de toy, de Frâce, & de ses Princes.
 Sur la mort de la Royne d'Espagne sa
 fille aînée.*

III.

*Je croy qu'estant, M A D A M E, aux maux excercitee
 Autant ou plus que Royne oncques le fut ici:
 Et comme en plaine mer des vagues de souci,
 D'ennuy, d'effroy, de tort, de malheur tourmentee,
 Et qu'en voyant souvent toute ioye restee
 De ioye estre la fin, tous plaisirs mesme aussi
 N'estre que seruitude, en qui nos sens ainsi
 Qu'en un rets d'or leur force ont sans cesse arrestee:
 Sçachant qu'il faut par force arriuer tous au port,
 Et qu'apres nos honneurs vne honorable mort,
 Qui sans crime nous prend, rend la vie plus viue:
 Toymesme ne voudras en ta mort t'ennuyer:
 Voudras tu donc tel port à ta fille enuier,
 Qui hors des maux avec tant d'honneurs y arriue?*

De

I I I.

De ton dueil ie ne veux par ces vers arrester
 Le roide & premier cours, en l'aspre destinee.
 La douleur est rebelle alors qu'elle est gesnee,
 Trop saigrit un grand mal qu'on veut trop tost oster.
 A trop bon droict ta fille il te faut regretter,
 Tant vtile, tant grande, aux vertus tant bien nee,
 Qui mieux qu'autre couronne encor l'ont couronnee,
 Bien que Royne dix fois, dix elle en peut porter.
 Mais quand le cœur, le fiel, où gist l'amour, & l'ire,
 Font que nostre estomach tant de soupirs en tire,
 Tant de cris nostre bouche, & tant de pleurs nostre œil:
 Comme en un ciel il faut que du haut de la teste
 La raison qui ressemble un beau Soleil, arreste
 Le venteux, l'orageux, & le pluuiex dueil.

I I I I.

Bien que tu sois grand' Royne, & que ta grandeur doive
 Presque approchant des Dieux, des Dieux mesme sen-
 Sans un terrestre dueil faire de soy sortir, (tir,
 Si faut-il que grand dueil par force elle conçoine:
 Nature veut que mere & femme on t'aperçoine,
 Le sang ne peut, & moins l'humaine loy, mentir:
 Puis quelle mort pourroit tel amour amortir?
 Mais il faut que ton dueil soy mesme se deçoine,
 De toy naissant il doibt dire dans toy, Qui fait
 Que ie conteste au vueil d'un Dieu stable & parfait?
 Qui m'arme contre moy, si la vie on voit estre
 Un songe & brief & grief, si le bien plus choisi
 Au monde est quasi mal, si tout n'est rien quasi, (stre?
 D'un tel rien qu'en peut-il au cœur d'un Chrestien nai-

SONNETS.

v.

Des deux grands Rois d'Europe, estre fille premiere
 Al'un, & femme à l'autre, outre encor estre sœur
 D'un Roy non seulement des peres successeur
 En regne & en vertu, mais en façon guerriere:
 Estre aussi sœur de quatre, à qui la terre entiere
 D'autres grandeurs reserue, auoir soymesme l'heur
 D'estre plusieurs fois Roine, en maiesté, douceur,
 Et autres vertus, estre en terre vne lumiere:
 Auoir vescu & mesme estre morte en l'amour
 Extreme d'un mary, pouuoir reuiure un iour
 En terre par merite, & viure au ciel par grace,
 Hors des tragiques fins, qu'ont les plus grands, t'auoir
 Laissee en te laissant seurté de le reuoir,
 N'est-ce assez pour calmer & ton ame & ta face?

v i.

La fille à ce Cesar qui peut iadis conquerre
 Nos Gaules en dix ans, par mort auoit rendu
 Le tribut de nature: or du pere entendu
 Fut tel trespas alors qu'il domtoit l'Angleterre,
 (L'Angleterre il nommoit Albion, pour la terre
 Qui de loin paroist blanche) Adonc fut respondu
 Par luy, Morte ma fille & mon gendre perdu:
 Aussi le gendre & luy tost apres seirent guerre.
 Mais tu doibs au rebours, ces nouuelles oyant,
 De ton gendre iuger: car luy, Chrestien, voyant
 Qu'une cause qu'on croit Chrestienne vous allie,
 Fera(quand deux enfans ne le tiendroient lié,
 Quand autre Hymen de nous ne l'aura rallié)
 Que Dieu, que le danger, plus que l'amour le lie.

INSCRIPTION

POVR VNE STRVCTVRE EN-
treprise par la Roine mere du Roy.

A La Grandeur, Vert. & Liberalité de Catheri-
ne R. de Fran. auiourdhuy des II. plus puis-
sans & floriss. R. R. de l'Europe, mere à l'un,
& belle-mere à l'autre: tref-heroïque & tref-ma-
gnif. Princessè, soit iustement & deuotem. dedié le
dessein de si rare, si riche, & à tous siecles admirabl.
structure: à fin qu'elle qui sur tous les grans Heros
& grandes Heroines du monde, la peut plus fran-
chement & plus dignem. entreprendre, en faisant
honte à tout l'orgueil des plus grandes masses an-
tiques, plus par richesse & gentillesse d'inuention
que par despence immoderee: & mesme en peu
de temps pouuant venir à chef d'une entreprise
assez incroyable, vienne apres par vn solennel &
digne vœu la consacrer elle mesme, tant à la future
& perdurab. memoire de Charles VIII. trefchr.
R. de Fran. son fils, comme aussi à la sienne propre
deuëment & immortelem. soit pour vne marque
inaccoustumee de sa Gloire industrieuse & Ma-
gnificence incomparab. soit pour la conseruation
& protect. de la louange que merite vne inuen-
tion telle, aidee & pour iamais assuree sous l'appa-
rence d'un si haut nom: non pastant contre les ef-
forts de l'Ignorance & de l'Enuie, qui facilement
& tousiours seront contraintes de ceder à l'admi-
ration d'un tel ouurage, que contre la ialousie


que tout Art plus industrieux, & la Nature mesme
tres-inimitab. ouuriere, en doiuent prendre : l'un
pour se voir vaincu, l'autre pour se voir non seu-
lement imitee, mais extremement exprimee, &
quasi mieux que naïfvement & veritablem. ren-
due: comme tousiours le tesmoigneront assez ces
vers adressez icy, & sacr. à ceste mesme Maiesté.

*Toy qui dois & peux seule en la France entreprendre
Tel ouurage, qui t'est sacré par son Ouurier,
Voy comme tu pourras contre tout Art plus fier,
Contre Nature mesme un si bel art deffendre.
Eux, en voyant, vrayment sous la voûte s'épandre
Vne grand' vigne en treille: aux vrais miroirs d'acier
Les colonnes sembler, voire en tout l'œuvre entier
Tiges, fleurs, feuilles, fruits, vraymēt viuans se rēdre:
L'eau de l'arbre ou du roc sortir: le branlement
Cà & là faire croire un naïf mouuement,
Tous deux ialous, depits, nuisibles pourront estre:
Mais ne crain point, tous deux stupides se rendront,
Plus que l'arbre ou le roc, à tous coups qu'ils viendront
Penser que tout est faux, sans rien faux y cognoistre.*

Si l'Art & la Nature mesme se doiuent stupifier sur
tel edifice dressé de telle sorte, & en tous lieux
transportab. Il ne reste rien au monde qui ne puis-
se à iamais gratifier telle hardiesse d'œuvre: duquel
le dessein est à tel nom, & l'exécution est à telles
memoires eternellement vouee DD. Consacr.

A MONSEIGNEVR.

I.

 E C Y qu'à l'impourueu ce iour ie te proiete,
Grand Duc & grand vainqueur, est peu d'ou-
rage au pris

Des vers sacrez à toy, lors qu'à mes sens épris
Ton Dieu, ton Roy, ta France, & ta gloire s'obiete.

Mais pour monstrier mon ame en rien n'estre sujette
Al'oubli, quand de moy souuenance on a pris,
Ie iette en l'air ces vers: car quant aux longs escrits
Ce temps ne veut encor qu'au monde ie les iette.

Je te dy donc, qu'ainsi qu'il te souuint de moy,
Lors que fort esloigné ie ne pensois à toy:
Moy, ma Muse, & le ciel, sans que lors tu y pense,
De te recompenser prendrons vn tel souci,
Qu'à ton Dieu, qu'à ton Roy, & à ta France aussi,
Grand' part tu pourras faire en telle recompense.

I I.

C'est beaucoup voir les Dieux, les Heros, & les Rois,
Derang s'entre suiuan au tige de ta race,
Auoir pour digne pere vn HENRY, qui en face,
En façons & en faits sembloit passer ces trois:
Qui te laissant son nom pour armes & pour lois,
Te laissa son affable & sa hautaine grace.
Auoir pour frere & Roy, CHARLES, qui en sa place
Te commet, receuant de toy ce que tu dois.

Dés l'enfance auoir veu mainte alarme animee,
Presque enfant par deux fois estre grand chef d'armee.
Au camp premier, suiuant, pressant, gaignant, gardât:

SONNETS.

*Au second, triomphant de deux grandes batailles.
Mais c'est plus, qu'à Dieu seul le los & soing tu bailles,
A son vueil le laurier & l'olive accordant.*

III.

*En la douceur de paix, ta douceur naturelle
Semble presque oublier tes merites guerriers,
Mais le ciel ne peut voir seicher tes beaux lauriers,
Et veut que leur verdeur sans fin ie renouvelle.
Des Prouençaux la route ainsi s'oubliroit elle?
Pourrois-ie de Coignac me taire volontiers?
Taïre l'heur d'affranchir d'un tel siege Poictiers?
Taïre de Montcontour la victoire plus belle?
Du Roy la gloire y gist: trahir ie ne la puis,
Si soldat, si poëte, à mon Prince ie suis,
Trop plus que moy, mon Dieu, mon Roy, mon païs
Et quoy? tu vois qu'ici d'un tien petit bienfait (i'aime.
Enuers moy, la memoire ainsi chanter me fait:
Ton bienfait oublirois-ie enuers ces trois extreme?*

A MONSEIGNEUR LE DVC.

I.



*Ce iourdhuy d'un trait mesme, à l'impourueu, ie
veux
(Duc, qui près d'Alëgon ton tiltre & tō partage)
Au Duc d'Anjou ton frere offrir mon saint hōmage,
Puis sacrer dans ton temple encor mes humbles vœus.
Pareil bien, d'un cœur mesme, & sans penser aux deux,
De tous deux i'ay receu: sans qu'ayes tesmoignage,
Que si ce n'est d'effect ie vous fers de courage,
Qu'à toute heure esprouuer pour toy pour luy tu peux.*

Pour doncques enuers vous vos bienfaits recognoistre,
 Qui font vn frâc vouloir plus qu'vn tel don paroistre,
 Les armes & les vers ie pourrois presenter.
 Le premier seroit peu: mais ie voudrois vous suivre
 D'un tel cœur, que ie peusse en vos gloires reuiure,
 Comme vous la mort vostre en mes vers surmonter.

I I.

Jadis la France a veu son Hercule Gaulois,
 Dans son temple tenir les peuples, par l'oreille
 A sa langue enchainée: monstrant toute merueille
 De scauoir, d'eloquence, & de mœurs, & de loix:
 François ton haut ayeul, l'autre Hercule François,
 Ramena de ces dons la force nompareille,
 Qui rauit & enchainé. Or d'une ardeur pareille
 Goustant ces dons, il faut qu'à luy pareil tu sois:
 Hercule on te nomma peu apres ta naissance,
 Depuis nommé FRANÇOIS quâd tu sortois d'enfance,
 En ce nom tu changeas vn nom de haut renom.
 Mais des deux noms ie fây la difference nulle,
 Car puis qu'en tous effects François estoit Hercule,
 Suivant François tu prens d'Hercule encor le nom.

I I I.

Homere, qui diuin son Achille chanta,
 Commença, que ie pense, à la dernière année
 Qu' Achille auoit vescu, quand son ire obstinée
 Fit, que des fiers combats long temps il s'absenta.
 Stace moindre poète à ses vers presenta
 D' Achille le subiect, chantant la destinée
 De sa naissance, enfance, & ieunesse bien née,
 Mais la mort l'œuvre ensemble & l'ouurier arresta.

S O N N E T S.

*Commence de bonne heure, & en beaux faicts prospere
 Sous nostre Agamemnon: qui des deux estant frere,
 Fera qu'entre vous trois discord ne sortira.
 Si pour vos ans derniers, ie ne vy tant d'espace
 Que ie vous sois Homere, aumoins seray-ie Stace:
 Dans tel Stace (peut estre) vn Homere on lira.*

Au Roy, au nom de la ville de Paris, sur la paix
 de l'an 1570.

I.

MINERVE se peut dire aussi bien gardienne
 De mes murs, de mon nō, de mes arts, de mō heur,
 Qu'elle, fille du Dieu qui des Dieux est Seigneur,
 Fut garde de la ville, & gloire Athenienne.
 Bien qu'elle soit armee en sa ville ancienne,
 Par la tranquille oliue ell' emporta l'honneur
 Sur le Cheual guerrier, dont vn Dieu fut donneur,
 Par son offre effaçant l'offre Neptunienne.
 Si Minerue me fait comme à sa ville auoir
 Force & conseil en guerre & en paix, mon deuoir
 C'est de rēdre à mon Roy tout l'heur qu'elle m'y dōne.
 Si donc moy, ta sujette ay veu que tu te plais
 En la paix, ie te doy l'oliue de la paix,
 Attendant qu'un laurier plus parfait te couronne.

I I.

De quatre dons Amour, Pallas, Phebus, Mercure,
 Auoyent voulu ta paix marquer & asscurer:
 L'amour sainct d'un flambeau te vouloit honorer,
 Pour les tiens vers les tiens enflammer d'amour pure.
Pallas

Pallas vouloit t'orner (monstrant la paix qui dure)
 De l'arbre Athénien: Phebus te décorer
 De son arc, dont il vient sur les Monstres tirer,
 Pour de nos vices faire ample déconfiture...
 L'autre donner sa verge, à fin qu'à tout iamaï
 Nos maux on en charmât: mais en vain seroient faits
 Tous ces dons, car il faut que ta iuste pensee
 Pour ardre, unir, purger, ou assoupir ainsi
 Par saint Zele, accord, force, & charme, serue ici
 De flambeau, d'oliuier, d'arc, & de caducee.

I I I.

Pour monstrier que la paix (qu'ainsi comme tu veus
 Deuote ie reçoÿ) te vient du Dieu supreme,
 Et que toy, SIRE, autāt pour nous que pour toymesme
 L'as requise avec Zele, & prieres, & vœus:
 Je diroy volontiers qu'onques entre ces deux, (me
 Le vueil d'un Roy Chrestie, & le vueil de Dieu mes-
 Difference il n'y a: car Dieu prend soing extreme
 Des Rois, & dās sa main tiēt tousiours le cœur d'eux.
 Mais si durant ta paix tu guerroyes le vice,
 Redressant tout autant Piété que Iustice,
 Chassant avec tes cerfs tout crime detesté,
 Tāchant les foruoyans r'appeller en la voye,
 Tu prouueras au vray qu'en la paix qu'il t'enuoye,
 Dieu d'un cœur tout semblable à ton cœur a esté.

SONNETS.

IIII.

*Par mes feus iustement ie tesmoigne la ioye
 Que i'ay sentant mō Roy s'étreindre d'un beau nœu,
 Et luy mesme estre plein de maint & de maint feu,
 Qui en terre & au ciel diuersement flamboye.
 Sa pieté, son droit, son espoir qui verdoye,
 Tout prest à meurir, pousse au ciel maint ardent vœu,
 Par adresse & valeur son renom peu à peu
 Iette des feus qu'aux bouts de la terre il enuoye.
 Le saint feu qu'Hymen dōne à son cœur viēt des cieux,
 En terre son cœur prend un autre feu des yeux
 De ma Roine, & tel feu tous les autres excite.
 Or comme tous mes feus de ioye vont en haut,
 Que leur vertu flambante aille au ciel, car il faut
 Que par le ciel la terre en sente le merite.*

V.

*Pour vrayment m'ējouir ie ne quiers que dans moy
 Le ciel en ce saint iour transmette la liesse,
 Et que ce dieu qu'on seint sans fin estre en ieunesse,
 De ses Tygres tiré, me l'amene avec soy:
 Dans mes murs ie n'appelle Hymen, Iunon, la Foy,
 Venus, l'Amour, le Ieu, le Ris, & la Careffe,
 Qu'aujour d'huy tout tel Dieu, toute telle Deesse,
 Soyent aux lieux où Hymen doit étreindre mon Roy:
 Mais ie quiers que la paix n'aguere renolee
 Dans moy, pour consoler la France desolee,
 Etreigne autant son nœu qu'Hymen étreint le sien:
 Ou si la paix ne peut rester ferme en la France,
 Ie quiers qu'Hymen estrangle en son nœu d'alliance,
 Des faux sujets l'effort qui nous vole un tel bien.*

V I.

Qu'Hymen, Amour, le ciel, de foy, d'ardeur & d'heur,
 Leur ioigne, enflâme, illustre, & corps, & cœur, & vie,
 Tant qu'à nul change, ou haine, ou defastre afferuie
 Soit oncq leur alliance, & chaleur, & splendeur:
 L'accord qui vient des dieux, la flame, ou la grandeur,
 Ne craint discord, froideur, ny du bas sort l'enuie,
 Dont souvent est rompue, esteinte ou tostraue,
 D'Hymen, d'amour, du ciel, l'influence ou l'ardeur.
 Si aux grands le haut sang lie, allume, & bien-heure
 Tel laqs, telle ferueur, telle faueur, pour l'heure
 Vertu l'étreint, l'embrase, & prospere encor mieux:
 Ce lien royal donc, cet amour & hauteffe, (cesse
 Ferme, extreme, & supreme, en tout vainque sans
 Tout nœu, tout feu, tout don, d'Hymen, d'amour, des

V I I.

(cieux.

Extreme est la grandeur del'un & l'autre sang:
 L'un aiouste à son tige illustre d'Allemagne,
 Entre autres les maisons de Bourgogne & d'Espagne,
 Et du Romain Empire & le nom & le rang:
 L'autre sans fin des loix, fors que des siennes franc,
 Tout sang Chrestien deuâce, & par son Charlemagne
 A son beaulis doré l'Aigle noir accompagne,
 Lis qui mesme sans tache est pareil au lis blanc:
 La race donc des deux, la beauté, la ieunesse,
 L'heur & la ioye issant de malheur & tristesse,
 Et le long temps qu'Hymen par un premier amour
 N'étreigneit un mien Roy, meritent qu'on ordonne
 Tout un an pour tel iour celebrer, & qu'on donne
 A tous les ans d'apres la feste d'un tel iour.

SONNETS.

. V I I I .

Combien que Mars, ce semble, & Prince & peuple rende
 Appauuri, la grandeur du Roy, du pays sien,
 L'heur fertile, qui du mal semble croistre son bien,
 De ces nopces encorrendront la pompe grande.
 Mais ie sçay que d'un Roy la haste qui demande
 Le but d'un tel desir, & le temps qui à rien
 Ne me semble commode, & le lieu que ie tien
 Mal propre à receuoir & l'une & l'autre bande,
 Ont fait que de beaucoup telle pompe ait esté
 Moindre que n'en estoit du Roy la volonté:
 Mais il faut transferer de Spire & de Mezieres
 L'entier decorement de ces nopces en moy,
 Qui à ma Roine puis monstrer, que de mon Roy,
 Mars, ce semble, ialoux sur son heur ne peut gueres.
 A la Roine mere du Roy.

Soit donc par ta main digne à mon Roy consacrée
 L'offrande de ces vers, que d'un beau vœu i'ay faict
 Au nom de si grand' ville, en exaltant la Paix,
 Le Royal mariage, & l'une & l'autre Entree.
 Mon Roy croit la faueur des hauts Dieux rencontrée
 En ces trois heurs diuers, sortir de tes effects:
 Il faut donc qu'un present que sur ces trois tu fais,
 Ainsi que le present des trois heurs luy agree.
 Or si apres auoir par armes deffendu
 Son estat, par la paix calme tu l'as rendu,
 Si pour croistre son heur son espouse est fatale:
 Fay qu'à luy, qu'à la Roine, on iuge encor tant d'heur,
 Qu'eux deux entrans dedans leur ville capitale,
 Hors des flots soyent entrez au port de leur grandeur.

VERS CHANTEZ ET RECITEZ à l'Hymence du Roy Charles IX.

Vers intercalaires chantez & sonnez par toute la troupe
des Musiciens.

P V I S que de ces sept Dieux la conduite decore
L'heureux Hymen, qui va saintemēt attachāt
Deux cœurs royaux ensemble: il faut que nostre
chant
Les Dieux, le Roy, la Roine, & leur Hymen honore.

Vers recitez & chantez par la premiere Muse du premier rang.

C E S Dieux veulent que nous les neuf filles du
Dieu,
Qui presque à tous ces Dieux, ainsi qu'à nous,
est pere,
Sous nos sons, sous nos chants conduisions en ce lieu
Ceste arriuce autant nouvelle que prospere.
Ces sept Dieux sont seigneurs des ronds de l'univers:
Neuf vers doncques ie chante à neuf sujets diuers:
Les sept à ces sept Dieux gouverneurs, le huitiesme
Au grād Hymen qui suit: le neufiesme à nous mesme,
Qui toutes neuf orrons tels Hymen par nos vers.
Puis que de ces sept.

La premiere Muse du second rang.

C H A R L E S qu'Hymen étreint d'un liē saint & dous,
Estant de nom neufiesme entre les Rois de France,
Maintenant de ces Dieux, & d'Hymen, & de nous
Reçoit neuf grands faueurs en sa grande alliance.


HYMENE.

*La Lune offre grand fruit: Mercure offre les arts:
 Venus l'amour: Phebus toute splendeur, & Mars
 Grand victoire promet: Iupiter grand' richesse,
 Et Saturne exalté promet grande hautesse:
 Hymen grand ioye, & nous grâds los en toutes parts.
 Puis que de ces sept.*

La premiere Muse du tiers rang.

*Par moy de ces neuf sœurs, avecques ces neuf vers
 CHARLES, sa chere espouse, & l'Hymen qui les serre
 Ayent encor neuf dons: trois fleurs, six rameaux vers,
 Laurier, Myrte, oliuier, cedre, palme, & lierre,
 Oeillets, roses, & lis: pour victoire, amour, paix,
 Pour santé, pour iustice, & science en leurs faits:
 L'æillet soit pour grandeur, la rose pour plaisance,
 Leur lis pour grand espoir, puis qu'à eux l'influence
 Des neuf cieux ces neuf dōs par neuf Muses a faits.
 Puis que de ces sept.*

CLEION.

 *UTRE ces sons, ces chāts sortans d'instrumēs d'or,
 Et de celestes voix, oyez ces vers encor
 De moy Cleion, qui suis des Muses la premiere:
 Ces Dieux qui du Soleil empruntent leur lumiere,
 Ainsi que tout cela qui peut auoir en soy
 Grand' splendeur entre vous, l'emprunte de son Roy,
 Ordonnent que la cause aux dames ie declare
 De leur descente ainsi pompeuse, heureuse & rare:
 Car ils ont dans leurs chars tel superbe appareil,*

*Que quand leurs grans flambeaux enflammez du Soleil
Au ciel incessamment dans leurs cercles ils guident,
Et par eux sur vos maux & sur vos biens president:
Non que ce soyent les chars celestes de ces Dieux,
Ny les mesme animaux, qui dans leurs diuers cieux
D'un corps simple & subtil tirent ces chars, qui passent
Sans frayer leurs sentiers que par reigle ils compassent.
Car tous ces Dieux esmeus des causes & des fins
Que pour vous ils voyoyent en leurs heureux destins,
Font ceste pompe expres dresse'e en telle mode,
Qu'à vos yeux, qu'à vos sens l'appareil s'accommode:
Chasque dieu toutesfois imitant tout cela,
Que propre à soy là haut dedans son cerne il a,
L'œil mortel reçoit bien la plus pure figure
De ce qui est diuin, non la pure nature.
Car au ciel qui n'a rien en tout son Globe entier,
Qui tant soit peu puisse estre & massif & grossier,
Des animaux, des chars, des palais la matiere
Est faite d'esprit pur, de flame & de lumiere,
D'argent & d'or subtil, argent & or pareil
A celui de la Lune & celui du Soleil,
Et si quelque couleur s'y mesle, elle est pareille
A ces couleurs sans corps qu'à l'Aurore vermeille,
Ou qu'Iris l'arc du ciel par le Soleil reçoit,
Ou qu'au Soleil couchant souuent on apperçoit,
Qui tout autour de soy bigarre vn beau nuage,
Et par ces ombres fait embellir son image.
C'est pourquoy tous ces chars, tous ces animaux ci,
En or & en argent, & en couleurs aussi,
Et presque en mouuemens, en splendeurs, & au reste*

H Y M E N E E.

*Imitent quas'il'ordre & matiere celeste.
 L'appareil ample & digne, & propre à chacun Dieu,
 S'est fait tel que voyez, pour en temps & en lieu
 Qui seroit propre, orner vn si haut mariage,
 Qui auroit ja lié de foy, corps & courage,
 Telle espouse heroïque à l'heroicq espous,
 Qui sur vous estant Roy la fait Roine sur vous.*

*Ils accompagnent donc de faueurs & presence
 Hymen, qui à tel nœu donna telle excellence:
 Ce qu'ils font par Destin qui leur fait faire honneur
 Au grand Hymen, duquel ils ont sceu le bon heur.*

*Or le temps & le lieu de telle pompe extreme
 Fut alors arresté, qu'une ville supreme
 Non dessus les citez de France seulement,
 Mais sur celles qu'enclost Neptune entierement,
 Verroit en soy sa Roine heureuse, sage & bonne,
 Qui au chef ce iour mesme auroit pris sa couronne,
 Ce qu'ores vous voyez: mais pource que les lieux
 Où ce hautain projet fut resolu des Dieux,
 Les causes qui ont fait telle pompe conclure,
 La suite de la pompe, & la gloire future,
 Qui doit avec tout heur sortir de chasque don,
 Dont chacun de ces Dieux bienheura le brandon
 De ces nopces sur tous les Royaumes mariages,
 Et mesme d'un chacun des Dieux les tesmoignages
 Qu'ils veulent rendre ici de leurs vouldoirs tant bons,
 Me seroyent maintenant à declarer trop longs,
 J'ay voulu de ces Dieux outrepasser encores
 Le vueil, en escriuant dedans ce liuret qu'ores
 Je te presente, ô Royne, au long l'entier discours.*

Or

Or ly donc & retien, mesme avec luy tousiours
Des Muses les labeurs vueilla auoir agreables,
Autant qu'avec ces dieux tu nous as fauorables.

A LA ROYNE.

Par les Muses mesmes.

AINSI que c'est à nous à chanter de nos vois,
Entonner dans l'airain, toucher de doctes dois,
Vn heur qu'il plaist aux Dieux pour vn beau
sicle eslire:

Ne plus ne moins s'il faut pour le futur l'escrire
Aux grands Rois fils des Dieux, aux grâds Roines aussi,
Qui en tel heur des dieux, sont le premier souci,
Ce n'est aussi qu'à nous de l'escrire en tel stile,
Que presque à Rome estoyent les vers de leur Sibylle.
Car cela dependant du destin incogneu,
Et parauant secret entre les Dieux tenu,
Ne peut estre argument des hommes, quand la Muse
Sur tous auroit en eux des vers la grace infuse,
Pour aux siecles suiuians les heurs futurs pouuoir
Faire cognoistre, il faut cognoissance en auoir:
Ce qui n'est qu'aux Dieux propre: A nos forces hautai-
Soit le diuin sujet, & l'humain aux humaines. (nes
Tous les vers Sibyllins qui restoient, & ceux là
Que la Sibylle encor deuant Tarquin brula,
Venoient vrayment de nous, qui les Sibylles sommes,
Interpretes du vueil des Dieux aux dignes hommes.

En vers iadis estoient les Oracles diuers,
Et seules nous auons puissance sur les vers:
S'il sort de l'ame humaine aucun vers prophetique.

H Y M E N E E.

Nous l'inspirons tout fait dans l'ame poëtique,
 Qui en ce fait si prompt sent bien plustost l'effet,
 Qu'aucun égard, discours, ou bien travail du fait.
 Car nous, & nos beaux arts, qui l'ame au ciel emportèt,
 Faisons que d'elle apres des voix celestes sortent:
 De nous elle est l'organe, & si ce bon heur n'est
 Dedans vn vers, il meurt tout aussi tost qu'il naist.
 Tout ouurage, où par nous se souffle vigueur telle,
 Ha sa vie aussi bien que la nostre immortelle:
 Mais en ce fait (ô Roine) où la posterité
 Doit admirer sans fin l'estrange rareté
 Du haut dessein des Dieux, qu'un grand destin fit nai-
 le croy qu'onc à cela rien pareil ne peut estre. (stre,
 Donc de si rare emprise, & si merquable à tous,
 L'exécution digne & haute (qui a vous
 Avec si grand merueille aujourdhuy se presente,
 Qu'elle surpasse en tout de tous Rois toute attente,
 Qu'ils pourroient prèdre en soy des faueurs, d'ôt les dieux
 Voudroient un grand Hymen favoriser le mieux)
 Merite bien, qu'ainsi qu'on voit estre celeste
 De ces celestes Dieux la musique, qu'au reste
 De ce qui peut aider à remarquer sans fin
 Si nouuelles faueurs, rien n'y soit que diuin.
 Les grand's causes aussi qui tous ces Dieux esmeurent,
 Lors que par tel destin tel dessein ils conclurent,
 Pour apres tant de maux dans la France honorer
 Vn bien, dont on pouuoit tant de biens esperer:
 Mesme la conuenable & durable mémoire;
 Que requiert de ce fait la memorable gloire,
 Qui par ces Dieux se rend ainsi grande, d'autant

Qu' Hymen va tous ses nœus en ce nœu surmontant,
 Par tant d'heurs quereçoit non seulement la France,
 Mais bien la terre entiere en si digne alliance:
 Et pour fin nostre iuste & costumier deuoir,
 Qui sacre au vueil des Dieux des Muses le pouuoir,
 Font que tant pour le siecle auenir, que le vostre,
 Ces vers n'ayent requis autre main que la nostre.

Enten les donc, MADAME, & mesme à ce grand Roy
 Ton espoux, à la Roine aussi, qui pres de toy
 Apparoist tout ainsi qu'entre les Dieux Cybele,
 Quand mere elle se voit d'une race tant belle,
 Dont presque approche en traits, en hauteses, en heurs,
 De celle ci la race: à ses filles tes sœurs,
 Dont au grand Duc Lorrain se voit coniointe l'une,
 L'autre, peut estre, encor attend plus grand' fortune:
 A toute Dame aussi qui est, ou sera pres
 De ta grand maïesté, fuy les entendre apres.
 Si des Muses la bande en est la chanteresse,
 Si enuers si grand Roine un si grand chant s'adresse,
 Si le sujet surpasse en ce qu'il contiendra,
 Tous sujets, rien iamais au monde il ne crâindra:
 Nous dépitons l'orgueil, l'enuie, l'ignorance,
 Le sort, le tort, la mort: & quant à l'oubliance,
 Nous sommes de Memoire & la race & le soin,
 Qui pres de nous bannit sa contraire bien loin.

Ces Dieux ont veu l'heureuse & haute destinee,
 Qui sort de leurs aspects pour tel grand Hymenee,
 Qui, sa couple estant faite, ici deuoit venir,
 Pour avec plus grand pompe à tout iamais benir
 Ce saint nœu, qui surmonte encor toute alliance,

H Y M E N E E.

De la race d'Austriche à la race de France:
 Car CHARLES qui a pris ELIZABET, ainsi
 L'un Roy fils de grands Rois, l'autre qui sort aussi
 De Rois, & d'Empereurs, doit avec elle luire
 Dessus tous les flambeaux de ces Dieux, qui conduire,
 Orner, & prospérer ont voulu ce Dieu saint,
 Par qui CHARLES avec ELIZABET s'étreint.
 Vous diriez tant leurs feus de conionctions prennent,
 Que pour telle alliance allier ils se viennent,
 Si generalement, que d'opposition
 Aucune ne se rompt telle conionction.

Les Royantez qui sont des deitez prochaines,
 Emeuënt plus des Dieux les faueurs ou les haines,
 Soit pour voir la grandeur des Rois, ou pour sentir
 Ce qui en peut de bon ou de mauvais sortir:
 Ce qu'encore sur tout au mariage ils gardent.
 Car aux branches autant qu'aux tiges ils regardent,
 Vers les rameaus petits, ou vers les tiges hauts,
 Continuant la suite ou de biens ou de maux,
 Ou changeans l'un en l'autre, ou ramenans le change
 Du bien au plus grand bien, du mal au mal estrange,
 Dont les Dieux prennent bien, ou plaisir, ou pitié:
 Mais leur destin n'a point de haine, ou d'amitié,
 Inflechissable il suit; & les Dieux pitoyables
 Ne se font point pourtant par pitié flechissables:
 Long temps ils te l'ont fait (pauvre France) esprouuer,
 Car combien que pitié se peust en eux trouver,
 Pour tes guerres, tes maux, crimes, meurdres, outrages,
 Horreurs, saccagemens, ruines, où tes rages
 Aueugles te pouffoyent; ferme estoit le destin;

Qui de tes propres mains mesme à ta propre fin
Sembloit te trainer presque, alors que l'oubliance
De Roy, de loy, de sang, d'amitié, d'alliance
Tenoit vôtres cœurs saisis, & qu'on recommençoit
Tant de fois ce qu'au vray sa ruine on pensoit.
Car apres que du sort l'orageuse tourmente
D'horribles coups de mer, presque auoit toute attente
De ton salut chassée, on voyoit bien souuent
L'air serain, l'onde calme, & paisible le vent:
Mais c'estoit pour soudain te ramener au double
Le vent, le flot, & l'air, plus aspre, fier, & trouble.
On a veu mesme apres si diuers changement,
Du grand effort dernier l'aigre redoublement,
Pareffroyable heurt & bourrasque importune
De plusieurs de tes grands la nef, & la fortune,
Et la vie engouffrer, tant qu'ainsi s'annonçoit
Ton salut, ou ta fin du tout se prononçoit:
D'autant, ou que les Dieux molliissoient leur courage
Receuans telle amende, ou qu'apres tel orage
Tu ne pouuois iamais ton vaisseau rehausser,
Qui plein d'eau se voyoit deja presque enfoncer.
On voyoit mesmement que les peuples estranges,
De ton nom, de tes faits, de tes heurs, & louanges,
Et du sceptre si beau de tant & tant de Rois,
Qui à ces peuples mesme auoient donné tes lois,
Ne pensoient plus rien voir quasi que les reliques.
Pendans encore au flot de tes troubles Galliques,
Qui pleines dedans soy de leurs propres eclats,
Sans voile, ancre, timon, hune, cordage, & mas,
Sembloyent à tes voisins pour un temps rachetees

H Y M E N E E.

Des foudres, tourbillons, & vagues depitees,
 De ciel, d'air, & de mer, à la merci des eaux
 Abandonnees presque: & bien que tes vaisseaux
 Fussent grands, & encor fort armez, maint corsaire
 Proiettoit son proffit de ton dommage faire:
 Et maint estant, ou bien paroissant estre humain,
 Par Zele, ou autre égard tendoit aux tiens la main:
 Maint aussi se voyant presque en telle tempeste,
 Tâchoit qu'elle restast entiere sur ta teste,
 En son abrisi fort se serrant, & s'ancrant,
 Que le volant orage en luy n'allast entrant.
 Aux autres, d'une sorte ou d'une autre accusée,
 Tu seruois de pitié, d'exemple, ou de risée,
 Sans voir que tout autant leur en pendoit à l'œil,
 Sans voir mesme la part qu'ils auroient en ton dueil.
 D'as nous aux maux d'autruy viët plustost mal vueillâce,
 Que pour autruy secours, & pour soy pouruoyance.
 Mais soudain (tel auoit des Dieux esté le soin)
 Les contraires destins se trouuans au besoin,
 En temps calme & serain vindrent tourner la rage
 Du fortunel estrange, & le prochain naufrage,
 En seurté de vray port, voire aussi le mépris,
 Que precipitément l'estranger auoit pris,
 En admiration, en amour, ou en crainte
 De ta claire grandeur, qui soumise ou esteinte
 Ne peut estre iamais, ains qui peut faire choir
 (Peut estre) deffous soy tous ceux qui voudroient voir,
 Aider, ou hastier mesme en elle vne ruine:
 Grand est l'appuy qui sort d'ordonnance diuine.
 Tout estat qui se doit hausser plus qu'il n'est pas,

Se hausse mesme alors que lon le croit plus bas.
 Car pour l'heure le ciel, qui fit la Paix descendre,
 Par tel destin prospere vn moyen luy fit prendre
 Plus grand qu'elle n'eust oncq, d'amollir peu à peu,
 Desaignir, amortir, le cœur, le fiel, le feu
 Des François acharnez: penible & long affaire,
 Qu'elle ja descendant par deux fois ne peut faire:
 Et ce qu'au premier coup faire encor ne pourroit,
 Lors qu'à la tierce fois descendre on la verroit.
 Mais ce destin si doux dont elle print puissance,
 D'heure en heure en cela luy fait prendre accroissance,
 Tant que la rendant stable avec sa fermeté,
 Il establit les heurs qui en elle ont esté
 Destinez par le ciel: desquels ce mariage
 Tant haut, & tant heureux, ne sert pas de presage
 Seulement, mais d'entree & seur auancement:
 L'heur sans fin l'heur attire. Or quand fatalement
 Telle Paix descendit, les Dieux qui l'enuoyerent
 D'un tel bien resiouis, tout ce iour se trouuerent
 Chez le Pere Ocean. *

L'ABONDANCE.

Au Char de la Lune.

Un nature sans fin ie rens belle & seconde,
 Moy qui suis l'Abondance, & pour elle portâr
 Mariche corne en main, dõt tout fruct va for-
 l'aide, i'orne, i'empli, son soin, son art, son mōde: (tât,
 Mais celle là qui fait que plus ma corne abonde,
 C'est de Phebus la seur, qui du frere empruntant

H Y M E N E E.

*Ce grand lustre, qui va tout son teint argentant,
 Fait de tout abonder l'air, & la terre, & l'onde:
 Car la froide moiteur par le chaud s'enflammant,
 Se formant, s'accroissant, & souuent s'animant,
 De fruits, & de lignee apporte l'abondance.*
 CHARLES, ELIZABET, puissent d'oc par nous deux
*Se voir croistre en lignee, & ce qui naistra d'eux
 Puisse voir en tous fruits de France l'accroissance.*

Le Somme au derriere du Char.

*Pour le Silence, & moy, ie parle en peu de mots:
 Car l'un tousiours se taist, & l'autre dort sans cesse.
 Du Roy l'heureux Silence accroisse la Sagesse,
 Du Roy le Somme heureux accroisse le repos.*

L E G E N I E.

Au Char de Mercure.

MERCVRE, qui des arts fut au monde inuenteur,
*Fait que son gentil astre en tout tēps a puissance
 Sur toute inuention, sur toute cognoissance,
 Sur l'eloquence aussi, dont luy mesme est auteur.*
*Mais sans moy les humains n'auroyēt iamais cet heur,
 Qui premier aux bien nés, & mesme en leur naissāce
 Soufle vn pouuoir d'auoir toute telle influence:
 Pourtant ce Dieu me fait de son Char conducteur.*
*La nature pestrit la masse, moy Genie
 Diuers instinct luy soufle avec vigueur & vie,
 Fortune au eugle apres l'expose à ses hasarts.
 Nature fut prodigue, & Fortune opportune*

Tant

*Tant au Roy qu'à la Roine : en eux pourtant les arts
Puisse vaincre les dons de Nature & Fortune.*

LES TROIS GRACES

Deuant le Char de Venus.

AMOVR, *Venus*, & nous compagnes seruables
A Venus, les ardeurs, les beautéz, les attraits,
 Mettons aux cœurs, aux corps, aux graces plus loua-
Amour brusle les cœurs sous sa puissance attraits, (bles.
 D'air, de traits, & de teint: *Venus* les corps decore:
 Nous de grace animons l'air, le teint, & les traits.
Mesme en ces trois effets l'un parl'autre s'honore,
 Tous les trois sont communs entre nous, & pouuons
 Tous cinq ardre, embellir, & donner grace encore.
L'Amour aide aux beautéz, & aux graces qu'auons
 Mises en vous, *Venus* vous adresse & enflame,
 Et Nous vos beautéz croistre & vos flammes scauons.
Aussi d'Amour la mere, & de nous trois la dame
Venus que vous voyez, est le beau feu tousiours,
 La beauté, l'ornement de tout corps & toute ame:
 Cause, entretien, plaisir de l'essence, du cours
 Et mouuement de tout, de trois Graces suiuiue,
 Que merite son grand & continu secours.
Car pour tous biens *Venus* le seul bien de la vie,
 Doit de tous recevoir sans fin remerciement,
 Auquel sans fin par nous tout esprit se conuie.
 C'est pourquoy nostre nom lon peut prendre autrement,
 Qui est de graces rendre: or nous conuions donques
 De rendre ore à *Venus* graces infiniment.

HYMENE E.

CHARLES, ELIZABET, & leur Hymen, si onques
Rien a receu grand heur, ont receu tout le bien
Qu'avecq' Amour, & nous, Venus peut dire sien.

C V P I D O N

Conduisant ledi& Char.

Vers Sapphiques rymez.

SANS voler dans l'air ie guide en ce beau lieu,
Dans ce Char Cypris, reuerant ce beau Dieu,
Qui retint d'un nœu memorable sous soy
CHARLES, avec moy.

D'un leger trompeur le renom ie perdray,
Ferme pour tousiours tel amour ie tiendray:
Car chacun des Dieux promet en ce grand bien
Rompre le vol mien.
Seul ie suis autheur de ce bien, d'amour vient
L'heur d'Hymen: Cypris de mon heur, son heur tient:
Rien ne peut des deux ranimer le brandon,
Fors que Cupidon.

A V CHAR DV SOLEIL,
où estoient les quatre Saisons.

Vers intercalaires chantez & sonnez par les Musiciens estans dans
le creux du Char, & aussi par les Muses.

LE grand Soleil fait luire aux cieux
Tous astres, & sur tous la Lune:
D'un Roy le lustre radieux,
Ses deesses, ses demi-dieux
Fait luire tous, & sur tous une,

*Que mesme il fait paroistre un Soleil à chacun:
 Car puis que l'amour fait que les deux ne soyēt qu'un,
 D'un des deux la lumiere est à tous deux commune.*

LE PRINTEMPS.

PHEBUS marchant par ses maisons,
 De trois en trois signes rappelle
 L'une apres l'autre ses saisons:
 Nature par son change est belle.
 Moy le Printemps re florissant,
 La Jeunesse ie represente
 De ce monde raieunissant:
 La Jeunesse en tout est plaisante.
 Des fleurs dont ie suis couronné,
 Qui font au ciel la terre plaire,
 Ce bel Hymen i'ay mesme orné:
 L'heur florissant n'a rien contraire.
 Ce Roy, ceste Roine, en tout temps
 Puissest florir, de telle sorte
 Qu'eternel semble leur Printemps:
 L'heur est grand, qui tout heur apporte.


L'ESTE.

QUAND Phebus se chauffe, & qu'il laisse
 Ses Iumeaus, ie fors moy Dresse,
 Du chaud, du sec, du meurissant Esté:
 Toute fleur cede encor à la meurté.
 Ainsi que les fleurs il colore
 Du Printemps, mes épis il dore,

H Y M E N E E.

*Et mes épis dorent les champs encor:
 Cérés doree est plus riche que l'or.
 Je semble apres ieunesse tendre,
 Age meur faire au monde prendre,
 Qui tout soulage, & contente, & nourrit:
 Tout trauail plaist quand sa moisson nous rit.
 Que du Roy, de la Roine l'âge
 Tout meur, tout doré, vous soulage,
 En ramenant vn âge d'or pour vous:
 Du fruit des Rois depend le fruit de tous.*

L' A V T O N N E.


*Dieu flambant par moy, qui suis Autonne,
 Mille autres fruits & les vins mesmes donne,
 Tous ses beaux fruits il dore, & peint de cent
 couleurs,
 Le diuin Bacchus passe & bleds, & fruits, & fleurs.
 En tout beau val, en tout mont & campagne
 De ma Pomone Abondance est compagne,
 Avec elle & Bacchus la Lieffe est aussi:
 Bacchus par la Lieffe est vainqueur du Souci.
 La fin du mois, qui prend son nom d'Auguste,
 Me donne entree, & l'âge encor robuste,
 Soit pour l'an, soit pour vous, ie puis signifier:
 L'heureux labeur peut l'âge & l'hyuer deffier.
 En tout labeur propre à l'ame Royale,
 En tout beau fruit de leur couche loyale,
 Mesme en vertu, soyent veus ces deux ci foisonner:
 La vertu peut trop plus que les sceptres orner.*

L'HYVER.

LE Soleil s'esloignant en regne meremet,
 Tout est déjà flettri deffous mon Capricorne,
 Je retien toutesfois d'Abondance la corne:
 L'ardent travail passé le bien futur promet.
 Mon chef est tout chenu, horrible est ma saison,
 Mon vent & ma froideur tout l'air pourtāt nettoye,
 L'Amour m'est compagnon, le Jeu, le Ris, la Ioye:
 Souuent l'heur des champs cede à l'heur de la maison.
 I'enferme les thresors de la Nature, à fin
 De les garder: sous moy l'an finit, & commence:
 L'homme vieil semble ainsi renaistre en sa semence:
 La race & la vertu doit venger vostre fin.
 CHARLES, ELIZABET, pleins de prosperité
 Puissent en leur hyuer renouueller leur âge,
 Au ciel par Deité, sur terre par lignage:
 Tout bon Roy fils des dieux merite eternité.

L'A V R O R E

Conduisant ledi&t Char.

BIEN que j'aye un char propre à moy qui suis
 l'Aurore,
 Dont (Dames) vous semblez emprunter en vos
 teints
 Les roses, dont les cieux par moymesme sont peints,
 Je me suis mise au char qui seul tout le ciel dore.
 Ce Dieu duquel j'annonce, & deuançe, & colore
 L'or premier, veult qu'ici de mes rosines mains

H Y M E N E E.

*A ses cheuaux tous d'or ie reigle ainsi les freins,
 Pour ses faueurs vers vous, vous annoncer encore.
 Un Roy semble vn Soleil: que Phebus, que ces Dieux
 Eclairer de son feu, qu'au huiëtiesme des Cieux
 Les feux clouez, & ceux de ses douze demeures,
 Pour vous puissent tousiours tellement bien-heurer
 Ses ans, & ses saisons, ses mois, ses iours, ses heures,
 Qu'à l'enui CHARLES semble vn bas monde dorer.*

E N Y O N.

Au Char de Mars.

Vers Asclepiades rymez.

QN feint Mars violent, plein de fureur, de fiel,
 D'horreur, meurdre, hideur, en reputant le ciel
 Au bas monde pareil, tant que la passion
 Des Dieux semble regir leur volage action.
 Mars vient d'un sage Dieu, qui de ce monde sien
 Seul compasse le cours, l'ordre, le mal, le bien,
 Puis cherché de Venus Mars ne seroit iamais,
 Si tant il reiettoit l'ordre, l'Amour, la Paix.
 Aux mortels le desir, l'ire, le changement,
 Et l'aspre ambition, sont tel auexglement,
 Tant qu'ils vont s'animans en ce peril de Mars,
 Masquans l'ambition peinte de mille fards:
 Et pleins d'aigre dépit, pleins de fureur, de tort,
 Qu'on voit bondir en eux, contre le iuste sort,
 Presqu'aux grand's Deitez arracheroyent le droit,
 Qui esclau de Dieu rendre la terre doit.
 Lors maint peuple selon, qui de la loy se rit,
 Qui contemne le Roy, qui le mutin cherit,

*Brouille, & souille le temps: Mars retenant le soin
Des guerres, sa faueur fait venir au besoin.
Mars si fort ne requiert en ce pays le sang,
L'horreur, meurdre, hideur, qu'il ne le rende franc,
Et si vous reuereZ en ce pays la Paix,
Qu'en fin n'aille quittant tel pays à iamais.*

*Les vers chantez aux trois autres Chars de Saturne, Iupiter,
& d'Hymen, n'ont peu estre reconuez.*

O D E

*Sur la naissance de Madame, fille du Roy
Charles neufiesme.*

A la Lune argentine,
Qui au bas ciel chemine,
Et qui parfait son cours

En trente iours:

*Prenant, perdant lumiere,
Neuf fois s'est faite entiere,
Et se comblant neuf fois
A fait neuf mois:*

*Depuis que Dieu propice,
Qui par maint benefice
Veut mon Roy restaurer,
Et bien-heurer,*

*Luy vint former vn gage,
Vn sacré mariage,
Dont il lia la foy
De ce grand Roy:*

*Et fit son Ysabelle
(Qui Royne ieune, & belle,*

O D E.

Comme vn astre nous luit)
 Concevoir fruit.

Or que donques cet heure
 Par le ciel se bien-heure,
 Bien-heuré soit le fruit
 Estant produit.

Soit bon presage au pere,
 Soit plaisir à la mere,
 Qui ja leué sent bien
 Le ventre sien.

Il faut que la tendresse
 De sa prime ieunesse,
 Au faix qu'elle reçoit
 Sujette soit:

Et que la ioye amere
 De se voir si tost mere,
 En bref luy face auoir
 Vn grand espoir:

Comme la vigne à l'heure
 Qu'elle doit porter, pleure,
 Non pour se depiter
 D'ainsi porter.

La Royne peu scauante
 Du mal qu'il faut qu'on sente,
 Soit les enfans portant,
 Soit enfantant,
 Bien qu'elle en soit ioyeuse,
 Souuent morne & paoureuse,
 Pourroit bien à l'escart
 Pleurer à part:

Mais

*Mais son esprit contemple
Deux Dames, dont l'exemple
Chassant ce léger dueil,
Peut tarir l'œil.*

*Ces deux demi-Deesses
En toutes allegresses
Ont peuplé ces bas lieux
De demi-dieux:*

*Des Nymphes ont portees,
Quelquefois tourmentees
D'un desastre arriuant,
Plus que deuant.*

*L'Imperatrix sa mere,
De ces deux la premiere,
Pour la rassurer mieux,
S'offre à ses yeux.*

*Puis tousiours aupres d'elle
Est nostre grand' Cybelle,
Mere seconde aussi
Des Dieux d'ici.*

*De l'Aigle, dont la serre
Peut porter le tonnerre,
Et qu'on croit dedans l'air
Plus haut voler,*

*La femelle hautaine,
Du naturel prochaine,
(Car de l'Aigle elle tient,
Puis qu'ell'en vient).*

*Ne peut qu'elle ne face
Aux deux semblable race:*

O D E.

Ce qu'au Soleil exprés
 On preuue après.
 La femme venerable
 Du Prince redoutable,
 Qui tient dedans sa main
 L'Aigle Romain,
 D'Empereur mesme fille,
 A peuplé sa famille,
 Pour regir les mortels,
 D'enfans tous tels.
 Tout cela qu'elle porte
 Sent son Aigle, en la sorte
 Ce naturel hautain
 Leur est certain.
 Comme qui verroit croistre
 (Si cela pouuoit estre)
 Le grand tige admiré
 D'un Lys doré:
 Si haut qu'il semblast mesme,
 Que la grandeur extrême
 Des fleurons precieux
 Touchast aux cieux,
 Tant que leur beauté grande,
 De tous les Dieux la bande
 Qui la caresseroit,
 Estonneroit.
 Ainsi nostre Heroine,
 Nostre grand CATHERINE,
 Esleue l'heur fatal
 Du Lys Royal.

Qui des Rois veufue, & mere,
D'alliance prospere,
Tous Princes sous son Lys
A recueillis.

Tout ce qu'en ces Prouinces
L'Europe a de grands Princes,
La nomment en grand heur
Ou mere, ou sœur.

Car on les a veus rendre
Presque tous Bruz, ou Gendres,
Sans les futurs partis
De ses deux fils.

Cy belle elle est seconde
De grands liens au monde,
Sans les troubles peruers
De l'univers.

Un Tige on la peut dire,
Dont les fleurs on admire,
Sont ses filles, & fils,
Fleurons du Lys.

L'odeur de tant de grace,
Qui en la terre basse
En telle fleur se sent,
Au ciel se rend:

Au ciel leur chef arrive,
Et leur splendeur naïfue
Presque efface cela,
Qui reluit là.

CHARLES le Prince nostre,
Grand fleuron sur tout autre,

Par un couronnement

Fait l'ornement:

Veu ses ans, son attente,

Hommes, & Dieux contente:

Ceux-là luy soyent soumis,

Ceux-ci amis.

Son cœur est de hauteſſe,

Et son corps plein d'adreſſe,

Son ame & son cerueau

De deſſein beau.

L'exploit de la vengeance

Sur les traitres de France,

Fait par ſi bon eſſet

Voir ce qu'il ſçait.

Les enfans que Dieu donne,

C'eſt cela qui guerdonne

La foy, qui d'un nœu ſaint

Deux cœurs étreint:

Qui ſouuent dans noſtre ame

Serre, eguiſe, renſlame,

D'un froid amour le nœu,

Le trait, le feu:

Qui le plus rend loyale

La couche coniuſſale,

Et qui plus en met hors

Les ſourds diſcours:

Qui ſouuent plus en chaſſe

Le dédain, qui pourchaſſe

Vn diuorce, qu'il veut

Faire ſil peult.

Qui donne éjouissance,
 Qui nourrist l'esperance,
 Qui plus en tout beau fait:
 Valoir nous fait:
 Qui maint dessein inuente,
 Qui en guide l'attente,
 Qui en borne le bout,
 Seul but de tout.
 Qui fait d'un heur extrême
 Voir en autruy soymesme,
 Pour en luy vivre alors
 Que sommes morts.

S O N N E T.

Si Dieu pour premier fruit de ton saint mariage
 T'eust doné (SIRE) un fils, luy naissant tout guerrier,
 Comme enfant d'un tel Roy, t'eust avec le laurier
 De maint futur triomphe apporté le presage:
 Mais de ton saint lien tu as pour premier gage
 Vne fille, qui doit contre ce monstre fier
 Nostre obstiné Discord, apporter l'oluiuer,
 Et de la paix de France estre l'heureux message.
 Paix soit premier chez toy, pour dehors perdre après
 Tous ceux qui pour leur gaing à ta perte estoient prests:
 Ta Fille aussi nous vient, lors qu'une paix nataire
 Par toy du sang des chefs seditieux nous sort:
 Puis un fils qui naistra doit d'un si bel accord
 Faire naistre avec soy sur l'estranger ta gloire.

VERS FRANCOIS EXTRAITS
de la Masquarade faicte à l'hostel de la
ville de Paris 1558.

CHANSON D'ORPHEE.

Si iamaïs rochers & bois,
Ma force dans soy sentirent,
Si sous ma voix, sous mes dois,
S'arrachans ils me suiuirent,
Suiuez rochers, & avecq' vostre Orphee
Admirez moy d'un grand Roy le Trophee.
Si quelque Nymphe dans vous,
Quelque Pan, quelque Satyre,
Pour ouir mes accords dous,
D'auenture se retire,
Chantez rochers, & avecq' vostre Orphee
Adorez moy d'un grand Roy le Trophee.

LA MUSIQUE DES ROCHERS.

On nous auoit veu cacher
Pour t'ouir, aux roches creuses,
Mais avecque le rocher
Nous tirent tes mains heureuses,
Rais, abstraits, mourans d'ouir Orphee,
Et plus encor d'ouir vn tel Trophee.
O heureux Roy, qui as eu
Pour ton sonneur vn Orphee,
Heureux sonneur qui as peu
Si bien sonner tel Trophee,

O trois trois fois trois fois heureux Orphée,
O trois trois fois trois fois heureux Trophée.

MINERVE.

Voyant ainsi, ô Roy, dans ma main docte & forte,
Branler assésurément les armes qu'elle porte,
Et voyant ma Meduse effroyer derechef
Tous vos yeux des serpens de son horrible chef,
Me voyant mesme audir la bourguignote en teste,
Qui son panache fait flotter dessus sa creste,
Ne sçay tu pas desia que Minerve ie suis,
Qui seule sur les arts & sur les armes puis
Autant qu'Apollon mesme, autat que Mars mes freres?
Minerve, qui laissant mès deux villes premieres
Athenes, & puis Rome (aujourdhuy seul tombeau
De ce qu'elles ont eu de bon, de grand, de beau)
Me suis de ton Paris faite la gardienne
Par ton Pere, qui seul merend Parisienne,
Et merendra tousiours, si tousiours ie ne voy
Fouller l'heur que ie donne à ta ville & à toy,
Et sur le sçavoir saint et mettre le pié barbare,
Sçavoir, qui seul les Rois des lourds bouuiers separe,
Sans lequel, soit qu'un Roy le suive par autrui,
Ou qu'en soy mesme il ait sa conduite par luy,
Il ne sçauroit guider l'esper de plus grand gloire,
Ny, estant mort, auoir de sa mort la victoire.
Mais pourquoy tout ceci puis que te bras tu tends
Pour de ta gardienne estre garde en tout temps?
Ie m'egare, & m'estant propasée autre chose
Ie m'esbahi qu'ainsi sans propos ie propase.

M A S C A R A D E.

Or sçache donc que c'est, & sçachent tous pourquoy
Ma troupe tant estrange arrive deuant toy.

Tu as bien leu qu'auant que la Greque ieunesse
Eust voué de laisser le repos de la Grece,
Se donnant au hazard pour premiere ramer,
Et contraindre au faix l'eau pucelle de la mer,
En suiuant le conseil du cauteleus Pelie,
Qui pensoit perdre ainsi de son Neveu la vie,
S'il pouuoit enuoyer ce courageus Iason
Au dangereux conquest de la riche Toison:
Sur le mont Peliaque en la forest parlante
Ie fei faire pour eux la Nau prophetisante,
Qui fut nommee Argo, & Argonautes ceux
Qui dedans elle iroyent par les flots depiteux.
Ils demarent, ils vont, mille monstres ils voyent,
Souffrants cent mille maux cent fois ils se deuoyent:
Ils viennent en Colchos, où Medee les fait
Iouir de la Toison, & son frere deffait.
Ils partent en danger, mille perils les suiuent,
Et recourants leurs maux d'autre maux leurs arrivent:
Mais sur tout par les bords de la seiche Libye
Furent contrainsts porter leur Nauire affoiblie,
Leur mere soulageants qui les auoit portez,
Et du desir de l'or les auoit contentez
Sous ma guide tousiours, qui de leur nauigage
M'estois faite compaignie en tout ce grand voyage,
Fauorisant ma Nef, qui apres par les Dieux
Tiree en haut fut faite vn astre de nos cieux.

Or maintenant voyant que i'ay voulu me faire
De ton Paris peuplé Deesse tutelaire,

Dés

Dés que ce grand FRANÇOIS vint goûster nos douceurs,
 Pere second de moy, pere de mes neuf Sœurs:
 J'ay tousiours veu porter pour enseigne honorable
 De la felicité de Paris admirable
 La figure d'Argon, qui monstroit un destin
 Que ceste mesme Argon tu aurois en la fin.
 J'ay ces iours obtenu de Iupiter mon pere
 Qu'elle redescendroît, pour en ce temps prospere
 Te l'offrir, t'assurant que par son grand moyen
 Plus que n'est la Toison tu conquerras de bien,
 Emplissant tous les lieux de maint & maint trophée,
 Ainsi comme le sçait ce tout diuin Orphée,
 Qui maintenant ton Nom dessus son Lut sonnoit,
 Et qui iadis aussi les Grecs accompagnoit:
 Ainsi que sçait Iason & ses compagnons mesme,
 Ayant bien veu là bas filer ton heur suprême
 Par les fatales mains de ces trois Sœurs, qui font
 Ou redesont sans fin l'heur que les hommes ont.

I A S O N.

Je sçay mesme, qu'un iour & la Toison doree,
 Et le sceptre, & les biens, & la race honoree,
 De ceux qui vont portant en leur col la Toison
 Sentiront que HENRY est leur fatal Iason,
 Apprenans que sans fin la celeste ordonnance
 Donne à ceste grand Nau sur la Toison puissance:
 Ceste Nau, qui non pas seulement en Colchos,
 Mais aux deux bouts du monde emportera ton los.
 Elle est encor parlante, elle est encor prophete,

Rompre ni faire rompre aucunement la foy,
 Ainsi qu'on la rompit à Medee insensee,
 Quand elle fut par moy pour vne autre laiffée.
 Si tu te peux garder, toy qui es Roy prudent,
 De maint flateur subtil, maint flateur impudent,
 Qui courtisan de ris, de façon, de harangue,
 Couure mille venins du doux miel de sa langue,
 Et qui, si tu n'estois un bon Prince auisé,
 Rendroit sur la Vertu le Vice autorisé,
 Plus trompeur que n'estoient les Serenes flatantes,
 Dont i'échappay les vois doucement attrayantes,
 Qui pour le beau loyer du son qu'ils accordoient,
 Et ma vie & la vie à tous nous demandoient.
 Brief si en toutes peurs, tous perils, tous orages,
 Argon ta pauvre Nef tu portes & soulages,
 Comme dans la Libye elle se fit porter,
 Et comme tu la vois deuers toy rapporter
 Dessus le dos courbé des Argonautes mesmes,
 Qui paroistroient tous tels que sont les ombres blesmes
 Des champs Elysiens, où nous des long temps morts
 Habitons maintenant, & n'auroient point de corps
 Si Minerue n'auoit à vostre humaine veüe
 Accommodé la chose. Estant donc ainsi veüe
 Si viuement, croyez que tous vous nous voyez
 Sans phantasmé, tous tels que voir vous nous croyez:
 Tout ainsi par la mer quelquefois nous vogasmes,
 Tout ainsi quelquefois ce vaisseau nous portasmes:
 Et si on ne le croit qu'on oye le vaisseau
 Parler au vieil Iason, & au Iason nouveau.

MASQVARADE.

ARGON.

*Jason mon plus cher fils, & la gloire indomtee
 Quand i'estois sur les eaux, de toute ma portee,
 Si iusques aux enfers descend l'affection,
 Et si les Ombres ont aucune passion,
 Pren vn peu de pitié de moy qui suis venue
 Du ciel, où ie me suis par si long temps tenue
 En aise & en repos: & il faut maintenant
 Qu'on me voye cent maux & cent maux soustenant:
 Toutesfois puis que c'est pour porter de tels Princes
 Iusqu'aux dernieres mers, aux dernieres prouinces,
 Je veux bien supporter encore ce labeur.
 Mais Mopsus, qui soulois predire le malheur
 Et l'heur de mes enfans, ie te pry prophetise
 A mon second Jason l'heur de son entreprise.*

M O P S V S.

*De ceste peine en bref ie te dechargeray,
 Mere, & au lieu de toy ie prophetiseray
 Ce qu'ont desia predict quelques Prophetes sages,
 Ce qu'ont desia monstré mille & mille presages:
 Que les François bien tost loing du monde à l'escart
 Mettront au ioug le col de l'Anglois Leopard:
 Et de l'autre costé rabbatront l'arrogance;
 De ceux qui se font grands par ruse & alliance,
 Faisant en fin la fin de l'Empire Romain,
 Duquel le nom mourra sous leur fatale main.
 Et qui ne le croira, que la raison il croye,*

Apprenant que le ciel de terre en terre enuoye
 L'Empire des humains: & que quand il permet
 Vos humaines grandeurs croistre iusqu'au sommet,
 Ce n'est sinon à fin qu'aussi tost il les baisse,
 Comme monter en haut lentement il les laisse:
 Cestuy là des long temps est déjà renuersé,
 Semblable au pauvre oyseau, qui sur terre bleßé,
 Alors que dedans l'air se branler il s'essaye,
 Ne fait plus que trainer & son sang & sa playe.
 Et si tu crains, ô Roy, que le François prochain
 De la grandeur qu'auoit iadis le nom Romain,
 Ne soit point heritier de la grand' Monarchie,
 Et que ton Croissant cede au Croissant de Turquie,
 Tellement que lon vist vn grand Lion couché
 Apres auoir long temps sur le ventre marché,
 Pour épier sa proye, en s'elancant deffaire
 L'Aigle & le braue Coq l'un à l'autre contraire:
 Assure toy par moy que les Turcs mesme tiennent,
 Que les freins de l'Empire entre les mains reuiennent
 Des grans Rois indomtez heritiers de Francus,
 Par qui doiuent vn iour eux mesme estre vaincus.
 Mesmes qui te peut plus assurer de ces choses,
 Que si deuant tes yeux Calais tu te proposes,
 Et les derniers Lauriers, dont apres vn malheur
 Ce grand Prince Lorrain couronne ta grandeur?
 Car cela seul déjà te promet l'Angleterre,
 Ou les destins sont faux, l'Angleterre & ta terre
 Auec l'Escocce aussi, feront que chacun Roy
 De l'Europe sera contraint flechir sous toy.
 Et mesme en ce discord qu'on verra bien tost naistre

M A S Q U A R A D E.

*Pour l' Empire, il faudra que toyle plus grand maistre,
 Si tous les tiens au moins sçauent bien leur mestier,
 Tâches de ce grand rond auoir le tiers entier:
 Si l' Europe tu as, les deux autres parties,
 Veu qu' au pris de l' Europe elles sont abruties
 Et barbares, en fin par force & par moyens
 Peu à peu couleront deffous la main des tiens:
 Tant que si seul tu n'as toute la terre basse,
 Tu te peux asseurer qu' un iour l' aura ta race.
 Voila ce que Calais, & le cœur aiousté
 Aux tiens, peut aiouster à telle Maïesté.*

I A S O N.


*Argon s'en resiouit, Argon parmi la voye
 En murmuroit tantost vn long Io de ioye,
 Oyant le bruit meslé de toute la cité,
 Qui la porte en signal de sa felicité.
 Croy doncq' qu'elle est ja preste aux premieres cōquestes,
 Qui des vieux ennemis doiuent briser les testes.
 Ne crain donc point, tu as des Deesses & Dieux
 Comme nous, pour ta guide & faueur en tous lieux,
 Ta femme est ta Iunon, ta sœur est ta Minerue,
 Qui le droit de la nostre à bon droit se reserue:
 Et bien que nous n'eussions autre support sinon
 Que celui de Pallas, & celui de Iunon,
 Tu as outre ces deux vne tierce Deesse,
 Vne Diane archere, & chaste, & chasseresse.
 Cebon Roy Nauarrois, son ieune frere encor
 Te pourront bien seruir de Pollux & Castor,*

Ce grand vainqueur de Guise est ore ton Hercule,
 Qui sous toy, l'Espagnol outrepassant recule,
 Calais & Zethes sont deux freres qu'il a,
 De deux freres encor vn chacun choisira
 Le nom qu'il luy est propre, & l'autre diuin frere
 Qui d'un double conseil les affaires modere
 Auecq' la pieté, sera ton grand Tiphys
 Gouverneur de la nef. Mesme ie voy ton fils,
 Et d'autres ieunes Dieux, & tant d'autres Deesses,
 Qui leurs faueurs rendront de tous malheurs maistresses.
 Voici nos rames, ly dedans elles nos noms,
 Et vien accommoder les noms des bons aux bons,
 Nous les allons porter ensemble & leur nauire
 La dedans, pour tousiours t'attendre, & te conduire
 Par tout où il plaira à ta grand' Maiesté
 Singler d'un voile plein de la prosperité.

SVR LA NAISSANCE DE

Henry de Lorraine Comte d'Eu, se-
 cond fils du Duc de Guise.


SONNET.


 Dieu pour tout ce iour tourne en douce tiedeur
 Ma fieuze, qui s'estend d'une rage obstinee
 Sur mon sang, sur ma chair, sur mes nerfs achar-
 Tantoſt d'ardeur me tue, & tantoſt de froideur: (nee,
 En ce relâche (ô Dieu) renforce encor mon cœur,
 Ma Muſe, & ma raiſon par foibleſſe étonnee,
 Pour augurer en bref l'heureuſe deſtinee
 D'un enfant dont en moy ie prenoy la grandeur:
 Enfant, qu'ores on offre au ſainct ſacré Bapteſme,

C H A N T.

Outre l'heur de ton astre, outre cet heur extreme
 Qu'en vaillance le ciel ottroye au sang Lorrain:
 Ton nom HENRY t'excite à gloire plus hautaine,
 Par l'heur fatal d'auoir pour pere & pour parrain
 Deux HENRYS, du haut sang de BOVRBON
 & LORRAINE.

C H A N T.


 ESSANT de mon malla rigueur,
 Et ma Muse prenant vigueur,
 (Enfant) sur le nom qu'on te donne,
 Je veux de trois hauts noms chanter,
 Qui le plus semblent augmenter
 L'heur de la Françoisse couronné.

L'un de ces noms, dont le bonheur
 Emporte auiourdhuy plus d'honneur,
 C'est celuy que porte ton Pere,
 Celuy qu'a ton Parrain, celuy
 Que tu prens auiourdhuy de luy,
 Nom qui soit à tous trois prospere.

Ce qui dedans la France rend
 Ce beau nom de HENRY si grand,
 C'est ce grand HENRY magnanime,
 HENRY pere de nostre ROY,
 Qui par tout exemple de soy
 Son fils à toute gloire anime.

De ce grand HENRY les valeurs,
 Maugré tous les diuers malheurs,
 Ialoux d'une si braue gloire,
 Ont fait qu'il ait esté nommé

Pere

Pere des armes, qui armé
 Sur Mars mesme eust eu la victoire.
 Les armes ne sont seulement
 D'un si grand Prince l'ornement:
 En voyant sa iustice grande
 Et ses vertus, on eust cuidé,
 Qu'il eut seul sous soy possédé
 La vierge Astree avec sa bande.

O que n'ay-ie en ceste chanson
 Et pour le vers, & pour le son,
 La veine, & l'haleine plus forte,
 Son Esprit ie deisfroy
 Au ciel, & ça bas ie seroy
 Sortir des fleurs de sa chair morte.

HENRY, i'empliroy de ton nom
 Tous les cieux, & de ton renom
 Tout ce bas globe auquel nous sommes,
 De ta memoire tous les temps,
 De ton amour tous cueurs des gens,
 De ton exemple tous grands hommes.

Sur les sons sacrez ce Roy tint
 Ton Pere, qui son nom en print,
 Et qui fait preuue en sa ieunesse,
 Outre le cueur heredital,
 Que quasi ce nom est fatal,
 Et pour adresse, & pour prouesse.

Ton Parrain mesme de * *
 Donne du preux sang de BOURBON
 Et de l'heur fatal de son nom
 Grand preuue & plus grand' esperance.

C H A N T.

*Ce qui rend ores entre nous
 Ce nom memorable sur tous,
 Ce Prince à son second fils mesme
 Ce beau nom fatal a laissé,
 Qui par luy sera surhausé
 Vn iour en son honneur suprême.*
*Il est du naturel entier,
 Comme du nom fait heritier:
 Car dès qu'il est sorti d'enfance
 Sous CHARLES son frere, & son Roy,
 De deuoir, d'ardeur, & de foy,
 Il s'est fait l'Achille de France.*
*Il a faulxe Religion,
 Il a l'ouuerte rebellion,
 Se masquans de Pieté feinte
 Fouloient tout deuoir & raison,
 Quand l'erreur & la trahison
 Il a dessous son ioug étreinte.*
*Estant encor si ieune d'ans,
 Deux fois chef d'armee en deux camps,
 Entre maint acte memorable,
 Deux grandes batailles gaignant,
 Auant le temps il va ceignant
 Son front de laurier perdurable.*
*Or (Enfant) c'est assez chanté
 Du nom, que tu as rapporté
 Du Baptesme ceste iournee:
 La valeur de ceux que i'ay dictés,
 En cueur, en faicts, en grace, en dictés,
 Te soit avec leur nom donnee.*

A M. le Comte de Fauquemberge &
de Courtenay.

QUAND seul sans toy ie suis, car riẽ que ton absẽce
Ne me fait trouuer seul, tant que quand ie serois
Auecq' tous les humains seul ie me iugerois,
Car plus que tous humains m'est ta seule presence:
De peur de m'ennuyer ie fantastique & pense
Par quel art, quell' magie, à tous coups ie serois;
Que toy estant absent, present te trouuerois:
Car jamais nul ennuy, toy present, ne m'offense.
Ma Muse ou ce Demon qui me fait tant de dons,
Que lon me met moy mesme aurãg des hauts Demõs,
Se masquant lors de toy se presente à ma veuë.
Par luy donc ie te voy, en luy ie t'entretien,
Et des vers du Demon, qui est & tien & mien,
Present, absent, ie pais l'ame à toy toute deuë.

I I.

C'est vn grand heur à toy d'auoir de la Nature
Vn esprit, qui fait honte au labeur & à l'art:
C'est vn grand heur à toy sans craindre ny hasart,
Ny destin, t'appuyer dessus la raison pure:
C'est encor plus grand heur, que non obstant l'iniure
Que ton procès, ta fieure, & l'enuie, & le fard
De plusieurs, & tout mal qui de tous ces maux part,
Te font sans fin, sans fin ton sens tout tel te dure:
C'est vn grãd heur de voir qu'aux vertus, aux hauteses,
De l'esprit tu ioindras les grandeurs, les richesses,
Que ie sen s'euiller d'un sommeil long & fort:
Mais entre tous ces heurs, qu'est-ce qui voudroit taire
L'heur de m'auoir pour tien, qui veuë & qui puis faire
Tous heurs croistre en ta vie, & reuiure en ta mort?

SONNETS.

III.

*Jamais ne peut nostre ame asseoir de certitude
 Sur rien, que sur la vraye & parfaite amitié:
 Les filandieres sœurs, ny les sœurs sans pitié,
 N'asservent point tel bien à la vicissitude:
 Tousiours à soy semblable en l'eternel estude,
 De tenir & main preste & prompt & ferme pié,
 A tous maux de l'ami participe en moitié,
 De tout sans regarder ne gré n'ingratitude:
 De là le bien de l'homme est fait vn plus grand bien,
 De là les maux humains se transforment en rien,
 Cela combat la peur & souuent la mort nostre:
 Mais l'amitié cent fois est plus heureuse encor,
 Quand vne couple ainsi que Pollux & Castor,
 Se peut communiquer Deité l'vn à l'autre.*

IIII.

*Combien que veu ton sang, ton rang, ton abondance,
 Seruiteur ie te sois: i'ose prendre enuers toy
 Vn nom plus haut, plus digne, & plus grand, puis qu'à
 Tu daignes t'abaissant en donner la puissance. (moy
 Je suis donc ton ami, mais tel que l'excellence
 Du beau mot n'orgueillit mon deuoir ny ma foy:
 Car plus que mille serfs ie puis ce que ie doy
 Payer, & croy qu'amour doit toute obeissance.
 Thesee Perithoe, & Pylade & Oreste,
 Scipion & Lelie, & si quelque autre reste
 Des couples des amis firent, ce croy-ie, esgaux:
 Mais l'alliance ainsi d'hommes pareils vnüe,
 Ne pourroit rien gagner en l'esprouue des maux,
 Sur mon amitié serue & seruitude amie.*

V.

*A fin que ceux qu'enuie ensemble brusle & mange,
 Ne se peinent de quoy tu me peux tant aimer,
 La brusque & libre humeur qui me vient enflammer,
 Me fera déborder iusques en malouange.
 Sous vn sort malheureux le ciel en ce corps range
 Vn esprit que tout sien il peut bien estimer,
 Vn sens, vn iugement, vn cœur qu'on peut nommer
 Vray iuge du vray bien, vainqueur du mal estrange.
 Un prompt sçauoir sans fard, vn dol, mais sans vsage,
 Vn ie ne sçay quel don qui iuge & qui presage
 Toutes fins par discours, non par songes menteurs.
 Une bonté qui point ne change ou s'espouante,
 Et si lon dit que trop par ces vers ie me vante,
 C'est qu'estant tien ie veux te vanter en mes heurs.*

VI.

*Si aux extremes maux, où mon hasart me guide,
 Tu n'esprouuois mon ame estre sans changement,
 Qui prend du bien non pas du mal le sentiment,
 Comme en tout asseuree & non comme stupide:
 Tu pourrois bien douter que le sort, qui preside
 Sur tous cœurs, les changeant de moment en moment,
 T'estant cruel pourroit faire vn ébranlement
 A ma foy, dont la mort ne peult estre homicide.
 Mais l'espreuue de l'vn te peult rendre certain
 En l'autre, que si Dieu mesloit le ciel hautain
 A la terre, & vouloit faire vn Chaos renaistre.
 S'encor i'estois tout tel, ie serois & ne puis
 Tant ceder à ce Dieu, que si en tout ie suis
 Malheureux, en cela ie ne puisse heureux estre.*

SONNETS.

VII.

*Maudiray-ie (cher Comte) ou les Dieux enuers moy
Nonchalans, ou ialoux, ou du fort la constance,
Qui ne fut oncq constant fors qu'en l'aspre nuisance,
Que sans relâche il fait tant à moy comme à toy?
Des celestes flambeaux maudiray-ie la loy?
(Si quelque loy sur nous peut auoir l'influence
Des corps non animez:) maudiray-ie qu'en France
Ils m'ont fait naistre & voir tout cela que i'y voy?
Maudiray-ie la Court, où les grands qui ne pensent
A moy, tant que trop plus que moy mesme ils s'offensēt.
Ha non! ie maudiray seulement la Vertu.
Seul i'exerce auiourdhuy ce qu'en moy plus i'admire.
Car pourquoy? si i'estoy sans cela, penses-tu
Qu'en France en vn tel temps i'eusse rien q̃ maudire?*

VIII.

*Comme vn docte artisan, si l'n'entremet l'ouurage,
Sent éblouir ses yeux, sent étourdir ses sens:
Nostre ame au long trauail se deplaisit, si le tems
De cent varietez ses esprits ne soulage.
Tu sçais quand tu partis, de quel heur, & courage
Ie suiuois l'œuure sainct que de moy tu attens:
Mais par trop longue halene élourdir ie me sens,
Si par le changement ie ne me rencourage.
Donques tant en la chasse, & au vol des perdreaux,
Qu'au pourmenoy des bois, des iardins, & des eaux,
Ie repren les plaisirs, les Muses & l'halene.
Là où pour ne laisser roüiller l'œuure des vers,
Ie resue ces sonnets dessus ce temps diuers,
Sonnets faits de grand chose, & toutesfois sans peinc.*

A M. SYMON.

SONNET.

L'AMITIE qui me lie à toy dès ma ieunesse,
De ma Muse (ô SYMON) print son fatal lien:
Quand premier des François, toym'ouurant le
moyen,

I'empruntay le Cothurne, & le Soc, à la Grece:
Pour aux Rois, pour au peuple, avecques la hauteffe,
Avecques la basseur, du vers Æschylien,
Et du vers de Menandre, apporter l'ancien
Miroir Tragic, Comic, qui Rois, & peuple dresse.
Or ma Muse, qui peut nostre amitié nouër,
Se sentant immortelle, ores luy veut vouër,
Qu'ainsi qu'elle luy fit prendre d'elle naissance,
Elle luy donnera ce qu'elle sent en soy,
Qui est l'eternité, tant que du temps la loy
N'ait sur ton nom non plus que sur le mien puissance.

A Loyse l'Archer, & à ses sœurs.

On vante assez le banquet ancien
De ceste perle à l'ami presentee:
Assez des vieux l'ambrosie est chantee,
Le seul honneur du past Olympien.
L'vne pour estre vn miracle Indien,
Part dnt de vers se voit ainsi vantee:
L'autre pour estre aux seuls Dieux apprestee,
Mesme passant le ius Hymettien.
En ce disner peuuent estre choisies
Plus saints ioyaux, plus saintes ambrosies

SONNETS.

*Que l'Inde n'a, que n'ont pas les hauts cieux:
Mais la douceur est en l'aigreur changee,
Et bien que fust l'autre perle mangée,
Ces perles ci deuoreroient les Dieux.*

FANTASIE SVR VN VERS BIEN
chanté & bien sonné sur le Lut.

A Loyse l'Archer.

*Chanter ce vers, sonner ce son ainsi,
Ce son qui est l'esprit au vers enclos,
Animer l'un, animer l'autre aussi,
C'est de ta voix & de tes doigts le los
Tant excellent (ô LOYSE) qu'iceux
Dignes de toy, te rendent dignes d'eux.
O voix! ô dois! ô beau vers! ô beau son!
O ame! ô corps! de si rare chanson,
Qui ame & corps nous raut par ces deux.*

L'AMOUR CELESTE DE
Vertu, sur vn ieu.

A M. Symon.

*Par moy l'Amour celeste on voit mener ici
Trois Cupidons, captifs deffous ma main diuine:
L'un est l'amour de Mars, qui sanglâs vous mutine:
L'autre vous va bruslant d'un auare souci,
C'est l'amour de Plutus: le tiers, qui brusle aussi,
Est l'amour trop lascif de Venus la marine.
Ceste Musique accorde à ma pompe enfantine,
Qui pour vous & pour nous va chantant ces vers ci.*

Il faut que pour le fils de la Venus celeste,
 Haultain & pur Amour, ces trois ci lon deteste,
 Qui en ce peruers siecle ont eu le plus de cours.
 Il les a pris captifs en ceste sainte feste
 Des Innocens: Que doncq vn trophée on appreste
 A l'Amour innocent, sur ces trois faux Amours.

A M. de l'Aubespine, Secretaire d'estat.

Bien que l'allusion des noms soit peu souuent
 A l'antiquité, docte & à moymesme agreee,
 Si m'en iouray-je ici: l'Aubespine est sacree
 A Venus, aux honneurs de son autel seruant:
 Ce que Venus chérit, d'elle il va receuant
 Des graces la faueur, qui seules font entree
 A l'honneur, a l'amour: l'Aubespine recree
 Le Rossignol, sa plainte en ses chants poursuivant.
 L'odeur de sa fleur blanche en telle sorte attire,
 Que nonobstant l'espine il faut que lon l'aspire,
 Ayant de telle espine éprouué la douceur.
 Il faut que d'elle vn iour, sous elle vn chant ie face,
 Qui mesme estant du chant des rossignols vainqueur,
 Soit plein d'honneur, d'Amour, de Venus, & de grace.

A Madame de Primadis.

Voyant, Madame, en vn bel œuvre,
 Où mainte rose se décrouvre,
 Sítost ces roses façonner,
 I'estoy prest à m'en estonner,

SONNETS.

Quand il me souuint que sans peine
 Ell' a promptement ce bel heur
 D'en prendre en son teint la couleur,
 L'odeur suau en son haleine,
 Ailleurs la façon de la fleur.

A Madamoyelle de Surgieres.

Nonobstant tout mépris, la Vertu fait paroistre
 A tout cœur vertueux son besoin de bien loin.
 De moy (qui ay bien peu de moy mesme le soin)
 Le soin entra dans toy sans mesme me cognoistre.
 Cela sans fin m'oblige, & tousiours me fait croistre
 Ceste ardeur, de me rendre vn immortal tesmoin,
 Que puis que les vertus tu secours au besoin,
 Tout siecle doit en toy ta vertu recognoistre.
 Je n'ay point aux vertus tant de part ny tant d'heur,
 Que toy, qui la vertu couples à la grandeur,
 Deusses peiner pour vn qui oncq pour soy ne peine.
 Que doncq ce cœur gentil, qu'en cela tu as pris,
 Me rende à recognoistre à iamais, tant épris,
 Qu'à toy, plus grãd qu'à moy, soit le fruiet de ta peine.

Sur la deuise de la Cygalle.

Quand le chien d'Erigone ou l'auant-Chien encore,
 Au plus fort de l'Esté d'une ardente cuisson
 Seiche toute herbe aux champs, auançant la moisson
 Que le Soleil doré de son or mesme dore:
 Du plain iour l'aspreté, qui toute hùmeur deuore,
 Vient tous gosiers d'oiseaux fermer à leur chanson,
 La Cygalle sans plus renforçant son haut son,

Sans fin de voix & dueil, l'œil du grād monde honore.
 Or tu es la Cygalle, & ta Dame vn Soleil,
 Mais au chaud de l'Esté ton chaud n'est pas pareil,
 Ny ton beau chant au chant de la rauque Cygalle:
 Car ta Dame peut faire ainsi qu'aucun flambeau
 N'egalle à ton auis son lustre en tout si beau, (n'egalle.
 Qu'aucun chaud, qu'aucun chāt, ton chaud, ton chāt

Anagramme, SON ARC TIRE FLAME.

L'arc d'Apollon & l'arc de sa Sœur, ont des deux
 A plusieurs fait sentir l'ire & valeur celeste,
 Tesmoin soit la Niobe, & des Gregeois la peste,
 Les Cyclopes tuez, & le Python hideux,
 L'arc d'Hercule dans l'air de maint coup hāzardeux,
 Des Harpyes la bande & puante & moleste
 Tua mesme en volant: mais l'amour nous moleste
 D'un arc passant tout arc, & tout art mesme, d'eux:
 Encor son arc premier ne tiroit que des fleches,
 Qui pouuoient mesme au fond des ames faire breches:
 Mais ma Maistresse l'a d'autres armes armé,
 Dont il embrase tout, tirant pres de Madame:
 Ce qui fait donc qu'Amour m'ait si tost consumé,
 C'est de Madame l'arc, car SON ARC TIRE FLAME.

Au Seigneur de la Bourdaiziere.

Voyāt ta beauté grāde on peut (cher BOVRDAIZIERE)
 A celle de Narcisse en tout la conferer,
 Non tes amours, qu'on voit des siennes differer,
 Autant qu'il te sembloit de face & forme entiere.
 L'air, l'or, le teint, les traits, peurent à la priere

SONNETS.

Pousser la Nymphé Echo qu'il fit desespérer:
 Au contraire tu viens sans cesse reuerer
 Et supplier ta Nymphé, encontre toy trop fiere.
 Ta Deesse aussi passe en beauté mille fois,
 C'est autre qu'un refus fit transformer en voix:
 Mais lors que son amour, non l'amour vers toymesme
 Te fait languir au feu, non pas au bord d'une eau,
 Tu te changes en voix, dont sort ce vers si beau,
 Qu'il peut venger ton sort contre son tort extreme.

A luy mesme.

Lors que ie iuge en tout ta Deesse estre telle,
 Que sa beauté rassemble en soy les raritez
 Qu'à part on attribue à plusieurs Deitez,
 Et qu'autant que son corps son esprit mesme excelle:
 Lors qu'à tant de beautez ie vien conferer celle,
 Dont Nature en ton corps a les traits imitez
 D'Apollon, & ses arts dans ton ame excitez,
 Pour ceste autre beauté rendre encore plus belle:
 Je dy que si ta Dame est cruelle enuers toy,
 Qu'en fin ton corps si beau perd le plus beau de soy,
 Sont les vers qui sans fin les beautez embelissent:
 Je dy que l'esprit perd le los du iugement,
 Qui aux vaines grandeurs postpose auueuglement
 Les beautez & beaux dons qui les grâdeurs grâdisset.

Disthique.

Phebus, Amour, Cypris veult sauuer, nourrir & orner,
 Ton vers, cœur, & chef, d'ombre, de flamme, de fleurs.

Sur les Meteores de I. A. de Baïf.

Tant bien chercher aux cieux leurs substance plus pure
 Que n'est l'elementaire, & en leurs actions.
 Merquer les tours, les temps, les inclinations,
 Mesme en leurs feux tout nom, tout cours, ordre & fin
 Descrire en l'element du feu la nourriture
 Qu'il prend, les qualitez & les impressions
 Chanter en l'air ses corps subtils, ses regions,
 Sa pluye, foudre, & vents, neige, & gresle plus dure:
 Chanter tant bien en l'eau, sa liqueur, ses restus,
 Son sel, ses animaux: puis ce qui est reclus
 Dans terre, ou qui sur elle & vegete & chemine:
 Comme un BAIF fera; chasque chose en son lieu,
 C'est monstrer qu'on a l'ame en tout vrayment diuine,
 Qui par tout dans ce Tout se mesle ainſi que Dieu.

A LA FRANCE.

ELEGIE.

SUR ce que tourne le ciel, & sur ce q'cloſe ded'as luy
 Forme la Terre encor, l'Onde, le Vuide, le Feu:
 Combien voy-ie en toy ſans ceſſe ſe naiſtre de
 terreurs,
 Et ſans ceſſe en toy, FRANCE, ſe naiſtre d'abus?
 Veux-tu dans un vers cognoiſtre la cauſe de ces deux?
 C'eſt le mepris qu'o' fait, FRANCE, d'apre'dre que c'eſt.
 Or doc ceſſe le Feu, l'Air, l'Onde, la Terre, de leurs faits
 Intimider nos ſens, tromper, epoin dre, raurir.
 Mesme le Ciel, par faute de voir de ſa D'ſe le vray cours

Cesse de mille liens l'ame pesante lier.
 Par la diserte leçon des Vieux (qui même de leur rang
 Ont fait par ce labeur estre le docte BAIE) (1)
 S'ouvre la cause de tout, tât bien que la craintes que l'er-
 Et la superstition faulse, se donte par eux. (reur
 O doncq' digne labeur! ô Gens dont l'ame ne peut pas
 En rien estre de Feu, d'Air, ne de Terre, ne d'Eau!
 D'elle le Ciel est seul geniteur de son estre le plus pur,
 Tel qu'est l'estre de Dieu presque tel estre creant.
 Un propre corps luy constituant, qui par sa pesanteur
 Lâche, ne puisse le vol roide de l'ame tenir.
 Par fois doncq' la tirant, & iusqu'au feste de ses ronds,
 En voletant, se sicher sur chasque chose la fait.
 Lors de ce haut sur tous Elemens treshaute se comprend,
 Ains comprend dans soy l'œuvre de tous Elemens,
 Voire le rond des Cieux, voire ainsi tout ce que sans fin
 Cause le Vuide, le Feu, l'Onde, la Terre, le Ciel.
 Puis au corps derechef se logeant, par son graue discours
 Enclos dans son corps tient de ce monde le corps.
 Tant qu'un mode petit clost un grand monde dedans soy,
 Vn miracle encor peut de là chose venir,
 L'ame de soy retirât par l'art de la Muse ce grand Tout,
 Comme le peut retirer par ce poëme BAIE, (bastir
 (Mieux que celuy qu'on veit (ce dit-on) d'un verre se
 Vn monde, en ce petit verre de Dieu se moquant.)
 Tous les cieux vrayment figure & peut clorre de ses vers,
 Clorre la Terre encor, l'Onde, le Vuide, le Feu.

A MADAME MARGVERITE
de France, sœur du Roy Henry, deuant
qu'elle fust mariee.

VIERGE, ta France te veut par ces vers sacrer un
autel, & offre l'impudens & le cruel.
Auquel nuire le fer, l'onde, ne l'âge, ne peut.
L'âge superbe ne mord les vers, dont Grece se bastit.
Vn los eternal, ny ce que Rome graua.
Moy doncq qui retirant mes pas leur gloire resuiuray,
Meurdriſſant l'oubli, viure ta gloire ſeray.
Et de ce vers meſuré ton ſainct nom bruiſe lon orra,
Puis que ta ſaincte faueur aide ma ſaincte fureur.

Epistre à la meſme Dame.

Si deormais vers toy, ſous qui doit eſtre ſerue,
L'impudente ignorance, on adreſſe, ô Minerue,
Tant d'œuvres auorteZ, à qui leurs peres font
Porter effrontément ton beau nom ſur leur front,
Comme ſi lon vouloit ſa ſauuegarde faire.
Sous la targue qu'on voit au poing de l'aduerſaire.
Si meſme dans ton temple impatient ie voy
Quelque enroué, corbeau croiſſer deuant toy,
Qui ſe pouſſant au rang des Cygnes les plus rares,
Vienne ſouiller ton nom dedans ſes vers barbares.
Et qui tout bigarré, d'un plumage emprunté,
Ne couche iamais moins qu'une immortalité.
Ie ne ſeray point moins dépit, ny nos Charites,
Tes neuf ſcélantes Sœurs ne ſeront moins dépités,
Que ſi nous auions ven dans ton temple Troyen.

Où *Aiâx* *Oïlee*, ou le *Laërtien*:
 L'un pour forcer enebz ta prestresse *Cassandre*,
 L'autre pour ton pourtrait gardien vouloir prendre
 D'une sanglante main, indigne de toucher
 A cela que la *Troye* auoit tenu si cher:
 Car pareil à ceux-ci est celui qui s'efforce
 De bon gré malgré, faire aux *Muses* toute force,
 Pour d'une main souillée au borbier d'ignorance,
 Toucher au sacré los d'une *Pallas* de France,
 Faisant tort à ton temple, à moy ton prestre saint,
 Voire à son nom qu'on voit dès sa naissance estoint.

Mais aussi quand ie scay qu'un *RONCARD*, qui estonné
 Et contente les Dieux, à qui ses vers il donne,
 Vient humble dans ton temple à tes pieds apporter
 Ce qui peut aux neveux, voire aux peres oster
 La gloire des beaux vers, bien que lon me uist estre
 Ton plus cher seruiteur, ton plus favori prestre,
 Te repaissant sans fin d'un vers qui vient à gré,
 Quand il vient d'un *LODELLÉ* à toy seule sacré:
 Ie ne suis moins ioyeux que la prestresse antique
 Du deuin *Apollon*, quand au temple *Delphique*
 Le grand Roy *Lydien* prodigant son thresor,
 Vint enrichir ce lieu de mille presens d'or,
 Eschangeant les vaisseaux d'argille bien tournée,
 Aux vaisseaux massifs d'or, où la troupe estonnée
 Des deuots pelerins aborde en ce lieu,
 Beauuoient de longue suite aux festes de ce Dieu.
 Car les riches presens qui or cheZ toy se treuuent
 Presentez par *RONCARD*, tout ainsi nous abbreuent:
 Inuitans tout un monde à louer ton honneur,

Inuitans

*Inuitans tout un monde à louer ton donneur,
 Qui recule en l'autel de ma grand' MARGVERITE,
 Pour faire place à l'or, mon argille petite,
 Où deuant ie faisois l'offrande à ta grandeur,
 Non pas d'un pareil pris, mais bien d'un pareil cœur.
 Malheureux sont ceux-là, de qui les ialousies
 Pour les gesner tous seuls, ont les ames saisies:
 Malheureux est celuy, qui pour penser gaigner,
 D'un admirable ouurier veut la gloire espargner:
 Dans les antres ombreux, le ialoux d'un bel œuvre
 Doit viure, sil ne veut que sarage on decœure.
 Qu'est-ce qui fait les vers, & leurs saints artisans,
 Seruir d'une risée à tant de Courtisans,
 Et que les grands qui font leur but de la Memoire,
 Dedaignent à tous coups l'ouurier de telle gloire,
 Aimans mieux se priuer mesme de leur espoir,
 Portans tout au cercueil, qu'en viuant recevoir
 Les vengeurs de leur mort? Hé! qui fait que la France
 Charge souuent d'honneurs son asnesse Ignorance,
 Si ce n'est une enuie? enuie qui ne veut
 Souffrir une vertu, qui trop plus qu'elle peut,
 Se perdant pour la perdre. Il faut il faut des autres
 Vanter les beaux labours pour donner force aux nostres.
 Tel admire souuent ce qu'il doit admirer,
 Qui de soy mesme fait d'auantage esperer:
 Car quand au point d'honneur, tât plus un hōme en quitte,
 Et plus il en retient, & plus il en merite.*

*Ie seray tousiours franc, l'honneur que i'ay de toy,
 Au rebours de tout autre éucille un cœur en moy,
 Un cœur prompt & gentil, qui fait que gay i'adore*

EPISTRE.

Celuy, qui comme moy ma grand Minerue honore,
 Et si fait que de luy ie m'accompagne, à fin
 Que ton nom & le sien vole au monde sans fin.
 Aux couards soit l'enuie, oncques on ne vit estre
 L'enuie dans l'esprit courageux & adextre.
 Nul ne sçauroit si bien se faire plaie aux Dieux,
 Que ie ne desirasse encor qu'il leur pleust mieux.
 Quand on a le cœur tel, bien qu'encore on ne face
 Ses traits du tout parfaits, ce braue cœur efface
 Par vne opinion le trait le plus parfait,
 Puis de l'opinion la verité se fait:
 Ainsil l'œuvre d'autruy doit seruir à la vie
 D'un encouragement, & non pas d'une enuie.
 Tant s'en faut qu'enuieux de nos hommes ie sois,
 Que ie iure ton chef, qu'entre tous nos François,
 Tant l'honneur du pays m'a peu tousiours espoindre,
 Je voudrois qu'on me vist, tel que ie suis, le moindre,
 Je ne seruirois plus fors qu'à ton sacré los
 D'inciter languissant les esprits plus dispos.
 Mais puis que nous voyës croistre en France un tel nôbre
 De brouilleurs, qui ne font sinon que porter ombre
 A la vertu naissante, il te faut prendre au poing
 Ton glaue, & ton bouclier, pour m'aider au besoing,
 Et tant qu'encourageant mes forces, à l'exemple
 Du vainqueur Vandomois, ie sorte de ton temple,
 Pour sur les ignorans redoubler les efforts,
 Et voir ces auortons aussi tost que nais morts,
 A fin que l'heur de France & des Muses ie garde,
 Faisant apres RONSARD la seure arriere-garde.
 Je les verray soudain sous mes traits seffroyer,

*Je les verray soudain sous ta Gorgon muer,
 Mais non pas de beaucoup, car estans demi-pierre
 Del'esprit, il ne faut sinon que lon reserre
 Leur mouuement, d'un roc, à fin qu'on oste à tous
 Le pouuoir de se nuire eux-mesmes de leurs coups,
 Arrestant par les yeux de Meduse avec l'ame
 Le malheureux Demon qui si mal les enflame.*

*Orce pendant qu'ainsi ton secours i'attendray,
 Et redoutable à tous au combat me rendray,
 Embrasse moy ces vers, que la Harpe meilleure
 Pour ta sainte grandeur a sonnez à ceste heure:
 Embrasse, embrasse, & fay ces beaux hymnes sonner,
 Freres de ceux qu'on vit à son Odet donner,
 Tant que depuis ton temple entendent les estranges
 Des hommes & des Dieux les plus belles louanges,
 Confessans qu'en ce siecle ingrat, auueugle, & las
 Des troubles de la guerre, on voit vne Pallas,
 Qui fait de nos vertus & de nos Muses conte,
 Autant qu'à l'ignorance & au vice de honte,
 Prenant pour les faueurs que fait sa deité
 L'usure qu'elle attend en nostre eternité.*

CHAPITRE.

En faueur d'Orlande excellent Musicien.

S*IL faut q tes chansons graues ensemble & douces,
 Sur l'aile des beaux châts qu'on leur doit inuêter,
 Iusqu'aux Rois (ô ma Muse) ains iusqu'aux
 Dieux tu pousses:*

*Des vers en contr' échange ici tu dois chanter
 Pour Orlande, qui peut aux vers l'aile si belle,
 D'un heur, d'un air, d'un art, admirable prester.*

CHAPITRE.

L'aile qu'Orlande peut donner aux vers, est telle,
 Que son vol animé de mouuemens si beaux,
 Si prompts, si hauts, surpasse en volât toute autre aile.
 D'enfer au ciel, du ciel aux infernales eaux,
 Mercure en vn moment remonte & redeuale,
 Ayant au chef, aux piés, ses ailerons iumeaux.
 Ce beau vol peut porter à la riuë infernale
 Nos vers, au ciel, aux coins de la terre, sans peur
 De ce qui fit en mer choir le fils de Dedale.
 Mercure aussi qu'on fait fort subtil inuenteur,
 En Musique, peut estre, est la Musique mesme,
 Haussant, baissant, par tout ce beau vol enchanteur,
 Puis donc qu'un tel art donne & course & force extreme
 Aux vers, & puis qu'Orlande un tel vol façonnant,
 Est des vieux & nouueaux ouuriers l'ouurier suprême-
 Musés qui d'un tel art irez tousiours tenant, (me:
 Comme l'art tient de vous, il ne faut qu'on refuse
 D'orner ce qui vous peut donner tant d'ornement.
 Puis la Musique a pris son beau nom de la Muse,
 Mesme l'air des beaux chants inspirez dans les vers,
 Est comme en un beau corps une belle ame infuse.
 Le ciel qui roide emporte avecq' soy l'uniuers,
 Retournant tant de ronds, une harmonie engendre
 Par leurs accords, tirez de leurs discords diuers.
 Si l'humain sens pouuoit de ces cercles entendre
 Le bruit, qui de discords sans reigle, & infinis,
 En tant d'accords reiglez, & finis, se vient rendre,
 Tous les plaisirs humains seroient de nous bannis:
 Mais au defaut des sens, nos esprits de diuine
 Essence, absens des corps, sont au ciel réunis:

Et raprenans au lieu de leur haute origine,
 Tous ces sons qu'ils auoient autresfois entendus,
 En rapportent des tons dans leur fresle machine:
 Mesme aucuns d'eux si tost qu'ils sont redescendus,
 Tâchent faire imiter à leurs sens l'harmonie,
 Qui d'aise les auoit pareils aux Dieux rendus.
 Telle accordance encor s'imite au ciel, unie (Sœurs,
 Aux beaux vers, quand la main de Phebus, de ses
 Du tout presque à son gré l'ame des Dieux manie:
 Et qu'eux émeus, forcez, par accents rauisseurs,
 Lairoient & l'Ambrosie, & le Nectar, pour paistre
 Leurs deitez sans cesse en ces autres douceurs.
 Car que sert l'autre past à leur immortel estre?
 Mais tel celeste accord à tous coups fait dans eux,
 De leur estre celeste un sentiment renaistre.
 Il ne fait seulement les Dieux se sentir Dieux,
 Mais les hommes il fait, par une éprise extreme
 Se sentir tels, que fût ces Dieux mesme en leurs cieux.
 Nostre essence mortelle, en l'essence suprême
 Sur l'heure il ne peut pas seulement transformer,
 Mais en hommes il peut tournér les bestes mesme:
 Ains ce qui est sans ame, il s'efforce animer,
 Comme le bois suiuant, & la suiuite pierre,
 Qu'il semble d'effort propre & sans charme charmer.
 Et comme au ciel, en l'air, en la mer, en la terre, (sons,
 Aux Dieux, aux hauts esprits, aux oiseaux, aux poif-
 Aux bestes, aux humains, Amour ses traits desferre,
 Voire & encor penetre aux Enfers, par ses sons
 Et par ses châts, qui sont ses deux traits, la Musique
 Force tout ce qu'en tout rencontrent ses chansons:

C H A P I T R E.

Elle a mesme forcé la porte Plutonique,
 Retenant le hideux & l'incessable aboy,
 Qui sort par trois gosiers hors du corps Cerberique,
 Quand ce monstrueux chien, tout transporté, tout coy,
 Tout beant, aualloit ces charmes indomtables,
 Dans soy tournant sa rage en douceur maugré soy.
 Quand les Sœurs sanspitié se feirent pitoyables,
 Quand les trois autres Sœurs (qui tout destin filans,
 Ne flechissent iamais) se veirent flechissables.
 Ces tons si forts, si doux, penetrans, & coulans,
 Du cruel, de l'auare Enfer les lois faulserent,
 Toute ombre triste, rude, & farouche emmielans:
 Tant qu'Yxion, Sisyphe, & Tantale laisserent
 Ou le dur souuenir & sentir de leurs maux,
 Ou leur rouë, & leur faix, & leur soif, s'arrestèrent:
 Aussi non seulement aux esprits infernaus (Deesses,
 Cet Orphee eust fait force, ains aux Dieux, aux
 Aux Demons, aux humains, aux brutes animaux.
 Nostre Musique doncq', qui aux enchanteresses
 Chançons de cet Orphee exerçoit son pouuoir,
 Les fit sur tous les cœurs autāt qu'Amour maistresses.
 Mesme son mont Rhodope, en fin ne l'eust peu voir
 De Thyrses assommé par les foles Bacchantes,
 (Car puissance il eust peu sur sa mort mesme auoir:)
 Mais les barbares bruits des cymbales sonnantes,
 Des éclatantes vois, des cornets, des tabours,
 Estoufferent l'effort de chansons si puissantes.
 La Musique plus vraye & parfaite a tousiours
 Telle rencontre, alors que plus on chante & sonne,
 Que des meilleurs ouuriers on fait plus le rebours.

*Ainsi contre Apollon ses lourds tuyaus entonne
Le Satyre Marsye: & le iars-éclatant,
Pense égaller l'oiseau dont Meandre resonne.
Ces Bacchantes, qui haine extreme alloyent portant
A tel honneur, festans leurs iours Trieteriques
Alloyent par tout errant, chantant, dansant, saultât:
Mais si le sainct effort de si rares Musiques,
Eust peu lors d'as leurs chefs, d'as leurs cœurs penetrer,
Pleins de vapeurs, d'ardeurs, & de rages Bacchiques,
Auecques la Musique Orphee eust fait entrer
L'amour mesme au dedans des vineuses Menades,
Faisant ces deux pareils en force se monstrier.
Car l'une tous leurs sens & troublez & malades,
Eust remis en leur train: & l'Amour eust domté
La haine sa contraire éprise en ces Thyades:
Doucelement le cerueau par tels appas flaté
Eust mis hors toute erreur, & fureur, par l'aureille:
Et l'amour allumé dans le cœur eust esté.
L'admiration doncq' de chose nompareille,
Vers Orphee eust esté tel amour produisant:
Et la Musique seule eust fait telle merueille.
Mesme aux amours plus vrais la Musique attisant,
Au cœur, au chef émeu, le desir, la memoire,
Val l'apprehension viuement embrasant.
Amour fait & refait par elle sa victoire,
Et croy que cault il porte en son carquois des traits,
Qu'il luy derobe, à fin d'en restaurer sa gloire.
Aussi de mesme pere & mesme mere extraits
Ie les croy, frere & sœur: car la Venus celeste
Est la mere, & le ciel dans elle les a faits.*

C H A P I T R E.

*L'un l'autre s'accompagne, & sont pareils au reste
 Tous leurs effets, sinon que par douceur la Sœur
 Rompt cela, dont le frere aigre & fascheux moleste:
 Ou quand languide il dort, qu'il dilaye mal-seur,
 Que trop fier il mesprise, elle l'éveille, assure,
 Et rabaisse, par viue, aspre, & braue douceur.
 Aussi se souuenant de leur pere, à toute heure
 Nous portent dans le ciel, & font entrer en nous
 La Venus, qui d'un heur celeste nous bien-heure.
 Vous donc tous, qui goustez tous les plus saints & doux
 Plaisirs, que la Venus coniointe au ciel, fait naistre,
 Et qu'Amour & Musique ont fait sentir en vous:
 Qui Orphee admirez en tel art si grand maistre, (froids,
 Iugeans par là les cueurs plus lourds, plus durs, plus
 Plus enterrez, plus morts en cœurs humains renaistre.
 Car sont les animaux, rochers, daulphins & bois,
 Et vrays enfers d'Orphee, ou d'Arion encore,
 Ou d'un, dont Thebes print & ses murs, & ses loix.
 Vous qui discernez bien ceux dont cest art s'honore,
 D'auec les faux ouuriers: & qui voudriez ouir
 Cela dont le banquet des hauts Dieux se decore,
 Quand Phæbus & ses Sœurs les viennent éjouir,
 Raur & posseder: & qui de l'harmonique
 Branle des cieux tournans, voudriez mesme iouir.
 Vous qui aimez les vers, qui mieux qu'un Atlantique
 Neuen courrier des Dieux ne les pourroit porter,
 Seroyent portez au ciel sur l'aile de Musique:
 Vous qui voudriez, peut estre, ouir mes vers chanter
 D'un chant diuers & digne, admirez tous Orlande,
 Qui peut tout tel vouloir en vous tous contenter.*

Il peut faire en vous naistre vne Venus plus grande
 Que n'est l'autre, ie croy, faisant qu'Amour ainsi
 Avec sa Sœur, trop plus que iamais vous commande.
 Il pourroit faire en terre, & aux Enfers aussi,
 Sur ce qui est viuant, sans vie, & hors de vie,
 Plus que n'en fit Orphee, autant là bas qu'ici.
 Il peut d'inuention docte, douce, & hardie,
 Qui contente le docte, & retient l'ignorant,
 D'Apollon, de ses Sœurs, vaincre la melodie.
 Son ame, que ie cuide, alla des cieux tirant
 Tous les tons plus parfaits, tant que mesme il égale
 L'accord meilleur que font ces cieux en se virant.
 A tous beaux vers, & mesme aux miens, ie croy, fatale
 Son aile, reuolant par tout l'ample vniuers,
 C'est le but, le loyer que toy, Muse, en mes vers
 Attens, d'auoir chanté sa Muse musicale.

A Loyse l'Archer.

SONNET.

Si Orlande sent bien, qu'outre son grand merite,
 Par ces miens vers son los peut prèdre accroissement,
 Qu'il sçache gré, LOYSE, à toy premierement,
 Puis à moy, que sans fin tout grand merite excite.
 Ton sçauoir, ta façon, ta vois, si fort incite
 Tous ceux, dont la vertu peut donner ornement
 Aux vertus, qu'il conuient qu'en cela promptement
 Vers la vertu, vers toy, vers soy mesme on s'aquite.
 Air pour air, par ses chants Orlande payera
 Mers vers, leur soufflant l'ame: il te satisfera

H

Par ses chansons: mais force & grace bien plus grande
Ses chansons reprendront par ta vois, par tes doigts:
Au lieu doncq' de le voir quitter enuers toy, tu dois
Obliger de rechef l'art & le nom d'Orlande.

Sur la Grammaire de P. Ramus.

Les vieux Gaulois auoyent tous arts en leur langage,
Mais Dis l'un de leurs Dieux (qui riche tiët couuers
Sous les obscures nuitës mille thresors diuers)
Aux champs Elysiens retint des arts l'usage:
Il falloit doncq' auoir pour là bas penetrer,
Les rappeler, les faire en l'air Gaulois rentrer,
Ce Rameau d'or, par eux redorant tout nostre âge.

S O N N E T

Sur les Dialogues d'Honneur de I. Baptiste Possuin.

Si de l'honneur le nom s'honore en toutes parts,
S'il fait seul les duels, les assauts, les iournees:
S'il conduit au sçauoir les ames les mieux nées,
Honneur le seul guidon d'Apollon & de Mars:
Bref, s'il est nourricier & nourriçon des arts,
S'il est seul conducteur des plus grand's destinees,
Vainqueur de la ranqueur, de la mort, des annees,
Et bien souuent le fleau des Rois & des Cefars:
Quel poinct plus honorable eust trouué pour deduire,
L'auteur Italien, ne Gruget pour traduire,
Fors l'honneur & son poinct, des outrages domteur?

*Ceux doncques de ce temps, & leurs enfans encore,
Soyent tels enuers ceux-cy, que cet Honneur honore
D'un honneur eternel & l'un & l'autre Auteur.*

O D E

Sur la traduction de Paule Emile, faiçte par
Iean Regnard, Sieur de Mi-
guctiere.

Ses sages Dieux, qu'on doit croire
Ialoux de nostre basse gloire,
N'auoyent d'une imperfection
Bridé toute humaine action,
A fin de rabaisser l'audace
Des hommes, leur rebelle race:
Et si dès le commencement
Ils n'auoyent meslé iustement,
Et leur defaueur & leur grace,
Par mille beaux faits entrepris,
Par mille admirables écrits,
Maugré le dard de la mort blesme,
Mille mortels se fussent faits
Eux-mesme immortels & parfaits,
Aussi bien que les grands Dieux mesme:
Mais ceste ordonnance suprême,
A fait qu'aucun peuple n'ait eu
Le pouuoir d'empescher qu'un vice,
Après mille efforts n'obscurcisse
Tout ce que de bon il a peu:
Les peuples que Phebus éclaire

O D E S.

Tous les premiers, quand au matin
 A son leuer il fait retraire
 De sa sœur le char argenté,
 Ont premierement par vaillances,
 Par la grandeur de leurs puissances,
 Par hautes apprehensions,
 Et par doctes inuentions,
 Meres de toutes nos sciences,
 Tâché d'égaller leur pouuoir,
 Tâché d'égaller leur sçauoir,
 Voir & par leur renom, leur vie,
 Aux Dieux, qui estoient maistres d'eux:
 Mais tousiours l'orgueil hasardeux
 A sus la vraye gloire enuie.
 Car leur gloire leur fut ranie,
 Ou pour au milieu de leur bien
 Avoir voulu trop entreprendre,
 Ou pour en voulant tout apprendre,
 A la fin ne comprendre rien.

Quelle entreprise a ton trouuee
 Qu'ils ayent iamais acheuee,
 Comme deuant ils la pensoient?
 Tantost quand plus ils s'efforçoient
 De venir au but de la chose,
 Le tour du destin, qui s'oppose
 A nos forces, à nos conseils,
 Rompoit les humains appareils,
 Inutiles, quand trop on ose:
 Tantost voulans cognoistre tout,
 Ils sentoient au lieu d'estre au bout

*La peine, loyer de la peine,
Ou sus un principe inuenté
Ils assureyent leur verité,
Ainsi qu'une tour sur l'arene,
Ou d'une pieté qui meine
Cent mille superstitions,
Faisant semblant d'atteindre aux nuës,
Et parlans par voyes incongneuës
Bigarroyent leurs opinions.*

*Depuis la cauteleuse Grece,
La Grece tousiours menteresse,
Et par beaux faits & par écrits
Voulut à tous ravir le pris
De ceste immortalité grande,
Que l'homme ainsi qu'un Dieu demande:
Mais leurs vertus ils embrouilloyent
Des vices, dont ils se souilloyent,
Et de mainte execrable offrande,
En masquant d'une pieté
Leur detestable cruauté:
Ou bien dans l'onde obliuieuse
Enuoyoyent leur nom desia mort,
Pour s'estre efforcé pour le tort,
Fust par audace auantageuse,
Fust par ruse malicieuse,
Ou bien fils l'ont fait viure ici,
Ils ont fait viure avec leur honte,
Et nostre reproche, qui donte
Leur labeur & leur gloire aussi.*

Que diray-ie de mille songes,

O D E.

Mille fables, mille menfonges,
 Dont ils penfoient orner leur faits,
 Et leurs beaux eſcripts contrefaits?
 Quoy que le vulgaire m'en tance,
 Je me permets ſans arrogance
 De dire, que la grand' faueur,
 Que nous faisons à leur labeur,
 Ne vient que de noſtre ignorance,
 Qui approuue, comme à credit,
 Tout ce que le commun nous dit,
 Sans que rien à ſoy lon retire.
 Ce que le Ciel plus chichement
 Nous donne, c'eſt le iugement:
 Qui fait que i'oſe encore dire,
 Que tous ceux qui veulent eſcrire
 Du tout comme l'antiquité,
 Seruans aux aueugles d'amorce,
 Se penſent eux meſme ſans force,
 Et ſans yeux la poſterité.

Apres que les deſtins bornerent
 L'heur des Grecs, les Romains regnerent,
 Ces plus fiers que vaillans Romains,
 Qui penſoyent tenir en leur mains, -
 Fuſt en guerre, fuſt en doctrine,
 Les gonds de ceſte grand' machine:
 Mais par mainte ſedition,
 Qu'enſantoit leur preſomption,
 Ont fait eux meſme leur ruine.
 Laiſſons mille vices vilains,
 Dont leurs plus beaux actes ſont pleins,

Comme le ciel les entremesle:
Laissons leurs procez obstinez,
Laissons leurs cœurs effeminez,
Quand on combatoit pesle-mesle:
Laissons & le foudre & la gresle,
Qui leur serain souuent brouilloit,
Et laissons vne enuie extreme,
Qui au sang de leurs amis mesme
Derage souuent se souilloit.

Si est-ce qu'entre tant de fautes
Ils ont leué leurs gloires hautes,
Par beaucoup de braues vainqueurs,
Par beaucoup de doctes autheurs:
Et bien que si forts ils ne fussent,
Bien que souuent mesme ils receussent,
Voyant l'autre camp affronté,
La froide peur de leur costé:
Et combien que tant ils ne sceussent,
Par grands morgues, par grands moyens,
Par la largesse de leurs biens,
Sernoyent d'épouuentail au monde,
Encore leur viuant renom
Nous espouuentant de leur nom,
Ne sentiroit la nuit profonde,
Noyé dedans l'infernale onde,
Si les bons esprits & le temps
Ne decouuroient que les plus braues,
Les mieux disans, & les plus graues,
Font bien souuent les charlatans.

Mais que diray-ie de leur race,

O D E S.

Qui encore aujourdhuy pourchasse
 De se faire nommer de nous,
 Le peuple le mieux né de tous?
 Je ne parle point de leurs vices,
 Je sçay que tousiours les malices,
 S'on les contrepoise aux bienfaits,
 Rauallent l'honneur sous le fais,
 Et puis tousiours quelques supplices
 Suivent ceux-là, qui écriuans
 Parlent librement des viuans:
 Je ne sçay pas si ce peuple ose,
 En reprenant vn cœur plus haut,
 Quelque beau fait quand il le faut,
 Je diray ceste seule chose,
 Puis qu'il faut que ma flamme enclose
 Trouue vn soupirail en cela,
 Que ce peuple & son voisinage
 Nous donne souuent tesmoignage,
 Que les Gots ont passé par là.
 Encore ont il cestie prudence
 De s'authoriser d'un silence,
 Et par mille admirations,
 Quelquefois par inuentions,
 De mains, d'espaules, de louanges,
 Se faire admirer aux estranges:
 Mais toy mais toy, peuple François,
 Qui, vaillant, iamaïs sous les lois
 D'un peuple estrange ne te ranges,
 Quel autre plus grand vice as tu
 Qui obscurisse ta vertu,

Sinon

*Sinon le mépris de ta gloire?
Je sçay qu'aucun n'égallera
Ce qu'il a fait, ce qu'il fera,
Aux couronnes de ta victoire:
Mais si des hommes la memoire
Ne les fait à tous siecles voir,
Qu'as tu gaigné par tant d'alarmes,
Sinon que perdre tes gensd'armes,
Et le plus beau de ton espoir?*

*Quelle autre plus belle esperance
Auois tu, pour la recompense
De tant de travail despendu,
Et de tant de sang respandu,
Sinon l'honneur, qui deuoit suiure
Ta vaillance, & qui ne peut viure
Si quelque ingenieuse main,
Mieux qu'en vne taille d'airain,
D'or, de bois, de marbre, & de cuiure
Ne l'anime si doctement,
Qu'on y voye eternellement
Vne ame des siecles maistresse?
Mais comme ennemi du plus beau
Que nous ayons d'un lourd tombeau,
Tu fais que ta lourde paresse
Ton nom & tes ayeulx oppresse,
Ou pour de tout temps mettre au bas
Les vrais artisans de la vie,
Qui par les ans n'est point rauie,
Ou pour ne te cognoistre pas.*

Voila ce que le ciel t'enuoye,

Voila le trait dont il foudroye
 Tout cela que tu as de bon,
 Ente priuant du vray guerdon
 Que la seule vertu merite.
 Mais i'attens qu'une chatemite
 Contre mes vers grince les dents,
 Qui Sardanapale au dedans,
 Contreface au dehors l'hermite:
 Me faisant de ce lourd defaut
 Vne vertu, disant qu'il faut
 Estimer que la gloire humaine
 Est vne honte deuant Dieu,
 Et que si lon fiche en ce lieu
 Quelque attente, l'attente est vaine:
 Mais si ceste beste vilaine
 Veut sonder son espoir infet,
 Elle trouuera que la rage
 D'auoir quelque gloire en son âge,
 De tel masque la contrefait.

Je sçay qu'un peuple qui se vante,
 Rend sa gloire au ciel deplaisante,
 C'est le vice dont i'ay blasmez
 Les peuples parauant nommez:
 Mais si la chose que lon traitte
 Se voit au naturel pourtraitte,
 Quel autre eguillon voudroit on
 Pour embrasser ce qui est bon,
 Et fuir la chose mal faite?
 Dy moy, donc si les auteurs saints
 N'eussent par histoire depeints

*Les faits sacrez que lon doit croire,
Qu'eust-il en ce monde resté
De foy, de loy, de pieté,
Veu que du vieil temps la victoire
En eust effacé la memoire?
Dymoy, si tout Roy des Chrestiens
Voyoit nos histoires bien peintes,
Suiuroit-il pas les guerres saintes
Ainsi que nos Rois anciens?*

*Mais quel Prince auroit ce courage,
S'il est ami du beau langage,
Et si les histoires des vieux
Ont desia passé par ses yeux,
De vouloir tous les faits apprendre,
Qu'ont voulu iadis entreprendre
Nos peres, des Dicux les enfans,
De toute guerre triomphans,
Veu qu'on ne les sçauroit où prendre,
Sinon de quelques vieux ramas
De Chroniques, & vieux fatras
Qui doiuent servir, ce me semble,
D'envelopemens aux merciers,
Et de cornets aux espiciers:
Ou bien quand une feste assemble
Six ou sept artisans ensemble,
Entre les tisons, & les pots,
Leur faire passer la froidure,
Tous bayans apres la lecture,
Dont presque ils épellent les mots?*

Mais, au rebours, quel homme braue

S'estant acquis vn style graue,
 Et s'estant enrichi de traits,
 Sur les meilleurs des vieux pourtraits,
 Eust voulu se mettre en tel œuvre,
 Veu qu'en toy, Peuple, lon decœure
 Vne ingratitude enuers ceux
 Qui sont de ton bien soucieux,
 Et plus qu'en autre qui se treuve?
 Le ciel qui fait tout par compas,
 Fait que ceux, qui ne peuuent pas,
 Veulent toute chose parfaire:
 Et que ceux qui le peuuent bien,
 Ne veulent iamais faire rien.
 Quelque esprit aux Muses contraire
 Entreprendra bien tel affaire,
 Qui, nourri seulement aux plaids,
 Apporte du creu de sa terre,
 Et souuent parlant de la guerre;
 Du puriargon de son palais.

FRANÇOIS, ce grand Roy, dont la France
 Prend iustement vne arrogance,
 Voulut de nos Rois le premier
 Chasser ce vice coustumier,
 Qu'apastoit tousiours la paresse
 Pour amortir nostre hauteesse:
 Et ainsi que de toutes parts
 Les plus doctes hommes espars
 Il appelloit par sa largesse,
 Dedans sa France il appella
 (Peux tu bien entendre cela,

O peuple, sans rougir de honte,
 Voyant qu'il faut qu'un estrange
 Vienne tes histoires renger,
 Et qu'un peuple que chacun domte
 De ceste gloire te surmonte?)
 Il appella doncques à soy
 Ce docte historien Æmile,
 L'honneur de Veronne, sa ville,
 Du peuple Italique & de toy.

Or ce n'est pas tout, que la peine
 D'un docte escriuain nous rameine
 Nos ayeulx dehors de la nuit,
 Sichacun n'en reçoit le fruit.
 Vne histoire n'est pas suiue
 Pour ceux seulement qui leur vie
 Consonnent au parler Romain,
 Où Æmile employa sa main:
 Il faut qu'on contente l'enuie,
 En sa propre langue escriuant,
 Du gentil-homme peu sçauant,
 Et d'une grand' part du vulgaire,
 Qui veut aussi bien voir son los
 Sous la main d'ignorance enclos,
 Sortir en lumiere plus claire.
 Ce que mon REGNARD a seu faire,
 Rendant Æmile d'un tel heur,
 Qu'un autre qui a voulu suiure
 Le premier & second liure,
 Doit borner au tiers son labeur.

Ce n'est pas moy qui chacun prise

Dans mes vers, & qui autorise
 Pour estre quitte à mon ami,
 Des écrits forgez à demi:
 Ma liberté inuiolable,
 Et ma louange est equitable,
 Et ne sçay que c'est qu'en flattant
 Louer quelcun, puis detractant
 De son nom plaifanter à table.
 Il ne faut la gloire celer
 Des amis, ny trop en parler:
 Ce qui a fait qu'en bref ie vante
 La double gloire de celuy,
 Qui brauement vient auiourdhuy
 Entre nostre troupe sçauante,
 Combattre la troupe ignorante,
 Et qui suiuant le Dieu guerrier,
 Messant les liures aux alarmes,
 Bien faisant, bien disant des armes,
 Doit attendre vn double laurier.

Toy troupe des Dieux, qui maistrises
 Dessus toutes nos entreprises,
 Et toy qui nous donnes les loix,
 HENRY, le meilleur Roy des Rois:
 Toy ANNE aussi, dont la hauteffe
 A fait que cet œuure on t'adresse,
 Vueillez, les vns par leur bonté,
 L'autre par liberalité,
 L'autre par moyen & adresse,
 Par l'exemple de cestuy-ci,
 Nous inciter si bien ici

*A bien faire & à bien écrire,
 Puis qu'un bon siecle est retourné,
 Puis que le ciel a ordonné
 Au peuple François plus d'Empire,
 Qu'à autre que i'aye sceu dire:
 Qu'en gloire il les surmonte tous,
 Tant que, si parfaits nous ne sommes,
 Nous puissions les premiers des hommes,
 O grands Dieux, approcher de vous.*

Sur le Monophile d'Estienne Pasquier, Aduocat
 en la Cour de Parlement.

NE verray-ie point que ma France
 S'estonne de son siecle heureux,
 Mais de son siecle malheureux,
 Qui n'a de son heur cognoissances?
 Verray-ie point cet an nouueau,
 Que le Latonien flambeau,
 Qui va reuoir son Ganymede,
 Chasse auecques ses ans passez,
 Ces ans à tout iamais chasséZ,
 Le mal dont ce mal nous procede?

Verray-ie point qu'il te regarde,
 (O ma France) encor une fois,
 Gouster la douceur de ses loix,
 Qui seule de l'oubli te gardeZ,
 Loix que le Prince Delien
 Sur son coupeau Thessalien,
 Entre ses sçauantes Sœurs donne:
 Loix qui mieux te couronneroyent

Que quand les Rois adiousteroyent
L'autre couronne à leur couronne,

Pourquoy parmi nostre ignorance
Semez-vous (ô doctes esprits)
Tant d'œuvres, si pour vostre prix
Vous n'avez que la repentance?
La terre qui vous a portez,
La terre que vous exaltez,
Ialouse de voir vos louanges
Se faire maistresses des ans,
Engloutit ses propres enfans,
Pitié mesme aux terres estranges.

Mocquons nous, Lyre, ie te prie,
Mocquons nous des seueritez
De ces vieux sourcils despittez,
Par qui tout œuvre se decrie?
Que seruira (dit un vilain)
Cest œuvre de mensonge plein,
Qui le peuple à mensonge incite?
O vilains, voulez-vous encor
Dessous un masque de Nestor
Celer un deforme Thersite?

Moquons nous, ma Lyre, & me chante
Que de ce vieil siecle doré,
Ce siecle pour l'or adoré,
Ia la saison nous est presenté:
L'or tout seul retient son honneur,
L'or seul de France le bon heur,
L'or qui a la terre pour mere,
Veult clorre au ventre maternel.

Dessous

*Dessous un cercueil eternel,
Tous ceux qui ont le ciel pour pere:*

*Tant l'ambition execrable
Loing de la vertu se tenant,
Hait le bien d'autre part venant
Que de sa faim insatiable:
Ce qui de son gibier n'est pas,
Ne sera iamaïs son repas:
Et commel' asne courbé laisse
Les fleurs, pour manger les chardons,
Reiette les celestes dons,
Et sa seule fange caresse.*

*Mocquons-nous, ma Lyre, & brocarde
Ces autres singes, qui mal nés
Pendent un chacun à leur nés
Sous un demi-ris, que lon farde
De quelques gestes courtoisans:
Ceux-ci par mines déprisans
Les bonnes choses qu'ils n'entendent,
Se vont naurans de leur cousteau,
Mesme de leur propre cordeau
Deuant les doctes yeux se pendent.*

*Mocquons nous, Lyre, d'auantage
De ceux-là qui mesme entre nous,
Estans l'un de l'autre ialoux,
Blasment l'un de l'autre l'ouurage:
Et bien qu'ils celent au dedans
Leurs poisons sans fin remordans,
Ils appastent de leur mouëlle
L'enuie qui dedans se paist,*

O D E S.

L'enuie qui sans fin leur est
Et leur amie, & leur bourrelle.

Mais qui nous fait ores, ma Lyre,
Changer tellement nostre son,
Que la douceur de la chanson
Se tourne en l'aigreur de Satyre?
PASQUIER, destourne nous du ris,
PASQUIER, entre les bons esprits
De la France vne gloire rare,
R'adresse vers toy nostre voix,
De toy seul parler ie deuois,
Mais sans fin ce malheur m'esgare.

Si nostre terre n'estoit telle,
Que tu peux voir dedans mes vers,
France combleroit l'uniuers
Ia ia de ta gloire immortelle,
Pour auoir si bien mis au iour
De ton Monophile l'amour:
Mais hélas hélas! nostre gloire
En France n'aura point son cours,
Si le temps rechangeant tousiours,
N'a mesme sus France victoire.

Sus donc, Faucheur, que lon s'emplume,
Raze tout, pren l'affaire en main,
Et tant, que contre nous en vain
Se puisse obstiner la coustume.
Si tu fais un tel changement,
Ia nostre PASQUIER iustement
Vaincra d'une eternelle vie
L'Ignorance, le gros sourci,

*L'ardente ambition aussi,
Le ris, & l'escumeuse enuie.*

O D E

Sur les Singularitez de la France Antarctique,
d'André Theuet, Cosmographe du Roy.

Si nous auions pour nous les Dieux,
Si nostre peuple auoit des yeux,
Si les grands aimoyent les doctrines,
Si nos Magistrats traffiqueurs,
Aimoyent mieux s'enrichir de mœurs,
Que s'enrichir de nos ruines:
Si ceux là qui se vont masquans
Du nom de Docte, en se mocquans,
N'aimoyent mieux mordre les sciences,
Qu'en remordre leurs consciences:
Ayant d'un tel heur labouré,
THEVET, tu serois assuré
Des moissons de ton labourage,
Quand favoriser tu verrois
Aux Dieux, aux hommes, & aux Rois,
Et ton voyage, & ton ouurage.

Car si encor nous estimons
De ceux là les superbes noms,
Qui dans leur grand Argon oferent
Asservir Neptune au fardeau,
Et qui malgré l'ire de l'eau
Iusques dans le Phase voguerent.

Si pour auoir veu tant de lieux,
 Vlysse est presque entre les Dieux,
 Combien plus ton voyage t'orne,
 Quand passant sous le Capricorne,
 As veu ce qui eust fait pleurer
 Alexandre? Si honorer
 L'on doit Ptolomee en ses œuvres,
 Qu'est-ce qui ne t'honoreroit,
 Qui, cela que l'autre ignoroit,
 Tant heureusement nous decouvertes?

Mais le Ciel par nous irrité,
 Semble d'un œil tant de pitié
 Regarder nostre ingrate France.
 Les petits sont tant abrutis,
 Et les plus grands, qui des petits
 Sont la lumière & la puissance,
 S'empeschent tousiours tellement
 En un trompeur accroissement,
 Que veu que rien ne leur peut plaire,
 Que ce qui peut plus grands les faire:
 Celuy-là fait beaucoup pour soy
 Qui fait en France comme moy,
 Cachant sa vertu la plus rare:
 Et croy, veu ce temps vicieux,
 Qu'encor ton liure seroit mieux
 En ton Amerique barbare.

Car qui voudroit un peu blasmer
 Le pays qu'il nous faut aimer,
 Il trouueroit la France Arctique
 Avoir plus de monstres, ie croy,

Et plus de barbarie en soy,
 Que n'a pas ta France Antarctique.
 Ces Barbares marchent tous nuds:
 Et nous, nous marchons incogneus,
 Fardés, masquez. Ce peuple estrange
 A la pieté ne se renge:
 Nous la nostre nous mesprisons,
 Pipons, vendons, & deguisons.
 Ces Barbares pour se conduire
 N'ont pas tant que nous de raison:
 Mais qui ne voit que la foison
 N'en sert que pour nous entre-nuire?
 Toutesfois toutesfois ce Dieu,
 Qui n'a pas banni de ce lieu
 L'Espérance nostre nourrice,
 Changeant des cieux l'inimitié,
 Aura de sa France pitié,
 Tant pour le malheur que le vice.
 Je voy nos Rois, & leurs enfans,
 De leurs ennemis triomphans,
 Et nos magistrats honorables
 Embrasser les choses louables,
 Separans les boucs des agneaux,
 Oster en France deux bandeaux:
 Au peuple celuy d'ignorance,
 A eux celuy de leur ardeur,
 Lors ton liure aura bien plus d'heur
 En sa vie, qu'en sa naissance.

O D E S.

O D E

A Claude Colet, sur le 1 x. d'Amadis.

E temps malheureux où nous sommes,
 Plombant les lourds esprits des hommes,
 Ne permet qu'on puisse honorer
 Ceux, qui, bannissant l'Ignorance,
 Tâchent de retrainier en France
 L'âge, qui nous viendrait dorer:
 Sans nostre enuëné courage,
 Qui, reiettant chacun ouurage,
 Veult tousiours sa roüille endurer.

Mesme le mal, qui plus estrange
 Nourrit nostre cœur en sa fange,
 C'est que tousiours nous trouuons bien
 Quelque raison, quelque deffense,
 Ou quelque probable apparence,
 Pour battre contre nostre bien,
 Sans que pour la chose louable
 (Bien qu'elle nous soit proffitable)
 Nostre esprit se condamne en rien.

Tant est la venimeuse enuie
 Familiere de nostre vie,
 Qu'un bien est plustost deietté,
 Qu'un mespris d'un bien salutaire,
 D'un bien qui mesme pourroit plaire,
 Puisse estre des hommes quitté:
 Et ne faut point que lon escriue,
 En espoir qu'au monde lon viue,
 Sinon par la posterité.

*Du Philosophe, du Poëte
 La peine est à ceci sujette,
 Qu'on n'eust point escrit au milieu
 De nos vieux Payens autre chose,
 Que cela qu'escrire lon ose,
 Voire son escriuoit de Dieu,
 On trouueroit qu'Hypocrisie,
 Ou bien que l'aucugle Heresie
 En tels escrits auroit son lieu.*

*Ne sçais-tu pas que i'emprisonne
 Les graces que le ciel me donne,
 Dessous vn silence obstiné?
 Bien que ie sente en moy la gloire
 Et Poëtique & Oratoire:
 Bien que le Ciel m'ait destiné
 Pour plus haute philosophie,
 Et bien que braue ie me fie
 D'estre au monde heureusement né.*

*Mais quand on me verroit confondre
 Tous nos anciens, & refondre
 Des sciences vn Rond nouveau,
 On ne verroit point que ma France
 Vint estrener telle assurance,
 Sinon que d'un obscur tombeau,
 Pour se rendre à son bien contraire,
 Et de ses amis aduersaire,
 Ne souffrir vn esprit plus beau.*

*Fault-il donc que tu t'esmerueilles,
 COLET, si les doctes merueilles
 Tant des amours que des combats,*

Si ta plus mielleuse parole,
 Si mesme du peuple l'eschole
 Façonnant les courages bas,
 Maugré ton heureuse entreprise,
 Par le peuple en messpris est mise,
 Peuple indigne de tels appas?

L'un tantost d'un front venerable,
 De son front bannira ta fable,
 Et sourcilleux contre son heur,
 Aime mieux reietter tout l'œuvre,
 Que lire ce qui luy decœuvre
 Le contraire de sa fureur:
 Lequel sera, si la rencontre
 D'un bon siecle s'oppose contre,
 Du peuple la fable & l'horreur.

L'antiquité qui s'eternise
 Par ceux là mesme qu'elle prise,
 Estimoit un œuvre immortel,
 Quand la façon bien ordonnee
 Passoit la matiere donnee:
 Ton ouvrage, C O L E T, est tel,
 Qui ceste menteresse feinte,
 Par ta docte escriture as peinte,
 D'un pinceau qui n'est point mortel.
 Penseroit-on bien qu'un Homere
 Depeignant de Pirrhe le pere,
 Ou bien de Laërte le fils,
 Sous tant d'alarmes furieuses,
 Sous tant d'erreurs auantureuses,
 Sous tant de dangers desconfits,

N'ait voulu voiler la vaillance,
 N'ait voulu voiler la constance,
 Double but aux hommes prefix?

Lors que lon lit la destinee
 De cest Anchisien Ænee,
 Le regne Troyen replantant:
 Ne voit-on pas ces mesmes choses
 Estre hors des fables écloses,
 Que le Mantouan va chantant?
 Et toutesfois de telles fables
 Les façons, à iamais durables,
 Vont l'une & l'autre mort domtant.

Poursuy donc, COLET, fuy toy viure,
 Et ton nom, comme moy, n'en yure
 Dessus le riuage oubliex,
 Par faute d'auoir ce courage,
 De supporter l'iniuste rage
 De nostre siecle iniurieux:
 Tu vaincras, peut estre, l'audace
 Des siecles, tirant par ta trace
 Mes escrits dépitant les vieux.

Aux cendres du mesme Colet.

S I ma voix, qui me doit biẽ tost pousser au nombre
 Des Immortels, pouuoit aller iusqu'à ton ombre,
 COLET, à qui la mort
 Se monstra trop ialouse & dépite d'attendre
 Que tu eusses parfait ce qui te peut deffendre
 De son auare port:

L

O D E S.

Si tu pouuois encor sous la cadence sainte
 D'un Lut, qui gemiroit & ta mort, & ma plainte,
 Tout ainsi te raiuir,
 Que tu te raiuissais dessous tant de merueilles,
 Lors que durant tes iours ie faisois tes oreilles
 Sous mes loix passeruir:

Tu serois escouter à la troupe sacree
 Des Manes bien heureux, qui seule se recree
 Entre les lauriers verds,
 Les mots que maintenant deuôt en mon office
 Ie rediray neuf fois, pour l'heureux sacrifice,
 Que te doiuent mes vers.

Mais pource que ma voix, aduersaire aux tenebres,
 Ne pourroit pas passer par les fleues funebres,
 Qui de bras tortillez
 Vous serrent à l'entour, & dont, peut estre, l'onde
 Pourroit souiller mes vers, qui dedans nostre monde
 Ne seront point souilleZ:

Il me faut contenter, pour mon deuoir te rendre,
 De tesmoigner tout bas à ta muette cendre,
 Bien que ce soit en vain,
 Que ceste horrible Sœur qui a tranché ta vie,
 Ne trancha point alors l'amitié qui me lie,
 Où rien ne peut sa main.

Que les fardez amis, dont l'amitié chancelle
 Sous le vouloir du sort, eurent vn I O D E L L E,
 Obstiné pour vanger
 Toute amitié rompue, amoindrie, & volage,
 Autant qu'il est ami des bons amis, que l'age
 Ne peut iamais changer.

*Sois moy donc vn tesmoin , ô toy Tumbe poudreuse,
 Sois moy donc vn tesmoin, ô toy Fosse cendreuse,
 Qui t'anoblis des os
 Desia pourris en toy, sois tesmoin que i'arrache
 Maugré l'iniuste mort ce beau nom, qui se cache
 Dedans ta poudre enclos.*

*Vous qui m'accompagnez, ô trois fois trois pucelles,
 Qu'on donne à ce beau nom des ailes immortelles,
 Pour voler de ce lieu,
 Iusqu'à l'autel que tient vostre mere Memoire,
 Qui regaignant sans fin sus la mort la victoire,
 D'un homme fait un Dieu.*

*Pour accomplir mon vœu, ie vois trois fois espandre
 Trois gouttes de ce laiçt dessus la seiche cendre,
 Et tout autant de vin,
 Tien, reçoyle cyprés, l'amaranthe, & la rose,
 O Cendre bien heureuse, & mollement repose
 Icy iusqu'à la fin.*

A S A M V S E.

CHAPITRE.

E*v sçais, ô vaine Muse, ô Muse solitaire
 Maintenant avec moy, que ton chât qui n'a rien
 Du vulgaire, ne plaist non plus qu'un chât vul-
 Tu sçais que plus ie suis prodigue de ton bien, (gaire.
 Pour enrichir des grands l'ingrate renommee,
 Et plus ie pers le temps, ton espoir & le mien.
 Tu sçais que seulement toute chose est aimée,
 Qui fait d'un homme un singe, & que la verité*

A S A M V S E

Sous les piés de l'Erreur gist ores àssommée.

*Tu sçais quel on ne sçait ou gist la Volupté,
Bien qu'on la cherche en tout: car la Raison sujette
Au Desir, trouue l'heur en l'infelicité.*

*Tu sçais que la Vertu, qui seule nous rachete
De la nuit, se retient elle mesme en sa nuit,
Pour ne viure qu'en soy sourde auuegle & muete.*

*Tu sçais que tous les iours celuy là plus la fuit
Qui monstre mieux la suiure, & que nostre visage
Se masque de ce bien à qui nostre cuer nuit.*

*Tu sçais que le plus fol prend bien le nom de sage
Aueuglé des flateurs, mais il semble au poisson,
Qui engloutit l'amorce & la mort au riuage.*

*Tu sçais que quelques vns se repaissent d'un son,
Qui les flate par tout, mais hélas! ils dementent
La courte opinion, la gloire, & la chanson.*

*Tu sçais que moy viuant les viuans ne te sentent:
Car l'Equité se rend esclau de faueur:
Et plus sont creus ceux là qui plus effrontez mentent.*

*Tu sçais que le sçauoir n'a plus son vieil honneur,
Et qu'on ne pense plus que l'heureuse nature,
Puisse rendre un ieune homme à tout œuure meilleur.*

*Tu sçais que d'autant plus, me faisant mesme iniure,
Ie m'aide des Vertus à fin de leur aider,
Et plus ie suis tiré dans leur prison obscure.*

*Tu sçais que ie ne puis si tost me commander,
Tu cognois ce bon cœur, quand pour la recompense,
Il me faut à tous coups le pardon demander.*

*Tu sçais comment il faut gesner ma contenance,
Quand un peuple me iuge, & qu'en deuit de moy*

L'abaisse mes sourcis sous ceux de l'Ignorance.

*Tu sçais que quand un Prince auroit bien dit de toy,
Un plaisant s'en riroit, ou qu'un piqueur Stoïque
Te voudroit par sotie attacher de sa loy.*

*Tu sçais que tous les iours un labeur poëtique
Apporte à son authheur ces beaux noms seulement,
De farceur, de rimeur, de fol, de fantastique.*

*Tu sçais que si ie veux embrasser mesmement
Les affaires, l'honneur, les guerres, les voyages,
Mon merite tout seul me sert d'empeschement.*

*Bref, tu sçais qu'elles sont les enuieuses rages,
Qui mesme au cœur des grands peuvent auoir vertu,
Et qu'avec le mépris se naissent les outrages.*

*Mais tu sçais bien aussi, pour neant aurois tu
Debatu si long temps, & dedans ma pensee
De toute Ambition le pouuoir combatu.*

*Tu sçais que la vertu n'est point recompensee,
Sinon que de soy mesme, & que le vray loyer
De l'homme vertueux, c'est sa Vertu passee.*

*Pour elle seule doncq ie me veux employer,
Me deussé-ie noyer moy mesme dans mon fleuve,
Et de mon propre feu le chef me foudroyer.*

*Si doncq' un changement au reste ie n'épreuue,
Il faut que le seul vray me soit mon but dernier,
Et que mon bien total dedans moy seul se treuue,
Iamais l'Opinion ne sera mon colier.*

L iij

LES DISCOVRS DE IVLES
CESAR AVANT LE PAS-
sage du Rubicon.

AU ROY.



N croit que ce qui plus pousse, dresse, & con-
tente

Des mieux nés le desir, le projet, & l'at-
tente,

SIRE, c'est le seruice & la suite de ceux
Que Dieu mesme & Nature ont commis dessus eux:
Tant pour leur dominer que pourn tout affaire
Comme Nature & Dieu tâcher de leur bien faire,
Sans mors les gouuerner, sans dol les maintenir,
Sans fin en paix & guerre ensemble les vnir,
Pour les vnir à soy prendre vn desir extreme
De leurs biens & repos autant que des siens mesme:
Chercher à les cognoistre, & en leur commandant
Les merquer pour s'aider d'eux mesme en leur aidant.
Car là le Roy doit mettre & le but de sa gloire,
Et l'esperoir le plus haut de sa longue memoire,
Comme en luy nous mettons (quand on a ce bon heur
De le suiure & seruir) le but de nostre honneur.
Croy pourtant qu'un esprit vrayment haut & deliure
De ioug & vaine ardeur, hait de seruir & suiure
Et les Rois & leurs cours, dont pour les seuls appas
D'un espoir, il espouse & les toicts, & les pas,
Sans qu'un vouloir plus franc, quel espoir ne peut estre,
Et sans qu'un eguillon, que luy peut faire naistre

*La vertu, pour preuoir l'honneur futur d'un Roy,
Et sans qu'un iuste amour l'y contraigne de soy.
C'est pourquoy les plus grands qui furent onq' au monde,
Dedaignoyent des Tyrans la Court en tout seconde,
Fors qu'en honneur, vertu, iustice, & liberté,
Dont telles Courts auoyent sans cesse pauureté:
Tant que ces gens uiuoyent en leur pauvre sagesse
Plus contens, que ces Rois en leur pauvre richesse.
Encor voit on que quand les plus vrais Rois, au lieu
Qu'ils tiennent dessus nous, monstrent d'effet que Dieu
Les donne heureusement, comme il t'a donné, SIRE,
Et qu'à soy leur vertu les vertueux attire:
Si est-ce que l'esprit que tant entier i'ay fait,
Estant attrait des Rois, souuent d'eux se distrait,
Fasché de voir gesner tant sa franche nature,
Que son discours, mespris, gaillardise, & droiture
Par seruice seruil, duquel il soit estreint
Tant plus fort, que plus fort sa bonté l'y contraint,
Et par suite, en laquelle il ne face oncques faute,
Suiuant d'ardeur plus vraye, & plus prompte & plus
haute.*

*Car ceux qui de tous poincts de franchise sont francs,
Quand ils se sont donnez font tous deuoirs plus grands
Que nul serf de loyer: qui sans qu'aucun merite,
Ou sans qu'un vouloir franc, & iuste amour l'incite,
(Fait esclau d'espoir) & seulement tâchant
A son but, espiant, reculant, rapprochant,
Donne, reçoit, attend, presque de ruse egale,
Des beaux vents courtisans la plaine & vaine balle,
Habile à retourner son cœur girouëtant,*

DISCOVRS.

*Vendant les mesmes vents qu'il va mesme achetant.
 Tous tels seruiteurs vils, soit qu'ils seruent leurs Princes,
 Ou ceux qui les suiuan tiennent de leurs provinces
 Les charges dans leurs mains: voulans sans fin piper,
 Ne faillent guere en fin d'eux mesme se tromper:
 Tant qu'on les voit souuent pauvres & vieux se rendre,
 Pour alors, tout ainsi qu'un oiseau de Meandre,
 En regrettant d'auoir passé leur âge entier
 En maint indigne, & dur, voire infertile mestier,
 Apres leurs vents, leurs jeux, & la longue rîsee,
 Dont leur faueur aueugle en son songe abusée
 S'eclaphoit contre tous, tous blancs & tous mourans,
 Lamentertant le but, que le cours de leurs ans,
 Tous deux tels, que souuent au bout de leur attente,
 Rien n'y a qui leur maistre, ou les autres contente,
 Ny mesme eux, ou leur race, en leur fin faïsans voir
 Qu'un desespoir occit ceux qui viuent d'espoir.
 Bien qu'aucuns soyēt entre eux, qui ne laissent pas d'estre
 Seruans pour le salaire, & bien seruans leur maistre,
 Et qu'aucuns de ceux-ci, en l'espoir qu'ils ont eu,
 Ayent plus rencontré qu'à l'espoir n'estoit deu:
 Et que souuent encor les bons heurs se reseruent
 A ceux qui pis, ou moins, ou le moins souuent seruent.
 Mesme qu'aucuns, ou soit pour l'auoir meritē,
 Ou pour estre importuns, ou par fatalité,
 Trompans l'opinion de tous, par l'heur extreme
 Passent infiniment leur opinion mesme:
 Puis ce grand heur se passe encor par autre espoir.
 Car plus ha l'homme auide, & plus il tâche auoir,
 Tant que souuent on perd tout esgard de seruice,*

S'en

*S'en meslant bien ou mal, pourueu que l'ardent vice
 D'auoir, se puisse en nous à tout heur souller,
 Qui seul nous fait de tout, plus qu'on ne veut, mesler,
 Et dès que nous croyons grandement fructueuse
 Telle meslange, ou bien feintement glorieuse,
 Iasoy que soit vn mal qui souuent nous appert;
 On sestime perdu pourtant silon la pert:
 Creuant contre chacun, qui loyal la manie:
 Car toute loyauté des Courts n'est pas bannie.
 Maint on voit grand ou bas, suiure & seruir vn Roy,
 Qui trop plus tient son ame à son Prince qu'à soy.
 Mais au rebours de tout, quelquefois sans s'astreindre
 A tel seruice & suite, & sans caller ne feindre
 Soit l'ame soit la voix, sans voir souuent flater,
 Chatouiller, sucrer, oindre, amorcer, appaster
 Par l'oreille & par l'œil, de blandice ou louange,
 L'humeur qui fresche ou vieille en vn maistre demange,
 Que sans cesse on accoustre ainsi, tant qu'il desplaist
 Souuent, ce croy-ie, à luy, qui tout entier s'en paist:
 Sans crainte, honte ou dueil de poursuite importune,
 Et sans à chasque tour du temps & de fortune,
 Voir les vns en Catons, les autres se tourner
 En bouphons, & tous deux leurs singes façonner:
 Loin des fameuses Courts, & loin de la personne
 A qui tel esprit franc d'un franc vouloir se donne,
 Seul, secret, & deuôt, dans soy la va seruant,
 Et non du corps, mais bien d'un cœur plus seur suiuant:
 Attrait, gaigné, lié, autant par vraye & viue
 Gentillesse & grandeur, que par vertu naïfue:
 Et sur tout par l'humeur, qui à tel esprit rond*

DISCOVRS.

Par un resentment satisfait & respond:
 Le condamnant ainsi par l'attrayant merite,
 A l'esloigné service, ains à l'absente suite:
 Qui le rendans present en l'absence, & tout prest
 D'estre vrayment present, quand besoin il en est:
 Qui souuent rendans mesme utile son absence,
 Plus que n'est de beaucoup utile la presence,
 L'affranchissent des loix d'aspre quemanderie
 Souuent vaine, de dol, de masque, & flaterie,
 Comme il est affranchi des vents & vanitez,
 Dont par espoir & peur tous cueurs sont agitez.
 Car luy sans proietter rien de ce qui auance,
 Sans craindre ingratitude, inconstance, oubliance,
 Mesme sans en soy prendre aucun but ou souci,
 Fors que pour le merite il luy plaist faire ainsi:
 De gayeté de cœur, reuere, honore, & aime
 D'un grād cœur, qui n'a point d'eguiillon que soymesme,
 Celuy que son vouloir prend pour sujet gaillard,
 Et qui iamais dehors ce franc vouloir ne part:
 Et songe à part d'aider à faire à tous paroistre,
 D'aider à maintenir, d'aider à faire croistre,
 Non seulement de l'autre & le los & l'honneur,
 La grandeur, & le rang, le repos, & bon heur,
 L'eternité du nom: mais l'accortesse, adresse,
 Et sagesse, & vertu, voire encor la liesse,
 La gaillardise utile, & l'accort passetemps,
 Qui pour les faits meilleurs rafraichissent nos sens.
 Et sur tout il se peine à faire, que d'ouurage
 En secret entrepris, toute peine il soulage
 A celuy qu'il adore, en tâchant que tous biens

Soyent creus ou restaurez, tant à luy comme aux siens.
 L'encourageant, s'il peut, aux choses les plus hautes,
 Des plus grands anciens luy proposant les fautes,
 Vertus, ruses, discours, & ce dont la grandeur
 Peut renuerfer, ou croistre, ou sauuer son grand heur,
 Prenant sans fin le soin des choses qui luy viennent,
 Veillant pour empescher tous troubles qui retiennent
 Son estat empestre, soit qu'iceluy soit Roy,
 Ou bien que soit quelque autre ayant estat sous soy.
 Tousiours dedans les Courts aux Rois on ne se donne,
 Bien que tous soient aux Rois, ny tousiours leur personne
 Hors des Royales Courts, ne peut estre l'objet
 D'un franchiseit qui prend quelque grand pour sujet:
 Car il ne choisit pas (s'il choisit par franchise)
 Ce qui est plus prisé, mais ce que plus il prise.
 Quand c'est un Roy pourtant, le choix de cestuy-ci
 Se rend plus glorieux, plus profitable aussi.
 Car veillant pour un Roy, qui deffous Dieu commande
 A tant d'œuvres de Dieu, mainte chose plus grande
 S'en peut apres laisser à la posterité,
 Qui fait prendre à tous deux plus d'immortalité.

Or tout ceci m'aient, qui hors de ta presence
 T'ay choisi pour mon but, te seruant en absence:
 Et quand (ô SIRE) encor mon Roy tu ne serois,
 Si t'aurois-ie pourtant choisi plus que tous Rois:
 Car ce que i'ay conceu dedans moy d'esperance,
 Des traits que i'ay merquez dès ta premiere enfance,
 M'ont fait, sans à ta suite autrement m'asseruir,
 Comme il t'apparoistra, d'un grand cœur te seruir.
 Moy pauvre, & qui pis est, de sastreux gentilhomme,

M ij

DISCOVRS.

Tant riche toutesfois, que le sort de nul homme
 N'est enuié de moy, ne me puis ny de rang,
 Ny de biens, ny d'honneurs, vanter, mais d'un cœur frâc,
 Par lequel i'ay sacré tout ce que peut d'office
 Et mon ame & mon corps, à ton plus haut seruice:
 Sans que i'aye eu souci, si en gré tu l'auois,
 Sans iamais m'enquerir, si rien tu en scauois.
 Le temps veut commencer, sans que ie vueille dire
 Ici ce qu'il en est, à te decouurir, SIRE,
 Quel seruice est le mien: voulant faire auancer
 Deuers toy mes labeurs, & me faut commencer
 Par vne arre petite, en qui ma fantasie
 Pour grand' occasion chose haute a choisie,
 Que ie veux en ces vers subtilement (apres
 L'auoir bien exprimee) à toymesme à plus pres
 La venir adapter, pour bien te faire apprendre,
 Mesme à propos, le fruiçt qu'ores tu en peux prendre.

Moy donc à qui desor sans aucun vain espoir,
 Le temps & mon Demon, ton regne & mon deuoir,
 Commandent de sortir hors de ma solitude,
 Pour faire issir dehors les fruiçts d'un franc estude,
 Et pour d'oresnauant apres un domestic
 Seruice recele, t'en monstret un public:
 Ie resen bien, mais c'est pour dissemblable chose,
 Qu'un estroit Rubicon à passer se propose,
 A moy comme à Cesar. Car pour estre incogneu
 Iusqu'ici, ie scay bien quel grand heur m'est venu,
 Ie scay bien, veu le temps, qui contre nostre teste,
 Nous reforge sans fin diuers traits de tempeste,
 Que sil peut bien scauoir, ce que sur luy ie puis,

Ce m'est d'estre cogneu pour tout tel que ie suis,
 Vn grand malheur, peut estre, & continuel trouble:
 Si tu n'as, SIRE, en main le bouclier sept fois double,
 Dont vn Aiax de gloire & de fureur ardent,
 En combatant couuroit Vlysse le prudent.
 Tant qu'il ne tourne en moy gueres moins de pensees,
 Que Cesar en sentit dedans soy r' amassees,
 La nuit dont il vouloit passer le lendemain
 Le Rubicon, pour faire à son pays Romain
 La guerre, & de fureur iuste ensemble & inique,
 Le ventre maternel de sa grand Republique,
 Parricide fouler. Quant à moy çà & là,
 Tantost deuers ceci, tantost deuers cela,
 Mes pensers se roüans m'agitent & me meinent,
 Et mesmement pour toy d'autres pensers me peinent:
 Scachant que le soupçon, le garbouil, le besoin,
 Auant lès faits doit faire aux faits auoir le soin.
 Car ie sen que desia la rage turbulente
 De ce siecle, bien tost à passer te presente
 Maint nouueau Rubicon, où mesme tout ainsy
 Qu'à Cesar, pour passer ou reculer aussi,
 Pourroit, peut estre, en fin se trouuer vne perte,
 Perte ou honte, ou bien mesme & la honte & la perte.
 Cela donc me fait poindre en ces pensers diuers
 D'un prompt & chaud humeur, pour vouloir dās ces vers
 De ce Cesar pensif les mesmes discours faire,
 Qu'il fit sur tel passage, & pour, & au contraire,
 Ausquels ie brusle après d'accommoder les tiens:
 Mais premier permets, SIRE, ici chanter lès siens.
 Fa ce Cesar contoit par dix fois les annees

*Dedans l'oblique tour du grand Soleil tournees,
 Depuis qu'il eut sa charge aux Gaules, & qu'aux loix
 De Romme il entreprint flechir tes fiers Gaulois,
 Qui deslors estoyent tels que pour à sa fin rendre
 L'entreprise, il falloit Cesar pour l'entreprendre:
 Car à tels la vaillante & iuste liberté
 Peut ceder, mais encor c'est par fatalité.*

*Ia donc par cent assauts, par batailles, par prises,
 Escarmouches, exploits vrayment guerriers, surprises,
 Attraits, ruses & dols, il auoit (non d'effort,
 Bien que son effort fust subtil ensemble & fort:
 Mais bien du fil du temps qui tout mine & depeuple)
 Sous son dessein superbe accablé ce franc peuple,
 Qui ja sur Romme auoit presque pris en ses mains,
 Ce que sur luy prenoient par Cesar les Romains:
 Et qui sous toy, peut estre, ou bien sous les tiens, SIRE,
 Aioustant tes Lis d'or aux Aigles de l'Empire,
 De Romme & du Romain vainqueur se vangerà,
 Et ses subiugateurs sous soy subiuguera.*

*Or deslors par l'effort de tant d'amples victoires,
 Qui Romme, ains tout le môde emplissoyēt de ses gloires,
 Ce vainqueur ne greuoit des nations d'ici
 Les cœurs tous seuls, mais bien les cœurs des siens aussi:
 Et sur tout de ceux là qui les premiers de Romme
 Se voyoient peu à peu deuancer d'un tel homme,
 Contre le haut espoir que prendre ils auoyent peu,
 Contre le mépris mesme auquel ils auoyent eu
 Sa croissante grandeur, semblable à la marée
 Qui flot à flot se fait soudain de mesuree
 En ses croissans reflux: ou bien semblable au feu*

Qui souvent dans un chaume, en marchant peu à peu
 Embrase tout un champ : voire semblable encore
 A l'argent in flambeau dont la nuit se decore,
 Qui dès qu'il a fait voir ses cornes dans les cieux,
 Ne cesse d'aionster à son corps radieux,
 Jusques à tant qu'il ait, prenant par tout lumiere,
 De sa claire rondeur comblé la forme entiere:
 Tant que de grandeur telle en eux ils conceuoient
 Crainte, enuie, & fureur : la crainte qu'ils auoyent,
 C'est que voyans Cesar brusler d'enorme enuie
 Naturelle, de voir à son ioug asservie
 Et sa ville & le monde entier, dont la rondeur
 Deslors n'outrepassoit de gueres la grandeur
 De si superbe ville, & voyans qu'à l'extreme
 Ardeur s'aparioit presque la force mesme
 D'armes, d'amis, de biens, mesme que tel objet
 Ambitieux par luy par maint & maint projet
 Se suiuoit d'heure en heure : & que par ses recentes
 Conquestes se frayoit la voye à ses attentes,
 Ils craignoyent que le bien & l'heur dont ce fatal
 Cesar les accroissoit, ne fust bien tost le mal,
 Le malheur, le decroist, ains la cheute ordonnee
 De leur hauteesse acquise, en un coup terminee
 Avec l'estat public, avec la liberté,
 En qui l'heureux estat sans cesse auoit esté:
 Bien que liberté lors ne fust qu'une voix feinte,
 Et couleur faulse entr'eux, car ils l'auoyent estreinte
 Eux & leurs deuanciers desia de tant de nœus,
 Et pour en un grand feu reduire mille feux
 Autour d'elle, ils auoyent laissé telle trainee

DISCOVRS.

Qu'il ne failloit qu'une ame accorte, heureuse, & nee
 Au mépris des hasarts, pour soudain luy servir
 D'amorce, & tout d'un coup en cendre la raur,
 Ou soudain l'estouffer, ou bien d'effroy troublee,
 Chancelante en ces pas de mainte redoublée.
 Suite, rencontre, & choq, malignement tâcher
 De la faire au peril extreme trespucher,
 Sous feinte de secours ou d'une aveugle force,
 Contre celuy qui plus la renuerse s'efforce,
 Vrayment la secourant: mais voulant hasarder
 D'un coup ce qui pourroit peu à peu la garder,
 Ou bien differant trop sa recousse opportune,
 Et donnant à la fraude, à l'audace, à fortune
 Trop de loisir, pour mesme attendre le destin,
 Et de la fin d'icelle & de sa propre fin
 Sur elle s'accabler, la priuant d'esperance
 De pouuoir de quelque autre auoir autre alleeance:
 Tellement que l'estat auquel estoit alors
 De ces Romains trop grands, trop riches, trop accords,
 Et trop forts, en leur dam, la liberté premiere
 C'estoit d'estre reduite à sa borne derniere,
 Encor qu'elle peust bien ou rompre ou desserrer
 Quelques uns des liens, & qu'elle peust errer,
 Les allongeant, ou bien les trainant par les terres,
 Estranges à ses flancs ayant tousiours les guerres,
 Les effrois, les abois, les atteintes des siens,
 Comme Acteon fuyant auoit ses propres chiens:
 Mesme encor qu'elle peut faire esteindre, peut estre,
 Ou faire euanouir, ou bien garder de croistre
 Les feux, qui par trainee à l'entour se dressoyent,

Et

Et qui d'embrasement soudain la menaçoient,
 Ou d'un grand cœur auant qu'estre toute enflammee,
 Par force s'arracher hors la flamme allumee,
 Sans se laisser du tout consumer de ces feux,
 Et sans garder que mesme aux arriere-neueux
 De ces plus grands Romains, au moins quelque relique
 Entiere peust rester de liberté publique.
 Mais quoy? son piteux sort & son Demon qu'elle ha
 Pour guide de sa fin, la pousse & conduit là,
 L'estat mesme, où elle est, vient par force, ce semble,
 Appeller dessus elle & son sort, & ensemble
 Son contraire Demon, qui chassant tout conseil
 Luy fait contre soy mesme ourdir tel appareil,
 Se plaire en ses ardeurs, & s'y rendre acharnee,
 Pour voir par ses efforts sa force ruinee:
 Trop auant s'est poussé de son mal l'ardent cours,
 Et du secours l'esperoir meurt avec le secours.
 Il faut ceder aux nœuds d'estreinte ambitieuse,
 Il faut ceder au feu d'ardeur seditieuse.
 Quand entre les Romains ce Cesar ne seroit,
 Romme alors pour cela cent Cesars se feroit:
 Aussi de tout estat l'accroissance fatale,
 Dés lors qu'elle est portee au sommet, redevale
 Par force, tout ainsi que lon feint le fardeau
 De Sisyphé aux enfers, porté iusqu'au coupeau
 De son roc, s'échaper, & de roide roulee
 Gagner en vn moment le fond de la vallee:
 Si bien que ce qui a tant de traueux cousté,
 Pour estre par la voye aspre & haute porté.
 Iusqu'au proposé feste, échape, & de vistesse

DISCOVRS.

*Par sort, par faulſe gloire, & faulx eſpoir ſe laiſſe
 Precipiter, trompant les mains, les ſens, l'eſpoir,
 Le trop tardif deſir qu'on a de le rauoir,
 Et l'eſlancement vain qu'on fait pour le rateindre,
 Ne laiſſant que le dueil pour vainement s'en plaindre:
 Tant qu'on eſt plus long temps ſouuent à regretter,
 Que lon n'auoit eſté long temps à le monter.
 Et en ces deux longueurs de temps la precedente,
 Et celle là qui ſuit la cheute violente,
 Se ſont ſouuent du tout vaines en vn moment,
 Auquel ſi toſt on voit l'impourueu roulement
 Du hault iuſqu'au plus bas, au moins ſi dans la roche
 Quelque debile appuy pour vn temps ne l'accroche,
 Qui par l'eſpoir reſté nous fait plus reſentir,
 Et plus ſouuent l'eſſet du premier repentir.
 Pour tout vray donc eſt vaine, & la longueur de l'âge,
 Durant lequel avec tout eſſort, tout courage,
 Tout haſart, tout encombre, on pouſſe ce qu'il fault
 Voir par neceſſité tomber de ſon plus hault,
 Et vaine eſt la longueur des regrets & des plaintes,
 * * * pour ces cheutes contraintes
 Par naturelles loix, dont l'une c'eſt que tout
 De grandeur & duree en fin trouue le bout:
 L'autre que l'homme eſt né pour aux choſes plus hautes
 Et plus grandes, tousiours faire les plus grand's fautes:
 L'autre encor que tant plus l'homme ſe voit hauſſer
 En vn eſtat, & plus il veut ſous ſoy baiſſer
 Ses egaux en l'eſtat, d'aveuglement extreme,
 Hazardant avec eux & l'eſtat, & ſoymeſme,
 Sans égard de pays, de loix, ny d'amitié,*

*D'alliance, de sang, de peur, ny de pitié,
Par ses discours faisant à soy mesme vne excuse,
Que pour le bien futur, du mal present il vse.
Vne autre loy se peut adiouster à ces loix,
Considerable encor plus que les autres trois,
C'est qu'au monde inconstant toute chose rechange
Par la viciissitude incertaine qui renga
Sous ses tours & retours, non pas tant seulement
La chose, mais pour elle aussi l'euenement
Entre nous, tout autant diuerse sur tout estre,
Que sur tout bien ou mal qui pour nous se peut naistre:
Changeant avec ses tours, ses façons, & souuent
Lentement, & souuent trop plus roide qu'un vent,
Pour ramener non pas tousiours apres la chose
Bonne ou mauuaise, vn bien ou mal qu'elle propose
A rebours l'un de l'autre: ains d'un moyen fatal
Après le mal souuent cela qui est moins mal,
Ou souuent retourner apres le mal le pire,
Ou bien apres le bien celuy qu'on peut eslire
Pour le mieux de deux biens, ou mesme en moindre bien
En changeant rabaisser quelque autre bien moyen:
Ou par vn sault estrange aller conuertir mesme
Vn bien ou mal leger, en bien ou mal extreme:
Ou d'un reuoltement encores plus leger,
Du bien du mal l'extreme en l'extreme changer:
Si bien que par ses faits ne soit pas maintenue
Seulement ceste loy, qui mobile est venue
Du naturel de tout, mais que sans fin tournant
Elle aille mesme en tout nature maintenant,
Qui caduque ne peut conseruer ses essences,*

DISCOVRS.

Ou bien ses actions que par ces inconstances.
 Qui ne voit que la seure & plus constante loy,
 D'une inconstance telle au ciel change sous soy
 Les dominations des feux qui sur nous luisent,
 Et qui de quelque instinct nous & nos faits conduisent
 Par leurs retours diuers, soit qu'ils soyent ascendans,
 Ou bien de leurs honneurs & forces descendans:
 Soit que l'un avec l'autre ou se ioint, ou s'oppose,
 Soit qu'autrement du Ciel le grand bal les dispose
 Aux rencontres qu'ils font par ses douze maisons,
 Où les heures, les iours, les mois, & les saisons
 De l'an par les traux du Soleil se partissent:
 Soit que tous ces aspects sur nous se reünissent
 Partant d'autres moyens que l'art peut esprouuer,
 Et ausquels il a peu des noms propres trouuer:
 Tant que tel art souuent par principe inniable,
 Par supposition pour le moins vray-semblable,
 Par obseruation que comme il dit il fait,
 Et par diuers calcul qu'il tient iuste & parfait,
 S'efforce de monstrier que tout ce qui chemine
 En ceste haute, claire, & tournante machine,
 En tours, en ordre, en nombre, en figure, en pouuoir,
 Et mesme en tous effets, que tel cours fait auoir
 A toute autre nature en ces ronds contenue,
 Et necessairement sous les reigles tenue
 Du Ciel, qui la contient, pourroit parfaitement
 Par cognoissance entrer dans nostre entendement,
 Si pour l'aspre longueur de l'estude, la vie
 Au milieu du travail ne nous estoit rauie.

Or cet art dans ce Ciel tantost en haut honneur,

Fait quelque astre esleuer comme maistre & seigneur,
Et du Ciel, & du temps, & de toute influence,
Que le Ciel à chacun durant tel temps dispence:
Toute chose qui naist, tout faict qu'on voit venir,
Se feint ou peu ou prou de tel pouuoir tenir,
Comme si dans son throne alors ce grand Planete
A son regne rendoit toute essence sujette,
Ainsi qu'un grand Monarque: apres il vient ceder
A quelque autre qu'on voit apres luy commander.
Tantost pour autre égard un tel art nous assemble
Des principaux flambeaux une grand' troupe ensemble,
Qui semblent, mais non pas du tout egalemt,
Par leurs regards donner un commun mouuement.
Tout ainsi que lon voit qu'une Aristocratique
Façon de gouverner quelque grand' republique,
Des hauts & saincts decrets d'un Senat par compas
Doit regir l'ordre haut, le moyen & le bas:
Bien que ne plus ne moins qu'en telle compagnie
De celestes flambeaux, la ciuile harmonie
D'un estat publiq, rompe en soy l'egalité
Par enfleure de biens, de race, ou dignité,
Par un resentiment de bienfaits & victoires,
Ou par l'orgueil qui veut croistre ou perdre ses gloires:
Mesme tousiours faut-il (mais chacun au rebours
Confesse necessaire & louable tousiours
Telle inegalité) que les uns tous seuls guident,
Et qu'entre les plus hauts les uns sur tous president,
Voire un seul, ou bien deux, qui prennent presque en soy
(Le seul nom excepté) tout ce qui est d'un Roy:
Mais leur charge & puissance, ou bien n'est qu'annuelle

DISCOVRS.

Seulement, ou bien n'est qu'autant que les appelle
 A cela le besoin, encor leurs actions
 Cedent aux loix, & mesme aux superstitions:
 Qui plus est, quelquesfois de nouvelle ordonnance
 Et de controullemens, se borne leur puissance:
 Ou celuy qui Monarque entre les siens est né,
 De rien que de sa mort n'a son pouuoir borné.
 Ceste Aristocratie en ceci, comme au reste,
 Suit le gouuernement de la troupe celeste,
 De tant de feux meslez vnis ensemblément,
 Desquels cet art obserue vn commun reiglement.
 Car là tousiours les vns sur les autres maistrisent,
 Et selon plus ou moins fauorisent, ou nuisent,
 Mesme par leurs aspects contraires & malings,
 Semblent presque se rendre en leur troupe mutins,
 Comme en vn corps ciuil troublans par leur discorde,
 Tout ce qui à peu pres en telle chose accorde.

Voila donc comme au Ciel les obseruations
 De l'art Astronomicq', aux propositions
 Hautes quelles se font, trouuent que d'une sorte
 Ce haut gouuernement celeste se rapporte
 A l'estat Monarchicq' d'un Empereur, d'un Roy,
 Ou d'un autre qui seul tient tout l'estat sous soy:
 Et que, comme i'ay dit, d'autre sorte il ressemble
 A l'estat de plusieurs qui commandent ensemble,
 Se faisans les premiers, tant par l'illustre sang
 Des plus vieilles maisons, que par merite & rang:
 Ne pouuans toutesfois, ou ne deuant rien faire
 Sans vn accord de tous, fust-ce du populaire,
 Qui puissant en l'estat (bien qu'il soit le plus bas)

Ha pour cela ses voix, & propres magistrats,
Dont l'autorité mesme à tout autre s'oppose,
Tirant souuent à soy pour la publique chose
Tout vueil, & tout pouuoir des armes, & des loix,
Tant il craint que les grands facent surluy les Rois.
Mais deslors que lon voit ses fureurs moderees,
Ou bien de ses soupçons les causes retirees,
Il se raccorde & met ce qu'il auoit repris,
Aux mains de ceux qui sont à regir mieux appris,
Deuers soy retenant toutesfois sa puissance,
Qui contre les grandeurs, tousiours contrebalance,
Si bien qu'il n'a pas moins entre eux d'autorité,
Mais il a moins d'honneur, de charge, & dignité.
Aussi croire il nous faut que d'une multitude,
Sans quelques nobles chefs l'estat est vil, & rude,
Incertain, confus, lâche, ignoble, & qui ne peut
Avoir l'honneur en soy, qui seul pourtant nous meut
Non seulement aux faits, qui par l'heur de la guerre,
Du nom, du los, du bien, font l'accroissance acquerre:
Mais aux vertus, aux arts, aux sciences aussi,
Bref, à tout ce qu'on peut cognoistre & suiure ici
De bon, de beau, de grand, & sans qui (ie croy) qu'estre
Seroit pis que mourir, ou bien iamais ne naistre:
Bien qu'en quelques endroits, quelque aspreté des lieux,
Quelques insignes torts qu'ont receu les ayeux
Des peuples, qui grossiers dessous tel Ciel habitent,
Et d'aspreté de mœurs ces mesmes lieux imitent,
Tant que la durté lourde, & du viure, & des mœurs,
Les exempté aussi bien de Seigneurs que d'honneurs:
Outre cela, le long, & costumier vsage

DISCOVERS.

De hair la Noblesse, à cause de l'outrage
 Que, peut estre, ils auoyent (comme i'ay dit) receu
 De leur noblesse, & mesme vn égard qu'ils ont eu
 Quelquesfois à bon droit, pour voir aucuns des Princes
 Leur voisins, se monstrent tyrans de leurs prouinces:
 Puis la difficulté que lon trouue à vouloir
 Asseruir ceux qui sont sous leur propre pouuoir,
 D'autant que la franchise estant long temps goustee,
 Bien que lourde elle soit, ne peut estre domtee,
 Qu'à toute extremité de trauail & pouuoir,
 Qui mesme en fin trompé bien souuent se peut voir:
 Puis leur gloire grossiere, & les vaines audaces
 De penser corriger les Rois, & les menasses
 Qu'aux plus grans mesme ils font, pour se voir estre amis
 Des Princes, sans se voir à nul Prince sousmis,
 Les dures loix sans grace, & les peines cruelles
 Qui à leur liberté rendent les leur fidelles:
 L'assurance qu'ils ont qu'en voulant faire excez
 A leur basse franchise, on trouue sans accez
 Tout leur pays, peut estre, & l'effort sans louange,
 Mesmement sans grand gain telle conqueste estrange:
 Et bref, maint autre égard qu'on peut encor trouuer,
 Qui les garde sans fin d'autre ioug esprouuer,
 A serui, mesme encor sert auiourdhuy d'excuse
 Aux peuples, dont l'estat fuyant les nobles, use
 De tel entretien bas, qui n'est point vrayment franc,
 Où pour tout rang n'y a que du peuple le rang,
 Qui bien souuent se peut de son propre ioug plaindre,
 Lequel plus que le ioug d'un Royle vient estreindre,
 Ployant sous ses égaux vilement, lâchement,

Et

Et sans qu'esper de grace y soit aucunement.
 Mais ie dy que quiconque a goûté des noblesses
 Le deuoir, & le fruit, les grandeurs, les prouesses,
 Les plus gayer vertus, & les ciuilitéz,
 Qui soyent franches pourtant des superfluitez,
 Les honneurs, que Dieu mesme exprés a voulu faire
 Des vertus l'equillon, le but, & le salaire,
 Les gloires, des honneurs compagnes, & les arts
 Plus riches, plus hautains, plus rares, plus gaillards,
 Qui delectent tous seuls, soulagent, & conseruent
 Nostre vie, & qui seuls de grand lustre luy seruent,
 Les spectacles gentils, & tout diuers plaisir,
 Où licitement tire un grand & haut desir,
 Les plus dignes, plus forts, & plus hauts exercices,
 Par ordre resuiuis des honnestes delices:
 Les entremeslemens qui grands & fructueux,
 D'hommes brutaux nous font souuent des Demi-dieux:
 La louange, qui lors qu'à l'oreille elle agree
 Dedans nous & nostre ame, & nos vigneurs recree,
 Soit qu'un bruit populaire exalte nos renoms,
 Ou sur tout qu'un beau vers embrasse nos beaux noms.
 Comme ne pourroit plaire (ô Dieux) louange telle
 Aux mortels, qu'elle plaist à vous Troupe immortelle,
 Lors que là haut Mercure, Apollon, ou ses sœurs,
 Flatent vos deitez de leurs doctes douceurs?
 Et mesme outre le ios, les grand's pompes licites
 D'un triomphe, en publicq couronnant nos merites:
 Les beaux chars de diuers animaux attelez,
 Les lauriers, & les fleurs, les sons, les chans meslez
 D'allegresse & de ris, les enseignes, trophées,

DISCOVRS.

Et autres merques d'or & d'argent estoppees,
 Les grands arcs triomphauls, les prieres, les vœus,
 Les sacrifices saincts, les festins, & les jeux,
 Qui montans iusqu'au Ciel, des palmes glorieuses
 Peuent les deitez rendre presque enuieuses:
 Mesmement, qui plus est, de tant & tant de los
 La memoire à tousiours gardant qu'il ne soit clos
 Sous le cercueil muet, dans la muette cendre,
 Ou qu'il n'aille en la bourbe oublieuse descendre,
 Ains qu'il soit eternal par la posterité,
 Qui au nom des mortels donne immortalité,
 Et pour encore en fin comprendre d'auantage
 Tout cela qu'un esprit hautain, accord, & sage,
 Braue, heureux, genereux, en tous ses faits peut voir,
 Admirer, desirer, & mesme recevoir
 En sa vie, en sa mort, voire apres la mort mesme,
 Dessous vn noble estat, soit que soit le suprême,
 Qui en tout temps tout tel dure en ses Royautez,
 Ou soit l'estat publicq, qui en ses dignitez
 Et magistrats plus hauts, pour vn temps presque égale,
 Et la fuyant ensuit la puissance Royale.

Or quiconques dans soy tous ces dons goustera,
 D'un populaire vil sans fin dedaignera
 L'estat tout populaire: & n'y a rien qui blesse
 Vn noble esprit, si fort, que de voir sans noblesse
 Tous ceux entre lesquels, comme vn astre qui luit
 Vn peu, mais tout autour couuert de noire nuit,
 Il luy conuient trainer indignement sa vie,
 Qu'il aimeroit trop mieux se voir soudain rauie,
 Que voir tirer tousiours le filet que Clothon

Luy a predestiné, sous quelque gros Canton
 De Suisses, Grisons, ou bien d'autres sauvages,
 En leur ioug tant ignoble auilissans leurs âges.
 Que cent fois soyent maudits (si lon dit vray) tous ceux,
 Qui entre nous vouloyent tâcher nous faire à eux
 Semblables, en estat : Grande estoit leur furie
 Hypocrite, plus grande encor leur barbarie.
 Les sauvages viuans tous nuds qui n'ont ny loy,
 Ny Dieu, ny raison presque, ont entr'eux cōme un Roy:
 Cet ordre est naturel, que les choses guidees
 Soyent des choses par ordre, & d'elles commandees:
 Et iacoy que souuent par desastre ou erreur
 De Nature, ceux-là qui en plus grand' grandeur,
 Et avec plus de faix de grands charges futures,
 Regnes, principautez, dignitez, prelatures,
 Se voyent naistre ici, ne soyent pas ceux qui ont
 Le plus d'autres grandeurs, qui les plus propres sont
 Pour guider celles ci, comme un instinct de flame,
 Qui haut & vif rehausse & repoint sans fin l'ame,
 Et vient pourtant promettre en ceste prompte ardeur,
 D'un iugement plus froid & plus seur la tieueur:
 Comme est un autre instinct d'accortesse, meslee
 A droicteure, & bonté, qui la rendent reiglee,
 Pournen tout l'âge entier sans fin la mesurer,
 Sans iusques à la mort d'elle se separer:
 Comme est l'instinct encor de science & sagesse
 Plus hautaine, & l'instinct de plus noble hautesse,
 Et celuy-là qui peut sans cesse nous hausser
 A tout ce que plus grand sans cesse on peut penser:
 Voire & celuy qui fait qu'en adresse & en grace,

DISCOVRS.

*Les autres tant du corps que de l'ame on surpasse:
 Et tous autres instincts, dont pour nous patronner
 Au plus pres sur les Dieux, le Ciel nous vient orner.
 Si est-ce que pourtant la meslange fatale
 De Nature, aux vns chiche, aux autres liberale,
 Tant diuerse en ses dons, mesme les tours des Cieux
 Ramenans aux vns pis, ainsi qu'aux autres mieux,
 Eux mesmes tant diuers, en cent mille influences,
 Qui font de nos esprits (comme on dit) les puissances:
 Et sur tout du grand Dieu les graces, qui autant
 Les va diuersement dans nos ames iettant,
 Soit d'une main prodigue, ou chiche, compassee
 A ce qu'il a preueu de nous dans sa pensee,
 Rendroyent, comme ie pense, & nos complexions
 Egales, & nos sens, & nos conditions:
 Et n'auroyent distingué de tant de differences
 Les graces, dont en nous ils versent les semences,
 Et sur tout celles là qui nous peuuent guider
 A policer, regir, regner; & commander,
 A guerroyer, & vaincre, à deffendre, conduire,
 Ou bien amplifier dextrement vn Empire,
 Et par viuacité naïfue, par effort
 De cœur, par maiesté de visage & de port,
 Et d'esprit, & de voix, tantost tenir en bride,
 Tantost à ce qu'on veut piquer ceux que lon guide:
 Et reluisant sur tout, des plus precieux biens
 Orner son temps, sa terre, & soymesme, & les siens.
 De tous ces dons on voit sans trauail, sans estude,
 Aux vns la naturelle, & tant grande aptitude,
 Aux autres on la voit plus mediocre, aux vns*

De ces dons on y voit ceux qui sont plus communs
 Aux autres, & ceux-cy sont quasi tous les hommes.
 Car des hommes douez tant richement, nous sommes
 Au monde mal pourueus, on voit si grand deffaut
 De tels & pareils dons, qu'il semble (peu s'en faut)
 Qu'ils ne soyent pas des Dieux, ny des hommes la race:
 Mais qu'excepté la voix, & la forme, & la face,
 Ils ayent retiré l'estre de leurs esprits
 Des brutes animaux bien souuent mieux appris.

Et pourquoy donc Dieu mesme & sous luy mesmemēt
 Le Ciel, & la nature, auroyent ils tellement
 A si peu d'entre nous, d'une si riche corne
 Respandu tout cela qui plus nos esprits orne?
 Et au rebours, au nombre infini des humains,
 Pour tels dons auroyent-ils tant reserré leurs mains,
 S'ils ne vouloyent qu'exprés des ames fussent nees
 Au monde, dont seroyent les autres gouvernees?
 Estans ou plus, ou moins, & par diuers degré
 Serues au ioug, aux lois, à la voix, & au gré
 De celles, que ie croy, telles entre nous naistre
 Exprés, pour le deffaut qu'aux autres on voit estre.
 Aussi ny le destin celeste, ny le sort,
 Qui est l'euenement particulier qui sort
 Du destin à toute heure, & dessus chascune chose
 Qui peut estre en l'arrest de tout destin enclose,
 Ne se fussent point vus (depuis que du grand monde
 Se va sans fin tournant l'architecture ronde,
 Et logeant nostre espece humaine dedans soy)
 Maintenir pour iamais ceste immuable loy,
 Que tousiours nous naissons, les uns pour estre grands,

DISCOVRS.

Et les autres petits pour estre serfs ou francs,
 Riches ou souffreteux, sans qu'en la plus brutale
 Façon de viure, ou plus la basseur est egale,
 Leur loy tousiours courante oncques permettre peüst
 Qu'aux vns quelque grâdeur plus qu'aux autres ne fust:
 Que plus riches les vns naquissent, ou se feissent
 Que les autres, les vns mesme aux autres seruissent:
 Et que par tous moyens telle societé
 Ne recherchast tousiours telle inegalité,
 Que luy ait peu l'ardeur naturelle promettre,
 Ou bien que luy ait peu son vil estat permettre.
 Qui plus est ce destin, & ce sort, quant au bien,
 N'eussent iamais souffert ces noms de tien, & mien:
 Ils n'eussent point laissé sans fin entre nous estre
 La force qu'ont ces noms de seruiteur, & maistre,
 Sans qui tous les labours des humains cesseroient,
 Et sans qui tout commerce, & secours manqueroient:
 Mesme en fin l'homme mesme ils n'eussent par concorde
 (Qui à Nature, au Ciel, voire à Dieu, les accorde
 En face, & en façon, en courage & desir)
 Semblé les vns du tout disposer, & choisir
 Au fer, aux coups, au sang, au sceptre, à la couronne,
 Que le vray sang ou bien la prouësse nous donne:
 Et tant aux chars, qu'à mille autres pris Martiaux,
 Aux dictatures mesme, aux haches, aux faisceaux,
 Aux puissans tribunats, pretures, & questures,
 Aux saintes dignitez de prestres, & d'augures,
 Et à mille autres rangs d'honneurs, tous differens
 De nom, selon l'estat, & la terre, & le temps:
 Les autres au contraire, au soc qui leur agree,

*Au pastoral flageol qui aux champs les recree,
 Aux perilleux travaux de leur petit trafficq,
 Aux sueurs de tout art plus bas & mecanicq:
 Qui pis est par malice, ou par disete, aux peines
 Des hotes, & des piqs, des rames, & cadenes:
 Tout cela (dis-ie) ici ne se fust veu sans fin
 Sur nous entretenu du Sort, & du destin,
 Si Dieu, le Ciel, Nature, & la suite ordonnee
 Pareux en toute chose, & de leur destinee
 Les cheutes, ramenans tout effet incertain
 A nous, d'un roulement qui est pourtant certain,
 Ne s'accordoyent tous là, par conseil necessaire
 Qui preuent, & pouruent de tousiours ainsi faire:
 Ains ne contraignoyent tout sans cesse à telle fin,
 Estans eux mesme adstrains par ce grand vueil diuin,
 Mesme immuable à Dieu, d'incessablement tendre
 A ce but, que tel vueil pour le mieux voulust prendre:
 Qui est, que par un ordre inegalement mis,
 Parmille sorts diuers, les vns fussent soumis
 Aux autres, que ceux cy de ceux là garantissent
 La vie aux grands dangers, leurs esprits affranchissent
 De grands desseins, grands soins, grands discours, qui ne
 Propres à ceux, ausquels les rangs vulgaires sont (sont
 Vulgaires les esprits: qu'autant en autre terre
 Comme en la leur, autant en la paix qu'en la guerre
 Les maintiennent sous soy: quant aux biens, quant à l'heur,
 Aux mœurs, & au repos, tout ainsi que des leur,
 Desir, soin, & travail en toute chose ils eussent,
 Et en leur commandant, aspres, & doux ils fussent,
 Aspres pour leurs vouloirs effrenez refrener,*

DISCOVRS.

Doux pour par bonté mesme à bonté les mener:
 Et qui tout autrement suivant la loy commune,
 Où nous reduit la basse & vulgaire fortune,
 Ceux là serfs, ou sujets, ou soumis à ceux ci,
 De l'amour, de la crainte, & du service aussi
 Leur rendans tout deuoir, avec l'obeissance,
 Cherchassent par trauaux leur aisance & croissance:
 Eussent le soin pour eux de tout commun besoin,
 En les affranchissant du trop vulgaire soin,
 Au trafficq de dehors, en l'aliment publique,
 Au domesticq mesnage, au labeur trop rustique,
 Aux œuures manuels, aux deuoirs plus petits
 Des soldats, ou des chefs sous eux assujetis,
 Au commun appareil des diuers exercices,
 A l'œuure, à l'ornement des diuers edifices, (steaux,
 Soyent murs, iardins, maisons, grans arcs & grans cha-
 Soyent citez, forts, ou ports, ou bien marins vaisseaux,
 A tout cela de quoy toute grandeur s'atourne,
 Et dont sous elle encor la petiteesse s'orne:
 Au ministere aussi tant des desirs remis
 Sous le ioug de raison, que des plaisirs permis:
 Aux ordinaires mesme, & sacrez ministeres
 De leurs religions, & coustumiers mysteres:
 Au ministere encor des executions
 De leurs loix, mandemens, graces, punitions:
 Au ministere utile de ceux, qui pour les Princes,
 Ou bien pour vn publicq, les deniers des prouinces
 Doiuent asseoir, leuer, assembler, departir,
 Les faisans nettement rentrer, & ressortir
 D'une main non glueuse: & bref, en tous offices

Qui

Qui des petits, aux grands exercent les seruices:
 Et que poussez ainsi du continu deuoir,
 Qui moins puissans les lie à ceux qui ont pouuoir,
 Non seulement pour eux, leur art, & leur ouurage,
 Leur industrie, & soin, leur travail, leur courage,
 En paix, & en repos employer on les vist,
 Et que non seulement chacun d'eux asseruist
 A tel commun besoin, repoussé d'une extreme
 Ardeur, les bras, les pieds, le corps, & l'esprit mesme:
 Mais bien qu'à l'heure aussi que d'un discord bouillant,
 La sanglante Enyon va leur repos brouillant,
 Se vist de tous ensemble & le sang & la vie
 Sacree obstinément, & sans cesse asseruie
 Au soustien de la vie, honneur, & dignité
 De tous ceux qui sur eux ont iuste autorité,
 Soit Roy, soit magistrat, d'autant qu'il est notoire
 Que leur gloire, & leur bien ne pend que de la gloire
 Et du bien de ces grands, pouuans seuls estranger
 Des testes du bas peuple, & du ioug estranger,
 La honte, & sans parler de playes estrangeres,
 Les pauuretez qui sont au dedans familiares.
 A quoy sur toute chose, avec tout iuste égard,
 Tout vouloir franc & prompt, tout conseil & tout art,
 Preuoyance, & souci, mesure & accortesse,
 Tout noble & digne chef doit mettre ordre sans cesse,
 Pour le moins sans relâche efforcer il se doit,
 Que tel qu'il est requis sans fin mis il y soit,
 Sans souffrir que de charge indigne lon le foule
 Tant, que par trop de faix hors de ses mains s'ecoule
 Tout moyen d'enrichir, sans le voir deuestir

DISCOVRS.

De champs, & de maisons, sans du tout engloutir
 Ses iournalles sueurs, & de mains sacrileges
 Ses franchises, ses droicts, ses sacrez priuileges,
 Voler, ou violer, souuent oster pour rien
 La vie aux vns, à fin d'oster aux leur le bien:
 Tout crime amende doit, mais sont-ce legitimes
 Façons de s'enrichir, que de laisser aux crimes
 Les chemins pour remplir vn fisque ? les chercher,
 Espier, souhaiter, sureter, esplucher,
 Et tâcher pour tel gain, contre tout ce qu'on pense,
 De faire conuertir en crime l'Innocence?
 Où tant plus les malings, & trop cauts officiers
 Font plus mal, plus ils sont estimez iusticiers:
 Laisant en sauueté richesse, honneurs, louanges,
 Ceux-là qui mesme entre eux des vices plus estranges,
 Plus sordides, plus faux, se voyent entachez,
 D'autant qu'ils sont comme eux saintement empeschez
 A ce tresbon, tresdigne, & tresiuste exercice,
 Qui de iustice n'a qu'un faux nom de iustice:
 Ou bien laissans ainsi tous ceux qui en leurs rangs
 Soyent petits, ou bien soyent mediocres, ou grands,
 Aident à faire cheoir par diuerses fouteures
 Sur le peuple oppresse toutes telles blesseures,
 Lors que (non sous les Rois iustes, bons, & feux,
 Mais dessous des Tyrans) ils se font tyranneaux,
 Ou que la Tyrannie ils flattent, & consentent
 A ces maux, sur lesquels bien souuent ils plaisantent,
 Ou bien la deguisans bien souuent par raisons,
 Peuent mesme vn bon Roy gaster de leurs poisons,
 Tous presque marians à telle peste inique,

Maint autre crime encor tant priué que publique.
 Souuent pourtant la faulſe apparence les fait
 Pour des coulombes prendre, ou le moindre meſſait
 Peut faire les petits pour noirs corbeaux paroître:
 Souuent meſme en ce rang des petits, on fait eſtre
 En tous tels torts, ceux là qui en tout ſoy n'ont rien
 De petit, ſi ce n'eſt la faueur, & le bien.
 Il ne faut donc iamais que ceux qui veulent ſuiure
 Ce qui avec honneur, voire apres la mort viure
 Dans l'uniuers nous fait, ſoit que ceux là ſoyent Rois,
 Ou qu'aux libres citez ils baillent lors les loix,
 Ou que les Rois ſous ſoy leur baillent charge grande,
 Ou qu'autrement leur main ſouueraine commande,
 Puiſſent iamais permettre à ſoy meſme, ou à ceux
 Qui ſont encor commis pour policer ſous eux:
 Ou l'un, ou l'autre eſtat, qu'au ſousmis populaire
 Toute cruauté telle à tort ſe voye faire:
 Dont pourtant on a veu mille brouilleurs eſprits
 Nés au dam des humains, enragément épris,
 Neſpagnans ny diſcours ſubtil, ny ruſe inique,
 Pour de plus en plus rendre vn eſtat tyrannique:
 Juſques à vouloir meſme en ces maux ſe baigner,
 Sans ſemonce ou beſoin, pour plus faire regner
 Par exemple mauuais leur nature inhumaine
 Sur la terre, & regner ſur l'eſtat plus de haine,
 Plus de maux ſur le peuple, & ſur leur actions
 Maudites, & ſur eux plus d'execrations.

Je croy, SIRE, pour vray que toutes fois & quantes
 Qu'en quelque eſtat antique à ces ames meſchantes,
 Les Eumenides ſœurs d'un tiſon infernal

DISCOVRS.

Ont échauffé les sens engendreur de tout mal,
 A leur propre pays de langueur & misere,
 Aux pauvres & aux grands de honte & vitupere,
 Il ne leur a suffi pour à l'heure assouvir
 L'estrange & lâche ardeur, qui là les vient ravir,
 D'auoir souuent ouuert la voye à ces maudites
 Foulleures, que desia par mes vers ie t'ay dites:
 D'auoir sans nul égard, sans pitié, sans propos,
 Sans mesure introduit impos apres impos:
 D'auoir mesme recreu toute charge annuelle,
 Ia trop dure de charge encore plus cruelle,
 Qui non seulement peut tout mesnage empescher
 D'accroist & d'entretien, mais peut mesme arracher
 Au four, au mains, au dents, d'une deconfortee
 Famille le pain cuit, ou la paste apprestee,
 Ou tout autre sien meuble, au moins si bien saisir,
 (O barbare hideur!) que sur terre gesir
 Plus vilement encor que les bestes il faulle,
 Dessous qui tels voleurs ne rauiroient la paille.
 Mais il n'est rien qu'ici ces hommes hayent tant,
 Quel'homme dont ils vont les seuls membres portant,
 La seule face aussi: car si tant que nous sommes
 Ne leur estions d'esprit dissemblables, des hommes
 La race ne deuroit du ciel se regarder,
 Se porter de la terre, & tant soit peu garder
 En sa peruerse espece, ains dans son ventre large
 Telle mere engloutir deuroit sa faulx charge.
 Pour tels hommes le Ciel n'a point assez, ie croy,
 De foudres, de courroux, de desastre, & d'effroy:
 La mer n'a point assez de hurlemens, d'orages, .

De tourmentes, d'horreurs, d'abysses & naufrages:
La terre assez de peste & d'autres hideux maux,
De tristes, veneneux, ou cruels animaux,
De poisons, de venins, de funestes discordes,
De precipices bas, de feu, de fer, de cordes,
De Juges impiteux pour là les condamner,
Ny de bourreaux pour tel salaire leur donner:
Ne permettant jamais que leur charongne rentre
Au grand tombeau du sein maternel, mais au ventre
Des mastins charongners, des sinistres oiseaux,
Qui mesme encor cent fois sont trop dignes tombeaux:
De tels hommes de proye en toutes leurs besongnes,
Recherchans des humains les maux & les charongnes,
Que mesme auant la mort on leur voit déchirer,
Bequeter, & tous vifs en la fin deuorer.
Pour eux l'Enfer encor n'a point tant de Cerberes,
De Tisiphones, tant d'Alectons, de Megeres,
Qu'il faudroit de prisons, de tenebreux manoirs, .
De brandons, de serpens, l'un & l'autre tous noirs,
De foits ensanglantez, de tenailles mordantes,
De fleuves tous bruslans, de grand's roches pendantes
Sur le chef attendant, de pierres, de tonneaux,
Et de rouës qu'en vain on porte, on remplit d'eaux,
On tourne, sans jamais voir la peine eternelle
Cesser, puis que l'esprit est eternel comme elle:
Ou si ces maux ne sont qu'antiques fictions,
Pour eux la conscience a moins de passions
Qu'il ne conuient, d'aigreur de remors, de piqueures,
De cauterres rongeurs par secrettes brusleures,
D'eslourdissans fleaus coup sur coup rebatans,

DISCOURS.

D'affamez vipereaus sans cesse resortans
 Du fond de la Memoire, & de mainte autre peine
 Que tel ressentiment horriblement rameine,
 D'un tel viure faisant presque un continuel
 Mourir, & de la terre un Enfer plus cruel,
 Faisant de nostre corps nostre ame estre bourrelle,
 Et de soymesme encor la meurtriere cruelle.
 Mais pourquoy ces tourmēts, quand plus au vray i'y pèse,
 Veus-ie estre accreus à ceux qui sont sans conscience,
 Pour la plus part exempts de souffrir tels tourmens,
 Puis qu'ils se sont exempts de tous tels sentimens?
 Il vaut mieux renvoyer au vrais tourmens leur vie,
 Dont en fin quelque fin meschante la chastie,
 Soit par conseil des Dieux, soit par vne equité,
 Qui souuent mesme aux tours de fortune a esté:
 Je sçay qu'en rien plustost sur leurs chefs ie n'attire
 Par ces vers que i'escris, les maux que ie desire
 Leur estre ramenez, mais si ie ne puis plus
 Proffiter aux vieux Grecs, aux vieux Romains exclus
 Et de vie, & d'Empire, & puis que tout barbare
 Regne viel ou nouueau de mes vers ie separe,
 Comme indigne de reigle, & si à nos ayeulx
 Lors qu'on voit tout remede inutile pour eux
 Seruir, il n'est possible au moins à la couronne,
 Que sus un si doux peuple un grand destin te donne,
 Mesme au sceptre des Rois tes voisins qui à toy
 Sont lieZ & par sang & par semblable foy,
 A tout Roy de l'Europe & aux grands Republiques,
 Qui encore à mon gré imitent les antiques,
 A tout Duc, à tout Prince, ou Prelat qui en main

Tient en la Chrestienté quelque estat souverain,
Voire à toute leur gent, puis qu'ainsi que la tienne
Presque sous mesme loy, soit ciuile ou Chrestienne,
Chacune se maintient, puis que d'esprits & cœurs
Et de mesme desseins pour mesme loy, de mœurs,
D'armes & arts encor qu'il y ait difference,
La difference n'est pourtant telle qu'on pense:
Si bien que qui voudroit faire sous soy trembler
L'uniuers, il pourroit l'une à l'autre asssembler:
Et puis que toutes sont en l'Europe, qu'eslire
Les destins ont voulu, pour souuent un Empire (droit,
Donner aux siens, plus vray, plus grand, plus saint, plus
Qui, peut estre, en fin, SIRE, aux tiens tous seuls se doit:
Ou bien sans auoir soin de tout tel peuple estrange,
Bien que sous la loy nostre, un Dieu commun le range,
Au moins à tes François, peuple qui d'un lien
Plus grand que naturel estreint son bien au mien,
Je veux iusqu'à la mort dedier cet office,
Comme à toy, Roy, ie veux sacrer ce saint seruice,
Sans chercher de m'y voir par toy Prince excité,
Et sans qu'onque ta gent l'ait de moy merité.

Je veux dōc qu'une ardeur & plus libre & plus sainte,
Et plus aigre à bon droit, dont iamais estre atteinte,
Puisse quelque haute ame éprise en mon cœur soit,
Par l'equitable instinct de la Muse qu'on voit
Plus aspre, & brusque, & iuste, & qu'elle alors me face
D'art nouveau façonner quelque trompe de chasse,
Inusitée à tous, meslant à la fureur,
A l'espouuement, à la froide terreur,
Des meschans les raisons, & mesme des offences,

DISCOVRS.

Ou des auenglemens, ou bien des conuiuences,
 Qu'aux offenses on fait vn iuste resentir,
 Vn forcé marriſſon, vn tardif repentir,
 Et maugré qu'on en ait vn conſeil qui rameine
 L'horreur de ce qui meſme agreeoit Melpomene:
 C'eſt la Muſe qui peut des diuerſes façons,
 Plus rares qu'ayent eu iamais les plus hauts ſons,
 Animer ma grand' trompe & d'une eſtrange haleine,
 Par toutes les foreſts de la grand' race humaine
 Peut faire entendre vn iour ce tortueux airain,
 Auquel & mon eſpaule & ma bouche & ma main
 Adreſſer ſe verra, pour avec quelque grace
 Le porter en echarpe, avec ardente audace
 Dans le poing le reprendre, & puis en chaſque part
 Qu'il le faudra ſonner, l'emboucher d'un grand art,
 Plus bruyamment encor, qu'en mes ſcenes Tragiques
 Je n'ay faict eclater mes grands cornets Bacchiques:
 Plus librement auſſi, que parmi les hauts bois,
 Premiers des anciens, les Hiſtrions ſans loix
 De Comedie encor, ſe barbouillans de lie,
 Ne ſouloyent d'un chacun au viſpiquer la vie,
 Meſme plus aigrement, que parmi maint rocher,
 Et maint bois contrefait on ne voit emboucher
 Vn long cornet bouquin crochu par le gros bout,
 Lors qu'un Satyre vieil en ſe riant de tout,
 Entre ſes tons aigus, mord, egratigne, aſſolle
 Les ridicules mœurs de noſtre race folle,
 En ces Scenes qui ont des Satyres cornus,
 Le nom de leur poeme & leurs noms retenus:
 Et ſans que toutesfois par les mots de ma trompe

Les loix de modestie ie rompe,
 Si bien que trop d'aigreur me poussast hors des rangs,
 Et sans qu'en rien ie poigne ou les Rois ou les grands,
 Si ce n'est en cela pour qui vrayment ie pense
 Qu'ils m'adiungeroyent mesme & los & recompense,
 Se voyans à leur bien si bien eguillonner,
 Ou bien à ce qui peut plus d'honneur leur donner.
 Car il ne faut iamais qu'un Prince au gain regarde
 Si fort, que son honneur & sa gloire il hazarde,
 Ains sa memoire encor, de qui le seul espoir
 Doit causer le grand cœur qu'en tout il doit auoir,
 Et le mestriz qu'il fait aux choses belliqueuses,
 Des hazards se poussant iusqu'aux plus hazardeuses,
 Le desir d'estre veu iuste, accord & loyal,
 Genereux, vertueux, adroit, & liberal,
 Et l'enuie de faire à tous siecles paroistre
 Son Regne entre ceux-là que plus grands on voit estre.
 Car c'est le seul espoir de memoire, qui fait,
 Au moins s'il est vray Roy, que dans son ame il ait
 Tout tel hautain desir, & qui mesme peut faire
 Qu'en heur comme en grandeur de son peuple il differe.
 Car sans un tel espoir, veu le faux, les ardeurs
 De croistre, les soupçons, les soucis, & les peurs,
 Et veu les aigrisons & les fureurs encloses,
 Trop plus grandes d'autant que de plus grandes choses
 Elles vont renaissant: veu les aspres douleurs
 Que lon sent pour se voir arriuer des malheurs,
 D'autant plus grands qu'aux grands plus heureux ils a-
 Veu les aigus regrets qui dās leurs serres tiēnēt (uiēnēt:
 Telles ames, alors que par un long effort

Qu'un decore requiert tout ce qu'à l'heure porte
 Ce jeu brief & ce roolle, apres lequel il faut
 Soudain se retirer derriere l'echauffaut,
 Souuent sans le succez des choses desirees,
 Souuent avecq' ennuy des choses empirees,
 Souuent avecq' regret & mescontentement
 D'auoir ainsi fini son roolle briuement,
 Plus souuent avec honte & repentance & rage
 D'auoir trop mal ioué tant digne personnage,
 Tant qu'avecques vn blasme en sort encor vn ris,
 De voir l'orgueil enflé soudainement surpris
 D'estonnement & faute, & bien souuent encore
 Avec cruelle fin, qui sans fin deshonore,
 Qui au chaisnes de fer les couronnes changeant,
 Ou sous honteuse mort piteusement rangeant
 Telle enfleure de vie en mille horreurs terribles,
 En muglemens tragicqs, en larmes, en horribles
 Pitiez, qui quelquesfois pour le peu d'amitié
 Qu'on porte à tel ioueur, ne font point de pitié,
 Vont tout d'un coup cachant tout cela qu'on admire
 En eux, sous le rideau que le sort soudain tire
 D'iceluy, les couurant pour iamaïs tel rideau,
 Le plus souuent tout noir : c'est vn obscur tombeau,
 Si tombeau mesme ils ont, qui pour la fin receuë,
 Peut estre, courrira la grace qu'ils ont eüe
 Pour vn temps, la faueur des spectateurs, l'honneur,
 Magnificence, pompe, accortesse, & bon heur,
 Mesme ce qu'ils ont eu de courage & victoire
 Sur d'autres, voire encor de clemence en leur gloire,
 Et en leur triste fin d'innocence & de cœur,

DISCOVRS.

Pour contre le malheur, la fureur, la rancueur,
 Et le tort, s'il y est, porter telle inhumaine
 Issue, & meprisant comme trompeuse & vaine
 Toute gloire & grandeur, mesler aux durs sanglots
 Quelque parole, ou fait, digne de quelque los,
 Et qui puisse apres quelque constance apprendre,
 Au lieu de s'enterrer dans l'urne de leur cendre.
 Mais au rebours souuent on voit ce tombeau là,
 Qui (peut estre) dans soy pour iamais tout cela
 Que i'ay dit, couurira, si ces Rois d'auenture
 Ont eu soit en viuant, soit en la mort si dure,
 Quelques vns de ces dons: il ne couurira pas,
 Soit pour la vie, ou bien pour l'horrible trespas,
 Les deffauts d'heur, de sens, de bon cœur, de paroles
 Dignes, & dignes faits, aduis, les rages, les folles
 Ardeurs, l'horreur hontense en l'air il vomira,
 Puis par tout l'uniuers l'air l'éparpillera,
 Tant que le bruit ailé qui fera d'âge en âge
 Courir ce qui est pire, en portant grand dommage
 A tout bien qu'ils ont eu, portera grand renfort
 Aux blasmes de leur vie, aux hontes de leur mort.

On se taist à bon droit du mol Assyrien
 Sardanapale, aussi ie croy qu'il n'y eut rien
 De bon dans telle femme, ou dans tel homme lâche
 Qui en femme fornoit, & partissant la tâche
 A sa troupe la sciue, impudemment mesloit
 D'un salle & mol regard l'ouurage qu'il filoit:
 Encore a t'on bien sceü retenir de sa vie
 Telle honte, & la honte encor par qui rauie
 Luy fut & la couronne, & la vie, & l'honneur,

Avec son faux plaisir & malheureux bon heur,
 Auecques son oisue & chetive richesse,
 Qui trop mal auoit peu la molasse paresse
 De son cœur, qui iamais ne fut esmeu ny fort,
 Nymasle, fors qu'un peu sur l'instant de sa mort,
 Ineuitable à luy, mesme on passe en silence
 Ce point que plus louable en son grand blasme on pense,
 Ains en honte plus grande on tâche le tourner:
 Disant qu'ayant bien veu qu'il ne pouuoit donner
 Ordre à son dur destin brutal, il voulut faire
 Son sepulchre en cela qui seul luy pouuoit plaire,
 Se bruslant dans son or, dans ses biens precieux,
 Qui deuant luy brusloyent & son cœur & ses yeux.
 Des Rois ses deuanciers autant que luy barbares,
 Des peinturez Medois, des Rois porte-thiares,
 Qui regnerent en Perse, & d'autres qui tenoyent
 Leurs sceptres sous ceux-ci, qui par tout dominoyent,
 Plusieurs sous leur cercueil, presque de mesme sorte
 Ont dans leurs os poudreux enseveli la morte
 Memoire de leurs faits, de leurs dits, de leurs noms,
 De leur vie, & leur mort, excepté quelques bons,
 Iustes, heureux, ou preux, encor ce qui plus reste
 D'iceux c'est ce qui plus leur fut iadis moleste,
 Honteux, ou desastreux: mais pource qu'ils ne sont
 Ny blasfables du tout, ou qu'au contraire ils n'ont
 Vn los du tout entier, la trompette que sonne
 La Renommee, ou bien piteuse leur pardonne,
 Ou bien ingrate oublie à nous rememorer
 Du tout cela, dont plus ils táchoyent l'honnorer:
 Chose qu'elle n'a pas à tant d'autres Rois faite,

DISCOVRS.

Dans lesquels presque on vit vertu du tout parfaite,
 Ou presque parfait vice, ains d'un renom diuers
 Ces deux les font sans fin reuiure en l'vniuers.

Ces Rois qui par les maux qu'ils firent ou receurent,
 Dans le tragicq theatre à tant de fables furent
 Et sont mesme auiourd'huy, presque un continuel
 Et second argument, puis que perpetuel
 Leur renom s'est rendu par implacables rages,
 Qui par enuie ou haine exerçoient leurs outrages,
 Ou par euenemens de pitiez, de hideurs,
 Qui tant à droit qu'à tort tomboyēt sur leurs grandeurs,
 Rencontrans pour leurs maux commis ailleurs ces peines,
 Fussent Thebains, ou ceux de Troye, ou de Mycenes:
 Car, comme en d'autres vers i'ay chanté, la plus part
 Des ouurages Tragics de ces trois maisons part:
 Fussent ceux qui premiers à Corinthe donnerent
 Leurs loix, ou qui premiers dans Athenes regnerent,
 Ou dans d'autres Citez, qui en se remplissans
 De hargne, horreur, & meordre, alloyent ainsi *
 A la plus haute Muse vne ardeur qui l'allume
 De sans cesse en leurs maux rensanglanter sa plume:
 Quiconques soyent ceux là, ie les croy malheureux
 Doublement, d'auoir eu leur memoire apres eux,
 Premier par leurs malheurs ou crimes reuiuante,
 Et puis par tels écrits, par qui se rensanglante
 Sans cesse leur renom, & par qui mallement
 Leur reuiuant orgueil remeurt incessamment.
 Aussi, comme ie croy, veu que nous peruers hommes
 D'un ialoux naturel trop plustost induits sommes
 A remarquer les maux, que les biens, il faut bien

Qu'aux honneurs & bontez presque ils ne puissent rien,
Ou bien peu de mechant & de honteux paroistre,
Pour tousiours apres nous faire aux siecles paroistre
Nostre memoire bonne & glorieuse aussi:
Ce que tesmoignent mesme assez ces Princes ci,
A l'issuë desquels horriblement infame,
Infortunee aussi ceste volante Fame
S'attache seulement:mesme les cruautéz,
Dont les vns tristement ou les autres traitez,
Ce sont les seuls sujets, qui plus apres leur vie
Leur chetive memoire ont desensuelie,
Laisant presque du tout tout cela dont leur bon
Naturel en naissant leur fit (peut estre) don,
Ce dont l'enseignement, l'âge, l'art, l'exercice,
Aux grandes choses peut entremesler leur vice,
Froidement s'assopir d'un dormir continu,
Ou bien ceder au mal qui mieux est retenu.
Que retient on de grand, de toute la grand' race
Du vieil Laomedon ? qu'a ton dont mesme on face
Memoire de son fils, ce Priam tant puissant,
Sous qui la grand' Asie alloit son chef baissant?
Et qu'est-ce donc qui plus sur luy se rememore,
Et plus souuent, sinon ce qui honnit encore
Auiourd'hui ses honneurs, sa puissance, & le doit,
Qu'enuers chacun garder aux grands Rois il faudroit
Ce qu'on merque de luy, bien que la vaine Grece
Feindre (peut estre) ait peu toute la mentereffe
Fable qu'on oit de luy: c'est que pour reuenger
Hesione rauie, il souffrit outrager
Ceux qui n'en pouuoient mais, & qu'apres au publique

DISCOVRS.

Repos & paix des siens, il proposa l'inique
 Conseil, de ne vouloir rendre honteusement,
 Comme au moins il sembloit, ce qui non autrement
 Qu'avecques des-honneur, avec honte & pillage,
 Et faulsement de foy fait au saint hostelage,
 Auoit esté rai, puis desia refusé,
 Dés que presque on en eut si traistrement usé:
 Quelle reproche hélas! de voir cheoir tant de peine
 Sur un Roy ia vieillart pour l'adultere Helene?
 Et qu'il falloit qu'un Roy, que mesmement un cas
 Si vain ne concernoit ny ne delectoit pas,
 Ia tout meur & tout blanc, souffrist estre enflammee
 Pour une femme à tort dedans ses murs menee,
 Telle guerre sur luy, quand mesme il abondoit
 De famille chez soy, qui encor redondoit
 Par diuers Hymenee en tant d'autres familles,
 Tant de fils, & de bruz, que de gendres & filles,
 Pour qui craindre il deuoit qu'en fin par la raison
 Que quelques Dieux seroyent si puissante maison,
 Que tant d'autres auoyent pour leur source superbe,
 Ne fust avec leur ville en fin couuerte d'herbe,
 Apres qu'un long effort d'un grand peuple outragé
 Auroit tout & par fer, & par feu saccagé,
 Tant de grandeurs, & tant de richesses rauies,
 Tant de testes à luy si cheres afferuies,
 Qui au cruel seruage encores ne seroyent
 Que tristes demourans de tous ceux qui auroyent
 Accompagné durant le sac de leur prouince,
 Par leur mort le pitieux meurtre de ce vieil Prince.
 Aussi quelle memoire agreable peut il

Retirer

Retirer de son sort parauant tout fertile
 D'heur, de race, & de biens, quand d'une infortunee,
 Triste, deshonnorable, & cruelle iournee
 On verra tout borner dans vne Scene, ou bien
 Dedans vn liure encor saigneux du meurdre sien:
 Quand par Pyrrhe on verra forcer ses murs royaux,
 Tous les siens se serrer le cœur de si grands maux,
 Les femmes rompre l'air de leurs voix éclatantes,
 Et rompre de leur poil les tresses innocentes:
 Quand dans vne peinture, ou dans les vers qu'on lit,
 Ou dans la Scene, ou bien en ce que mesme on dit,
 Si suiuant la memoire en ceci pitoyable,
 L'un à l'autre on raconte vn tel fait lamentable,
 Avec les sens emeus & troublez on orra,
 Ou bien représenter à l'œil mesme on verra
 Cent & cent autres maux, dont ceste nuit meurtriere
 Quidu regne de Troye estoit la nuit dernière,
 Remplit la ville où japar tout bruioient les feux,
 Et la Court, & l'œil mesme à ce Roy, qui aux vœus,
 Au saints autels sacrez, aux sanglots, & aux larmes
 Auoit eu vain recours, ne pouuant rien par armes,
 Iacoit que cassé d'âge & desaccoustumé
 A vestir la cuirasse, il se fust lors armé:
 Et iacoy que voyant Polite ieune d'âge
 Plus que nul de ses fils, iusqu'au propre visage
 Déluy son pere s'estre en fuyant echapé
 De Pyrrhe, & de rechef estre là ratrapé:
 Et voyant que nauré, tombant, & demi-roide,
 Blesmissant, debatant, atteint de la mort froide,
 Avec sanglots les yeux paternels il souilloit

DISCOVRS.

Du sang, auquel depit & ieune il petilloit,
 Il ne peut lors souffrir qu'aux piés & qu'à la face
 D'un pere tel massacre en ce pauuret se face,
 Mais d'indignation lançant d'un bras vieillard
 Et foible, mais pourtant si fort qu'il peut son dard
 Sur l'inhumain meurtrier, & d'ardant vitupere
 Le demantant de dire un Achille son pere,
 Qu'il auoit trouué mesme ennemy tant humain,
 Fit l'effort de la voix accompagner la main:
 Qui fut cause, qu'he!las! Pyrrhe piqué d'outrage,
 De haine, & de fureur, enuoya ce message
 A son pere porter iusqu'à l'ombreux enfer
 Parce mesme Priam, qui trop moins de son fer,
 Que de son aspre voix auoit peu faire offense
 A ce Neoptoleme, & qui pour recompense
 Tout murmurant encor fut aux ombres d'embas
 Chassé d'un autre coup poussé d'un autre bras.
 Car son corps fut à iour trauersé de l'espee,
 Là où le dard ayant la targue un peu frappee
 Par la pointe du fer, presque à peine y pendoit,
 Monstrant le pauvre effort du bras qui le dardoit.
 Puis qu'on sçait que la fin d'un grand, qui se decœuure
 Aux ans s'entresuiuans, couronne en fin son œuure,
 Ou bien d'un verd laurier pour tout iamais après
 Verdissant, ou d'un vieil & funeste cyprés,
 Et d'une branche d'If par les ans seiche & morte,
 Tant qu'il semble à tous coups qu'à nous on la rapporte
 De l'oublicux cercueil, ne nous representant
 Qu'un nom que va la mort avec le corps dontant:
 Puis que c'est la fin, dis-ie, en quoy le plus s'arreste

Le vol du Temps, soit elle honnesteste, ou deshonesteste,
 Pleine d'heurs ou malheurs, pleine de faits & mauls
 Admirables, ou bien vuide de tout grand los:
 Puis que l'homme en oyant parler de quelque antique,
 Auant que presque ouir de sa vie Heroïque,
 Ou bien cruelle, ou lâche, ou folle, les discours,
 Impatient s'enquiert, ce qu'à la fin du cours
 Il deuint, & de brusque ardeur precipitee
 Met là le but entier de la chose contee,
 De la memoire aussi qu'il en veult retenir,
 Et de tout fruiçt qui peut par l'exemple venir.

Voyons quelle est la fin de ce grand Roy d'Asie,
 Qui trop plus est merquee, & plus souuent choisie
 Pour sujet, qu'un grand cours de ses ans, quand on va
 En memoire amenant la memoire qu'il ha:
 Iugeons s'elle enrichit vers les siecles suiuaus
 Le souuenir qu'ils ont du long fil de ses ans,
 Ou s'elle l'apauurit, d'orageuse nuee
 Couurant toute sa vie assez ia denuee
 De soy mesme, de vraye & plus digne clarté,
 Veu les dons qui en elle extremes ont esté,
 Pour rendre par Empire, & puissance, & richesse,
 Vne lueur qui fust des grand's lueurs maistresse.
 Mais elle assez desia malheureuse en grand heur,
 N'ayant pas son merite égal à sa grandeur,
 En sa richesse encor quelque peu souffreteuse,
 De ce qui iustement peut rendre plantureuse
 La vie qui plus ferme & durable nous suit,
 Si le viure premier à ce second ne nuit:
 Mesme en son grand Empire encores mal adextre,

DISCOVERS.

Non pas pour ne pouuoir extremement l'accroistre:
 Mais pour n'auoir preueu que (peut estre) il faudroit
 Que le tort outrageux en fin cedast au droit,
 Au long siege les murs, les choses ordonnees
 Par les Dieux, comme on dit, aux fins des destinees:
 Et pourtant n'auoir pas chassé l'occasion,
 Qui petite eust bien peu si grand' destruction
 Sur ce Regne apporter, si lon venoit permettre
 Ce qui tant soit peu mesme en bransle l'eust peu mettre,
 Et, si faut encor dire, en sa puissance extreme
 Aueuglement se fit impuissante soy mesme,
 Enfermant & bornant tout ce qu'elle pouuoit
 De ses murs, où trop grande assurance elle auoit.
 Car si ce grand Troyen iugé des Grecs barbare,
 N'eust esté non plus qu'eux de ses forces ignare,
 S'il eust eu le conseil, l'adresse, & le denuoir,
 Par les siens, par luy mesme egal à son pouuoir:
 Et si dés que les Grecs, qui se mescontenterent
 De ce rapt, & les vns les autres irriterent,
 Se mandoyent, s'aprestoyent, eux & leurs naus armoyēt,
 Et leurs diuerses mers pour s'assembler ramoyent,
 Qu'ils attendoyent les vents si long temps en Aulide,
 Pour qui leur plus grand chef se rendit l'homicide
 D'une horrible façon, lors que par pieté
 Faulse & lourde excusant l'enorme cruauté,
 Sur l'execrable autel, au sang de la pucelle
 Iphigene il trempa sa dextre paternelle:
 Et durant mesme encor que de ce lointain port
 Iusqu'aux bords Phrygiens leur route & leur abord
 D'heure & en peu de temps, luy qui telle abondance

De biens tenoit chez soy, deuoit toute puissance
 Des siens & des amis en Phrygie assembler,
 Qui trop plus que les vents, les Grecs eust fait trembler,
 Et pour qui dans Aulide eust esté du tout vaine,
 D'autres Vierges le meurdre & l'offrande inhumaine,
 De loin dedans leur sein il eust poussé la peur,
 Il eust de loin rompu le dessein & l'ardeur.
 Car quel espoir eust eu d'entr'eux vn chef de guerre,
 Si n'ayant que des naus, & point d'armee en terre,
 Et sçachant qu'une flote, encor qu'estrangement
 Effroyable & nombreux soit son embarquement:
 Ne peut pas presque encor porter si grand' armée,
 Que la moindre qui peut par terre estre mencee,
 Aueugle eust entrepris d'aller lors conquerir
 La terre où il eust sceu sur terre s'aprester
 Trop plus puissante armée, à fin de le surprendre
 En la descente, ou bien l'engarder de descendre?
 Qui ne sçait combien l'un trop plus que l'autre peult,
 Si rien fors qu'empescher la descente on ne veult?
 Par vn nombre petit, lors qu'un bon chef commande,
 Rembarrer mesme on peut la flotte la plus grande.
 Iugeon donc quel moyen toute la Grece eust eu,
 Si ce Roy Dardanide à sa force eust pourueu:
 De se mocquer des Grecs il luy estoit facile,
 D'autant plus qu'à son dos il eust eu sa grand' ville,
 Pour lors forte & munie, où mesme eust peu loger
 Vn ost entier, en tout succez de tout danger,
 Outre espoir auenu, s'il eust esté possible
 Au moins que l'ost Gregeois luy fust en rien nuisible,
 En la sorte qu'ici breuement i'ay fait voir,

DISCOVRS.

Et dont le prompt moyen n'excedoit son pouuoir.
 Car tant s'en faut qu'ainsi des grandes forces siennes,
 Sur les bords affrontant les naus Pelagiennes,
 Il ne les eust au moins contraintes à ramer
 De rechef leurs chemins sillonnez en la mer,
 Pour en effroy, dedain, & honte, & moquerie,
 Porter les leur chez eux digerer leur furie,
 Que sans doute ce Prince eust peu les laissant prendre
 Terre dans ses pays sans les rines deffendre,
 En pieces les tailler, & semer par monceaux
 De charongnes ses champs, des armes & vaisseaux
 Estre maistre, en vn rien priuer d'honneur Mycenes,
 Gardant ces chauds maris d'auoir besoin d'Helenes,
 Se fiant aux siens seuls, & trop barbarement,
 Que ie croy, mesprisant tout aduertissement,
 Les laissant aborder iusques au port Sigea,
 Pour en leur prime abord voir sa ville assiegee,
 Et ne pensant, ie croy, pour assaut ou bataille
 Qu'il eust besoin de rien, fors que de sa muraille
 Pour entiere seurté, des propres enfans siens
 Pour chefs de tout combat, de ses seuls citoyens
 Pour soldats de sa haute & superbe apparence,
 Pour tout rebut des Grecs & toute sa deffence:
 Qui pis est ne songeant, ce croy-ie, à tout le fort
 Appareil de ces Rois assemblez, qui d'effort,
 De haine, espoir, & cœur, & de force cueillie
 De mainte force auoyent vne force assaillie,
 S'estant mesme vn chacun en son endroit forcé,
 Trop plus qu'en mesurant sa force on n'eust pensé:
 Bref, ne poissant, ie croy, que se voir chez soy mesme

Surprendre à l'ennemi, c'est vn peril extreme:
 Encore, & nonobstant ce lourd ou fier mépris,
 Dont la Memoire à tort ne l'auroit point repris,
 Que vit-il arriuer aussi tost qu'à la riuë
 Troyenne telle armee en mille naus arriue?
 Tant estoit grand & fort & haut de ce Roy ci
 Le pouuoir: & quoy doncq, si le preuoir aussi
 Grand & haut, comme luy par conseil braue & sage,
 Au pouuoir eust donné de soymesme l'usage?
 S'il faut croire celuy qui mesmement en gloire
 De ses Grecs a gardé dans ses vers la memoire
 De l'aspre & longue guerre, aussi tost que dedans
 Ce haure ces Gregeois apparurent ardens
 De vanger leur iniure, & que les Troyens veirent
 Qu'armez d'armes & cœurs sur la greue ils saillirent:
 Eux aurebours enfleZ, aspres, & forts, & durs,
 Au hasard du combat, en laissant de leurs murs
 La seurté, marchans roide & droit se presenterent
 A l'ost de sambarqué qu'en fureur ils chargerent,
 Donnans puis çà, puis là, puis tantost de cœurs grands,
 Escartans ceux qui ia vouloyent prendre des rangs:
 Puis courans renfoncer tantost de cul & teste
 Ceux qui rangeZ tenoyent desia leur troupe preste
 Pour d'ardeur soustenir le choc, & repousser
 Ceux, qui pour tost les rompre enrageoyent d'enfoncer
 Sur d'autres, qui non pas par froideur ou paresse,
 Mais d'autant que (peut estre) ils auoyent en la presse
 Des vaisseaux, leurs vaisseaux, ou que plus esloigneZ
 Ils les auoyent du bord, ou bien qu'embesongneZ
 Aux charges ils estoyent, pour faire en ordonnance

DISCOVRS.

Tenir leurs naus, & mesme y laisser resistance:
 Ou bien à tous deuoirs, dont lors auoit besoin
 Selon la loy guerriere, un grand ordre & grand soin
 Qu'il leur falloit auoir de tout poinct necessaire,
 Et duiſible & gaillard qu'il leur conuenoit faire
 Pour l'égard de la mèr, ou d'autant qu'ils estoient
 Embesongnez à ceux qui encore sortoyent
 A la file, & de rang, & qui dès leurs sorties
 Rendoyent agilement leurs forces departies
 Par troupes: car encor ils n'auoyent eu loisir
 De dresser bataillons & tout ordre choisir,
 Ils auoyent seulement entre leurs Capitaines
 En leur chemin conclu les choses plus certaines,
 Pour au saillir premier le desordre empescher,
 S'on venoit viuement leurs gens escarmoucher.
 Plusieurs donc de ces chefs voyent que l'escarmouche
 Si forte à leur mespris, ains à leur perte touche,
 Si les Troyens voyoient mettre à sang ces premiers,
 Et croyans de pouuoir faire ainsi des derniers,
 Faisoyent encor deslors saillie sur saillie,
 Dont iusqu'au creus des naus fust leur flote assaillie:
 Et lors entre les cris des bruyans matelots,
 S'entrehaſtent de geste, & de signe, & de mots,
 Et monstrent en tous trois qu'ils vouloyent de courage
 Indomtable domter ceste aduersaire rage.
 Les vns font leurs vaisseaux du riuage approcher,
 Les autres font les leur aux prochains accrocher,
 Puis passans par plusieurs sautent d'un pié deliure
 De tillac en tillac, aux leur se faisans suivre:
 Les autres font leurs naus au large depeſtrer

D'entre

D'entre la presse druë, & pour bien tost entrer
Au plus pres des combats, s'eslongnans vn peu prennent
Vn tour ny long ny court, les vns en cernant tiennent
Vn tour plus long, à fin de pouuoir sortir mieux
En ordre, & se trouuer tous rangez sur les lieux
Del'acharné combat, les autres d'autre sorte
Font sembler qu'au riuage vn vol leger les porte,
Tant ils font roidement leur galere arriuer,
Pour plus viste la gloire avecq les coups trouuer.
Chacun boust & fremist, nul n'est qui ne desire
D'estre plustost dehors que dedans son nauire:
Mais le deuoir le nie a beaucoup, & mestier
Il n'est point de tirer tout l'exercite entier
Contre telle faillie, encore que l'encombre
Que faisoit son effort fust plus grand que le nombre:
Siest-ce, que ie croy, que ces Grecs sestonnans
Des barbares soldats si vaillamment donnans,
Et outre esmeus, piquez, & bruslans, n'aperçoient
Rester presque en leurs naus que ceux qui rester doiuent.
Tandis ces Phrygiens non seulement bourroyent,
Et de cœur & de coups foudroyans rembarroyent
Les premiers descendus, mais bien ceux qui sortirent
Presqu'à l'heure rentrer dedans leurs vaisseaux feirent:
Car si tost qu'on les voit alliez, presentez,
Et en diuerse place asprement affrontez
A ces fiers Dardanois, de prime effort se sentent
Chargez, pressez, forcez, si fort qu'ils s'espouuentent
Tantost, & puis tantost reprenans leur vigueur,
Recueillans & leur troupe, & leur force, & leur cœur,
Ils vont tenans, donnans, poussans, & tant renforcent

DISCOVRS.

Et le nombre & l'effort, qu'à leur tour presque ils forcent
 L'ennemy, qui pourtant de ses barbares voix
 Plus effroyable qu'eux, d'un large & long pauois
 Plus couuert qu'ils n'estoiēt des courts boucliers de Grece,
 De son soudain dessein, d'orgueil, d'ardeur, d'aspreffe,
 D'effort hardi, robuste, aueugle, & hasardeux,
 Estoit, ie croy, pour l'heure encor plus poussé qu'eux:
 Contre quoy le Gregeois vante son auantage,
 Queluy bailloit l'adresse & conduite plus sage:
 Qui plus est, il se sent époint outre cela
 D'un dépit enfiellé, d'un creuecœur qu'il ha,
 De voir qu'à si grand' foule un peuple estranger aille
 En sa terre, en son haure, au pié de sa muraille,
 Enbrauant menasser le Roy, les enfans siens,
 Et du peuple les murs, les testes, & les biens:
 Il est encore mesme enflé qu'à la rencontre
 Premiere qui se fait, le menasseur se monstre
 Plus estonné, moins roide, & moins ardent alors,
 Maugré les cœurs repris, & les doublés efforts
 Des Gregeois, les menant batant de place en place,
 Souuent iusqu'à l'endroit de leurs naus il les chasse,
 Tant que plusieurs d'entre eux sans rien plus hasarder,
 Presque conseileroient de rentrer pour garder
 Leurs naus, en se gardans dedans leurs naus soymesme,
 Dont ils pourroient forcer tout effort plus extreme,
 Auec les traits volans, auec les dards lancez,
 Et qu'apres sur la greue ils combattroient assez:
 Qu'on feroit mieux pour lors, attendant que fut faite
 Leur pouruoiance à tout, de tendre à la retraite:
 Qu'un grand barbare effort soutenir lon ne doit,

Tant que tout esprouué, tant que tout preuë soit,
 Et part art ordonné, mais si ces raisons crues
 Dans ces gens refroidis, par eux se fussent creues
 Du tout, ie croy, qu'à l'heure on les eust pourchassez,
 Espouuentez, batus, massacrez, & forcez,
 Iusqu'en leurs propres naus reduites au pillage,
 Ainsi que ces fuitifs au meurdre & au seruage:
 Parmi lesquels pour tel carnage executer,
 Pesle mesle on eust veu ces Troyens se ietter,
 Suiuant de bois en bois, par tout se faisans maistres,
 Plus par desordre & peur que par leurs propres dextres.
 Mais ceux qui sembloiët prests dans soy mesme de prëdre
 Tel conseil, leurs auis soudain viennent reprendre,
 Se rechauffans eux mesme, & les autres qui sont
 Par tout en tel deuoir qu'aux Troyens teste ils font,
 S'encourageans des coups, à la longue cognoissent
 Que d'un peu ces Troyens plus lassez leur paroissent
 D'efforts plus longs & grands, & si bien les soustiennent
 Que peu s'en faut qu'egaux tous les deux ne se tiennent.
 Aussi croy-ie que ceux qui sur tous autres furent
 L'esperoir des peuples Grecs, & qui tousiours parurent
 En dix ans que dura ce long siege odieux,
 Vrais demi-dieux eux mesme, ou fort aidez des Dieux,
 Furent ceux qui deuant, & lors que plus ils veirent
 Que les inesperez forcemens le requirent,
 S'estans tous les derniers en fureur débarqueZ,
 Tous les derniers s'estoient aux vainqueurs attaqueZ.
 Si dès l'abordement qu'en ces riuës Troiques
 Se ietterent dehors ces troupes Argoliques,
 Et deslors que soudain ces Teucres enflammeZ

DISCOVRS.

En grand nombre & grand ordre estoient saillis armez,
 Eussent voulu d'entree estre de la meslee
 Auecq le moindre *Aiax* qu'on nommoit *Oilee*,
 L'autre *Aiax* au bouclier qui sept fois double estoit,
 Et le Roy *Menelas* grand guerrier, qui sentoit
 Plus fort l'outrage sien, puis l'autre Roy son frere,
 Qui choisi pour seul chef de l'entreprise fiere,
 Roy des hommes estoit, & pour au grand effort
 Adiouster sur le champ quelque tour plus accord,
Vlysse en tout meslé, qui, de peur qui ne cede
 Maugré son dol, prendroit *Aiax* ou *Diomedé*
 Pres de soy pour soustien, ce braue & furieux
Diomedé qu'on feint auoir nauré les Dieux:
 Puis sur tout autre encor le fils de la Deesse
Thetis aux pieds d'argent, qui d'extreme vitesse
 Meslant l'extreme effort pour courir aux dangers
 Plus grands s'est bien peu dire *Achile* aux pieds legers,
 Qui quelque iour deuoit venger apres les larmes
 De son dueil, son *Patrocle* occis deffous ses armes
 Par *Hector* fort trompé, quand l'autre il aperçoit
 Deffous l'armet, au lieu qu'un *Achile* il pensoit
 Mettre à mort, qui vengeant son cher *Menetiade*
 Fit tout d'un coup cesser la Troyenne brauade.
 Caren crainte & frayeur *Hector* auoit tenu
 Ces Grecs, tant que s'estoit ce *Pelide* abstenu
 De combattre en sa nef, maschant l'ire enflammee
 Pour *Briseïs* au lieu de *Chriseïs* menee
 Au fier *Agamemnon*, qui pour se voir tollu
 Son butin, le butin d'*Achile* auoit voulu:
 Mais l'ami fut piqué du regret de la vie,

Qui au lieu de la sienne à l'ami fut rauie,
 Plus qu'il n'estoit des morts, & pertes des Gregeois,
 Des prieres de l'ost, & de leurs autres Rois,
 Ni des riches presens qu'on luy prioit de prendre
 Auecq sa Briseïs qu'à luy lon vouloit rendre:
 Il s'arme, & de colere agilement sautant
 Sur son char, va son œil tout embrasé iettant
 Par tout le camp, pour voir si ce grand Priamide
 Tueur d'hommes viendrait encor au vray Pelide
 Furieux s'attacher: luy donc par tout faisoit
 Tourner Automedon qui son char conduisoit
 Galopant, dédaignant toute cargue, fors celle
 Où l'amour, la vengeance, & la rage l'appelle.
 Je ne veux pas ainsi que l'aveugle sonneur
 De ce braue duel croistre à l'un d'eux l'honneur
 Sans mesure, en faisant deux si grands capitaines
 Courir si fort à pié qu'ils perdroient leurs haleines
 A tourner quatre fois les murs d'une cité,
 L'un épouuantant l'autre, & l'autre épouanté
 Plus que n'est la perdris, qui ia trois fois remise,
 En repartant se void par l'autour presque prise.
 Je ne veux point encor en couurant d'un destin
 Vne lasche, fuitiue & trop couarde fin,
 Priuer l'un d'eux d'honneur, & par fin si chetiue
 La racine arracher de la memoire viue
 De celuy, sur qui seul tant nos premiers François,
 Et nos peres & nous, qu'aussi nos premiers Rois,
 Et toy, SIRE, qu'on void heritier de leurs gloires,
 Auons tousiours posé de nos hautes memoires
 Le tige & fondement, mesme il ne me plaist point

DISCOURS.

De me laisser aller lourdement sur tel poinct
 Avec l'antique erreur, qui tâche en vain de feindre
 Aueuglement qu'un seul Achile peut contraindre
 La fortune si fort, que pour force qu'il eust,
 Et pour tout cœur nouveau que sa présence peust
 Redonner aux Gregeois, iacoy que lon s'efforce
 Mesme de faire faire à luy seul toute force,
 Du sang des hommes Grecs, comme sous la nuit noire
 Vn loup dans vn troupeau rougiroit sa machouère:
 Combien qu'à Vray parler, tant Hector que tous ceux
 De sa part, sous l'effort ferme & non paresseux
 Des Grecs rencouragez, commençassent adonques
 De souffrir au combat plus qu'ils n'auoyent fait onques.
 Car ces Heros, ces Rois, ces autres chefs bouillans,
 Avec les leur s'estoient cent fois fait plus vaillans,
 Sçachans que leur espoir ce grand Pelide, en place
 Viendrait pour affronter d'Hector l'horrible audace,
 Et que ses Myrmidons à la guerre bien nés,
 Pour grand renfort seroient avec luy ramenez:
 Mais ce iour il voulut que les vns attachassent
 Premier, puis que tous d'ordre & de cœur s'y poussassent,
 Et puis pour vn effroy tout soudain des Troyens,
 Contre leur esperance il decochast les siens
 Sur eux, luy sur Hector: or il voit donc qu'à l'heure
 Aux cris des Myrmidons Hector planté demeure
 Sur son char, il l'appelle, & le faisant tourner
 Voit orgueillir son geste au lieu de s'estonner:
 Car il cognoist celuy qui plus pouuoit sa Troye
 Faire de Myrmidons & d'autres Grecs la proye,
 Dont la mort pouuoit plus ensemble auantager

*Sa terre avec sa gloire, & la Grece outrager.
Leurs guides sous leurs voix font qu'ardëment decochèt
Les cheuaux des deux chars qui l'un de l'autre aprochèt,
Mesme auant l'approcherces Heros en courant
D'un bras roide se vònt leurs iauelots tirant:
Le coup d'Heçtor sembla plus que l'autre effroyable,
Mais Achile a le corps par tout inuulnérable,
Fors qu'en son talon seul, par qui Thetis dans l'eau
De Styx le tenoit lors qu'elle charmoit sa peau,
Par telle trempe: ou bien l'ayant renouvellee,
Comme autrement on feint, apres l'auoir bruslee,
Pour ce qui estoit sien faire à la peau rester,
Et tout ce qui estoit du Pere luy oster.
Mais sans croire à la feinte, au moins si c'est histoire,
Non pas fable qu'Achile & qu'Heçtor, il faut croire
Qu'estans outre nature estrangement tous deux
Vistes, roides, & forts, adroits, hautains, & preux,
Des autres pouuoit bien leur chair estre estimee
Non vulnérable, ainçois contre les coups charmee.
Ce que l'un fit paroistre en ce combat mortel,
L'autre aussi fort long temps, mais il ne fust pas tel
Estimé sur la fin, quand sa prouësse agile
Et forte, vint ceder au coup fatal d'Achile.
Or ils n'eurent pas donc si tost lancé ces dards,
Qu'ils voyent retournez cu à cu leurs deux chars,
Tant que se rencontrans si pres, de violences
Incroyables saisis, posent vn peu leurs lances
Qu'en la gauche ils auoient, sur les chars, pour apres
Les reprendre & darder lors qu'ils seroient moins pres.
Ces lances n'estoient pas ni grosses, ny pesantes,*

DISCOVRS.

Ni tousiours vers le bout plus fort s'amenuisantes,
 Sans arrest sans poingnee en hault ils les portoient,
 Pour les lancer, & rien des nostres ne sentoient:
 Et combien que plustost elles eussent semblance
 De iaueline en fer & en bois que de lance,
 Lances on pouuoit bien les nommer du lancer,
 A quoy lon voyoit plus ces vieux preux s'adresser:
 Laisans les lances donc, & pource que leur rage
 Prompte brusloit apres les coups & le carnage,
 Et pource qu'ils vouloient plus fort que de la nue
 On ne voit cheoir la gresle & grosse & forte & drue,
 Assouuissant leur faim tant sanglante, venir
 Aux coups & drus & forts & durs à soustenir,
 Croyans faire par là plustost que par l'adresse
 De bien darder un bois remarquer leur prouesse,
 Outrecuidez, pensans desarmer & tailler
 L'un l'autre en un moment, comme on voit écailler
 Quelque horrible poisson dur d'ecaille, & l'atteindre
 Dans la chair, l'écaillant si fort qu'on le voit teindre
 De son sang par endroits, à fin que quand l'ecaille
 Est ostee à son gré, par pieces on le taille.
 Ensemble donc tous deux, sans que l'un regardast
 Aux premiers coups de l'autre, & qu'en rien se gardast
 Que les Troyens pour luy perdissent tout leur cueur,
 Que Priam ne preschast à son fils que la peur
 Qu'un seul luy deuoit faire, & combien que lon face
 Hector obstinément l'attendre en vne place
 Sans oncq vouloir entrer aux portes, que pourtant
 Tout soudain il fallast si fort espouuantant
 Le voyant sur luy courre, & que tous ceux de Troye
Comme

Comme si cent eclats du Ciel quand il foudroye
 Fussent tombez entre eux, avec tant d'autres forts
 Peuples & chefs venus à leur secours pour lors,
 Jusqu'à un tous perdus aux portes accourussent,
 Se serrassent dedans, sans qu'en rien secourussent
 D'espoir, d'hommes, de traits, de quelque autre deuoir,
 Contre un seul l'homme seul, qu'ils iugeoient leur espoir:
 Eux qui auparauant long temps victorieux,
 Ayans par leurs estours frequens & furieux,
 Apres neuf ans forcé ces troupes Danaïdes,
 De se vouloir sauuer par les routes liquides,
 N'y voyoient point pour lors d'accroissance plus grande,
 Sinon d'un homme seul & d'une seule bande,
 Voire encor se voyoient sains & saufs, & qu'encor
 Sain & sauf leur restoit ce magnanime Hector,
 Qui deuant tant de fois assaillant leurs grand's troupes
 Semant le champ de morts, & dans les creuses poupes
 Dardant les feux vengeurs, pouuoit plus effroyer
 Que ce grand Grec, qu'un Grec menteur fait foudroyer,
 Qui tant de fois auoit pour s'efforcer d'abattre
 Son orgueil, desiré seul à seul le combattre,
 Et mesme alors qu'on feint que chacun se rendoit
 Fuitif dedans les murs, de pié coy l'attendoit:
 Comme mesme une telle incroyable contrainte,
 Par un seul, ne m'est rien que vaine & lourde feinte:
 Pour mensonge ie veux tout autant reprouuer,
 Un Phebus descendant pour Hector preseruer,
 Minerue contre Hector haranguant à son pere,
 Par Iupiter en fin tel destin improspere
 De mort, contre celuy d'Achile balancé

DISCOURS.

Dans la balance d'or s'estre à l'heure abaissé,
 Ceste mesme Deesse aux yeux vers descendue,
 A fin que telle vie à tel poinct fust rendue:
 Son Achile exhorté par elle, le moyen
 De faire Hector tourner, puis du visage sien
 Del'habit, de la forme, un faux & soudain change,
 Pour vers Hector user de trahison estrange
 Se faisant Deiphobe, un encouragement
 Simulé qu'elle donne, un prompt recueillement,
 Pour à tort rebailier la lance Peliade
 A ce Pelide fier, qui trompant sabrauade,
 Auoit failli d'atteindre Hector, qui n'eust failli
 Achile, si son coup du bouclier recueilli
 N'eust esté desournée: Puis l'autre iect de lance,
 Dont luy qui sur Hector tout armé la relance,
 L'atteint vers le gosier, ce que ie pense encor
 Estre de tout ceci le plus vray: car d'Hector
 C'estoit l'arrest fatal, de voir un iour finie
 Par la lance qu'on dit Peliade, sa vie:
 Puis du mourant encor & du victorieux,
 Les mots un peu grossiers & trop iniurieux
 Pour un vainqueur honneste, & trop abjets aussi
 Pour le cœur d'un vaincu, tel qu'estoit cestuy-ci:
 Puis tant d'autres façons de la fable assorties
 Souuent si mal, qu'au vray s'elles n'estoyent parties
 De telle antiquité venerable à tousiours,
 Mesme tant en celuy qu'en tant d'autres discours
 On sen pourroit moquer, n'estoit que l'affluance
 Si grande des beaux traits que iustement on pense,
 Et hauts, & bons, & mesme au poëte decelez

Par les Dieux, sont parmi telles choses meslez,
 Dont l'admiration doit tourner la rîsee
 En l'honneur d'une Muse en tous siècles prisee.
 Mais moy qui ne veux pas laisser ore outrager
 Ce qui nous appartient, & qui veux reuanger
 Vne memoire haute & strangelyment blesee,
 Par qui ta grand' memoire & la nostre auancee
 Pour iamais peut bien estre, & qui me penserois,
 Quand du costé des Grecs mesmement ie serois,
 Leur memoire auancer, en rendant inutile
 Comme fableuse en tout la victoire d'Achile:
 Je veux suiure l'instinct gaillard que ie reçoÿ,
 Que par ressentiment celeste i'apperçoÿ
 Estre vray, pour le moins plus semblable à l'histoire,
 Si quelqu'une en estoit que vrayment on peust croire:
 Car Dictys & Darés son supposez encor,
 Le Grec Dictys n'eust fait ainsi mourir Hector:
 Et sous tel instinct libre en brief ie te vois faire
 D'une façon qui plus te peut & te doit plaire,
 Combatre nostre Hector, encor qu'un sort fatal
 Trop enuieusement soit sur luy tourné mal.

Ce grand Pelide armé de corps, de bras, de teste,
 Mais sur son morion n'ayant pas ceste creste
 Effroyable, qu'auant il y faisoit floter,
 Trop marri de se voir d'autres armes porter,
 Sçachant mesme qu'Hector auoit les siennes prises,
 Sur soy par le combat de Patrocle conquises,
 Fort & fier, haut & droit, & bruslant de bien faire,
 Sur son char qu'il fait bruire, & dans ce champ eclaire
 D'une face enflammee, ainsi que lon peut voir

DISCOVRS.

Un tonnerre flambant, lors qu'il ne vient pas choir
 En pierre, mais en flamme, & qu'en forme de boulle
 Rouge bruyant, sifflant, dans les champs il se roule.
 Tout aussi tost qu'il voit Hector le fort des forts,
 Dont le bras iusqu'au coude estoit tout rouge alors,
 Mesme auant que fichez d'une assurance extreme,
 Front à front, œil dans œil, & pié contre pié mesme,
 Ils recherchaient l'art, l'un sur l'autre auancé
 Iusqu'à moitié du fer, de nerfs bandez haussé,
 Tant que leur bras est long, en mesme instant dechargent
 Leur coup suivi de coups, dont l'un l'autre ils se chargent
 Plus que Vulcan l'enclume, ayant dès l'aborder
 Avec vifesse & grace, & force, sans tarder
 La pieça mis au poing leurs trenchantes espees,
 Noirastres de couleur, larges & bien trempées,
 Ausquelles cedit lors le clair iour en clarté,
 Et de leurs bons harnois tout l'acier en durté,
 Toutes les fois qu'en l'air incessamment mouuantes,
 Escartoient leurs lueurs, ou bien que retombantes
 Coup sus coup dextrement sans beaucoup espier,
 Faisoient sembler qu'en plomb fust conuertit l'acier,
 Au moins celle qu'Hector rouoit dedans sa dextre,
 Et dont il chamailloit d'elle le propre maistre,
 Sur l'épais morion faisant appesantir
 Le roide & dru chaplis, horrible au retentir,
 Et qui souuent remplit d'estincelles la place,
 Ou bien faisant les coups tomber sur la cuirasse,
 Et plus souuent encor dessus un acéré
 Pesant & grand bouclier, dont alors fut paré
 Par Achile maint coup, quand le Troyen s'efforce

D'une subtilité meslee à l'aspre force,
 En feignant quelques coups, les ramener tout droit
 Dessus la face nue, ou sur tout ce qu'on voit
 En luy de decouvert, entre la cuiracine
 Et le fort morion, ou de ruse plus fine
 Sur l'une & l'autre espaule adroitement donnant,
 Les courrayes trencher, qui seules vont tenant
 Le corselet fermé, pour apres l'ouuerture
 Trouuer ce qui n'a pas resistance si dure.
 Veu l'art & veu l'effort qu'à l'heure on ne croit pas,
 Le voyant & l'oyant sortir d'un mortel bras,
 Tu as vrayment alors digne fils de Pelee,
 Grand mestier de grand force aux addresses meslee,
 Et grand mestier encor d'auoir sur toy tout bon
 Corselet & brassals, bouclier & morion:
 En flatant nostre los, pourtant ie ne veux dire
 Que ton parti ne fust touchant ces armes pire.
 Car de celles que lors l'aduersaire portoit,
 Meilleure de beaucoup chacune piece estoit,
 Avec les autres deux la cuirasse & l'espee,
 Dans la forge Ætneanne auoit esté trempee,
 Et polie, & garnie, & richement encor
 Derelief burinee, & tant d'argent que d'or
 Couché dedans l'acier par histoires ornee,
 Qui sembloient viure en l'œuure, en qui la destinee
 D'Hector & ton trophée on pouuoit sur tout voir,
 Hector mesme les vit, sans pourtant en sçauoir
 Pour l'heure rien cognoistre, & ne pensa que fussent
 Choses qui sur Achille ou sur luy tomber deussent:
 Malheureux de porter ignoramment sur soy

DISCOVRS.

De son cruel destin la trop iniuste loy.

*Dans ce mont, qui sans fin sous la grand' forge fume,
 Vulcan le forge-foudre auoit dessus l'enclume
 Tourné tout cet ouurage, & luy mesme qui peult
 Par un grand art former aux metaux ce qu'il veult,
 Des Cyclopes aidé pour battre, ou dans la braise
 Mouuoir le fer, ou bien ranimer la fournaise,
 De ses mains mesme auoit si luisamment poli
 Tel ouurage, & de tant d'histoires embelli
 Sur tout, ou bien par trempe, ou par force diuine,
 Donnant vne durté presque diamantine
 A telle espee, & mesme assez endurcissant
 Le reste, pour garder que rien l'allast fauçant.
 L'œuure fait, il bailla tel present à ta mere,
 Qui pour te le forger à ce Dieu fit priere,
 Tâchant faire par là qu'en toy, qui fus humain
 Du costé paternel, de la Parque la main
 Pour trancher ton beau fil si tost ne fust hastee,
 Ta vie tost apres pourtant te fut ostee,
 Quand pour vanger Hector au temple d'Apollon,
 Tu fus occis d'un trait par ton fatal talon.
 Ou si ce que i'ay dit des armes n'est encore
 Que feinte, dont tant plus Hector ie deshonore,
 Encontre toy l'armant de tel present fatal,
 Dont mesmes il t'a sceu faire encor aucun mal,
 Si faut-il maugré moy confesser sans feintise,
 Quelque part qu'eust esté l'armure par toy prise,
 Qu'en tout cela que toy, Prince, auoir tu pouuois
 D'armes dans tes vaisseaux, ou que tous autres Rois
 Auoyent dedans les leur, c'estoit l'armure à l'heure*

Qui en chacune piece estoit bien la meilleure,
Fust morion, cuirasse, & brassals, & bouclier;
Semblans, tant estoit bonne & la trempe & l'acier,
Fatalement feés : mais veu que tel orage
De coups tombans d'enhaut, d'effort, rage, & courage,
Dont Hector bien payé par tes bras tant & tant,
Va sur toy comme toy dessus luy rebarant:
Il faut que presque autant soit bonne & forte, & dure,
Chasque arme que tu as qui tant d'efforts endure,
Et puis ayant assez de l'horrible vaillance
D'Hector, que de la tienne armeure cognoissance,
Tu ne te serois oncq en tel combat iettés
Si par trop contre toy l'avantage eust esté.
Iusqu'ici donc ces deux ont eu presque vne egalle
Puissance, mais la fin à tous les deux fatale,
Avec honte devoit d'un & d'autre costé,
Par vn diuers effect mettre inegalité.
Car d'armeure & de fer Hector se fit paroistre
Plus fort, & ia s'estoit d'Achile rendu maistre:
L'autre d'un peu d'adresse & par sort enuieux,
Vaincu se fit vainqueur du vainqueur glorieux.
Mais alors qu'entre deux ceci mesme ie chante,
Par quelle horreur, qui l'œil & l'oreille espouvante,
Ces Heros se sont ils rechargéz, martelez,
Et des sons rebruyans du tout eceruelez,
Pour le moins si encore ils sont sans playe nulle,
Que peut estre l'ardeur & le cœur dissimule,
Leurs espees tantost semblent d'un choir plus lourd
Ces armes assommer, avec un coup tout sourd,
Ou tout mat, & tout plat, & tantost de bruyantes

DISCOVRS.

*Atteintes les rebatre, & tantost de tintantes,
 Ou bien ne tintans point en donnant vont sonnans
 Par compas un bon son, tantost vont estonnant
 De rechef ce grand camp d'eclatantes atteintes,
 Les nuës mesme en sont penetramment atteintes:
 Car comme i'ay chanté que ce fort Dardanois
 Se va sur le bouclier, ou sur le dur harnois
 D'Achile, de tant viste & tant poissante sorte
 Acharnant, qu'on ne sçait comme l'autre supporte
 D'un tel bras la tempeste: aussi diray-ie bien
 Que l'autre aussi s'efforce à ne luy deuoir rien,
 Ains d'enragé courage aioustant à la dure
 Peine & force qu'en luy fait durer sa nature,
 Plus qu'il ne croit pouuoir estre à elle adionsté,
 Rend iusqu'ici tous biens prestez d'autre costé,
 De pareil poix, de force effroyable indomtee
 Presque pareille, & d'ame autant entalentee
 De nuire & de consire, & d'une adresse en quoy
 Il vainquoit l'autre, ayant moins de force dans soy.
 Car il ne paroist pas en l'enorme tempeste
 Dont ore il va le corps, & les bras, & la teste,
 Et le bouclier de l'autre à l'enui martelant,
 Faire un rebatement, qui soit moins violent
 Que quand Vulcan alors que d'un infatigable
 Trauail faisoit forger ce harnois insaussable,
 Sur qui s'obstine Achile, au moins s'il faut ici
 Me plaire de rechef en ces fictions ci,
 Et que ce Dieu parmi sa troupe renfrongnee
 De Cyclopes autour de l'œuvre embesongnee,
 Auec retentissant ahan, & d'un gros bras*

Qui

Qui par compas se voit tantost haut, tantost bas,
 Batant & rebatant aprestoient les matieres
 Plus rudes, dont Vulcan fit ces armes entieres:
 Ou quand l'œuvre formé sur l'enclume on mettoit,
 L'enclume qui de plainte eclatante tintoit,
 Pour d'un gros marteau battre une des pieces seule,
 La portant tost apres eclarcir sur la meule:
 Aussi fort tout cela, qu'auoit Vulcan batu
 Pour Achile, d'Achile estoit lors rebatu.
 Ainsi tint amarrant par renfort l'un sur l'autre,
 Le Grec en fin sailloit sur le cheualier nostre,
 Lassant, & mesme encor lassé des coups trop lourds
 Que renforçoit Hector: mais Hector au rebours
 Plus fort, plus vigoureux, plus nerueux, de la peine
 Accroissoit sa valeur, son ame, & son haleine,
 Et ces trois qui dans luy de plus en plus croissoient,
 Faisoyent qu'elles par force en l'autre renaissoient:
 Tant peut une louable & genereuse enuie
 Exciter la vertu, quand non pas de la vie
 Moins chere, mais qu'il va de ce tant cher honneur,
 Que la vertu refait de tous travaux seigneur.
 On diroit les voyant que lon voit mainte chose,
 Que plus espouventable un esprit se propose,
 En tout cela qu'on trouue au monde rechercher
 Auidement l'un l'autre, & l'un l'autre attacher:
 Mesme attachez ainsi rendre en eux acharnee
 Leur rage par moments entre eux remutinee,
 Soit instinct naturel de haine entre les deux,
 Qui le face, ou de proye, ou de sir hasardeux.
 Mais que me seruiroit pour comparaison telle

DISCOVRS.

Enſuiure ou inuenter choſe vieille ou nouuelle,
 Veu qu'avec tel combat rien ne peut ſ'asſembler,
 Qui tant extreme peut ſoymeſme reſembler?
 O que c'eſt peu de voir la furieuſe attache
 De deux Taureaux plus grands, q̃ l'ardeur d'une vache
 Plus qu'onques on ne vit, forceneꝝ bruſleroit,
 Et durant rage telle au combat pouſſeroit,
 Mortellement ialoux, aimans mieux en leur flame
 Et penſement brutal perdre en leur ſang leur ame,
 Que l'un de l'autre maiſtre à ſon gré puiſſe uſer
 De la choſe en qui l'un veut l'autre maiſtriſer:
 Tant qu'après leurs regards de trauers & la hargne
 Des malins muglemens leur rage en rien n'eſpargne,
 Par courſes & grands heurts mille fois redoublez,
 Le teſt, le front, les yeux, de leurs haines troublez,
 Les tempes, ny la gorge, ou meſme la poitrine,
 Qui de la vie encloſe en leur cœur eſt voiſine:
 Ains leurs cornes craquans l'une en l'autre, & leurs frōs
 Qui ſemblent faire ouir le choc de deux grands monts,
 Et leurs piés animez regalopans derriere,
 Pour faire plus grand coup touſiours plus grand carriere,
 Ne deſiſtent iamais tant que l'un de ces deux
 Animaux, en grandeur & en fureur hideux,
 Dont les yeux gros & ronds une torche en eux portent,
 Faiſant ſembler qu'au heurt les eſtincelles ſortent,
 Ait de ſon compaignon la victoire par peur,
 Par grand playe, ou par mort, & du prix ſoit vainqueur.
 Ce ſeroit bien peu, meſme à telle horrible beſte,
 Ayant ia dans ſon fiel, dans ſon cœur, dans ſa teſte,
 Par eguillonemens embrasé peu à peu

L'audace & le dépit, la terreur, & le feu,
Mettre en teste vn Lyon, grand, effroyable, & braue,
Qui del' antre sortant de marche fiere & graue,
Dedaigneux va roüant ses longs pas en circuit,
Et qui en rugissant d'un long & d'un long bruit,
Rompt tout l'air, rebruyant, & tourne à la fenestre
L'œil de trauers, que plein tousiours d'ire on voit estre,
Dés qu'en tournant il a dans vn coin apperceu
Son Taureau, qui dedain & courroux a receu,
Il s'enfle & s'affamant tant de sang que de gloire,
Faisant d'un aigre eclat craquer l'aspre machoüere,
Comme s'il eguisoit sa fureur & ses dents,
Dont quatre horribles crocs il decouure au dedans:
Armé d'ongles trenchans outre ces dents trenchantes,
Il secoue en tremblant ses iubes iaunissantes,
Il court, & puis se lance, & du sault se iettant
Sur l'ennemi, de dents & d'ongles l'arrestant:
Ne plus ne moins qu'on voit des anchres endentees
Les batteaux ou les naus estre au bord arrestees:
Sous serre il le retient, il le presse, il le mord,
Ou se laissant trainer il le suit, & si fort
Garde pour lors sa prise, en qui mesme il fait bruire
L'os craquetant, que l'autre en rien ne luy peut nuire,
Muglant, sautant, trainant, secouant, enrageant,
De n'outrager celuy qui tant va l'outrageant:
Mais toutesfois en fin par si roide secousse
L'agitant, que dehors de la prise il se pouesse,
Puis soudain reculant, & semblant dans ses yeux
Porter & sang & flame outragé furieux,
Voire horrible au Lyon, en couchant la double arme

DISCOVERS.

Dont son grand front baissé, comme de droit fil s'arme,
 Donne si roidement que bien souuent il faut,
 Et atteignant trop bas iette la beste en haut,
 Qui de roideur surprise, & nullement greuee,
 Des cornes du taureau dedans l'air souleuee,
 Choir bien haut & bien loing par dessus luy s'en va
 Auec estonnement de ce grand sault qu'elle a:
 Puis soudain retournant il recourt, il redonne,
 Contre la dure peau du Lyon le coup sonne:
 Il fiche, il naure, & brise, & en recommençant
 Auec pareille ardeur souuent se va poussant
 Plusieurs coups, & souuent il est repris encore
 De l'ongle & de la dent, qui dechire & deuore:
 Souuent il en echape, & de rechef fraper
 S'efforçant, de rechef se resent attraper:
 Souuent court, souuent long est le combat, il greue
 Souuent si malement le Lyon qu'il le creue
 A demi mesmement, mais ce n'est pas souuent,
 Il pousse hors & l'ame & les tripes au vent:
 Ou quelquefois apres que telle guerre rare
 A bien pleu, l'un & l'autre aduersaire on separe:
 Où plus souuent en fin du combat furieux
 Le Lyon du Taureau se rend victorieux,
 Qui saisi de la gorge, estrangle, ronge, & mange
 Ceste partie, & mesme au sang succé se vange.
 Je ne ferois pas plus, si mes vers amusant,
 Ce que i'ay ia trop fait, i'allois mesme opposant
 A ce Lyon vainqueur, des Ours le plus terrible
 Qui se trouue aux rochers de la Scythie horrible:
 Ou bien au lieu de l'Ours le Tygre plus puissant,

Plus agile & cruel, qui fut onques naissant
En toute l'Hircanie, & qui sortant en face
De mon Lyon, du prix se fist maistre en sa place.
Ou bien ferois-je assez si pour bien exprimer
Cela qui vient Hector sur Achille animer,
Et sur Hector Achille, & leur haine conceüe
Que quasi naturelle ils semblent auoir eüe,
Tant on la voit fatale, en leur appariant
Le monstrueux assaut du dragon variant
De cent & cent couleurs sa reluisante ecaille,
Dont son suc veneneux par tout son corps l'emaille:
Bien que son venin soit presque le moins malin,
Et que veu sa grand' masse il ait peu de venin
Au pris d'autres serpens: l'aspre guerre & vilaine
Que liure tel Dragon par naturelle haine,
C'est au fier, grand, & noble, & puissant Elephant,
De toute beste en force & en sens triomphant,
Alors qu'à tous se vient dessus l'arene Indoise
Rafraichir de ce monstre encontre luy la noise,
Lors que ce chaud serpent dessus terre volant,
Toujours apres le sang des Elephans bruslant,
Qui froid le rafraichit en dressant l'orde creste,
Voire pour imiter le trait d'une tempeste
Faisant bruire son vol, son gosier de sensler,
Pour l'alongeant de vents empunaisis sifler,
Son ecaille craquer, sa langue veneneuse
Dardiller, & bransler sa queue tortueuse,
Où la nature a mis le plus de son effort,
Qui plus en combatant à l'Elephant fait tort,
Ose se ruer sur la beste trop bien nee,

DISCOURS.

Pour estre à un combat si vilain destinee.
 Car non pas en grandeur excessiue du corps
 Seulement, & non pas pour fardeaux, pour efforts
 Genereux, qui souuent ont peu seruir en guerre,
 Elle va surpassant les bestes de la terre,
 Mais en subtilité de prompt entendement,
 En douceur, en memoire, & presque en iugement,
 Et qui du graue port grandement venerable,
 Par l'iuoir des dents si grandes admirable,
 Admirable en stature, & de beau poil qui plaist
 Tousiours, & mesme plus lors que tout blanc il est,
 Toute autre beste, ainçois le serpent homicide,
 Qui quelquefois le tue avec sa proboscide,
 Le hapant, le serrant, ou bien l'estoufferoit,
 Ou mesme l'aterrant expirer le feroit
 En l'assommant, foullant, ou de quelque autre sorte
 Triomphant en dedain de sa charongne morte.
 Mais souuent presque en tout un grand mal est egal
 Au grand bien, pour le bien faire luter au mal,
 A fin que la nature en tout par la malice
 Donne aux mesmes bontez un nuisible exercice,
 De peur que ce qui ha receu d'elle trop d'heur,
 N'ayant rien de contraire enfle trop sa grandeur,
 En grand force de corps pour diuers egard prise,
 En grand haine entre eux deux embrasement eprise.
 Comme par mouuemens naturels en deuoir
 De chercher ce qui peut victoire faire auoir,
 En assaut, en repousse, en longue & dure peine,
 Où souuent la longueur d'un tel combat les meine,
 En effroyable ardeur, de grands heurs estonnans,

De maints tours acharnez, d'horribles coups sonnans
 Espouventablement, de nuisances, morsures,
 Prises, depestremens, & mortelles naureures,
 En haut bruit d'infinis sifflemens, & en bruit
 Dont l'Elephant par cris espouventables bruit.
 En toute chose donc soit elle auantageuse,
 Ou contraire, qui suit telle guerre hideuse,
 On peut, tel combat dire estre egal, & pourtant
 L'un des deux ne va pas la victoire emportant
 A tous coups: car souuent le dur sort a baillé
 Sur l'Elephant victoire, au grand monstre ecaillé:
 Souuent si cautement l'Elephant s'eueruë,
 Que sans danger de mort l'ailé serpent il tuë;
 Et quelquefois luymesme, ou soit que se trompant
 Il vueille la meslee acourcir en tombant,
 Pensant l'autre assommer, si sa grosse, pesante,
 Et grand' masse il fait cheoir sur la peste volante:
 Ou soit que de tomber par force il soit contraint,
 Estant de plusieurs nœus par les iambes etreint,
 Dont du monstre la queue incroyablement forte,
 Le garrote si fort qu'en terre elle l'emporte,
 Par un destin pareil en tombant il deffait
 L'ennemy, que creuer sous sa grand' cheute il fait,
 Et luymesme en creuant & tuant l'aduersaire,
 De ce bruslant venin extremement contraire
 A sa nature, il va s'enuenimant si fort
 Qu'il s'enfle & creue, & prend sa mort en l'autre mort.
 Tels combats donc à voir seroient pleins d'horreurs toutes
 De grâds dâgers aux faits, mesme aux fins de grâd's dou-
 Sur ces trois points derniers plus au wray se pourroiet (tes.

DISCOVRS.

Par vers qui pour la chose adapter discourroyent
 A tel combat Indique apparier l'affreuse
 Horreur, le danger grand, l'issue encor douteuse
 Du duel, qu'à chanter ie me plais, y mettant
 Autant de temps que presque on mit en combatant.
 C'est grand horreur de voir comme aigris ils travaillent,
 Comme sestourdissans ils s'assomment & taillent
 Au bord des morions, au grand tour des boucliers,
 Des breches, & souuent des eclats tous entiers,
 Et de grands coups tousiours tombans de toute aspreffe,
 Enfoncent iusqu'au nu toute arme plus espesse,
 Tant que sil faut encore en ceci donner lieu
 Aux fictions, faisant ces armes par ce Dieu,
 O * auoir esté forgees,
 Voire(sil m'est permis d'ainsi parler) fées,
 Veue ce qu'on leur voit faire, elles ne lairroient pas
 De sentir à tous coups dommage sous leurs bras
 Plus fées, pour pouuoir quelque enclume, ie pense,
 Detrancher, que ne peut contre eux quelque deffence
 Se fcer sur l'enclume: Or c'est vne horreur doncq,
 Si en conflct semblable aucune horreur fut oncq,
 De voir qu'à chasque coup qu'on peut donner ou rendre,
 Promptement on les voit tous deux à s'entre-fendre
 Quasi sans cesse prests: c'est horreur que desor
 Hector, Achile, & mesme Achile plus qu'Hector,
 Qui du choir continu de leur bruyant tonnerre,
 Rehaussé rabaisse, semblent & ciel & terre
 Autour d'eux effroyer, & qui de coups tant lourds
 Deuroyent tous deux pieça festre entre-rendus sourds,
 Plus que ne sont les fils d'Yxion, quand ils forgent,

Ou le peuple habitant les lieux où se degorgent
 Les sept bouches du Nil, pour dire au vray, se vont
 Par force en fin lassant de l'œuvre auquel ils sont,
 Et que pourtant tant plus leur vigueur est forcee,
 Tant moins on voit dans eux leur rage estre lassée,
 Qui cent ans les pourroit faire opiniastrer,
 S'ils ne sortent au but qui les a fait entrer
 En si cruels travaux, qui mesmes les enflamment
 Tousiours d'esperoir, tant plus que leurs armes s'entament,
 Pensans mettre en morceaux tout ce fer, & tuer
 Le premier desarmé quelque part, ou ruer
 Tant & tant de tels coups, que quelques vns arriuent
 Par quelque breche, ou plus l'ame & les forces viuent:
 Car on ne les eust peu si long espace voir
 Continuer, n'estoit l'irrenocable espoir,
 Obstiné par l'esprenue, encore que tant bonne
 Espeffeur & durté des armes les estonne,
 D'auoir vn si long temps sur elles tempesté,
 Sans auoir l'un sur l'autre encor rien profité.

Or quant à telle horreur de ceux qui le font voyent,
 Ou de ceux qui l'oyans, comme present m'en oyent
 Chanter, SIRE, en ta gloire & memoire ces vers,
 Que l'enuoye en tout siecle & tout terroir diuers,
 D'icelle pour le plus la cause ne procede
 Que de voir que par force il faudra que l'un cede
 A l'autre, ou que d'un mesme implacable destin
 Donnent tous deux naurez l'un à l'autre leur fin,
 Tant que la terre hélas! qui sur telle iournee
 Doit maudire à iamais l'ordonnance donnée:
 Veu qu'apres ou deuant elle n'a sceu trouuer

DISCOVRS.

Deux Heros qui plus haut ayent sceu releuer
 Sa maternelle gloire, en rendant par fatalle
 Vertu sa race basse aux Dieux mesmes egalle,
 Et que pourtant il faut qu'un des deux demeurant
 Tout seul dans elle, ou bien l'un & l'autre mourant,
 Elle reste à iamais miserablement veufue
 Du pair, ou de moitié de ce pair qu'elle treuve
 L'auoir deshonorée, ains qu'un peu de rancœur
 A deux grand's parts du monde ait fait perdre leur cœur.
 Hector estoit le cœur de l'Asie puissante,
 Achile estoit le cœur de l'Europe vaillante:
 Mais ce n'estoit pas lors en ce pair glorieux
 Seulement que le Ciel se rendroit enuieux
 De leur gloire & hauteſſe en l'une & l'autre terre,
 Soit deuant, soit apres leur decennalle guerre,
 Aux vaincus, aux vainqueurs le Ciel ialoux osta
 Ce que la terre aux deux de plus grand enfanta:
 Comme si la hauteſſe ensemble & la ruine
 De Troye eust courroucé la hauteſſe diuine,
 Et que l'une eust esté sur les vaincus ainsi
 Punie, comme l'autre eſtrangement aussi
 Le fut sur les vainqueurs, qui dans leurs propres portes
 Les haines, les fureurs, & les hontes plus fortes
 Trouuerent que deuant les Pergames Troyens.
 Tesmoin soit le grand chef des chefs Pelasgiens,
 Ce Roy Mycenien, que l'inique adultere
 Fit mourir, adiouſtant la mort au vitupere:
 Tesmoin ce Roy qui fut par l'impudicité
 De sa femme contraint d'aller une cité
 Fonder en terre eſtrange: ainsi lors l'outragee

Venus, ie croy, rendoit son Ilium vangee.
Et quoy des durs travaux d'Ulysse errant dix ans?
Quoy de l'un des Ajax que les Caphareans
Rochers, qu'alors les mains de Neptune darderent
Sur son chef dans la mer en passant accablerent?
Quoy de tant d'autres Grecs iusques à Pyrrhe encor,
Qui long temps ne garda l'Andromaque d'Hector?
Et mesme auant le sac ce pié-leger Achile,
Luymesme occis laissa ses cendres dans la ville
Qu'on vouloit mettre en cendre: & soudain apres luy
Au debat qu'on fit lors des armes d'iceluy,
L'autre Ajax de sa main arracha son seruice
Et sa vie, aux ingrats Gregeois fauteurs d'Ulysse.
Quant aux forcez Troyens, pourroit ou bien un lac
De sang, un mont de cendre, exprimer en tel sac,
Tant de sang que, ie croy, le vainqueur vint esandre,
Qu'esteindre il en eust peu les feux qu'il fit esrandre.
Au double destin donc Iupiter courroucé,
Comme on peut feindre encor, semble s'eslire poussé
D'une part en grand haine & sentence cruelle,
Puis en pitié de voir perdre en tout grandeur telle,
Et d'autre part au triste enuoy de tous malheurs,
Au soudain contrepois des aises aux douleurs,
Des lauriers aux cyprés, des gloires aux diffames,
Et des flames de Troye à leurs lugubres flames,
S'ils en ont eu l'honneur: car des Dieux le destin
Qui ne doit, s'ils sont Dieux, que tendre à iuste fin,
Treuoyans & forcez sans force aux pouruoyances,
A double faute auoyent prescrit doubles vengeances.
Au moins comme eussent peu deuiner tous ces vieux,

T O M B E A V X.

*Qui tous effets fondoyent au conseil de leurs Dieux.
Les Dieux pouuoient fleurir dès long temps l'obstinee
Et faulſe aigreur, non pas du ciel à nous donnee,
Mais par l'impurité de nature, qui lors
D'eux meſme, & dedans eux, & pour eux tant de torts,
De maux, d'enormitez, feroient sortir enſemble,*

*

*

*

*

TOMBEAUX. 175
A L'OMBRE DE M. SIMON
L'ARCHER.

AUX Musés par les vers de l'Ascrean Poète,
Un bel arc proprement se voit accommodé,
Qui de leurs mains, au haut du Parnasse, bandé
Decoche en l'univers mainte docte sagette.
Tel arc aux grands esprits par les Musés se preste,
Ses traits sont les renoms, desquels on est guidé
Par exemple à vertu. Mais il faut estre aidé
Pour sçauoir en visant tirer comme on souhaite.
Tu peus suiuant ton nom d'un tel arc estre archer,
Mais tu n'eus tel plaisir à si bien décocher,
Comme à bien adextre à tel arc la ieunesse:
Qui s'efforce à t'en rendre à ceste heure un loyer,
Voulant de ta memoire au Ciel mesme enuoyer
La fleche, qui du dard de la Mort soit maistresse.

A L'OMBRE MESME.

Si plus tost, cher Esprit Paternel, Nous ton gendre
Et ta fille, n'auons payé le saint deuoir;
Que dés long temps pouuoit par nos mains receuoir
En pleurs, en fleurs, en vœus, en prieres, ta Cendre.
Nostre deuoir pourtant moindre ne s'en doit rendre:
Nous sçauions ton merite auoir bien ce pouuoir
De faire à ton renom quelque memoire auoir,
Si ce merite un iour se pouuoit faire entendre.
La memoire qui doit un fort long temps durer,
Ne se perd pour se voir quelque peu differer,

T O M B E A V X.

*Pourueu que lon luy dresse en fin vn cours qui dure.
Si au saint payement que nostre deuoir fait,
A nostre affection se galle nostre effet,
Du deuoir differé tu prendras longue usure.*

I N E A N D E M V M B R A M.

TV quoque digna polo , cœlestibus Vmbra
colonis
Addita, quo studium studio, quibus ipsa rependi
Votis vota queant: Ecquid tibi grata iuuentus,
Ecquid cum grata tibi virque senexque iuuenta,
Versibus his iam ritè paret, det, consecret, audi.
Arte lyræ, validique Senex qui fingitur arcus
Arte potens, patre Saturno qui natus (in acrem
Dum Saturnus Equum se vertit) quadrupes imis
Partibus, & summis vir erat: cui mater alendum
Syluestri Theris Æacidem commisit in antro:
Hæc duodena, suos per quæ Sol aureus annos
Obliqua rotat vsque via, inter Signa receptus
Fertur, Orionius caudam qua vibrat ad uncam
Scorpius, & Phrygia Capricornus adultus in Ida
Cornua protendit, mediûmque Chirona patenti
Huncambo cepere loco. Micat ille minutis
Ignibus, & iam iamque fere fugiente sagitta,
Et tenso, rigidis quem curuat viribus, arcu
Armat, facit vnde nouum sibi nomen ab arcu.
Ast ea qua quondam puer est formatus Achilles
Cura vigil, si semiferum inter summa locauit
Astra senem, quantò fueras magis ipse, peractæ

Post vitæ spatium, nitidi suprema locandus
 Inter signa poli, stellis signandus & aureis,
 O tu docte sagaxque senex, cui fecerat Arcus
 Nomen, ut æthereis posses quoque lapsus ab astris
 Arcitenens credi? Verum maiore vel arte,
 Ac cura solerte magis, veroque labore,
 Non vnum sed & innumeros Heroas alendos
 Suscipiens, pueri longè superare magistrum
 Visus es Æacidæ. Nostræ sed vana Camœnæ
 Hæc vatum fugiant veterum figmenta: relictis
 Mortales nulli sunt noua sydera terris.
 Humanas æterna manet post funera mentes
 Vita, nec exanimis nostri torpescit imaginó
 Sydereis adfixa polis: Expertia vitæ
 Sydera sunt, orbis vel ab huius origine summi
 Imperio formata Iouis, dispersaque cælo.
 Ast animæ, cæleste genus, iam mole solutæ
 Corporea, primos pennis citioribus ortus
 Authorémque Iouem reperit, Cælóque, Deoque,
 Ac sensu, vitæque simul potiore fruuntur:
 Pernicesni fortè grauent teterrima pennas
 Crimina, lathifero queis demergantur Auerno.
 Ergo post actum terris tibi rectius æuum,
 Iam sensu meliore, Deo, placitoque potire
 Usque polo: teneræque lubens gratare iuuentæ,
 Hospitibusque leucis opta procul omnibus alas,
 Terra quibus tam cæca, quibus fugiatur Auernus.

NE hinc ocyus queso quam par sit adulescens
 huc quæ te vocat rogat moraturq. te te inter
 manes etiamnum curat vmbra raro benemerita
 sepeliri ea maxime quæ aliis benemerendi viam
 muniunt tu ab hoc primum Genio a te dolciſſi-
 mo gratiſſimoq. hospite viri senesq. demum intel-
 ligat Simon Arcurius Diuioni natus ſtudioſior. ergo
 Luſetiam a puero miſſus artib. & morib. optimis
 hac in ciuitate gnauit. excultus cuius tandem ciuis
 poſtquam vxorem duxiſſet Claud. Marchianam
 nobili progenitam famil. ex eaq. viii liberos fi-
 lium i. vii filias ſuſcepitſet coniugemq. illam qua
 cum amantiſſ. vixerat e viuis an. a ſalut. reſtit.
 ꝛ ꝝxxxxv. migrantem rite luxiſſet ac totum etiam
 æuum in erudiendis formand. ac longe nobilius
 liberaliusq. quam fieri ſoleat educandis nobilio-
 rib. & qui variis Gallor. optimat. famil. editi fuerant
 aduſcentib. propemodum conſumpſiſſet partis
 ſimul cum laude opib. curſuq. vitæ bene ac fœlici-
 tit. ad ſenium vſque tranſacto an. ꝛ ꝝxxxxxx.
 annum iam ipſe xxxxxxv agens vitam proſpe-
 ram cum morte proſpera commutauit Horum
 volui neſcius vt non eſſes gratare aduſcens pa-
 rem in cœteris curam & lauda & amplectere exi-
 guamq. auge memor. vel hoc ſaltem benemerito
 comparatam ac ſecundor. veluti parentum ma-
 nib. qui fœlicem non modo tuis annis ſed & ſtu-
 diis tuis progreſſum nunc etiam precantur bene
 quoq. precatus Vale.

L'OMBRE DE PERON-
ne le Greffe.

*Par trois sortes de vraye & sainte pieté,
 Qui sont enuers mon Dieu, mon pays, & mon pere,
 Fut le cours de mes ans (en vn siecle improspere
 D'une mort qui n'est point improspere) arresté.
 Je voyoy' la nouuelle & faulse impieté
 Preste à bannir la foy que diuine on reuere:
 Je croyoy' ma patrie abysmer en misere:
 Je croyoy' à mon pere vn massacre appresté.
 Si grand' ardeur en fin me rendit froide & blesme: (me
 Veu ces malheurs ma mort me fut vn grād heur mes-
 La patrie, & le pere en memoire, & deuoir
 Sepulchral m'ont payee: Et Dieu le seul salaire
 Des Chrestiens, tant au Ciel, comm' en foy m'a peu
 Et plus vraye patrie, & plus vray pere auoir. (faire*

D. O. M. S.

H E V S hospes: Quis me hic inquis? Pius Genius:
 Ecquid me velis rogas, Quod prius roget habet.
 Tunc secolis amabo impientis. locoq. Libitinæ
 ac Pollinctorib. parum cognito in beatos raraq.
 admodum pietat. testes Genios etiam imprudens
 incidere ratus fores? in genios forsitan ais quorun-
 dam, qui nuper pro patria ceciderint. Res certè
 minor, dissimilis parum, digna saltem quæ te mo-
 retur donec pellegas. Adolescebat adhuc Perona
 Grellæa, viuacis ingeni, bonæ indolis, spei non
 mediocris, puella ingenuarum aliquot artium, ar-
 tis præcipue Musicæ studio commendatissima. At

Y

festinātius, dices, quid hæc tantum? Impij nostrorum temporum perduelles spe sua pessimarumq. insidiar. successu candentes, quib. Carolum R. inuadere, ac in ipsum fortasse cum suis opprimere, die sceleri dicta, iurataq. per vniuersa Galliar. loca defectione constituerant: Sandyonisiacum, vt sat nosti, occuparunt, Regi in urbem Lutetiā recepto, suis destituto copiis, iugum, aut necē, internecionē ciuib. mœnib. ruinā, domub. sacrisq. superūm fanis incendium minantes: Ipsisq. propemodum tantæ ciuitat. fossis ac portis ingruere, passimq. insultare furialit. ausi plebem inermem, ac nil sibi tale metuentem, repentinis impetub. terruerunt. Cumq. ipsa nocte hostili furialiq. igne circum colucente publicis vbiq. clamorib. arma poscuntur, curritur vndiquaq. ad arma, arma sonant vndiq. Perona patrem sibi charis. qui aliquot urbanis cohortib. per decurias extemplò coactis præerat, arma capere, suos instigando instare, ad locum ipsi creditum properare, conspiciens, non tam patri quàm patriæ timuit: ac de diuino maxume cultu, cuius studiosissima fuit, actum autumans tanto subtilis pieq. excandescens animi velut incendio correpta est, vt attracto ac suapte vi exhalante totius corpor. calore sese in subitum ac letiferum rigorem horroremq. ex inflammatis. iustissimaq. exacerbatione transilire senserit. Ergone ex igne tanto tantum gelu? At id etiam in febricitantib. volgo fieri solitum dum febris occipit, hic flagor quoniam maior, proteruius frigoris virus fuit: sicq.

illa veluti congelato in venis sanguine , natinoq.
 pene calore in ipsis demum præcordiis extincto,
 post aliquot dies elanguens, ac sensim extabescēs,
 frigidissimisq. artub. viuacissim. ac ardentissim. ad-
 huc spiritum tanquam insuetis nimium vinculis
 exoluens, interiit. Verum puellari (inquis) gelidif-
 simoq. metu, forsan impotentius perculsa metuis-
 se non potuit, quæ sese pietat. ardori timorem
 quemlibet, tēporis calamitosiss. odio, huius vitæ, si
 qua est dolcedinem, ac cœlesti velut thalamo, spe-
 ratas quamprimum geniales nuptias, postponere,
 ad exitū vsq. verbis ac vultu constanter ardentemq.
 testata est. Hoc verū certe ac mirum est, insis, Ec-
 quid igitur? nonne hæc pro patria: hoc quoq. ho-
 spes non negas, bona ne etiam verba nega, & Vale.

A L'ESPRIT DE M. LE COMTE
 de Brissac, tué deuant Mussidan.

CHER esprit, non à moy, non aux tiens seulement,
 Mais à ton siecle, auquel tu fus grand ornement:
 Puis qu'à moy, puis qu'aux tiēs, se raut ta presēce,
 Et que ton siecle en toy perd si haute esperance:
 Puis que ta foy, ton Roy, ton cher pays aussi,
 Que tous trois d'un tel cœur tu soustenois ici,
 Mettant pour eux telle ame ardente & forte, & belle,
 Ont veu ton corps mourir premier que leur querelle:
 Puis que tu t'es si tost, non en genre de mort,
 Mais en cœur, en vaillance, en adresse, en effort,
 Dressé dedans le Ciel la mesme trace heureuse
 Que de ton pere l'ame accorte & valeureuse

T O M B E A U X.

S'estoit tracee auant: puis que moy qui t'auois
 Pris entre les hauts noms, que chanter ie deuoïs,
 N'ay pour toy que ces pleurs, & ce chant qui regrette
 De ne se faire ouir qu'à ta cendre muette:
 Qu'ores le Ciel au moins ne me puisse nier
 De t'honorer pour tous de quelque honneur dernier.
 Au cœur, qui non flatteur, mais haut & franc, honore,
 Croist l'ardeur d'honorer apres la mort encore.
 Si ma voix ne prend vol iusqu'à toy, soit permis
 Qu'au lieu de toy pour toy m'entendent tes amis.
 Qu'une voix naisse en moy, que sans fin puisse entendre
 Et ce siecle & tout autre: en moy te faisant prendre
 De ta foy, de ton Prince, & de ta France, vn don,
 Qui soit de ton deuoir vers ces trois vn guerdon.
 Ou bien si des Heros les ames demeslees
 Des sens charnels & lourds, & iusqu'à Dieu volees,
 Nous oyent de tant haut: si ma voix penetrant
 Par sa puissante ardeur, va iusqu'au Ciel entrant,
 Qu'elle au lieu de mouuoir les enfers bas & sombres,
 Tire pource seul coup, non (comme on dit) les ombres;
 Mais les deux clairs esprits (au Ciel ce croy ie enclos)
 De ton Pere & de toy: caren ton los son los
 Par ta vie, & ta mort, prend aussi bien croissence,
 Qu'ores son esprit prend au tien resiouissance.
 Qu'esprise elle vous face apprehender de près
 Ce qu'il faut que de toy lon apprehende après,
 C'est que ta mort apporte heur & malheur ensemble,
 Et fait qu'au commun dueil vn los publicq s'assemble.
 Car c'est desastre iniuste, & iuste dueil, de voir
 Avec si riche fleur tomber si grand espoir:

Mais c'est grand los, grand heur, d'estre mort de la sorte
 Et mort en France, avant que voir ta France morte:
 Qui soit guerre, ou soit paix, par estrange destin
 Semble en faits & conseils ne tendre qu'à sa fin:
 Si Dieu ne garde au moins que proye on ne la voye
 Des voisins, s'estant faite elle mesme sa proye.
 Le temps de tes beaux ans fait donques le malheur
 De ta mort, & le temps de nos malheurs, fait l'heur.
 Heureusement se perd, qui en la gloire aperte
 Se sauue de future & de honteuse perte.
 Toy donc qui en mourant as cet heur de mourir
 Glorieux, & cet heur de ne nous voir perir:
 Toy toy donc (par trois fois ie t'appelle ô Genie
 Bien-heureux, car le coup qui te mit hors de vie
 T'ostahors tant de maux) faisant sortir de toy
 Quelque voix claire & gresle, en brief confesse moy,
 Que ta mort en tel temps tellement glorieuse,
 Ne peult estre qu'à nous, non à toy, malheureuse,
 Avant qu'un tel destin eut transmis en ce lieu
 Ton corps, ta gloire au monde, & ceste ame à ton Dieu:
 (Car celuy qui vaillant pour tel Dieu perd son ame
 La regaigne avec luy) de viue & prompte flame,
 D'esper, de hardiesse, & de desseins bouillans,
 Propres à tes faueurs, à ton siecle, à tes ans,
 Ton corps sentoit dans soy remplir son ame enclose,
 Qui las ne pensoit pas sortir sans plus grand chose!
 Tu ne t'achois alors fors qu'en te hasardant,
 Aller à ton nom grec tes beaux faits accordant:
 Ainsi que né, nourri, exercité pour estre
 Nostre Lyon, tu fis (Timoleon) paroistre

TOMBEAUX.

(Presque enfant) ton grand cœur en Piedmont: & Lyon
 Te veit de Lyonceau te monstrier vn Lyon.
 Depuis en tant d'exploits, & mesme en ceste guerre
 Derniere, quand Mounans vaincu mordit la terre:
 Apres à Iazeneuil, à Congnac, où le chef
 Des ennemis trouua le loyer du meschef:
 Mesme en tant d'autres lieux qu'ici ie te veux taire,
 Tu fis bien, & te tins tousiours prest à mieux faire:
 Voire & de Mussidan deuant le mur fatal,
 Qui aux tiens, qui à tous, plus qu'à toy fit de mal:
 Sans cesse ardent de faire en accorte entreprise,
 En escarmouche, suite, imboscade, surprise,
 En rencontre, en bataille, en siege, & en assaut,
 Tout ce que tu sentoies digne de ton cœur haut,
 Du seruice du Roy, de la iuste querelle
 Qui du Roy, qui de Dieu porte le droit en elle:
 Veillant, sondant, cherchant, sans que l'affection
 Se peust vn seul moment depestrer d'action.
 Mais alors tu croyois, sans pourtant la mort craindre,
 Que c'eust esté malheur pour toy, de voir esteindre
 Si tost si rare vie. Or m'ayant entendu
 A toy nous conferant, & dans les cieux rendu
 Plus pur, tu vois, tu sens, tu crois toute autre chose.
 Va, reuole, & ton pere avecq' toy: puis repose
 Pour iamais avec luy: nous laissant pour iamais
 Auant que reuoler, vos deux noms, & vos faits:
 A moy, qui mieux orner les vœux ailleurs encore:
 A l'vniuers, qui mieux les oye & les honore.

S V R L E T R E S P A S D E
I e a n n e d e L o y n e s .

*Demophoon, Cephale, Orphee, Ænee, ont fait
De Thyllis, de Procris, d'Eurydice, & de Creuse,
Grands ou communs regrets, selon que l'amoureuse
Ardeur & foy monstroit plus ou moins son effect.*

*Mais eux en telles morts ont tous presque forfait:
L'un fait mourir Phyllis par attente angoisseuse,
L'autre naure Procris en la vallee ombreuse,
Des palles morts le tiers sa grand perte refait.*

*Ænee a moins de dueil, & moins de faute, encore
N'est-il sans grand soupçon. Le dueil qui te deuore
(Veu qu'on n'y voit ou faute, ou mort forcee ainsi)*

*Monstre qu'en tout deuoit à vostre couple heureuse
Ceder Phyllis, Procris, & Eurydice, & Creuse,
Demophoon, Cephale, Orphee, Ænee, aussi.*

A M. SOREAV SON MARY.

I.

*Qu'un passant ne s'estonne en voyant tant d'esprits
Si rares, tesmoigner ta douleur iuste, & forte,
Monstrant qu'à l'amitié qu'aux vertueux on porte,
Plus que les grâdeurs touche aux esprits mieux appris.*

*Mesmes ton dueil (SOREAV) d'amour extreme est pris
Vray sujet de nous tous, puis ta face aussi morte
Que ta morte moitié, puis ton pleur en la sorte
Nous esprant, qu'on peut estre en cas si rares épris.*

*Orphee en repleurant sa moitié reperdue
Esmouuoit à sa perte, à sa plainte entendue,*

T O M B E A V X.

*Les rochers le suiuaus, les bestes, & les bois.
 Toy les Orphees mesme esmeus à ta tristesse,
 Qui pour toy si le Ciel n'enfermoit ta maistresse,
 De la mort & d'enfer romproyent encor les loix.*

I I.

*Tout ce qui peut plus nuire à l'amour coniugale,
 La mort, le temps, l'oubli, la haine, auoyent vn iour
 Conspiré sus vostre aspre, & ferme, & saint amour,
 Tant que la mort pour toy hasta l'heure fatale:
 Mais le temps trompé, donne à telle ardeur loyale
 Memoire au lieu d'oubli: L'oubli donc à son tour
 En sefforçant se trompe: En fin la haine autour
 De mon cœur vient verser sa poison furiale:
 Son venin la deçoit, qui me fait bien fuir
 Les bois, la court, le monde, ains moy mesme hair,
 Mais de l'effort contraire amour sa force excite.
 Comment? la mort par dueil me rend mort comme toy,
 La mort se trompe. Icyl la Muse, au Ciel la foy,
 En l'vn l'autre l'Amour tous deux nous resuscite.*

D E M. B O V R D I N P R O C V R E V R
 general du Roy au Parlement de Paris.

*De B O V R D I N le sain chef qui courbé trauailloit
 Sous le faix des grands dons, dont le ciel, la nature,
 Et l'art l'auoyët comblé pour tout bien qu'on procure
 Tant au peuple qu'au Roy, sans relâche veilloit.
 Et veillant pardedans, sans cesse sommeilloit
 Par dehors, car le sens à tant diuerse cure
 N'eust fourni des deux parts, alors que pour la cure
 De nos playes sans fin tous ces dons esueilloit.*

Ce

*Ce ne fut donc ainsi qu'en une apoplexie
 Un flot soudain d'humeurs qui estouffa sa vie,
 Arrestant tout ressort des mouuemens vitaux:
 Ce fut un grand torrent des puissances de l'ame,
 Tiré du chef au cœur ardent contre nos maux,
 Qui dans le cœur tua les esprits & la flame.*

IN EVNDEM.

*Qui patriæ vigil usque fuit, dormiuit & usque,
 Nunc obitu verè dormiit ecce suo.
 Vix differt à morte sopor: nam visus vbique
 Hic dormire, ferè visus vbique mori est:
 Quin subito somnòque cadens fatòque soporem
 Esse putet potius, quàm putet esse necem:
 Quasiúmque suis (nec enim tunc æger habetur)
 Dormiat an vigilet, viuat an ille cadat.
 At longùm nobis vigilat per scripta, per acta
 Supremus nequirit quæ sepelire sopor:
 Semper & extinctus credetur viuere, viuus
 Qui falsò nobis creditus usque mori.*

A L'AME DE M. DESPENCE.

*En ce siecle aueuglé, par celeste doctrine,
 Par voix sainte & publique, & par maint docte es-
 Par tout insigne exēple embrasser Iesus Christ, (crit,
 C'est le remede heureux du malheur qui domine.
 Ame heureuse, tu as à la lettre diuine
 Consacré tous tes ans, plein du diuin esprit:*

T O M B E A U X . T

Long temps tu as presché, tu as maint liure escrit,
 Où l'effort de raison l'effort d'erreur ruine.
 Mais de ta vie encor l'exemple tu passas
 En ta mort, quand la Croix d'un tel zele embrassas
 En un temps où l'erreur contre la Croix s'irrité.
 Doncq' comme acquis ici par doctrine, par voix,
 Par escrits, los, & fruit, & renom, tu auois,
 La Croix t'aquière du Ciel de la Croix le merite.

D E V M D E M O N T S A L E Z .

S O U S L' O M B R E .

S V Y donc, Passant, & ly: Cet immortel flambeau
 Qu'ardent dedans sa main tient la Pieté sainte,
 C'est l'instinct, c'est l'amour, dōt nostre ame est cōtrainte
 A tout grand œuvre iuste, & noble, & saint, & beau.
 Et ces fleurs qu'elle aussi respand sur maint tombeau,
 C'est un deuoir auquel les Vertus l'ont estreinte:
 Ce vase c'est le los, les merites, la plainte,
 Et les vœus, qui tousiours refument de nouveau.
 Ce qui est propre à moy, sont ces Enfans qui tiennent
 Ces flambéaus contre bas, par lesquels ils s'apprennēt
 Qu'ainsi ma vie esteinte en la mort a esté.
 Mais croy qu'un iour la gloire & memoire immortelle,
 Leur fera r'allumer ma vie encor plus belle,
 A l'autre ardent flambeau que tient la Pieté
 La Pieté qui plus aux autres Vertus meine,
 Qui plus meine à la gloire & memoire ces trois,

Nos cœurs, nos faits, nos nōs, sans cesse pour ses droïts,
 Soyent diuins, soyēt humains, nous n'appelle à la peinte
 Nous aimant, quand l'erreurs ou quand l'orgueil forcent
 Contre Dieu, & qu'il blesse, ou qu'il foule nos Rois,
 Nos païs, nos amis, nōs parens, car des loix iustes
 Et liens de ces cinq, tout braue cœur se peine. *Illed hē*
 Pour tous les cinq i'ay fait, s'agitant aux trois premiers
 Mon sang, à eux repūe, laissant aux deux derniers
 L'aïse & l'heur de mon las: Mais tous cinq m'en guer-
 rissent, & donnent: *les cinq q'elles m'ay s'ingl'ant*
 Dieu les cieus m'a donnez, & mes Rois les honneurs, *ou*
 Mon païs la louange, & mes amis les pleurs, *ou*
 Mes parens ce sepulchre avec les pleurs mē donnent.

D. PIETATI PIISQ.

M. A. N. I. B.

S.

E C Q V I D hęc sublimi sacroq. crecta styloba-
 to Dea sepultis fortis. nuper Herois Manib.
 adstare vosq. etiam rito ac perpetuo compellare
 grata memorq. non abnuerit pellegendō discitore
 hospites, Re cognita si iusta si sancta vos potuerit
 Pietas commouere, vix vllum pietatis officium ipsis
 etiam cinerib. denegare quiueritis: Quod pienter
 ardenteq. exequamini, vōs certe pios ipsamet
 rogat Pietas. Hic enim illa quam oculis conspici-
 nobili pio fortiq. admodum viro Iac. Ballaguerio
 Monssalesij pagi celebriusq. aliquosin Aquita-
 nia locor. domino iamantiss. torquato Regij or-
 dinis Equiti digniss. meritiss. x x x x x. gratiori

armat. equitum ductori vigilantiss. strenuiss. acerr.
iustam stabilemq. tum gloriam tum memoriam
post ipsum obitum comparare, commendare atq.
etiam conseruare non modo statuit, sed & obni-
xe studuit. Cum enim ille illustri progenie editus
ad bellic. arteis supramodum natus corporis ani-
miq. dotib. nec non eximiis virtutum studiis præ-
ditus ac instructus sese adhuc puer paterna domo
veluti surripuerit, florentiss. Galliar. Regib. tam in
transalpinis quam cisalpinis castris ac expedi-
tionib. continuam nauarit operam. Ob res in ipsa
iamque adolescentia fortit. gestas C. equitum
produx & mox etiam equitum xxxxx. dux ipse
factus atq. Regia torque donatus fuerit, semper
optime de principib. suis patriaq. meruerit: non
tamen vsque adeo sibi publicam deuinxerat pie-
tatem, quam cum toto isto ciuili bello quo mise-
ra conflagrauit. Gallia rebus in Cadurcor. finib. lo-
cisq. aliis preclare gestis fractis fusisq. Ponsenacij
cuiusdā copiis. Postquam in grauiss. prælio fuerat
quod ad Druydas commissum est, in altero quo-
que prælio quo Mouentius victus ac cæsus est sese
fortius etiam gesserat. Ipsos perduelles sæpius ter-
ruerat maioremq. de se expectation. omnib. exci-
tauerat, eodem tandem prælio loco ac die eo-
demq. mortis genere quo Lodoic. Borbonius
princeps Condæus occubuit ipse vii. & xxx. an.
natus pro Reg. ac patr. pro ipsa denique pietat. a-
cerrime dimicans ac præ ceteris se se suosq. furio-
sis princip. illius impetib. opponens misere & ante

diem interemtus est. Tantæ pietat. ergo Franc.
Ballagueria soror chariss. piiss. gratiss. ab ipsa Pietate
deâ iure ac merito stimulata hoc diutiss. tum
fraternæ virtut. ac pietat. tum ipsius quoq. pietat.
sororiæ monumentum ponend. ac consecrand.
curauit. Iam nostis hospites, quidquid voti est
peragite ac valete.

M A N E S.

INnumeros inter, tulerat quos Martia quondam
Roma, Duces, natos fera prorsus ad arma, suôq;
Marte velut genitore fatos, victricibus omneis
Frondebis implicitos caput, haud minus attamen
(Vt decuit genus Æneæ) pietatis amantes: (alma
Hi laudemque decusque sibi noménque perenne
Præcipuè fecere, sua qui sponte, vocati
Responsis signisue Deum, patriæque salutem
Vel precio vitæ, se ultro damnantis, ementes,
Deuouere piâs animas, sobolisque thorisque
Oblitasque domus, angore metûque vacantes,
Contentas pietate sua, famâque sequenti,
Ac vitam vitæ damno brevis instaurantes.
Sic Decij, pater & soboles patre digna, supremi
Hoc fati subiere genus: sic acer & heros,
Quem non aspectu horribilis terrebat hiatus,
Deuotum simul absorpturus equumque virumque.
At vitam læthumque meum qui norit, eorum
Cur me non similem putet, heu ciuilia gentis
Bella diu nostræ nimis impia bella sequutum?
Qui nostrum patriæ voui quocumque cruorem

T O M B E A V X.

Occursu, totiesque mihi necis obuia vidi
 Fata mea, nec visa tamen discrimina sensi:
 Lumine pectoribus penitus cedente, simulque
 Spe vitæ mortisque metu cedente valori.
 Hic non Romuleis committitur inclyta pillis
 Pugna, virum quæ corda, manus, & robur, & artē
 Arguat, at breuibus (diri proh temporis artes!)
 Tormentis, quæ lethiferos reuomentia plumbi
 Flammiferi globulos, crebris loca grandinis instar
 Ictibus, ac fumo tetrum tunc sulphur olenti,
 Atque inter fumos rutila (ceu fulgure) flamma,
 Horrificisque leueis implent stridoribus auras:
 Implent corda metu, multoque cadauere læsi
 Arua soli: plectente nimis Ioue vindice duos.
 Terrigenas, non iamque suo sed fulmine nostro.
 Nam quid longa magis, patulis quid hiantia dicam
 Orbibus hæc tormēta? Iouis dum fulmina cessant,
 Nec terris etiam possunt satis esse piandis,
 Hæc in nos nobis superi fabricasse dederunt.
 Talibus ergo feris (quæ tot modo fulmina tor-
 quent)
 In pugnis, rigidumque virum, fortemque, trementē
 Nil penitus, mors certa manet: præsensque videri
 Parca potest vbicunque ferox: validisque lacertis
 Intrepidè quoque vana manet fiducia menti.
 Sic ego continuis caput obiectare periclis,
 Ac nullam effugere oblatis certaminis ansam
 Dum volui: semperque mea dum prodiga vitæ
 Corda gerens, risi cæcæ tot fulmina pugnae.
 Non semel hanc animam, Patriam cū Marte tuerer

Affiduo, verum toties prudensque volensque,
 Deuouisse ferar, quoties trux adstitit hostis.
 Cumque pia pro gente, pio pro Rege, sed ipsa
 Pro pietate mori toties mihi certa foret mens.
 Donec sustulerit melurida fulminis huius
 Plombea glans: Decius reliquisque Quiritibus, orco
 Qui tunc pro patria se deuouere profundo,
 Maior ero, quanto fuit iste frequentior in me
 Feruor & ansa necis, quanto prior usque futura est
 Hæc mea Romæ pietas pietate, profundo
 Vel quanto Cælum præstat sublimius Orco.

D E M. D'ALLVYE SE-

crétaire d'Etat.

*De mon ayeul le nom FLORIMOND ie receu,
 Ce surnom, ROBERTET, est le nom de ma race,
 Jeune ie fis ma fleur louer de mainte grâce:
 Secrétaire d'Etat d'un Roy CHARLES ie feu:
 Sur tout i'aimay PIANE, & pour femme ie l'eü,
 Qui seule en moy le tort fait par ma mort, efface:
 Car bien que lon rauisse à son tige vne fleur,
 L'eau dans un vase peut maintenir sa couleur:
 Mais ceste eau, qui aux yeux de ma PIANE aborde,
 Fait bien plus: car me slec avec l'eternelle onde
 D'Helicon, m'arrosant & ranimant tousiours,
 Dans ce vase mortel fait resflorir au monde
 Mon nom, mon sang, mon los, ma charge, & mes
 amours.*

C v m ferat arma Deûm sibi parta trophæa
Cupido,

Arma trifulca Iouis fulmen, patris arma Gradiui,
Ac falcem Saturne tuam, sæuique trabale
Ditis, Apollineam pharetrámque arcúmque, tri-
dentem

Oceani, clauam Alcidx, thyrsúmque Lyæi,
Cæteráque: ingētem qua Mors ruit omnia, falcem
Ferre nequit: pueri sed & ipsa Cupidinis arma
Tela, facem, pharetrámque, tulit, quæ vincula
soluens

Omnia, de puero Mors semper Amore triúphat.
Ast hic dum Pianis solitos pia suscitât igneis,
Igneis, casta virum tantum quibus arsit amantem,
Quantum vel vir amans à coniuge possit amari:
Nomen & acta decúsque viri, dum suscitât Orco,
Dúmque modis famáq; virum sic suscitât ipsum,
Thracius vt vates sic ius non dempserit Orco,
Post vim mortis in hanc læso vim reddit Amori:
Iungat vt ingentem, qua Mors ruit omnia, falcem,
Vincláque dissoluit, reliquis Amor ipse trophæis.



POVR LE TOMBEAUX DE

M. THEVET, COSMOGRA

phe du Roy.

LE grand Moteur du Ciel & Nature seconde,
 Pour en vn seul sujet faire voir en ce monde
 Comme est grand leur pouuoir, reduit en son
 effet,

D'un accord accompli THEVET auoit parfait.
 Le Ciel la plus belle ame en ses beaux feux choisie,
 Emprunta pour ici luire vne belle vie:
 Et Nature choisit ses plus riches thresors,
 Pour ce beau don du Ciel loger en digne corps.

Ainsi le saint honneur du Ciel & de Nature
 Fut decouvert çà bas en vne creature,
 Qui d'esprit & de corps tesmoigna la grandeur
 De sa forme & matiere, & de son createur:
 Car toutes les vertus qui l'esprit enrichissent,
 Et toutes les beautez qui le corps embellissent,
 Les sciences, les arts, la sainte pieté,
 La grace, la vigueur, & la dexterité,
 Feirent estre ceste ame vn diuin exemplaire,
 Et feirent que ce corps onques ne sceut deplaire
 Qu'à son ame, qui n'eut autre objet pour penser,
 Que celuy qui pourroit à son ciel la hausser.

Comme le corps pesant, qui forcé dans l'air entre,
 Bien tost courbe sa voye, & rechet sur le centre:
 Ainsi le feu leger longuement ne peut pas
 Contre son naturel demeurer ici bas.

Aussi ceste belle ame estant au corps forcee,

CANTIQUE

D'ordinaire desir contre le Ciel pouffee,
 Impetra par l'effect d'une viue oraison,
 De sortir de ce corps, sa mortelle prison:
 Autour duquel ici autre chose ne reste
 Qu'une image de mort, à ses amis moleste:
 Et de tant de vertus n'est demeuré, sinon
 Une gloire immortelle, & un illustre nom,
 Qui d'un vol empenné de Romaine parolle
 Par le desert THEVET court l'un & l'autre pole,
 Pendant que l'ame au Ciel iouit d'un doux repos,
 Et mollement la terre ici couure son corps.

CANTIQUE CHRESTIEN.



Grand Dieu souverain, dont la diuinité,
 Chrestiens, nous adorés deffous triple unité,
 Qui as pour ton palais ceste vouste etheree,
 Ou des Anges te sert la troupe bienheuree:
 Qui formas, tout-puissant, le grand tour spacieux
 De ce diuin chef-d'œuvre admirable à nos yeux:
 Quiournes d'un clin d'œil ceste grand' masse ronde,
 Qui lances de ta main le foudre par le monde,
 Pardonnez nous, Seigneur, & nos pechez lauuant,
 En ta iuste fureur ne nous va poursuivant.

Que si tu mets nos faits en égale balance,
 Et veux à la rigueur condamner nostre offense,
 Qui pourra supporter le terrible courroux,
 De ce grand Dieu viuant animé contre nous?

Rien ne se sauuera de ta fureur diuine,
Non pas mesme du Ciel l'éternelle machine.

Car où est celuy-là qui ne soit criminel
Par son propre peché, ou par l'originel.

Mais bien tu es celuy Dieu facile & ployable,
Qui es également & iuste, & pitoyable.

Qui donnes le loyer plus grand que le bien fait,
Et la punition moindre que le forfait.

Aussi ta pieté nos offenses surpasse:
Et donner au non digne est digne de ta grace.

Bien que dignes assez nous nous pouuons nommer,
Si dignes tu nous fais, & nous daignes aimer.

Doncques regardes nous de tes yeux pitoyables,
Soit comme seruiteurs, ou soit comme coupables.

Coupables sommes nous, si ta sèuerité
Regarde seulement à nostre iniquité.

Mais si tu as egard à la noble nature
Dont tu nous as ornez sur toute creature,

Sire, nous sommes ceux qui de creation
Te sommes seruiteurs & fils d'adoption,

Dont, hélas! d'autant plus coupable est nostre race,
Nous ayant le peché priuez de ceste grace:

Mais par la grace soit le peché surmonté,
Et croisse en nos forfaits l'honneur de ta bonté.


Car soit que ta sagesse, ou soit que ta puissance,
Vueille autrement de foy nous donner cognoissance,

L'honneur de ta bonté est trop plus grand en nous:
Et cest Amour là, Sire, est aimable sur tous,

Qui a peu le seigneur du Ciel faire descendre,
Et les membres de Dieu dessus la croix estendre

CANTIQUE CHRESTIEN.

Pour lauer nos pechez, par l'onde & par le sang,
 Que le fer inhumain fit sortir de ton flanc:
 Ainsi ta pieté & ton amour (ô SIRE):
 Fait que vainqueur du mal nostre bien se peut dir.
 O amour, ô pitié soigneuse de nos biens,
 Qui serue de tes serfs t'es faite pour les tiens:
 O amour, ô pitié de nous mal reconnue,
 Que nous auons quasi par nos pechez vaincue,
 Fay que de ton amour la violente ardeur
 Vers toy puisse eschauffer nostre lente froideur:
 Affranchi nous, Seigneur, de l'odieux service
 Qui nous a si long temps fait esclaves du vice:
 Esteins en nous l'ardeur de nostre vain plaisir,
 Et fay de ton amour croistre en nous le desir,
 A fin qu'ayant parfait le cours de nostre vie,
 Lors que deuant son Roy l'ame sera rauie
 De ton partage heureux iouissant avec toy,
 Tu luy sois comme pere & non pas comme Roy.



SONNETS.

A LA ROYNE MÈRE.

I.

*S*ie suis bien cogneu de Toy, de tes enfans,
 Et des grands plus amis de vertu, tant qu'il faille
 Que ma Muse à vous seuls se cōsacre, & qu'elle aille
 Haussât au ciel vos nōs, vos heurs, vos faits, vos rāgs:
 J'iray sur tout en toy cercher les dons plus grans,
 Que quelque heureux & rare aspect du ciel te baille,
 Qui pour toy contre Enuie & Fortune bataille,
 Brouillant, mais bienheurant, le beau fil de tes ans:
 J'iray cercher cela que tu as d'avantage,
 De nourriture & d'art, de conseil, & d'usage,
 N'oubliant l'heur recen du feu Roy ton seigneur,
 L'heur aussi, qui de Rois, & Roynes te fait mere:
 Mais si vaincre tu peux nostre Erreur & Misere,
 Je mettray ce pris double au plus haut de ton heur.

I I.

C'estoit grand bien (encor que la crainte ou contrainte
 T'ait peu mesme à bon droit tel vouloir esbranler)
 Que tu voulois tousiours entre nous rappeler
 La Paix, bannie hélas! par ardeur sainte ou feinte:
 Que tu as sans en rien t'espargner, & sans crainte
 D'aucun hasard, voulu peiner, sonder, aller
 Deçà delà, mander, desseigner, & parler
 Tant bien, pour par raison rendre l'ardeur éteinte.
 C'est grand bien, nonobstant tāt de sang, tant d'horreurs,
 Iuste amende payee à Dieu pour nos erreurs,

A a iij

SONNETS.

D'auoir en fin pourtant estouffé la grand' flame,
Et mesme desaigni la playe fresche, auoir
Tout fermé, tout couuert: mais c'est tout de pouruoir
Qu'un mal caché, couuert, ne se r'ouure & renflame.

II I.

Tu n'as pas seulement de nostre Paix souci,
Soit pour l'auoir bien sceu rechercher, & bien faire,
Soit pour la preseruer du trouble son contraire,
Mais nostre guerre en main tu as pris tout ainsi:
J'enten guerre licite, & non celle qu'ici
Un mal d'esprit à peu sinistrement attraire,
Pour du lien commun d'un seul Dieu nous distraire,
D'un seul Christ, d'un seul Roy, d'un seul país aussi.
Le Haure où ton aduis tout seul poussa l'armée,
De ton cœur, de ton heur, de ton droit anınee,
Les soldats enflammeꝝ & guerdonneꝝ par toy:
Les blesseꝝ recueillis, le lieu que tu ordonnes,
Où la vie honorable apres l'honneur leur donnes,
Monstrent que nous auons en vne Roıne un Roy.

A MONSIEVR.

Dv Croissant de HENRY toutes les autres parıs
Ne deuoyent pas sous luy remplir leur forme rōde:
Ceste merque par qui sentend le rond du monde,
Se gardoit à la race issüe d'un tel Mars.

FRANÇOIS soudain mourut: CHARLES hors des hasards
Et troubles, doit regir sa France en tout seconde:

ALEXANDRE-EDOVARĐ doit pour sa part secode
S'aller pousser au rang des Anglois EDOVARĐS:

C'est ton sceptre premier, mon vers est prophétique,
 L'un de tes noms, le tort, l'occasion t'ypique,
 Que ce mien vœu te soit un vœil continuel.
 Puis excité du nom d'ALEXANDRE, à ton frere
 Aidant, tous deux aidez du tiers destin prospere
 D'un HERCVLE, comblez le Croissant paternel.

A MONSEIGNEVR

LE DVC.

Tes seul, que ie pense, en tout le sang des Rois
 Tes ayeulx, qui as eu (non, ie croy, sans presage
 D'heureux & grand destin de grand' force & courage)
 Le nom d'HERCVLE, auquel prendre un patron
 tu dois.

Sois donc premierement nostre HERCVLE Gaulois,
 A ta langue enchainant les peuples de cet âge,
 Par leurs oreilles pris, & liez, d'un langage
 Plein du doux miel d'honneur, de vertus, & de loix.
 Cet âge en a besoin. Puis comme HERCVLE domte
 Tout rebelle, & tout monstre execrable surmonte,
 Asservant, nettoyant, pacifiant, tous lieux,
 Où tes freres, parens, alliez, & toymesmes
 Regnerez: pour apres tous les labeurs extremes,
 Du rang des Rois, te mettre en fin au rang des Dieux.

PERSONNAGES DE LA
COMEDIE D'EUGENE.

Eugene, *Abbé.*

Messire Jean, *Chappelain.*

Guillaume.

Alix.

Florimond, *Gentilhomme.*

Arnault, *Laquais.*

Pierre, *Homme de Florimond.*

Helene, *Sœur de l'Abbé.*

Matthieu, *Creancier.*

L'ÉV-



L' E V G E N E,
COMEDIE D'ESTIENNE
IODELLE PARISIEN.

PROLOGVE.

ASSEZ assez le Poëte a peu voir
L'humble argument, le comique deuoir,
Les vers demis, les personnages bas,
Les mœurs repris, à tous ne plaire pas:

Pource qu' aucuns de face sourcilleuse
Ne cherchent point que chose serieuse:
Aucuns aussi de fureur plus amis,
Aiment mieux voir Polydore à mort mis,
Hercule au feu, Iphigene à l'autel,
Et Troye à sac, que non pas un ieu tel
Que celuy là qu'ores on vous apporte.
Ceux là sont bons, & la memoire morte
De la fureur tant bien representee
Ne sera point: Mais tant ne soit vantee
Des vieilles mains l'escriture tant braue,
Que ce Poëte en un poëme graue,
S'il eust voulu, n'ait peu représenter
Ce qui pourroit telles gens contenter.
Or pour autant qu'il veut à chacun plaire,
Ne dédaignant le plus bas populaire,

P R O L O G U E.

Et pource aussi que moindre on ne voit estre
 Le vieil honneur de l'escrinain adextre,
 Qui brusquement traçoit les Comedies,
 Que celuy là qu'ont eu les Tragedies.
 Voyant aussi que ce genre d'escrire
 Des yeux François si long temps se retire,
 Sans que quelqu'un ait encore esprouué
 Ce que tant bon iadis on a trouué,
 A bien voulu dépendre ceste peine
 Pour vous donner sa Comedie Eugene:
 A qui ce nom pour ceste cause il donne,
 Eugene en est principale personne.
 L'inuention n'est point d'un vieil Menandre,
 Rien d'estranger on ne vous fait entendre,
 Le style est nostre, & chacun personnage
 Se dit aussi estre de ce langage:
 Sans que brouillant avecques nos farceurs
 Le saint ruisseau de nos plus saintes Sœurs,
 On moralise un conseil, un ercicit,
 Un temps, un tout, une chair, un esprit,
 Et tels fatras, dont maint & maint folastre
 Fait bien souuent l'honneur de son theatre.
 Mais retraçant la voye des plus vieux,
 Vainqueurs encor' du port obliuieux,
 Cestuy-ci donne à la France courage
 De plus en plus ozer bien d'auantage:
 Bien que souuent en ceste Comedie
 Chaque personne ait la voix plus hardie,
 Plus graue aussi qu'on ne permettroit pas,
 Si lon suyuoit le Latin pas à pas.

Iuger ne doit quelque seuere en soy,
 Qu'on ait franchi du Comicque la loy,
 La langue encor foiblette de soymesme
 Ne peut porter vne foiblesse extreme:
 Et puis ceux ci dont on verra l'audace,
 Sont vn peu plus qu'un rude populace:
 Au reste tels qu'on les voit entre nous.
 Mais dites moy, que recueilleriez-vous,
 Quel vers, quel ris, quel honneur, & quels mots,
 S'on ne voyoit ici que des sabots?
 Outre, pensez que les Comicques vieux
 Plus haut encor on fait bruire des Dieux.
 Quant au theatre, encore qu'il ne soit
 En demi-rond, comme on le compassoit,
 Et qu'on ne l'ait ordonné de la sorte
 Que lon faisoit, il faut qu'on le supporte:
 Veu que l'exquis de ce vieil ornement
 Ore se voüe aux Princes seulement:
 Mesme le son qui les actes separe,
 Comme ie croy, vous eust semblé barbare,
 Si lon eust eu la curiosité
 De remouller du tout l'antiquité.
 Mais qu'est-ce ci? dont vient l'estonnement
 Que vous monstrez? est-ce que l'argument
 De ceste fable encor n'auetz sceu?
 Tost il sera de vous tous apperceu,
 Quand vous orrez ceste premiere Scene.
 Ie m'en tairay, l'Abbé me tient la réne,
 Qui là dedans deuise avec son prestre
 De son estat qui meilleur ne pult estre.

L'EUGENE,

*La ja marchant, enrage de sortir,
Pour de son heur un chacun aduertir:
Et se vantant, si sa voix il deboûche,
De vous brider desiré par la bouche:
Et qui plus est sous la gaye merueille
De dérober vostre esprit par l'aureille.*

ACTE I. SCENE I.

Eugene, Abbé. Messire Iean, Chappelain.

Eugene.

E A vie aux humains ordonnée
Pour estre si tost terminée,
Ainsi que mesme tu as dit,
Doit elle, pour croire à credit,
Se charger de tant de trauaux?

Mef. Le seul souuenir de nos maux,
Qui ja vers nous ont fait leur tour,
Ou de ceux qui viendront un iour,
L'apprehension incertaine
Empoisonne la vie humaine:
Et d'autant qu'ils la font plus grieue,
Ils la font aussi bien plus brieue.
Mais qui sçait mieux en ce bas ci
Que vous, Monsieur, qu'il est ainsi?

Eu. Il ne faut donc que du passé
Il soit apres iamais pensé,
Il faut se contenter du bien
Qui nous est present, & en rien

N'estre du futur soucieux.

Mef. O grand Dieu, qui dist onques mieux!

Eu. Comment donc ne consent on point

De s'aimer soy mesme en ce poinct,

De se flater en son bon heur,

De s'auengler en son malheur,

Sans donner entree au souci?

Mef. C'est abus, il faut faire ainsi.

Eu. En tout ce beau rond spacieux,

Qui est environné des Cieux,

Nul ne garde si bien en soy

Ce bon heur comme moy en moy:

Tant que soit que le vent semeue,

Ou bien qu'il gresle, ou bien qu'il pleuve,

Ou que le Ciel de son tonnerre

Face paour à la pauvre terre,

Tousiours Monsieur moy ie seray,

Et tous mes ennuis chasseray.

Car serois-je point malheureux

D'estre à mon souhait plantureux,

Et me tourmenter en mon bien?

Ie ne vouŕay iamais à rien,

Sinon au plaisir, mon estude.

Mef. Ce seroit vne ingratitude

Enuers la fortune autrement,

Qui vous pourroit tant richement:

Car qui est mal content de soy

Il faut qu'il soit, comme ie croy,

Mal content de fortune ensemble.

Eu. Fortune assez d'heur me rassemble

L'EUGENE,

Pour me plaire en ce monde ici,
 Esclauant en tout mon souci:
 Sans trauail les biens à foison
 Sont apportez en ma maison,
 Biens, ie dy, que iamais n'acquirent
 Les parens qui naistre me feirent,
 Et qui ainsi donnez me sont
 Qu'à mes heritiers ne reuont,
 Ains pour rendre ma seule vie
 En ses delices assouuie,
 Ce que nous pratiquons assez,
 Tant qu'il semble que ramassez
 Tous les plaisirs se soyent pour moy.
 Les Rois sont sujets à l'es moy
 Pour le gouuernement des terres:
 Les Nobles sont sujets aux guerres:
 Quant à Iustice en son endroit,
 Chacun est serf de faire droict.
 Le marchand est serf du danger
 Qu'on trouue au païs estranger:
 Le labourreur avecque peine
 Presse ses bœufs parmi la plaine:
 L'artisan sans fin molesté,
 A peine fuit sa pauureté.
 Mais la gorge des gens d'Eglise
 N'est point à autre ioug submise,
 Sinon qu'à mignarder soymesmes,
 N'auoir horreur de ces extremes,
 Entre lesquels sont les vertus:
 Estre bien nourris & vestus,

*Estre curez, prieurs, chanoines,
Abbez, sans auoir tant de moynes
Comme on a de chiens & d'oiseaux,
Avoir les bois, auoir les eaux
De fleuues ou bien de fontaines,
Avoir les prez, auoir les plaines,
Ne recognoistre aucuns seigneurs,
Fussent ils de tout gouuerneurs:
Bref, rendre tout homme ialoux
Des plaisirs nourriciers de nous.
Mais que seruiroit t'expliquer
Ce que tu vois tant pratiquer,
N'estoit que ie me plais ainsi
En la memoire de ceci,
Voulant les plaisirs faire dire
Ou d'heure en heure ie me mire?
Au matin, quoy? Mes. Le feu leger,
De peur que le froid outrager
Ne vienne la peau tendrelette,
Le linge blanc, la chauffe nette,
Le mignard pignoir d'Italie,
La vesture à l'enui iolie,
Les parfums, les eaux de senteurs,
La court de tous vos seruiteurs,
Le perdreau en sa saison,
Le meilleur vin de la maison,
A fin de mettre à val vos flumes:
Les liures, le papier, les plumes,
Et les breuiaries ce pendant
Seroyent mille ans en attendant*

L'EUGENE,

*Auant qu'on y touchast iamais,
 De paour de se morfondre: mais
 Au lieu de ces sots exercices,
 De la musique les delices
 Auant que monter à cheual,
 Et puis & par mont & par val
 Voler l'oiseau, se mettre en queste
 Bien souuent de la rousse beste:
 Ou bien par les plaines errant
 Suiure le lievre bien courant,
 Pendant que moy Messire Iean
 Ie suë aupres le feu d'ahan,
 De taster les molles viandes,
 Pour vous les rendre plus friandes:
 Vous arriuez tous affamez,
 Les chaudières sont soudain humez,
 De paour de vicier nature:
 On fait aux tables couuerture,
 On rit, on boit, chacun fait rage
 De babiller du tricotage.
 On est saoul, on se met en ieu,
 Et puis son sent venir le feu
 De la chatouillarde amourette,
 Soudain en la queste on se iette,
 Tant qu'on reuienne tous taris
 Par ces pissesuses de Paris.*

*Eu. Tout beau Messire Iean, tout beau,
 Demoure là, d'un cas nouveau,
 Puis qu'à l'amour tu es venu,
 M'est à ceste heure souuenu,*

Pour lequel appelé r'auois.

Mef. *Quoy? comment? d'où vient telle voix?*

Auez-vous receu quelque offense?

Eu. *Non non, tout beau, seulement pense*

De me prester ici tes sens.

Tu sçais bien que depuis le temps

Que Henry magnanime Roy,

A mené ses gens avec soy

Iusques aux bornes d'Alemagne,

Amour qui se meist en campagne

Pour faire queste de mon cœur,

S'est rendu dessus moy vainqueur,

Me venant d'un trait enflammer,

Pour me faire ardemment aimer

Ceste Alix, mignarde & iolie,

Bague fort bonne & bien polie,

Pour qui, ô seruiteur fidelle,

Tu me vaux vne maquerelle.

Mef. *O que ie me tiens en repos,*

Pour voir où cherra ce propos.

Eu. *Iusqu'ici tant bien m'a serui,*

Que du tout en elle ie vi:

Et pour estre bon guerdonneur

Luy voulant courir son honneur,

Comme tu es bien aduerti,

Luy ay trouué le bon parti

De Guillaume le bon lourdaux,

Qui est tout tel qui nous le faut,

Et les ay marié ensemble.

Mef. *O fort bien fait.* Eu. *Mais que te semble?*

L'EUGENE,

L'ay feint que c'estoit ma cousine.

Mel. *La parenté est bien voisine,
Il n'y falloit esparagner rien,
Ce sont trois cens escus: & bien
Qu'est-ce pour vostre dignité,
Sinon qu'œuvre de charité?*

Eu. *Mais maintenant i'ay si grand' peur,
Que Guillaume sente mon cœur
Avec les cornes de sa teste.*

Mel. *Ha ventre bien il est trop beste,
Son front n'a point de sentiment,
Ny son cœur de bon mouvement:
Ho ho, quoy? craignez vous en rien
En cela un Parisien?*

*Le bon Guillaume sans malice
Vous est couverture propice,
Pour seurement brider l'amour.
Si fussiez allé chacun iour
Ce pendant qu'Alix estoit fille,
Planter en son iardin la quille,
A l'enui chacun eust crié:*

*Mais depuis qu'on est marié,
Si cent fois le iour on s'y rend,
Le mary est tousiours garend:
On n'en murmure point ainsi.*

*Et pais en ceste ville ci
On voit ce commun badinage,
De souffrir mieux un cocuage,
Que quelque amitié vertueuse.*

Eu. *Après, mon amour est douteuse:*

Elle crains que ceste mignarde
 D'aller autre part se hasarde.
 Car ses femmes ainsi friandes,
 Suiuent les nouvelles viandes.
 Et puis qui ne seroit ialoux
 D'un entretien qui m'est tant doux?
 Dés lors que j'ay chez elle entree,
 Je la trouue exprés apprestee,
 Ce semble, pour me recueillir:
 Elle me vient au col saillir,
 Elle me lace doucement,
 Et puis m'esireint plus fortement,
 L'entens si Guillaume est dehors,
 Bon iour mon Tout, dit elle alors:
 Mais si quand elle entend ma voix,
 Elle sent le cocu au bois,
 Ou bien en quelque lieu voisin,
 Bon iour (dit elle) mon Cousin.

Mes. Et quoy plus? Eu. Nous entrons dedans,
 Et ja d'un desir tous ardens
 Nous mirons nos affections
 Au miroir de nos passions,
 Qui sont les faces de nous deux:
 Souuent mollement ie me deulx
 Du temps, & elle se complaint
 Quel amour assez ne m'attaint.

Mes. O ducil heureux! Eu. Elle s'appaise,
 Elle accourt, & plus fort me baise:
 Puis s'arrestant elle se mire
 Dedans mes yeux. Mes. O doux martyre!

L'EVGENE,

- Eu. *Et folastrant elle rempoigne
Mes leures, qui font vne trongne,
A fin que d'elle elles soyent morfes:
Et quant est des autres amorces,
Pense que peut en cela faire
Celle qui se plaist en l'affaire.*
- Mel. *Qui pourroit estre homme tant froid,
Qui ne s'émeust en cest endroit?*
- Eu. *Mais où me suis ie promené?
Où l'amour ni a il ia trainé?
Ore donc sçache en cest affaire,
Comment il te faut me complaire
Au long discours de ceste chose.
Deux poinçts tous seuls ie te propose:
La peur que i'ay que ce sottard
Decouvre la braise qui m'ard:
Et la peur que i'ay qu'en ma Dame
Ne s'allume quelque autre flamme.
Au premier tu remediras,
Quand ce lourdaud gouverneras,
L'asseurant que i'ay bonne enuie
De luy aider toute sa vie:
Quand tu le meneras au jeu,
Quand l'amadouant peu à peu,
Tu le rendras ami de toy,
Autant que sa femme est de moy,
A fin qu'ayez l'entree seure.
Quant est du second, ie t'assure
Qu'il te faudra prendre cent yeux,
A fin de me la garder mieux:*

*Qu'on espie, que lon regarde,
 Qu'on s'enquiere, qu'on prenne garde
 De n'estre en embusche trouué,
 Apres auoir bien esprouué.
 Pour le loyer de ton office
 Je te voüe un bon benefice.*

*Mel. Grand mercy Monsieur, c'est de grace:
 Ne vous souciez que ie face,
 N'ayez de ces deux poincts esmoy,
 Dés ores ie pren tout sur moy.*

ACTE I. SCENE II.

Messire Iean.

AINSI, Dieu m'aime, on voit ici
 Maints auenglez, qui sont ainsi
 Que les flots enflez de la mer,
 Qu'on voit leuer, puis s'abysser
 Iusques au plus profond de l'eau.
 Ceux-ci se fichans au cerueau
 Vncontentement qu'ils se donnent,
 Dessus lequel ils se façonnent
 Le pourtrait d'une heureuse vie,
 Voyent soudain suiure l'enuie
 Du sort bien souuent irrité,
 Rabbaissant leur felicité.
 Songez à celuy qu'aucz veu,
 Ce braue Abbé tant bien pourueu
 Moins en l'Eglise qu'en folleie:
 Songez dis-ie, au mal qui le lie,

L'EUGENE,

Ains l'estrange tant doucement
 D'un foilastre contentement:
 Il se fait seul heureux, en tout
 Il n'imagine point de bout,
 Il ne preuoit, & ne preuient
 Au malheur, qui souvent aduient:
 Et qui pis est, voir il n'a sceu
 Qu'il est iournellement deceu.
 L'aveuglement est le moyen
 De tourner vn beaucoup en rien.
 Il est si fol, comme ie voy,
 De penser, Alix est à moy,
 Et me tient seul ami certain:
 Alix dy-ie plus grand putain
 Qu'on puisse voir en aucun lieu,
 Et qui veut sans crainte de Dieux
 Se bastir aux cieux vne porte,
 Par l'amour qu'à tous elle porte,
 Exerçant sans fin charité.
 Assez long temps elle a esté
 A vn Florimond, homme d'armes,
 Qui parauant sous les alarmes,
 Par qui son amour l'asservit,
 Long temps à Helene seruit,
 Sœur de ce bel Abbé mon maistre,
 Sans par son pourchas iamais estre
 Receu au dernier poinct de grace.
 Tant qu'estant vaincu de l'audace
 De sa maistresse impitoyable,
 Pour passer l'amour indomtable,

*Et amortir sa fantaisie,
Fust par luy ceste Alix choisie,
Laquelle il entretint tousiours,
Non pas seul maistre des amours,
Iusques à ce camp d'Allemagne,
Pour lequel se mist en campagne:
Mesmes on m'a dit qu'un grand zele
Florimond auoit enuers elle.*

*Mais qui veut bien aimer, ne face
Aux Parisiennes la chasse:
Et puis nostre Abbé, nostre braue
Fol masqué d'un visage graue,
Ce sot, ce messer coyon pense
Auoir eu seul la iouissance,
Et l'a mise en son mariage
A fin qu'il feist un cocuage
De mary & d'ami ensemble.*

*Mais, ie vous prie, que vous semble
Des morgues, que ie tiens vers luy?
S'il dit ouy, ie dis ouy:
S'il dit non, ie dis aussi non:
S'il veut exalter son renom,
Ie le pousseray par ma voix
Plus haut que tous les cieux trois fois.
Ainsi ie fais vn ameçon
Pour attraper quelque poisson
En la grand' mer des benefices,
Sont mes estats, sont mes offices,
Et qui n'en sçait bien sa pratique,
Voise ailleurs ouurir sa boutique.*

L'EUGENE,
ACTE I. SCENE III.

Guillaume. Alix. Messire Iean.

Guillaume.

HE Dieu quelle heureuse fortune
M'eust esté plus heureuse qu'une,
Ou quelle plus douce rencontre
En toute la terre se monstre,
Que celle là qu'ores i'ay faite
De ceste femme tant parfaite,
A qui Dieu m'a ioint pour ma vie?
Hé mon Dieu que i'ay bonne enuie
De t'en rendre grace à iamais!
Ah! ie t'en iray désormais
Souuent presenter des chandelles,
Et à la Roine des pucelles,
Qui m'a donné si chaste femme.
Sa beauté tout le monde enflamme:
Car ie voy bien souuent passer
Maints amourets que trespasser
Elle fait en les regardant:
Mais aucun n'y va pretendant,
Accablé deffous sa vertu:
Moymesme ie suis abbatu
Bien souuent de sa chasteté.
Car alors que suis excité
De faire le droit du mesnage,
Elle me dit d'un saint courage,

Esconte

Escoute mon mignon, contemple
 Du bon Ioseph la sainte exemple,
 Qui ne toucha sa sainte Dame.
 Nostre chair est vile & infame:
 Ces actes sont vilains & ords.
 Et qui nous damne, que le corps?
 Alors ie me mets en priere,
 Et luy tourne le cul arriere:
 Car helas (bon Dieu) tu ne veux
 Que lon blesse les chastes vœus.

Al. Qui est celuy que i'oy compter,
 Et tellement se contenter?
 Hamananda, c'est mon badault,
 Escouter ici me le faut,
 Pour sçauoir qu'il dira de moy.

Gu. Bon Dieu, ie suis tenu à toy!
 Outre cela elle est tant douce,
 Iamais ses amis ne repousse:
 Elle est à chacun charitable,
 Et enuers moy tant amiable,
 Que le monde en est estonné.
 Quantes fois m'at elle donné
 De l'argent pour m'aller iouer?
 Cil qui veut à Dieu se voïer
 Ne sera iamais indigent.
 Alix a tousiours de l'argent,
 Elle est sainte dés ce bas lieu:
 Car c'est de la grace de Dieu,
 Que cest argent luy vient ainsi,

Al. Je suis en paradis aussi,

L'EVGENE,

D'avoir un mary tel que j'ay:

Par ainsi sainte ie seray.

Gu. *Mesme quand ie me vais esbatre,
Si j'y estois trois iours ou quatre,
Elle n'en dit rien au retour
Non plus que d'un seul demi iour:
Et quand ie me veux excuser,
Et de tels mots vers elle yser,
Pardon ie vous suppli, ma femme,
Vrayment ce m'est un grand diffame
D'avoir demouré iusqu'à ores:
Je voudrois qu'y fussiez encores,
Mon ami, c'est vostre santé.*

Al. *Hé benest, que c'est bien chanté.*

Gu. *Et quand ie me treuve en mal-aise,
Je sens que sa priere appaise
La maladie que ie sens,
Elle sen court par ces conuents
De saint François, saint Augustin,
De l'abbaye saint Martin,
De saint Victor, de saint Magloire,
Pour faire prier. Al. Voire voire,
On y prie à deux beaux genoux.*

Gu. *Elle m'apporte à tous les coups
De ces saints conuents quelques choses:
Ou bien de quelque pain de roses,
Ou bien des eaux, ou bien du flanc,
Aucunes fois de leur pain blanc,
Et me dit que par les merites
Du bon saint, ces choses petites*

Ont pouuoir de guarir la fieure.

Al. Seroit perte s'il estoit lieure,
Les cornes luy sient fort bien.

Gu. Elle ne me moleste en rien,
Mesme quand malade ie suis
Elle ferme tout soudain mon huis,
Et de crainte de me fâcher
En autre lieu s'en va coucher:
Mais bien souuent ie sens de peur
Dedans moy debatre mon cœur,
Quand ma partie me deffaut,
Car i'entendy vn iour d'enhaut
Vn esprit qui fort rabaſtoit,
Lors qu'en mon liēt elle n'estoit.

Al. Ie retien d'un sermon ces mots,
Qu'un esprit n'a ny chair ny os.

Gu. Puis quand elle est malade aussi,
Vrayment ie luy fay tout ainsi,
Et me couche en quelque chambrette:
Mais helas! elle est tant flouette,
Qu'elle est bien souuent en malaise,
Ou elle feint, ne luy deplaise,
Pour accomplir en sainteté,
Quelque beau vœu de chasteté:
Non fait non, elle souffre peine:
Car la nuit bien fort se demaine.

Al. O que ie sens un doux martyre!
Ie creue ici quasi de rire,
Ie ne scaurois m'y arrester:
Mais ie vois ore l'accoster.

L' E V G E N E,

Gu. *Mon Dieu que ie serois marry.*

Al. *De quoy parlez-vous mon mary?*

Gu. *Ha nostre femme, Dieu vous gard.*

Ie meure si vostre regard

Ne m'a serui d'allegement

Contre mon facheux pensement.

Al. *Quel pensement?* Gu. *Le creancier*

M'a faict ore signifier

Qu'il veut que ie paye aujourdhy.

Al. *Auourdhy: c'est vn grand ennuy,*

C'est donné bien peu de respit,

Il n'en faut point estre despit,

Il faut prendre patiemment

Ce que nostre Dieu iustement

Pour nos commises nous enuoye.

Gu. *Il est vray, c'est la droite voye.*

Patience est d'Honneur la porte.

Al. *Patience est tousiours plus forte.*

Gu. *Ses dons sont à tous bien seans.*

Mais comment? qui entre ceans?

Auez-vous laissé l'huis ouuert?

Al. *Tout beau tout beau, j'ay decouvert*

Vn des plus grands de nos amis,

C'est le Chappelain, le commis,

Le fac totum de mon cousin.

Mef. *Et puis quoy? comment? vostre vin*

Est-il ja là bas mis en broche?

Al. *Il est trouble, car on le hoche*

Trois ou quatre fois tous les iours.

Gu. *Monsieur faites deux ou trois tours*

*Par le iardin en attendant:
M'amie enuoye ce pendant
Au meilleur sans craindre les frais.
Mef. Je vay donc là prendre le frais.*

ACTE II. SCENE I.

Florimond, Gentilhomme. Pierre, Laquais.

Florimond.

ORES que ie suis de retour,
I'ay consumé quasi ce iour
A contempler en ceste ville
De plusieurs la pompe inutile:
Ceux qui n'aguères en la guerre
Faisoyent leur cheuet d'une pierre,
Et qui du long chemin greuez
Auoyent leurs harnois engrauez
A longues traces sur le dos,
A qui presque on voyoit les os,
Ayans une face despite,
Du Soleil quasi demi cuitte,
Meslee en sueur & poudriere,
Oublians leur face guerriere
Se sont parez si mollement,
Qu'ils semblent venir proprement
Des nopces, & non de la guerre:
Mesmes aucuns vendent leur terre,
Les autres engaigent leur bien,
Les autres trouuent le moyen

D d iij

L'EVGENE,

De reconurer quelques deniers
 Pour enrichir les usuriers:
 Les autres vendent l'equipage,
 Harnois, cheuaux, & attelage,
 Et tout pour despendre en delices:
 Et au lieu des bons exercices
 Pour tousiours asseurer leur main,
 Le palais muguet en est plein,
 Où leurs parfums, & leurs ciuettes,
 Chose propre à leurs amourettes,
 Tirent les dames aux deuis,
 Qui presque y courent aux enuis,
 Au velours, au satin, à l'or,
 Et aux broderies encor,
 Nonobstant tout edict donné,
 Il est autant peu pardonné
 Qu'il seroit mesme entre les Princes
 En pleine paix de leurs provinces.
 Mais quoy? comment? où est l'enseigne,
 Où est la bataille qui saigne
 De tous costez en sa fureur?
 Où sont les coups, où est l'horreur,
 Où sont les gros canons qui tonnent,
 Où sont les ennemis qui donnent
 Iusques aux tentes de nos gens?
 Ha nous deuiendrons negligens,
 Et chasserons hors de memoire
 Le desir qu'auons de la gloire.
 Je confere ceste Cité,
 A ce que lon m'a recité

*Iadis de l'antique Capuë:
Car sa friandise nous tuë,
Comme les soldats d'Hannibal.
Quittons l'amour, laissons le bal,
Oublions ces molles rencontres,
Faisons tournois, faisons des monstres,
Et pendons encores les prix
Pour guerdonner les mieux appris.
Estimez-vous l'ennemi mort?
Sçachez que pour un temps il dort,
Pour veiller plus long temps apres:
Mesmes de iour en iour plus pres
Tâche s'approcher de nos forces:
Et apres les douces amorces,
Penseriez-vous les maux souffrir
Qui se viendront à nous offrir?
Endureriez-vous seulement
Les maux qu'eusmes dernièrement,
Par trois iours le deffaut de pain,
Maint facheux mont, aspre & hautain,
Ces gros brouillars, ceste gelee,
Et puis ceste pluye escoulee
Qui souuent seruoit de breuuage:
Ce flux de sang qui feist outrage
Sans espargner soldat ne Prince.
Ie trepigne, & les dents ie grince,
Quand ie voy l'excessif & braue
D'auoir un bel habit & graue,
Bien decouppé: ne passons pas
Des Gentilshommes les estats.*

L'EUGENE,

*Pour veoir quelque dame cogneuë
 Qu'on a devant la guerre veuë:
 C'est raison de se rafraichir.
 Mais depuis qu'on vient à franchir,
 Fy fy de superfluité.
 Mais ja trop me suis excité:
 Puis ie voy mon homme venir,
 A luy veoir ses gestes tenir
 Il querelle en soy quelque chose,
 Au fond de sa cervelle enclose.
 Ici le vay guetter de loing,
 Attendant que i'aye besoin
 D'aller avec ma bonne Alix
 Esprouuer le bransle des lits.
 Laquais, vois tu pas bien les mines?
 Pier. Ouy Monsieur, sont des plus fines.*

ACTE II. SCENE II.

Arnault, homme de Florimond. Florimond.

Arnault.

COMBIEN que mille fois & mille,
*J'aye veu & reueu la ville
 De Paris, où suis à ceste heure:
 Si est-ce qu'apres la demeure
 Que i'ay faite au camp d'Allemagne,
 Apres mainte & mainte montagne,
 Dont le souuenir maintes fois
 Me fait souffler dedans mes doigts.*

Apres

Après la soif, après la faim
Qui vint par le deffaut du pain:
Et après m'estre veu moy mesme
Bien deffiré, bien maigre, & blefme,
Paris ville mignarde & belle
Me semble vne chose nouuelle:
Aussi lon dit qui veut choisir
Le plus doux du plus doux plaisir,
Il faut auoir premier esté
Au mal auant qu'il soit gousté.
Puis-ie bien laisser la maison,
Sans que ie voye grand foison
De choses braues & pompeuses:
Et mesmement tant de pisseuses,
Qui se font rembourrer leur bas,
Promettent que ie n'auray pas
Le deffaut que i'auois au camp:
Mais au fort, en si grand ahan
Ie n'en auois pas grand enuie.
Mais que fais-ie, maugré ma vie?
En babillant trop ie demeure,
Monsieur m'a chargé qu'à ceste heure
Ie ne faillisse à le trouuer,
Il sen veut aller releuer
Contre son Alix les discors,
Pour veoir si luitter corps à corps
Vaut mieux que de combattre aux armes.
O les doux pleurs, hélas! les larmes,
Desquelles Alix parlera
Quand son amant elle verra.

L'EUGENE,

Mais, ô fort heureuse rencontre!

Je le voy, ie vais à l'encontre,

Peine n'auray de le chercher.

Flo. *J'auois beau ma face cacher,*

Mon Arnault me cognoist trop bien.

Et bien Arnault, de nouveau? Ar. Rien

Que ne sçachiez, comme ie croy.

Flo. *Astu entendu que le Roy*

Nous rappellera bien soudain?

Ar. *Le bruit est tel. Flo. Mais quel desdain:*

Les plaisirs qu' Alix ma mignonne,

Quand ie suis à Paris me donne,

A ceste fois me seront cours.

Et bien apres fay moy discours

Dece que tu as ouy dire?

Ar. *L'Empereur remasche son ire,*

Et grinçant les dents s'encourage,

Tant qu'on diroit voyant sa rage,

Et son appetit de vengeance,

Qu'il est tousiours en celle dance

Qu'il fait à l'enuers sus vn liect.

Flo. *Où est-il ore? Ar. A ce qu'on dit*

Il a desia le Rhin passé.

Flo. *Seroit-il bien tant insensé*

De venir mettre siege à Mets?

Ar. *On luy seruiroit de bons mets,*

Et si n'y seroit pas grand tort.

Car outre le nouveau renfort,

Les braues gens qui sont dedans,

Le feront mieux grincer les dents

Que iamais il ne feist encor.

Flo. *Pour le moins il ne tient à l'or,
Qui est le nerf de toute guerre,
Qu'il ne prenne toute la terre
Que ceste annee auons fait nostre.*

Ar. *Il attendra fort bien à l'autre,
Et à l'autre an encor après:
Je pense qu'il vient tout exprés
Pour Thionuille enuitailler.
Mais vous ne faites que railler,
Vous sçauẽz le tout mieux que moy.*

Flo. *Je m'enquiers seulement à toy,
Pour veoir si ce qu'on dit de luy
Accorde à cela qu'aujourd'huy
On m'a parmissiues mandé:
Et tu l'as fort bien accordé.
Puis donc que ce peu de loisir
Se donne ainsi à mon plaisir,
Je veux recompenser le peu
Par l'accroissement de mon feu,
Qui ja merend mort en viuant.
Mais Arnault compte moy deuant
Que vers ma mignonne ie voise,
Qu'elle estoit ceste forte noise
Que tu mouuois tantost en toy:
Je te voyois mouuoir le doy,
Et marmonner en tes deux leures,
Comme vn qui frissonne des fieures.
Songeois tu ainsi seul à part
A l'outrageuse Amour qui m'ard?*

Ee ij

L'EUGENE,

Ar. Rien moins, Monsieur. Flo. Et à quoy donc,
 Dymoy. Ar. Je me plaisoye adonc
 Aux gentilles delicateſſes,
 A l'heur, aux eſbats, aux careſſes
 Que lon reçoit ici, au prix
 Des maux où nous eſtions appris.

Flo. Je meure, c'eſt choſe terrible
 Qu'il eſt preſque au monde impoſſible
 De trouuer un, qui ne peuſt eſtre
 Contraire au penſer de ſon maiſtre:
 En cela ie me deplaiſois
 Où te plaire tu t'amuſois.

Ar. Pourquoi Monsieur? Flo. Car ceſte pompe
 Et brauade mollement trompe
 Les plus enflammez de courage:
 Et nos Gentilshommes ſont rage
 D'exceder meſme l'exceſſif,
 C'eſt ce qui me rendoit penſif,
 Et en moy meſme me plaignant,
 Quand tu t'en venois trepignant
 Pour me trouuer. Ar. Pourtant Monsieur,
 Sauſ tousiours voſtre aduiſ meilleur,
 Il me ſemble que c'eſt à ceux
 Qui n'ont point eſté pareſſeux
 De maintenir le droit de France,
 Oppoſant leur vie à l'outrance
 De ces aiglons Imperiaux,
 Apres tant & tant de trauaux,
 D'auoir pour reſfraiſſement
 En volupté contentement:

Non pas à ces pourceaux nourris
Dedans ce grand tect de Paris,
Qui n'oseroyent d'un iect de pierre
Eslongner les yeux de leur terre:
Non à plusieurs larrons honnestes,
Qui n'estans faits que pour des bestes,
D'un visage humain emmasquees,
Par pratiques mal pratiquees
Despendent encor aujourdhuy
Et le leur & celuy d'autrui,
En banquets, pompes, & delices,
Pour souuent estre appuy des vices.
Ce pendant mesme que le Roy
Ayant ses Princes avec soy,
Souffre maintes & maintes choses
Pour garder ces bestes encloses.
Non à ces petits mugueteaux,
Ces babouins aduocasseaux,
Qui pour deux ou trois loix rouillees
De ie ne sçay quoy embrouillees,
Cheuauchent les asnes leurs freres,
Auecleurs contenances fieres,
Meslans la morgue Italienne,
A fin qu'un gros sourcil s'en vienne
Les demander en mariage.
Ha ventre bien quel badinage.
Non pas, dy-ie, à ces mercadins,
Ces petits mugnets citadins,
Ces petits brouilleurs de finances,
Qui en banquets, & ris, & danfes,

L'EVGENE,

En toutes superfluitez
 Surmontent les principautez.
 Mais quant est de nos Gentilshommes,
 Qui est le propos où nous sommes,
 Bien qu'on croye toutes brauades
 Rendre les courages plus fades,
 Si celuy-là qui est plus braue
 Entendoit le battement graue
 D'un tabourin quasi tonnant,
 Ou bien d'un clairon estonnant,
 Il seroit mieux encouragé,
 Et plus tost en ordre rengé.

Flo. Ainsi le Ciel me soit ami,
 Si tu ne m'as mis à demi
 Par ta parole hors de moy.
 Quoy? comment? qu'est-ce que de toy
 Quand tu vas ainsi contestant?
 Un docteur n'en diroit pas tant:
 As tu tant l'escholè suiuié?

Ar. La meilleure part de ma vie,
 Et si estois des mieux appris:
 Mais ores les meilleurs esprits
 Aiment mieux soldats deuenir
 Qu'au rang des badauts se tenir.
 Mais comment est-ce que la chose
 Qu'en venant ie tenois enclose,
 Dont vous m'auçz interrogué,
 Nous a si fort pouffez au gué?
 Où sommes nous venus ainsi?

Flo. Nous nous sommes tous deux ici

Oubliez de nostre entreprise,
Toutesfois cest oubli ie prise:
Car l'une est bien plus reconurable,
Que l'autre tousiours n'est comptable.
Mais tournant bride à tous les dits.
Reuiendrons nous à nostre Alix,
Que mon cœur solement adore?
Faut-il que i'y voise desore,
Ou bien s'il vaut mieux que par toy
Soit faite l'entree auant moy,
Pour veoir si tu surprendras point
Quelque muguet, qui se soit ioint
A mon Alix par mon absence?

Ar. Elle est fidele, que ie pense.

Flo. Et quand aucun n'y trouueras,
Au mesnage regarderas,
Pour veoir s'elle n'a rien acquis,
Si ses habits sont plus exquis
Que n'estoient quand ie departy.

Ar. Sont tesmoins du nouveau party.

Flo. Tu noteras bien le visage,
Le froid, ou le chaud du courage,
Le parler, la ioye, ou le dueil,
Les caresses, & le recueil
Qu'elle monstrera. Ar. Laissez faire,
Reposez vous de ceste affaire,
I'espere encor de faire mieux.

Flo. Et ore que suis ocieux
A nostre Dame m'en iray,
Où pendant me pourmeneray,

L'EUGENE,

Faisant la court à mes pensees.

Ar. *Qu'elles soyent bien là caressées:*

Car c'est le lieu où se retire

L'amant, qui serf de son martyre

Fait maint regret, comme maint tour.

Flo. *Va va.* Ar. *Je suis ja de retour.*

ACTE II. SCENE III.

Helene, sœur de l'Abbé.

S i l'œil trompé ne me deçoit,
 Par la rue au matin passoit
 Florimond, ainsi qu'il me semble:
 Dont ainsi Dieu m'aime, ie tremble,
 Ayant peur que quelque fortune
 Soit à quelques vns importune:
 Car ie cognois bien son courage,
 Impatient de quelque outrage.
 Il m'auoit par long temps serui,
 Et me voüoit quasi sa vie,
 Mais vaincu par mon chaste cœur
 De son amour s'est fait vainqueur.
 Combien qu'outre le dernier poinct
 Florimond ne me despleust point:
 Et me laissant, comme i'ay sceu,
 D'une Alix a esté deceu,
 Fille qu'il pensoit auoir seul,
 Qui faisoit de plusieurs recueil:
 Mesmes auant qu'il eust esté
 Deux iours hors de ceste cité,

Piquant

*Ticquant à la guerre d'Almagne,
 Ceste maraude, ceste caigne,
 Enamoura l'Abbé mon frere,
 Si bien qu'elle trouua maniere
 D'arracher de luy mariage.
 O quel horreur, quel cocuage,
 Vn seul mot iamais n'en parlay
 A mon frere, & tousiours celay
 Qu'il me sembloit de l'entreprise.
 Car ie n'estois tant mal apprise
 Qu'il ne me deust bien faire part
 De ce qu'il brouilloit à l'escart,
 Pour luy compter la fable toute:
 Mais ores ie suis en grand doubte
 Que de ceste badinerie
 Se naisse aucune fascherie,
 Et ie vous iure en bonne foy,
 L'ame mon frere mieux que moy.
 Ore ne luy faut celer rien.
 Ho ho anda, ie le voy bien:
 La rencontre est tout à propos.*

ACTE II. SCENE IIII.

Eugene. Helene.

Eugene.

*I'AY tousiours cherché le repos:
 Mais puis que l'amour est passible,
 De l'auoir il m'est impossible,*

Ff

L'EVGENE,

*Car de mon amour m'absenter
Ce me seroit la vie oster.*

He. *Mon frere, Dieu vous doint bon iour,
Vous estes tousiours sus l'amour:
Amour vous court par les boyaux,
Amour occupe maints cerueaux,
Que bien aueuglement demeine.*

Eu. *Ho ho, Ma seur, qui vous ameine?*

He. *Puis que sus l'amour estions ores,
L'amour que i'ay vers vous, encores
Que n'ayeZ en ce merité,
Que mon cœur soit sollicité
De suruenir à vos dangers:
Car si nous estions estrangers,
Vous ne m'eussiez celé vos choses,
Tant que les auez tenu closes.*

Eu. *Qu'y a il donc? He. N'aimeZ vous pas?*

Eu. *Et que vous allez pas à pas:
Me voulez-vous prendre au filé?*

He. *Vous me l'auiez tousiours celé,
Mais ie l'ay bien sceu nonobstant:
N'aimeZ-vous pas Alix pourtant?
Sauuez-vous du prochain danger.*

Eu. *Qu'est-ce donc? faut-il tant songer?*

He. *Florimond que bien cognoissiez,
Qui mes amours a pourchassiez,
L'auoit aimee deuant vous,
Mais elle se change à tous coups:
Car dés lors qu'il fut departi
Elle choisit vostre parti.*

*Maintenant il est retourné,
 Il luy auoit beaucoup donné
 Pour à luy seul la maintenir.
 Regardez qu'il pourra venir
 Des amours qu'auex assopis
 Pour les vostres, & qui est pis
 Du mariage qu'auex fait.*

*Eu. O grand ciel, que t'ay-ie forfait?
 Veux tu faire si braue cœur
 Esclaue de quelque malheur?*

He. Ce que ie vous dis est certain.

Eu. Ha maugré bieu de la putain.

*He. Ne crions point tant en ce lieu,
 Il faut supplier au grand Dieu
 Que par luy soit remedié.*

Eu. A a vertu bieu c'est bien chié.

*He. Comment? qu'est-ce ci? quelle guise?
 Voila vn braue homme d'Eglise.*

*Eu. L'amour & la douleur extreme
 Me font absenter de moy mesme.*

*He. Voyez comme il serre les dents:
 Tout beau, tout beau, entrons dedans,
 On y pourra remedier:
 Que gaignez-vous d'ainsi crier,
 Sinon faire vn simple mal double?
 Ceci n'est pas vn si grand trouble:
 Florimond s'appaisera bien,
 Quand il verra qu'il n'y a rien
 De constance en ceste femelle:
 Il mettra son amour hors d'elle,*

L'EVGENE,

*Ou il en prendra comme vne autre
 Pour l'argent: quant à l'amour vostre
 Voudriez-vous aimer desormais
 Celle là qui n'aima iamais,
 Prenez qu'ayez auieu perdu
 Ce que vous auez despendu,
 Ne soyez pour si peu marry:
 Quant à Guillaume son mary
 Il est si treshomme de bien,
 Qu'il ne se soucira de rien.*
 Eu. *Quelque peu soulagé me sens.*
 He. *Entrons.* Eu. *Entrons, entrons, le temps*
Nous offrira quelque remede.
 He. *Celuy vainq' qui au mal ne cede.*
 Eu. *Si est-ce que le cœur en moy*
Me predit quelque grand esmoy.

ACTE III. SCENE I.

Arnault.

Florimond.

Arnault.

A *Dieux, qui de nostre entreprise
 Par celle que mon maistre prise,
 Sommes ores bien destournez!
 Nous pourroit on plus estonnez
 Rendre iamais tous deux ensemble?
 O Ciel, ô terre, que te semble
 De chose tant mal ordonnee?
 Toymesme maudit Hymenee*

Conducteur de trois cocuages
Au lieu de tes saintes mariages,
N'as tu rougi d'autoriser
Ces nopces tant à mespriser?
O vous, quelconques soyez vous,
Dieux celestes, qui entre tous
L'ardeur des pauvres embrasez,
De vostre ciel fauorisez,
Voulez-vous ores vous garder
De vostre foudre en bas darder,
Veu que meurdrir il conuiendrait
Ces transgresseurs de vostre droit,
Ces mocqueurs de vostre maistrise,
Laissans la femme mal apprise,
Laissans ceste infidelle dame?
Dame, mort bieu, veu tel diffame
Le nom de dame n'y conuient,
Laissans la pute qui ne tient
Compte de l'amant tant aimable,
Lequel d'un vouloir immuable
Luy auoit dedié sa vie:
Mais, peut estre, auez ceste ennie,
Faisans tort au premier lien,
Faire tort à l'aise & au bien
De ce mien maistre gracieux.
Mais i'en renie tous les cieux,
Si ie ne fais tomber en bas
Tant de iambes & tant de bras,
Que Paris en sera paué.
En despecte, ie suis creué

L'EUGENE,

De despit: qui ne le seroit
 Quand son maistre on offenserait?
 Ladre Abbé, meurdrier de vertu,
 Si ie m'y mets. Mais quoy? veux tu
 Pauvre Arnault, sans ton maistre faire
 Ce qui luy pourroit bien desplaire?
 En te faschant tu es venu
 Jusqu'au lieu où il s'est tenu.
 Pendant ce malheureux voyage
 Je gage que nulle autre image,
 Estant mesme en ce deuôt temple,
 Que celle d'Alix ne contemple:
 Mais quand il sçaura la nouuelle,
 Ha charbieu qu'il la fera belle,
 Il m'esspouuentera des yeux.

- Flo. Je voy entrer tout furieux
 Mon Arnault. Oy oy, que seroit-ce?
 On luy a fait peu de caresse,
 Il en hennit comme un cheual.
 Et bien Arnault? Ar. Et bien, mais mal.
 Flo. Comment mal? Ar. Le plus mal du monde.
 Flo. Si faut-il que ce mal ie sonde,
 Pour veoir s'il est ainsi profond.
 Ar. Assez pour vous noyer au fond,
 Si vous ne prenez patience:
 Mais faites au mal resistance,
 Et me laissez vanger du tout.
 Flo. Mort bien qu'est-ce? Ar. De bout en bout
 Je vous compteray le malheur,
 Moyennant que vostre douleur

Prenne le frein de la raison.
 Je suis allé à la maison
 De vostre Alix, où l'ay trouuee
 Dés l'heure assez bien abreuee:
 Car i'ay bien cogneu au respondre
 Que de crainte de se morfondre
 Elle auoit coiffé son heaume,
 Elle estoit avec vn Guillaume,
 Ainsi là dedans on l'appelle,
 Et autrement le mary d'elle.

Flo. Mary, sang bien. Ar. Laissez moy dire:
 Si de tout ne bridez vostre ire,
 Contenez vn peu pour le moins:
 Ils estoyent assis aux deux coins
 De la table, & au bout d'enhaut
 Vn gros maroufle, vn gros briffaut,
 Dont Messire Iean est le nom.

Flo. Dieu me perde i'y vois. Ar. Non non.
 Laissez moy de tout souuenir:
 A ce que i'ay peu retenir,
 C'est cet Abbé, ce braue Eugene.

Flo. Qui? le frere de mon Helene,
 Que i'ay si long temps pourmenee?

Ar. C'est celuy mesme, il l'a donnee
 A ce Guillaume en mariage.

Flo. Ha Dieu, ha grand Dieu, quel outrage!
 Qui me pourra faire enrager,
 A fin que ie puisse vanger
 Ceste iniure de sorte telle,
 Qu'il en soit memoire immortelle?

L'EUGENE,

*A a faux amour trop incertain,
 A a faulx & trop faulx putain,
 A a traistre Abbé, Abbé meschant,
 Moyne punais, ladre, marchant
 De tes resfripez benefices,
 A a puant sac tout plein de vices,
 M'as tu osé faire ce tort?
 T'auois-ie fait aucun effort?
 Ne m'auoit pas sa sœur Helene
 Asses tourmenté, sans qu'Eugene
 Son frere, ains son paillard, ie croy,
 Me vint redoubler ce desfroy,
 Seduisant vn pauvre cocu,
 Pour auoir tousiours part au cu
 Sous vne honnestre couuerture?
 Hou que la fin en sera dure.
 Auquel dois-ie premier aller,
 Il faut aller desfetaller
 De la maison ce qui est mien,
 Par le grand ciel i'auray mon bien,
 Et si sereZ bien froteZ ores,
 Si bien pis vous n'auEZ encores,
 Si ie deuois fendre la porte
 I'iray i'iray de telle sorte
 Que le mur tremblera d'horreur.*
 Ar. *A a que ie conçois de fureur,
 Je suis gros de donner des coups,
 Si ie ne les eschine tous
 Je veux estre frotté pour eux.
 AlleZ Monsieur. Flo. Allons tous deux.*

Acte

ACTE III. SCENE II.

Messire Iean. Eugene. Helene.

Messire Iean.

Tv Dieu ie l'ay rechappé belle!
Sentit on iamais frayeur telle
Que ce braue nous la donnoit?
Par ses parolles il tonnoit,
Et meslant son Gascon parmi
Nous faisoit pasmer à demi.
Encore tant esmeu i'en suis,
Que presque parler ie ne puis,
Tant qu'il me faudroit emprunter
Vne autre voix pour raconter
A nostre Abbé telle vaillance.
Mais encor en moy ie balance
Si ie dois faire ce message:
Florimond fera beau mesnage,
Si vers l'Abbé vient vne fois.
J'aimerois mieux tenir ma voix
A tout iamais en moy rencloüe,
Que de derobber quelque chose:
Je suis aux coups trop mal appris.
Et ceux-ci seront tous épris,
Qu'ils ne pourront estre qu'à peine
Desenuenimez de leur haine,
Que par l'espée vengeresse.
O esperance tromperesse!
Pourquoy m'auois tu iusque ici
Allaicté de ton lait ainsi,

L'EVGENE,

Pour tout soudain t'euanouir?
Pourquoy me faisois-tu iouir
De tes promesses si long temps,
Pour me mettre apres hors du sens,
Et me faire au desespoir proye,
M'estrangent d'un cordon de soye?
A a pauvre & deux fois pauvre prestre,
N'eusses-tu pas trouué bon maistre,
Qui t'eust nourri, qui t'eust vestu,
Qui t'eust fait ami de vertu,
Sans le pattelin contrefaire,
Et en plaissant à Dieu desplaire,
Pour tourner en fin en ma chance
Si pauvre & maigre recompense?
Adieu les complots & fineses,
Adieu adieu larges promesses,
Adieu adieu gras benefices,
Adieu douces meres nourrices,
En l'Abbé ie n'ay plus d'esper.
Mais que tardés-ie à l'aller voir?
Qui se fait compagnon de l'heur,
Se le face aussi du malheur.
Mais quoy? comment? d'où vient cela?
Qui a il de nouveau? voila
Nostre malheureux maistre Eugene
Qui sort avec sa sœur Helene.
Ie pense que si les hauts cieux
S'appaisoyent des larmes des yeux,
Qu'Helene plus en iettera
Qu'il n'en faut, quand ell le sçaura.

Eu. *Mon cœur s'est pris à tressaillir,
Je sens quasima voix faillir,
Ma face est ja toute blefmie,
Helene, sœur & bonne amie,
Quand i'ay regardé contre val,
Voici l'ambassadeur du mal,
Voici mon Chappelain qui vient:
A veoir la face qu'il nous tient
Le malheur iure contre nous.*

He. *Las mon frere que ferez vous?
Mais las que feray-ie ô flouette?
Que deuiendray-ie moy pauurette?
Resteray-ie en ce monde ici,
Voyant mon frere en tel souci?
Mon esprit fuira comme vent:
Mais ie vais courir au deuant,
Je veux l'infortune sçauoir.
Messire Iean ie puis bien voir
Que quelque chose est suruenüe.*

Mef. *Les Dieux ont promesse tenue:
Après l'heur on sent le malheur,
Après la ioye la douleur,
Et la pluye après le beau temps.*

He. *O Dieu retien en moy mes sens,
Ou ie cherray en pasmoison.*

Eu. *Que la douleur est grand' prison,
Je me sens presque aussi faillir.*

Mef. *Et vous souliez si bien saillir
En vostre aise contre les cieux,
Et disiez qu'estre soucieux*

L'EUGENE,

En rien ne conuenoit à vous.

Eu. *O Iupiter que sommes nous!*

Pouuons nous rien de nous promettre?

Mef. *Et vous souliez sous le pied mettre*

Toute inconstance & changement,

Vous vantant qu'eternellement

Non autre que vous, vous seriez,

Et tous les ennuis chasseriez?

Mais il vaut mieux vn repentir,

Bien qu'il soit tard, que d'amortir

La cognoissance que Dieu donne

Par le malheur de la personne.

Eu. *Mais encores laissons nos pleurs,*

Retenons vn peu nos douleurs,

Ne donnons point tant à la bouche

Que les oreilles on ne touche.

Qui a-il, dy? Mef. Tantost i'estois

Chez Alix où ie banquetois

Auec Guillaume pour vous plaire,

Comme me commandiez de faire,

Quand à vn instant est entré

Vn soldat fort bien accoustré

D'equippage requis en guerre,

Qui vouloit mettre tout par terre,

Blasphemant tous les cieux, marry

D'ouir nommer ce mot mary.

He. *Elle qu'at elle respondu?*

Mef. *Toute tremblante elle a rendu*

Ces responce, Et bien Arnault

La plus sainte plus souuent fault:

Mais on appaise de Dieu l'ire
 Quand du deffaut on se retire:
 L'Abbé mon cousin me voyant
 En paillardise foruoyant,
 Ma mise avec cet homme ci,
 Avec lequel ie vis ainsi
 Que doit faire femme de bien.
 Pute (dit-il) ie n'en croy rien,
 Il n'y a point de cousinage,
 Il t'a mis en ce mariage
 Pour seurement couvrir son vice:
 Mais nous donnerons tel supplice
 A toy, à ton Abbé Eugene,
 Et à sa pute sœur Helene,
 Qui se vange ainsi de mon maistre,
 Que la memoire pourra estre
 Iusqu'à la bouche des neveux.
 Il faisoit dresser les cheueux
 A moy & à Guillaume aussi.
 He. Et Guillaume quoy? Mel. Tout transi,
 Estonné de ce cas nouveau
 Ne sonnoit mot non plus qu'un veau:
 Et l'autre branflant sa main dextre,
 Enragé va querir son maistre.
 Et puis vostre Alix de crier,
 Et Guillaume de supplier,
 Alix detranche ses cheueux,
 Et Guillaume fait de beaux vœux
 A tous les saincts de paradis.
 Ie suis seur que les estourisd

L'EVGENE,

Vous donneront apres l'assaut.

He. *Las mon frere le cœur me faut!*

Eu. *Las ie ne puis rien dire aussi!*

Tençons vn peu tous à ceci.

He. *Mais quel penser? Mel. Il ne faut pas*

Mesme prochain de son trespas,

Abandonner du tout l'espoir.

He. *Mais quel espoir? Mel. On peut bien voir*

Que vostre cœur n'est point viril.

He. *Quel cœur aurois-ie? Mel. Quel? faut il*

Tant obeir à la douleur,

Qu'on se laisse vaincre au malheur?

Pençons: peut estre que les Dieux

Nous conseilleront. Eu. Il vaut mieux,

Puis qu'ainsi le mal nous affôle,

Qui blesse & l'ame & la parolle,

Dedans la maison nous retraire

Pour mieux esplucher cest affaire.

ACTE III. SCENE III.

Alix. Florimond. Guillaume.

Arnault. Pierre.

Alix.

A L'aide. Flo. *Je suis au secours.*

Gu. *Tout beau, bellement ie m'encours,*

I'en arracherois bien autant.

Flo. *Je perisse, tu seras tant*

Et tant & tant de moy battue.

Qui me tient que ie ne te tue,

Pute, m'as tu fait tel outrage?

Me fais tu forcener de rage?

Al. *Helas Monsieur pour Dieu merci!*

Flo. *Tu n'es pas quitte pour ceci,*

Tousiours se renouuellera

La playe, & en moy saignera:

Mais laissons ici la vilaine,

Arnault ceste maison est pleine

De mes biens, qu'il faut emporter.

Al. *Monsieur voulez-vous tout oster?*

Ar. *Il auroit mesme bonne enuie*

De t'oster ta meschante vie,

S'il y pouuoit auoir honneur.

Flo. *Sus en haut. Ar. Sus donc Monseigneur.*

Flo. *Laquais trouue des crocheteurs.*

Pier. *I'y vois Monsieur, & quant à eux*

Ils voleront bien tost ici,

N'ont ils pas des ailes aussi?

Al. *O que ie suis au monde nec*

Pour estre au malheur destinee!

Quel malheur auroit bien enuie

Sur le grand malheur de ma vie?

A a faulx marâtre nature,

Pourquoy m'ouurois tu ta closture?

Pourquoy vn cercueil eternal

Ne fis-ie au ventre maternel?

Mais, las! il faut que chacun pense

Que tousiours telle recompense

Suit chacun des forfaits, qui traine

Pour s'acquerra sa propre peine.

L'EUGENE,

*Sus donc Esprit, sois soucieux:
Sus donc, sus donc pleurez mes yeux,
Ostez le pouvoir à la bouche
De dire le mal qui me touche.*

ACTE III. SCENE I.

Guillaume.

S'IL y a eu personne aucune
Plus enuié de la fortune
Et du bon heur, que ie suis ores,
Ie veux estre plus mal encores.
Helas, qui eust ceci pensé!
Ie ne le croy pas : offensé
M'ont en cela ces gens de guerre,
Et pendant de çà delà i'erre,
Que lon bat ma pauvre Innocente.
Suis-ie tant sot que ie ne sente
Quand ie suis tousiours avec elle
Si elle m'est tant infidelle?
Mais quoy? elle a ja confessé
Que Dieu elle auoit offensé
Avec Monsieur le gentilhomme:
C'estoit de grand' peur, ainsi comme
Ceux-là que lon gesne au palais,
Confessent des forfaits non faits.
Ie ne sçay, ie n'en sçay que dire,
Sinon que rendre mon mal pire,
D'autant plus que i'y penseray:
Par deuant l'Abbé passeray,

Qui

*Qui sera, peut estre, à sa porte,
A celle fin qu'il me conforte,
Encore qu'il soit aujourdhuy
La cause de tout mon ennuy.*

ACTE IIII. SCENE II.

Matthieu, Creancier. Eugene. Guillaume.
Helene. Messire Jean.

Matthieu.

ON m'a maintenant rapporté
Qu'on auoit à Guillaume osté
Tous les meubles de sa maison:
Depuis que lon prend la toison
Il conuient au mouton se prendre.
Mais où est il? il luy faut rendre
Aujourdhuy ce que i'ay presté,
S'il ne vouloit estre arresté
Dedans l'enfer du Chastellet.
Est-il rien au monde si laid
Que de frauder ses crediteurs?
Ie suis troublé, ces transporteurs
Ore m'ont rendu estonné.
Auroit il bien tout façonné
Craignant vne execution:
Auroit-il fait vendition?
Où le trouueray-ie à ceste heure,
Puis qu'il n'est pas où il demeure?
Chez son Abbé, comme ie croy.
I'y vois, i'y vois. Eu. Mais ressons moy,

Hh

L'EVGENE,

Ont ils dit qu'ils viendront chez nous
Incontinent? Gu. D'effendez vous:
Car ie suis seur qu'ils le feront,
Et s'ils peuuent outrageront.

Eu. Las que diray-ie! He. Et que feray-ie!

Mef. Le malheur prend bien tost son siege
Dedans ceux qui n'y pensent point.

Gu. Ils me mettront en piteux poinct,
Si lors m'y rencontrent aussi.

Eu. Les Sergens sont ils prés d'ici?

He. Quoy Sergens? laissons ce moyen.

Mat. A la bonne heure ie voy bien
Mon Guillaume deuant la porte
De son Abbé, qui le conforte,
Peut estre, des biens emportez.
Ie m'approche. Gu. De tous costez
Le malheur est mon deuancier:
Hélas! voici mon creancier.

He. Hé qu'il vient à heure opportune
Pour soulager vostre fortune.

Mat. Et bien Guillaume de l'argent?

He. Pour suiuez-vous vn indigent,
Estes vous forclus d'amitié?

Mat. La raison chasse la pitié,
Il faut payer. He. Et s'il n'a rien
De quoy payer? Mat. Il payra bien:
Le corps est de l'argent le pleige.

He. Mais s'il n'a rien? Gu. Comme aussi n'ay-ie.

He. Son cercueil est-ce la prison?

Eu. Bien bien, entrons en la maison,

*On pourra faire quelque chose:
Ou bien si rien ne se compose
Soyons tous en tout malheureux.*

*Mat. Je ne suis pas tant rigoureux
Que ie n'entre bien avec luy,
Pour l'attendre tout aujourd'hui.*

ACTE IIII. SCENE III.

Florimond. Arnault.

Florimond.

O Ciel gouverneur, quel edict
Dresses tu au pauvre interdit
De sa lieffe coustumiere!
Ou quelle ordonnance meurdriere,
Quelle bourelle destinee
A ce iour pour moy ramenee!
Le haut Soleil, qui pour couronne
Son chef de mille feux couronne,
M'apportoit-il ja cest edict,
Lors que laissant le iaunelict
A par la grand' lice ordonnee
Commencé sa seiche traisnee?
Mais quoy? la fureur me transporte,
Mes ennuis m'ouurent vne porte
Incogneüe à tous mes esprits:
Tant que ie suis du dueil épris.
Je suis mort, ie peri, c'est fait,
Ma vie avec tout son effet

Hh ij

Dependrez de ceste amour mienne:
 Et faut-il ore que ie vienne
 Perdre ce qui me faisoit viure?
 Puis apres si ie veux poursuiure
 Et vanger telle cruauté,
 La iustice est d'autre costé,
 Qui ja, ce me semble, me chasse,
 Et mes biens & mon chef menasse.
 Si i'assopi ceste vengeance,
 Je viendray sentir telle outrance
 Que despit me fera creuer.

Ar. Ne vous vueillez ainsi greuer,
 Tous ces mots auront guarison.
 Premier quant est de la poison,
 Qui tellement vous a deceu,
 Que, comme dites, n'avez sceu
 En ce monde viure sans elle,
 La contrepoison infidelle
 A ceste poison hors pouffee:
 Quant à la iustice offensee,
 Qui contre vous se leueroit,
 Quand le faux tour on vengeroit:
 De cela n'ayez peur aucune,
 Je me hasarde à la fortune.
 Tout seul demain ie m'en iray,
 Et nostre Abbé ie meurdri-ray.
 Si ie suy ignorez le cas:
 Si ie suis pris, dites que pas
 N'estiez de ce fait consentant.
 J'aime mieux seul mourir que tant

En vous voyant souffrir, souffrir.

Flo. *Vrayment c'est brauement s'offrir.*

Ar. *Ainsil' ire n'assopirez,*

Et de despit ne creuerez.

Flo. *Baste baste, laissons ceci,*

Le mal tousiours croist du souci,

Face la iustice du pire,

Il me faut dégorger mon ire,

Il faut que ce braue mastin

L'occie demain au matin,

Me faisant au mal qui me mine

Par son sang vne medecine.

ACTE III. SCENE III.

Eugene. Messire Iean.

Eugene.

Est-il possible que ma bouche
Pour me complaindre se deboûche?

Est-il possible que ma langue

Tire du cœur vne harangue,

Pour deuant le ciel mettre en veüe

Le mal de l'ame despouruenë?

Non non, la douleur qui m'atteint

Toutes mes puissances esteint,

Et l'air ne veut point sentonner,

De crainte de s'empoisonner

Du dueil en ma poitrine enclos.

Mef. O vray Dieu quels horribles mots!

Hh ij

Eu. Pource qu'il semble que malheur
 Ait remis toute la douleur
 De chacun des autres sur moy:
 Je porte de ma sœur l'esmoy,
 Tant pour sa petite portee,
 Que pource que desconsortee
 Elle est à tort: car ce monsieur
 La nomme cause du malheur.
 De Guillaume non seulement
 Il me faut porter le tourment,
 Mais à ce que ie voy sa debte.
 Et combien qu'Alix soit subiete
 A tromper ainsi ses amis,
 Mon cœur n'est pas hors d'elle mis:
 Je soustien encor ces travaux,
 Et puis ie porte tous mes maux,
 Dont l'un est tel que le guarir
 N'en sera que le seul mourir:
 Je cognois trop bien Florimond.

Mef. Premièrement estonné m'ont
 Avec leurs mots, comme estocades,
 Caps de dious, ou estaphilades,
 Ou autres brauades de guerre:
 Sont de ceux, dont l'un vend sa terre,
 L'autre un moulin à vent cheuauche,
 Et l'autre tous ses bois esbauche
 Pour faire une lance guerriere:
 L'autre porte en sa gibbectière
 Tous ces prez, de peur qu'au besoing
 Son cheual n'ait faute de foin.

*L'autre ses bleds en verd emporte
 Craignant la faim, ô quelle sorte
 Pour brauer le reste de l'an!
 Vous fâchez vous des mots de camp:
 Il faudra pourtant esprouuer
 Tous les moyens pour paix trouuer.*

*Eu. Il le faudra, c'est chose feure,
 Ou bien de la mort ie m'asseure,
 Je le sçay bien. Mef. Pouruoyez y.*

*Eu. Mais laisse moy tout seul ici
 Pour quelque peu, i'y resueray,
 Retourne apres. Mef. Je le feray.*

ACTE V. SCENE I.

Messire Iean. Eugene.

Messire Iean.

D*ESI A trop ici ie sejourne,
 Vers Monsieur ores ie retourne,
 Qu'à son vueil i'ay tantost laissé
 A demi, ce semble, insensé,
 En si triste & malheureux soing:
 Il ne le faut laisser de loing,
 De peur que dueil se tourne en rage.*

*Eu. O fortune à double visage,
 Prospere à ce que i'ay pensé!*

*Mef. Auez-vous en vous compasé
 Moyen de ces maux amortir?*

Eu. Fort bien fort bien, si consentir

L' E V G E N E,

*A son presque mourant Eugene
Ne refuse ma sœur Helene.*

Mef. *D'elle ie m'asseure si fort
Que iusqu'à l'autel de sa mort
S'estend l'amitié fraternelle.*

Eu. *Tout cest accord ne gist qu'en elle,
S'ell' le fait, tant qu'elle viura
Sa vie à elle se deura,
Et si ie luy deuray ma vie.*

Mef. *Desia ie brusle tout d'enuie
De sçavoir ce que voulez dire.*

Eu. *Il faut secrettement conduire
Ceste chose, à fin que l'honneur
Offensé, n'offense mon heur:
Et n'estoit que bien ie m'asseure
Que ton oreille sera seure,
Ie ne decelerois la chose
Que d'executer ie propose.*

Mef. *Vne chose à moy recitee,
C'est comme vne pierre ietee
Au plus creux de la mer plus creuse.*

Eu. *O que ma pensèe est heureuse,
Si ma sœur esbranler ie puis!*

Mef. *En cela son pleige ie suis.*

Eu. *C'est que comme tu sçais assez,
Deux ans se sont desia passez,
Depuis que Florimond quitta
L'amour qui tant le tourmenta,
A l'objet de ma sœur Helene,
Et le quitta à si grand'peine,*

Qu'il

Qu'il eust voulu que sa santé
Eust en la seule mort esté.
Mais il auoit esté confus
D'un & d'un renfort de refus:
Puis l'amour qui tant le pressa,
A l'égarade se passa,
Las, comme en mon damp i'ay bien sceu,
Auec Alix qui l'a deceu.
Mais ore si on luy parloit
De ma sœur, dont tant il brusloit,
Je suis sœur que non seulement
Enseueliroit ce tourment,
Mais qu'il rendroit toute sa vie
A mon commander asservie.
Parquoy ie veux prier ma sœur,
Que sans offense de l'honneur,
Elle le recoiue en sa grace,
Et iouissant elle le face.
Son honneur ne sera foulé.
Quand l'affaire sera celé
Entre quatre ou cinq seulement,
Et quand son honneur mesmement
Pourroit recevoir quelque tache,
Ne faut il pas qu'elle m'arrache
De ce naufrage auquel ie suis,
Et qu'elle mesme ses ennuis
Elle tourne en double plaisir?
Mes. Sçauroit elle mieux choisir?
O que chacun eust ce bon heur,
De faire tousiours son honneur

L'EUGENE,

Vn bouclier pour sauuer sa vie.

Eu. Elle serabien esbahie,

Quand de ce la viendray prier.

Mef. Point, laissez la moy manier.

Mais quant au creancier comment?

Eu. Ce m'estoit tourment sur tourment:

Mais cestuy est bien plus facile.

Si n'ay-ie pourtant croix ny pile.

Mef. Quoy donc? il ne faut delayer,

C'est cas raclé il faut payer,

Ou que Guillaume entre en prison.

Eu. Vne Cure en fera raison,

On trouuera bien acheptant.

Mef. Que trop que trop, il en est tant

Par ci par là dans ceste ville,

Qu'il faudroit mille fouëts & mille

Pour chasser les marchans du temple.

Eu. Le marché de Romme est bien ample.

Mef. Mesmes il pourroit estre ainsi,

Que si ce bon Creancier ci

Auoit enfans, il la voudroit,

Mieux qu'une terre elle vaudroit,

Et ne luy cousteroit si cher.

Eu. Or sus donc, il faut depescher

Le premier poinct: ie vais deuant.

Mef. Allez donc, ie vous vais suiuant.

ACTE V. SCENE II.

Guillaume. Matthieu. Helene.

Eugene. Messire Iean.

Guillaume.

ENCORES que les maux soufferts,
 Et ceux qui sont encore offerts
 Me soyent griefs, Sire mon ami,
 S'est-ce que presque à demi
 Je suis en ce lieu soulagé.
 Aa que ie suis bien allegé
 D'estre sous la tutelle & garde
 D'un homme tant saint & qui me garde.
 Sire vous ne pourriez pas croire
 De quel amour il m'aime, voire
 Jusques à prendre tant d'esmy
 De venir mesme au soir chey moy
 Pour veoir si ie me porte bien,
 Il ne souffriroit pas en rien
 Qu'on nous feist ou tort, ou diffame:
 Il aime si tres tant ma femme,
 Que plus en plus la prend sous soy.

Mat. Sus donc, courage esueille toy
 Mon bon ami, & ne te fâche,
 Je te ferois quelque relâche,
 S'il estoit en moy volontiers:
 Mais i'ay affaire de deniers.

Gu. Payer faut, ou tenir prison.

Mat. C'est bien entendu la raison:
 J'aime ces gens qui quand ils doibuent,
 Volontiers le quitte recoient.

He. Vos raisons ont tant de pouuoir
 Sur ce mien debile sçauoir,

Ii ij

L'EVGENE,

*Que respondre ie ne sçaurois:
Et quand encore ie pourrois,
Que gaigne ton de contester
Quand on s'y voit necessiter?
L'amour, Frere, que ie vous porte,
A ma honte ferme la porte,
Voulant contregarder ce iour
Nos deux vies par fol amour:
Et quand malheur m'en aduiendra,
Et que tout le monde entendra
Que par deux hommes, voire deux,
Que chacun estime de ceux
Qui sont desia saincts en la terre,
Contre ma renommee i'erre,
On me tiendra pour excusée,
Comme ayant esté abusée,
Ainsi que femme y est sujette:
Et puis lon dira, la pauurette
N'osoit pas son frere esconduire.*

Eu. Vostre honneur n'en sera point pire.

*Ceci reuelé ne sera:
Et au pis quand on le sçaura,
Laissez le vulgaire estimer.
Est-ce deshonneur que d'aimer?*

He. Non, comme i'estime en tel lieu:

*Mesmement ainsi m'aide Dieu,
Si Florimond ne m'eust laissée,
Et qu'il n'eust Alix pourchassée,
La course du temps eust gaigné
Sur ce mien courage indigné,*

Et tout ce trouble eust esté hors.

Meſ. Il vaut mieux maintenant qu'alors:

Car apres Vne longue attente

Vne amour en eſt plus contente:

Et, peut eſtre, il aura courage

De faire apres le mariage:

Ce vous eſt vn parti heureux.

Eu. Puis qu'il en eſt tant amoureux,

Quand nous ſerons amis enſemble,

I'en ſeray moyen, ce me ſemble.

He. Mais de quoy ſeruent tant de coups

Pour gaigner ce qui eſt à vous?

Faut-il que gayement ie die,

Ie ſuis en meſme maladie:

Il n'y a rien qui plus me plaiſe,

Ore ie me ſens à mon aiſe.

Eu. O Amour que tu m'as aidé,

Aueugle tu m'as bien guidé,

D'aiſe extreme mon cœur treſſaut.

Meſ. Par bien i'en vois faire ce ſault.

Que reſte plus? Eu. Rien qu'à ceſte heure

Te transporter en la demeure

De Florimond, & l'aduertir

De cet amour ſe diuertir,

Qu'il laiſſe enuers nous toute haine,

Qu'il laiſſe Alix, & qu'on rameine

Chez elle ce qu'on luy a pris,

Et que ſil a gaigné le pris

Sus vne amante damoyſelle,

Qu'au moins ſon auenture il cele.

L'EUGENE,

*Après chez Alix t'en iras,
Et la foiblette aduertiras,
Que sommes ensemble rejoints,
Sans luy declarer par quels poincts.
Car quand femme a l'oreille pleine,
Sa langue le retient à peine.*

Hc. Voy voy. Eu. Tu n'oublieras aussi

*Qu'elle vienne souper ici,
I'y feray pourueoir à cest' heure.*

Mef. Je feray bien courir demeure.

*Je vous pry' notez la maniere.
Mais ne voila pas vn bon frere.
O Dieu qu'on se frotera bien,
Siest-ce que ie me retien
Quelque lopin à ceste feste.
Il faudra que ie mette en teste
A mon Abbé, de me ranger
A quelque osselet pour ronger.*

ACTE V. · SCENE III.

Eugene. Matthieu. Guillaume.

Eugene.

Si les prisonniers des enfers
Auoyent tous debrisé leurs fers,
Si Sisyphé estoit deschargé,
Ou si Tantale auoit mangé
Ce qu'en vain poursuit son desir,
Ils n'auroyent point tant de plaisir ·

Qu'a maintenant Monsieur Eugene.

Ha voila voila bonne Helene,

La fraternité se ressemble.

Si faut-il que i'assemble ensemble

Guillaume & son anglois Matthieu,

Pour les accorder en ce lieu.

Guillaume, & vous Sire. venez,

Vous estes vous point demenez

D'auoir esté tous seuls autant?

Mat. Nenny. Eu. *Vous voulez du content,*

Il l'entens bien. Mat. C'est la raison.

Eu. *Auez-vous en vostre maison*

Grand nombre de fils? Mat. Trois. Eu. Je prise

Ce nombre qui est saint: l'Eglise

En aura elle quelqu'un d'eux?

Mat. *J'en feray de l'Eglise deux:*

Car ie veux tendre aux benefices.

Eu. *Toutes choses me sont propices.*

Or ça si i'auois d'auenture

Quelque belle petite cure

Valant six vingts liures de rente.

Mat. *Dites le mot, mettez en vente,*

Je mettray dessus mon denier.

Gu. *Comment, Monsieur, il est banquier,*

Il en fait tous les iours traffique.

Eu. *Il en entend mieux la pratique.*

Que me voulez-vous donner or'?

Mat. *Deux beaux petits cent escus d'or,*

Sus lesquels ie me payeray.

Eu. *Allez les querir, ie feray*

L'ÉVGENE,

Tandis au soupper donner ordre.

Mon ami Guillaume il faut mordre,

Et mon argent estoit failli.

Or ça tu estois assailli

Ce iour de tous costez sans moy,

Je t'ay mis hors de tout esmoy:

Tes meubles rendus te seront,

Tes crediturs se payeront,

Ta femme fera paix aussi

A Florimond. Gu. Hé grand merci

Monsieur, ie suis du tout à vous.

Eu. Il faut maintenant qu'entre nous

Tout mon penser ie te decèle:

J'aime ta femme, & avec elle

Je me couche le plus souvent.

Or ie veux que d'oresnauant

J'y puisse sans souci coucher.

Gu. Je ne vous y veux empescher,

Monsieur ie ne suis point ialoux,

Et principalement de vous:

Je meure si i'y nuy en rien.

Eu. Va va tu es homme de bien.

ACTE V. SCENE IIII.

Florimond. Arnault.

Arnault.

O *Dieux, quel astre en ma naissance
Me receut deffous sa puissance!*

Mais

- Mais aſtre le plus gracieux
 Qu'il ſoit (ô Dieux) en tous vos cieux!
 De quel lieu prendray-ie la voix
 Pour louer mon heur ceſte fois?
 N'ay-ie peur que mon cœur ſe noye
 En l'abondance de ma ioye?
 Rien plus au monde ne me fault.
 Mais las, voici mon bon Arnault:
 O Dieux quelle chere il fera,
 O Dieux comment il vous louera.
 Arnault, ho Arnault. Ar. Qui eſt l'homme?
 Flo. Arnault viença, vien voir la ſomme
 De tous mes malheurs miſe au bas.
 Ar. Monsieur ie ne vous voyois pas.
 Qui a-il de nouueau? Flo. Tout bien.
 Tu petilleras de l'heur mien
 Quand tu le ſçauras vne fois.
 Ar. Ie petille ja. Flo. De ma voix
 Il ne pourroit eſtre exprimé.
 Ar. Mais taſchez y. Flo. Ie ſuis aimé.
 Ar. De qui? Flo. D'Helene ma maiſtreſſe.
 Ar. O Idalienne Deeſſe,
 Sainctement ie t'adoreray.
 Flo. Auec elle ie ſouperay:
 Nous coucherons tous deux enſemble.
 Ar. De crainte & de ioye ie tremble:
 De ioye, pour ce bon heur ci:
 De crainte, qu'il ne ſoit ainſi.
 Flo. Si eſt: l'Abbé m'a fait ce tour.
 Ar. Iamais n'ait un ſeul mauuais iour.

L' EUGENE,

*Le discord s'est bien tost tourné
Al'amour d'enhaut destiné.*

*Flo. Aa que ne suis ie mort! disoye.
Hé que n'ay-ie serui de proye
A d'Anuilliers ou à Iuoy,
Comme deux seruiteurs du Roy,
D'Estange & son frere d'Angluse!
Plus en tels mots ie ne m'abuse:
Ains sans fin viure ie voudrois
(O Amour) dessous tes saincts droits:
Mais quoy? desia la nuit s'approche,
Le soupper se met hors de broche:
Allons, ne faisons point attendre.*

ACTE V. SCENE

*Alix. Messire Iean. Florimond. Arnault. Eugene.
Helene. Guillaume. Matthieu.*

Alix.

TOUT ce que me faites entendre
Messire Iean, est-il certain?

*Mel. Rien n'est plus seur. Al. O Dieu hautain,
Tu m'as bien tost mieux fortunee,
Que ie ne me disois mal nee!
Mais puis que chose tant heureuse
Suruient à moy peu vertueuse,
A iamais ma foy ie tiendray,
A nul autre ne me rendray,
Sinon qu'à l'Abbé vostre maistre.*

Mel. Vous ferez bien, & foy de prestre

*Vers vous quasi serf il se rend,
Son propre vouloir enserrant
Prisonnier pour le vostre suivre:
Mais marchez d'un pied plus deliure.*

Flo. *Voila l'Abbé & mon Helene
Deuant la porte, mais à peine
Ay-ie peu mon Helene voir
Sans m'absenter de mon pouuoir.
Saluons les, bon soir Monsieur.*

Ar. *Bon soir à tous. Flo. Et vous mon heur.
Si fort ie me sens embraser,
Que ie voudrois que ce baiser
Me deust durer iusqu'à demain.*

Eu. *Ca ma sœur baillez moy la main,
Et vous Monsieur auecques elle,
Iurans vne amour eternelle
A qu'il temps ne fera rien.*

Flo. *A a Monsieur ie le veux trop bien.*

He. *Le voila donc tout arresté.*

Eu. *Ie voy venir de ce costé
Nostre Alix. Gu. O qu'elle est ioyeuse.*

He. *Elle rit de sa paix heureuse
Auec Messire Iean. Eu. Voici
Matthieu qui vient de cestuy-ci.*

He. *Hastez-les. Eu. Venez ho venez,
Que lâchement vous pourmenez.*

Al. *Dieu vous doint le bon soir à tous.*

Mes. *Bon soir Messieurs. Mat. Bon soir. Eu. A vous.
Voici vne gentille bande.*

Al. *Monsieur quelle faueur trop grande*

K k ij

L'EUGENE.

Vous m'avez fait en ce pardon.

Flo. *Merciez Monsieur de ce don,*

Et luy voüez pour deormais

Vn fidelle amour à iamais.

Gu. *Monsieur pour elle grand merci,*

M'amie faites bien ainsi.

Eu. *Sus entrons, on couure la table,*

Suiuons ce plaisir souhaitable

De n'estre iamais soucieux:

Tellement mesme que les Dieux:

A l'enui de ce bien volage,

Doublent au Ciel leur saint breuuage.

Adieu, & applaudissez.

Fin de la Comedie d'Eugene.

LES PERSONNAGES DE LA Tragedie de Cleopatre.

L'Ombre d'Antoine.

Cleopatre.

Eras.

Charmiun.

Octauian Cesar.

Agrippe.

Proculce.

Le chœur des femmes Alexandrines.

Seleuque.



CLEOPATRE

CAPTIVE,

TRAGEDIE D'ESTIENNE

IODELLE PARISIEN.

PROLOGVE.



VIS que la terre (ô Roy des Rois la crainte)
 Qui ne refuse estre à tes loix estrainte,
 De la grandeur de son saint nom sestonne,
 Qu'elle a graué dans sa double colonne:

Puis que la mer qui te fait son Neptune;
 Bruit en ses flots ton heureuse fortune,
 Et que le Ciel riant à ta victoire
 Se voit mirer au parfait de ta gloire:
 Pourroyent vers toy les Muses telles estre,
 De n'adorer & leur pere & leur maistre?
 Pourroyent les tiens nous celer tes louanges,
 Qu'on oit tonner par les peuples estranges?
 Nul ne sçauroit tellement enuers toy
 Se rendre ingrat, qu'il ne chante son Roy.
 Les bons esprits que ton pere forma,
 Qui les neuf Sœurs en France ranima,
 Du pere & fils se pourroient ils bien taire,
 Quand à tous deux telle chose a peu plaire?

Kk ij

CLEOPATRE,

Lors que le temps nous aura présenté
 Ce qui sera digne d'estre chanté
 D'un si grand Prince, ains d'un Dieu dont la place
 Se voit au Ciel ja monstrier son espace.
 Et si ce temps qui toute chose enfante,
 Nous eust offert ta gloire triomphante,
 Pour assez tost de nous estre chantée,
 Et maintenant à tes yeux présentée,
 Tu n'orrais point de nos bouches sinon
 Du grand HENRY le triomphe & le nom.
 Mais pour autant que ta gloire entendue
 En peu de temps ne peut estre rendue:
 Que dis-je en peu? mais en cent mille années
 Ne seroyent pas tes louanges bornées.
 Nous t'apportons (ô bien petit hommage)
 Ce bien peu d'œuvre ouuré de ton langage;
 Mais tel pourtant que ce langage tien,
 N'auoit iamais dérobbé ce grand bien
 Des autheurs vieux: C'est vne Tragedie,
 Qui d'une voix & plaintiue & hardie
 Te represente un Romain Marc Antoine,
 Et Cleopatre Egyptienne Roïne:
 Laquelle apres qu'Antoine son ami
 Estant desia vaincu par l'ennemi,
 Se fust tué, ja se sentant captiue,
 Et qu'on vouloit la porter toute viue
 En un triomphe avecques ses deux femmes,
 S'occit. Ici les desirs & les flammes
 Des deux amans: d'Octavian aussi
 L'orgueil, l'audace, & le iournal souci

*De son trophée emprains tu sonderas,
Et plus qu'à luy le tien égaleras:
Veu qu'il faudra que ses successeurs mesmes
Cèdent pour toy aux volontez suprêmes,
Qui ja le monde à ta couronne voient,
Et le commis de tous les Dieux t'auoient.*

*Reçoy donc (SIRE) & d'un visage humain
Prends ce deuoir de ceux qui sous ta main,
Tant les esprits que les corps entretiennent,
Et devant toy agenouiller se viennent:
En attendant que mieux nous te chantions,
Et qu'à tes yeux saintement presentations
Ce que ja chante à toy le fils des Dieux,
La terre toute, & la mer, & les Cieux.*

ACTE I.

L'Ombre d'Antoine.

DANS le val tenebreux, où les nuits éternelles
Font éternelle peine aux ombres criminelles,

*Cédant à mon destin ie suis volén'aguere,
Ia ja fait compagnon de la troupe legere,
Moy (dy-ie) Marc Antoine horreur de la grād' Romme,
Mais en ma triste fin cent fois miserable homme.
Car un ardent amour, bourreau de mes mouëlles,
Me deuorant sans fin sous ses flammes cruelles,*

CLEOPATRE,

Auoit esté commis par quelque destinee
 Des Dieux ialoux de moy, à fin que terminee
 Fust en peine & malheur ma pitoyable vie,
 D'heur de ioye & de biens parauant assouuie.
 O moy deslors chetif, que mon œil trop folastre
 S'égara dans les yeux de ceste Cleopatre!
 Depuis ce seul moment ie senti bien ma playe,
 Descendre par l'œil traistre en l'ame encore gaye,
 Ne songeant point alors quelle poison extreme
 L'auois ce iour receu au plus creux de moy mesme:
 Mais helas! en mon dam, las! en mon dam & perte
 Ceste playe cachee en fin fut découuerte,
 Me rendant odieux, foulant ma renommee
 D'auoir enragement ma Cleopatre aimee:
 Et forcené après comme si cent furies
 Exerçans dedans moy toutes bourrelleries,
 Embrouillans mon cerueau, empestans mes entrailles,
 M'eussent fait le gibier des mordantes tenailles:
 Dedans moy condamné, faisans sans fin renaistre
 Mes tourmens iournaliers, ainsi qu'on voit repaistre
 Sur le Caucase froid la poitrine empietee,
 Et sans fin renaissante à son vieil Promethee.
 Car combien qu'elle fust Roïne & race royale,
 Comme tout aueuglé sous ceste ardeur fatale
 Je luy fis les presens qui chacun estonnerent,
 Et qui ja contre moy ma Romme eguillonnerent:
 Mesme le fier Cesar ne taschant qu'à deffaire
 Celuy qui à Cesar compagnon ne peult plaire,
 S'embrasant pour vn crime indigne d'un Antoine,
 Qui tramoit le malheur encouru pour ma Roïne:

Et

Et qui encore au val des durables tenebres
Me va renouellant mille plaintes funebres,
Eschauffant les serpens des sœurs echeueles,
Qui ont au plus chetif mes peines egalees:
C'est que ja ja charmé, enseveli des flames,
Ma femme OËtauienne honneur des autres Dames,
Et mes mollets enfans ie vins chasser arriere,
Nourrissant en mon sein ma serpente meurdriere,
Qui m'entortillonnant trompant l'ame rauie,
Versa dans ma poitrine vn venin de ma vie,
Me transformant ainsi sous ses poisons insuses,
Qu'on seroit du regard de cent mille Meduses.
Or pour punir ce crime horriblement infame,
D'auoir banni les miens, & rejeté ma femme,
Les Dieux ont à mon chef la vengeance auancee,
Et dessus moy l'horreur de leurs bras élancee:
Dont la sainte equité, bien qu'elle soit tardiuë,
Ayant les pieds de laine, elle n'est point oisieuë,
Ains dessus les humains d'heure en heure regarde,
Et d'une main de fer son trait enflammé darde.
Car tost apres Cesar iure contre ma teste,
Et mon piteux exil de ce monde m'appreste.
Me voila ja croyant ma Roine, ains ma ruine,
Me voila bataillant en la plaine marine,
Lors que plus fort i'estois sur la solide terre:
Me voila ja fuyant oubliëux de la guerre,
Pour suiure Cleopatre, en faisant l'heur des armes
Ceder à ce malheur des amoureux alarmes.
Me voila dans sa ville où i'yurongne & putace,
Me paissant de plaisirs, pendant que Cesar trace

CLEOPATRE,

Son chemin deuers nous, pendant qu'il a l'armee
 Que sus terre i' auois, d'une gueule affamee,
 Ainsi que le Lyon vagabond à la queste,
 Me voulant deuorer, & pendant qu'il appreste
 Son camp deuant la ville, où bien tost il refuse
 De me faire un parti, tant que malheureux i' use
 Du malheureux remede, & poussant mon espee
 Au trauers des boyaux en mon sang l'ay trempée,
 Me donnant guarison par l'outrageuse playe.
 Mais auant que mourir, auant que du tout i' aye
 Sangloté mes esprits, las las! quel si dur homme
 Eust peu voir sans pleurer un tel honneur de Romaine,
 Vn tel dominateur, vn Empereur Antoine,
 Que ja frapé à mort sa miserable Roine
 De deux femmes aidée angoisseusement palle
 Tiroit par la fenestre en sa chambre royale.
 Cesar mesme n'eust peu regarder Cleopatre
 Couper sur moy son poil, se deschirer & battre,
 Et moy la consoler avecques ma parole,
 Ma pauvre ame soufflant qui tout soudain s'en vole,
 Pour aux sombres enfers endurer plus de rage
 Que celui qui a soif au milieu du breuuage,
 Ou que celui qui rouë vne peine eternelle,
 Ou que les palles Sœurs, dont la dextre cruelle
 Egorgea les maris: Ou que celui qui vire
 Sa pierre sans porter son faix où il aspire.
 Encore en mon tourment tout seul ie ne puis estre,
 Auant que ce Soleil qui vient ores de naistre,
 Ayant tracé son iour cheZ sa tante se plonge,
 Cleopatre mourra, ie me suis ore en songe

A ses yeux présenté, luy commandant de faire
 L'honneur à mon sepulchre, & apres se deffaire,
 Plustost qu'estre dans Romme en triomphe portee,
 L'ayant par le desir de la mort confortee,
 L'appellant avec moy, qui ja ja la demande
 Pour venir endurer en nostre palle bande:
 Or se faisant compagne en ma peine & tristesse,
 Qui s'est faite long temps compagne en ma liesse.

Cleopatre. Eras. Charmium.

Cleopatre.

QUE gaignez-vous hélas! en la parole vaine?
 Er. Que gaignez-vous hélas! de vous estre inhu-
 maine?

Cl. Mais pourquoy perdez-vous vos peines ocieuses?

Ch. Mais pourquoy perdez-vous tât de larmes piteuses?

Cl. Qu'est-ce qui aduiendroit plus horrible à la veüe?

Er. Qu'est-ce qui pourroit voir vne tant despourueüe?

Cl. Permettez mes sanglots mesme aux fiers Dieux se
 prendre.

Ch. Permettez à nous deux de constante vous rendre.

Cl. Il ne faut que ma mort pour bannir ma complainte.

Er. Il ne faut point mourir auant sa vie esteinte.

Cl. Antoine ja m'appelle, Antoine il me faut suiure.

Ch. Antoine ne veut pas que vous viuiez sans viure.

Cl. O vision estrange! ô pitoyable songe!

Er. O pitoyable Roine, ô quel tourment te ronge?

Cl. O Dieux à quel malheur m'auez-vous allechee?

Ch. O Dieux ne sera point vostre plainte estanchee?

Ll ij

CLEOPATRE,

Cl. *Mais (ô Dieux) à quel bien, sice iour ie denie.*
 Er. *Mais ne plaignez donc point, & suiuez vostre enuie.*
 Cl. *Ha pourrois-ie donc bien moy la plus malheureuse,*
Que puisse regarder la voûte radieuse,
Pourrois-ie bien tenir la bride à mes complaints,
Quand sans fin mon malheur redouble ses attaines?
Quand ie remasche en moy que ie suis la meurdriere
Par mes trompeurs apasts, d'un, qui sous sa main fiere
Faisoit croûler la terre? Ha Dieux pourrois-ie traire
Hors de mon cœur le tort qu'alors ie luy peu faire,
Qu'il me donna Syrie, & Cypres, & Phenice,
La Iudee embasmee, Arabie, & Cilice,
Encourant par cela de son peuple la haine?
Ha pourrois-ie oublier ma gloire & pompe vaine,
Qui l'apastoit ainsi au mal, qui nous talonne,
Et malheureusement les malheureux guerdonne,
Que la troupe des eaux en l'apast est trompee?
Ha l'orgueil, & les ris, la perle destrempee,
La delicate vie effeminant ses forces,
Estoyent de nos malheurs les subtiles amorces!
Quoy? pourrois-ie oublier que par roide secousse
Pour moy seule il souffrit des Parthes la repousse,
Qu'il eust bien subiuguez & rendus à sa Romme,
Si les songears amours n'occupoient tout un homme,
Et s'il n'eust eu desir d'abandonner sa guerre
Pour reuenir soudain hyuerner en ma terre?
Ou pourrois-ie oublier que pour ma plus grand' gloire,
Il traina en triomphe & loyer de victoire,
Dedans Alexandrie un puissant Artauade
Roydes Armeniens, ven que telle brauade

N'appartenoit sinon qu'à sa ville orgueilleuse,
Qui se rendit alors d'avantage haineuse?
Pourrois-je oublier mille & mille & mille choses,
En qui l'amour pour moy a ses paupieres closes,
En cela mesmement que pour ceste amour mienne
On luy veit delaisser l'Octaviennne sienne?
En cela que pour moy il voulut faire guerre
Par la fatale mer, estant plus fort par terre?
En cela qu'il suiuit ma nef au vent donnee,
Ayant en son besoin sa troupe abandonnee?
En cela qu'il prenoit doucement mes amorces,
Alors que son Cesar prenoit toutes ses forces?
En cela que seignant estre prestre à m'occire,
Ce pitoyable mot soudain ie luy fëis dire?

O Ciel faudra-il donc que Cleopatre morte
Antoine viue encor? sus sus Page conforte
Mes douleurs par ma mort. Et lors voyant son page
Soymesme se tuer, Tu donnes tesmoignage,
O Eunuque (dit-il) comme il faut que ie meure!
Et vomissant vn cri il s'enferra sur l'heure.
Ha Dames, aa faut-il que ce malheur ie taïse?
Hohoretenez moy, ie ie. Ch. Mais quel mal-aise
Pourroit estre plus grand? Er. Soulagez vostre peine,
Efforcez vos esprits. Cl. Las las! Ch. Tenez la resne
Au dueil empoisonnant. Cl. A grand Ciel que i'endure!
Encore l'auoir veu ceste nuit en figure!
Hé! Er. Hé, rien que la mort ne ferme au dueil la porte.
Cl. Hé hé Antoine estoit. Ch. Mais comment? Cl. En
la sorte.

Er. En quelle sorte donc? Cl. Comme alors que sa playe.

CLEOPATRE,

Ch. *Mais leuez-vous vn peu, que gesner on essaye
Ce qui gesne la voix. Er. O plaisir que tu meines
Vn horrible troupeau de deplaisirs & peines!*

Cl. *Comme alors que sa playe auoit ce corps tractable
Ensanglanté par tout. Ch. O songe espouuentable!*

Mais que demandoit il? Cl. Qu'à sa tumbé ie face

*L'honneur qui luy est deu. Ch. Quoy encor? Cl. Que ie
Parma mort vn chemin pour rencôtrer son ombre. (trace*

*Me racontant encor. Ch. La basse porte sombre
Est à l'aller ouuerte, & au retour fermee.*

Cl. *Vne eternelle nuiët doit de ceux estre aimée,*

Qui souffrent en ce iour vne peine eternelle.

Ostez-vous le desir de sefforcer à celle

Qui libre veut mourir pour ne viure captiue?

Er. *Sera donc celle là de la Parque craintiue,*

Qui au deffaut de mort verra mourir sa gloire?

Cl. *Non non, mourons mourons, arrachons la victoire,*

Encore que soyons par Cesar surmontees.

Er. *Pourrions nous bien estre en triomphe portees?*

Cl. *Que plus tost ceste terre au fond de ses entrailles*

M'engloutisse à present, que toutes les tenailles

De ces bourrelles Sœurs horreur de l'onde basse,

M'arrachent les boyaux, que la teste on me casse

D'un foudre inusité, qu'ainsi ie me conseille,

Et que la peur de mort entre dans mon oreille.

Chœur de femmes Alexandrines.

Q V A N D l'Aurore vermeille
Se voit au liët laisser
Son Titon qui sommeille,
Et l'ami caresser:

On voit à l'heure mesme
Ce pays coloré,
Sous le flambeau suprême
Du Dieu au Char-doré :
Et semble que la face
De ce Dieu variant,
De ceste ville face
L'honneur de l'Orient,
Et qu'il se mire en elle
Plus tost qu'en autre part,
La prisant comme celle
Dont plus d'honneur depart,
De pompes & delices
Attrayans doucement
Sous leurs gayer blandices,
L'humain entendement.
Car veit on iamaïs ville
En plaisir, en honneur,
En banquets plus fertile,
Si durable estoit l'heur?
Mais ainsi que la force
Du celeste flambeau,
Tirer à soy s'efforce
Le plus leger de l'eau:
Ainsi que l'aimant tire
Son acier, & les sons
De la marine Lyre
Attiroyent les poissons.
Tout ainsi nos delices,
La mignardise & l'heur,

CLEOPATRE,

*Allechemens des vices,
 Tirent nostre malheur.
 Pourquoi fatale Troye
 Honneur des siecles vieux,
 Fus tu donnee en proye
 Sous le destin des Dieux?
 Pourquoi n'eus tu Medee
 Ton Iason? & pourquoi
 Ariadne guidee
 Fus tu sous telle foy?
 Des delices le vice
 A ce vous conduisoit:
 Puis apres sa malice
 Soymesme destruisoit.
 Tant n'estoit variable
 Vn Prothee en son temps,
 Et tant n'est point muable
 La course de nos vents:
 Tant de fois ne se change
 Thetis, & tant de fois
 L'inconstant ne se range
 Sous ses diuerfes loix,
 Que nostre heur, en peu d'heure
 En malheur retourné,
 Sans que rien nous demeure,
 Proye au vent est donné.
 La rose iournaliere
 Quand du diuin flambeau
 Nous dardela lumiere,
 Le raiusseur taureau,*

Fait

Fait naistre en sa naissance
Son premier dernier iour,
Du bien la iouissance
Est ainsi sans séjour.
Le fruit vangeur du pere,
S'est bien esuertué
De tuer sa vipere,
Pour estre apres tué.
Joye, qui dueil enfante,
Se meurdrist, puis la mort
Par la ioye plaisante
Fait au dueil mesme tort.
Le bien qui est durable
C'est vn monstre du Ciel,
Quand son vueil fauorable
Change le fiel en miel.
Si la sainte ordonnance
Des immuables Dieux,
Forcluse d'inconstance
Seule incogneüe à eux,
En ce bas hemisphere
Veut son homme garder,
Lors le sort improspere
Ne le peut retarder,
Que maugré sa menace
Ne vienne tenir rang,
Maugré le fer qui brasse
La poudre avec le sang.
On doit seurement dire
L'homme qu'on doit priser,

CLEOPATRE,

*Quand le Ciel vient l'eslire
Pour le fauoriser,
Ne deuoir iamais craindre
L'Ocean furieux,
Lors que mieux semble atteindre
Le marche-pied des Dieux:
Plongé dans la marine
Il doit vaincre en la fin,
Et s'attend à l'espine
De l'attendant Daulphin.
La guerre impitoyable
Moissonnant les humains,
Craint l'heur espouuentable
De ses celestes mains.
Tous les arts de Medee,
Le venin, la poison,
Les bestes dont garde
Fut la riche toison:
Ny par le bois estrange
Le Lyon outrageux,
Qui sous sa patte range
Tous les plus courageux:
Ny la loy qu'on reuere,
Non tant comme on la craint,
Ny le bourreau seuer,
Qui l'homme blesme estraint:
Ny les feux qui saccagent
Le haut pin molestans,
Sa fortune n'outragent,
Rendans les dieux constans.*

*Mais ainsi qu'autre chose
Contraint sous son effort,
Tient sous sa force enclose
La force de la mort:*

*Et maugré ceste bande
Tousiours en bas filant,
Tant que le Ciel commande
En bas n'est deuallant:*

*Et quand il y deualle,
Sans aucun mal souffrir,
D'un sommeil qu'il aualle
A mieux il va soffrir.*

*Mais si la destinee
Arbitre d'un chacun,
A sa chance tournee
Contre l'heur de quelqu'un:*

*Le sceptre sous qui ploye
Tout un peuple soumis,
Est force qu'il foudroye
Ses mutins ennemis.*

*La volage richesse,
Appuy de l'heur mondain,
L'honneur & la hauteffe
Refuyant tout soudain:*

*Bref, fortune obstinee,
Ny le temps tout fauchant,
Sa ru de destinee
Ne vont point empeschant.*

*Des hauts Dieux la puissance
Tesmoigne assez ici,*


CLEOPATRE,

*Que nostre heureuse chance
 Se precipite ainsi.
 Quel estoit Marc Antoine?
 Et quel estoit l'honneur
 De nostre braue Roine
 Digne d'un tel donneur?
 Des deux l'un miserable
 Cedant à son destin,
 D'une mort pitoyable
 Vint auancer sa fin:
 L'autre encore craintive
 Taschant s'éuertuer,
 Veut pour n'estre captive
 Librement se tuer.
 Ceste terre honorable,
 Ce pays fortuné,
 Helas! voit peu durable
 Son heur importuné.
 Telle est la destinee
 Des immuables Cieux,
 Telle nous est donnee
 La defaveur des Dieux.*

A C T E I I.

Octauien. Agripppe. Proculee.

Octauien.


*N la rondeur du Ciel enuironnee,
 A nul, ie croy, telle faueur donnee
 Des Dieux fauteurs ne peult estre qu'à moy:
 Car outre encor que ie suis maistre & Roy*

De tant de biens, qu'il semble qu'en la terre
 Le Ciel qui tout sous son empire enferme,
 M'ait tout exprés de sa voûte transmis,
 Pour estre ici son general commis:
 Outre l'esperoir de l'arriere memoire
 Qui aux neveux rechantera ma gloire,
 D'auoir d'Antoine, Antoine, dis-ie, horreur
 De tout ce monde, ^{accablé} la fureur:
 Outre l'honneur que ma Romme m'appreste,
 Pour le guerdon de l'heureuse conqueste.
 Il semble ja que le Ciel vienne tendre
 Ses bras courbez pour en soy me reprendre,
 Et que la ^{boûle} entre ses ronds enclose,
 Pour un Cesar ne soit que peu de chose:
 Or' ie desire, or' ie desire mieux,
 C'est de me ioindre au saint nombre des Dieux.
 Iamais la terre en tout aduantageuse,
 N'a sa personne entierement heureuse:
 Mais le malheur par l'heur est acquité,
 Et l'heur se paye par l'infelicité.
 Ag. Mais de quel lieu ces mots? O Et Qui eust peu croire
 Qu'apres l'honneur d'une telle victoire,
 Le deuil, le pleur, le souci, la complainte,
 Mesme à Cesar eust donné telle atteinte?
 Mais ie me voy souuent en lieu secret
 Pour Marc Antoine estre en plainte & regret,
 Qui aux honneurs receus en nostre terre,
 Et compagnon m'auoit esté en guerre,
 Mon allié, mon beaufrere, mon sang,
 Et qui tenoit ici le mesme rang

CLEOPATRE,

*Avec Cesar: Nonobstant par rancune
 De la muable & traistresse fortune,
 On veit son corps en sa playe mouillé
 Avoir ce lieu piteusement soüillé.
 Ha cher ami! Pr. L'orgueil & la brauade
 Ont fait Antoine ainsi qu'un Ancelade,
 Qui se voulant encore prendre aux Dieux,
 D'un trait horrible & non lancé des Cieux,
 Mais de ta main à la vengeance adextre,
 Sentit combien peut d'un grand Dieu la dextre.
 Que plaignez-vous si l'orgueil iustement
 A l'orgueilleux donne son payement?
 Ag. L'orgueil est tel, qui d'un malheur guerdonne
 La malheureuse & superbe personne:
 Mesmes ainsi que d'un onde le branle,
 Lors que le Nord dedans la mer l'ébranle,
 Ne cesse point de courir & glisser,
 Vireuolter, rouler, & se dresser,
 Tant qu'à la fin dépiteux il arriue,
 Bruyant sa mort, à l'ecumeuse riué.
 Ainsi ceux la que l'orgueil trompe ici,
 Ne cessent point de se dresser ainsi,
 Courir, tourner, tant qu'ils soyent agitez
 Contre les bords de leurs felicitéz.
 C'estoit assez que l'orgueil pour Antoine
 Precipiter avec sa pauvre Roine,
 Si les amours lascifs & les delices
 N'eussent aidé à rouër leurs supplices:
 Tant qu'on ne sçait comment ces dereiglez
 D'un noir bandeau se sont tant aveuglez,*

Qu'ils n'ont sceu voir & cent & cent augures,
Prognostiqueurs des miseres futures.
Ne veit on pas Pifaure l'ancienne
Prognostiquer la perte Antonienne,
Qui de soldats Antoniens armee
Fust engloutie & dans terre abyssmee?
Ne veit on pas dedans Albe vne image
Suer long temps? Ne veit on pas l'orage
Qui de Patras la ville environnoit,
Alors qu' Antoine en Patras seiournoit,
Et que le feu qui par l'air seclata,
Heraclion en pieces escarta?
Ne veit on pas alors que dans Athenes
En vn theatre on luy monstrois les peines,
Ou pour neant les serpen-piés se mirent,
Quand aux rochers les rochers ils ioignirent,
Du Dieu Bacchus l'image en bas pousse,
Des vents quil'ont comm' à l'enui cassee,
Veu que Bacchus vn conducteur estoit,
Pour qui Antoine vn mesme nom portoit?
Ne veit on pas d'une flame fatale
Rompre l'image & d'Eumene & d'Atale,
A Marc Antoine en ce lieu dediees,
Puis maintes voix fatalement criees,
Tant de gesiers, & tant d'autres merueilles,
Tant de corbeaux, & fenestres cornuilles,
Tant de sommets rompus & mis en poudre,
Que monstroyent ils que ta future foudre,
Qui ce rocher deuoit ainsi combattre?
Qu'admonnestoit la nef de Cleopatre,

CLEOPATRE,

Et qui d' Antoine auoit le nom par elle,
 Ou l'hirondelle exila l'hirondelle:
 Et toutesfois en sillant leur lumiere
 N'y voyoyent point ce qui suiuoit derriere?
 Vante toy donc les ayans pourchassez,
 Comme vengeur des grands Dieux offensez:
 Esiouy toy en leur sang & te baigne,
 De leurs enfans fais rougir la campagne,
 Racle leur nom, efface leur memoire:
 Poursuy poursuy iusqu'au bout ta victoire.
 OCT. Ne veux-ie donc ma victoire poursuiure,
 Et mon trophée au monde faire viure?
 Plustost plustost le fleuve impetueux
 Ne se rengorge au grand sein fluctueux.
 C'est le souci qui avecq la complainte
 Que ie faisois de l'autre vie esteinte,
 Me ronge aussi: mais plus grand tesmoignage
 De mes honneurs s'obstinans contre l'aage,
 Ne s'est point veu sinon que ceste Dame
 Qui consumma Marc Antoine en sa flame,
 Fut dans ma ville en triomphe menee.
 PR. Mais pourroit elle à Romme estre trainee,
 Veu qu'elle n'a sans fin autre desir,
 Que par sa mort sa liberté choisir?
 Sçauex-vous pas lors que nous échellâmes,
 Et que par ruse en sa court nous allâmes,
 Que tout soudain qu'en la court on me veit,
 En s'écriant vne des femmes dit:
 O pauvre Roine! es tu donc prise viue?
 Vis tu encor pour trespasser captiue?

Et qu'elle ainsi sous telle voix ranie
Vouloit trancher le filet de sa vie,
Du cimenterre à son costé pendu,
Si saisissant ie n'eusse deffendu.
Son estomach ja desia menassé,
Du bras meurdrier à l'encontre hausé.
Sçauex-vous pas que depuis ce iour mesme
Elle est tombee en maladie extreme,
Et qu'elle a feint de ne pouuoir manger,
Pour par la faim à la fin se renger?
Pensez-vous pas qu'outre telle finesse
Elle ne trouue à la mort quelque adresse?
Ag. Il vaudroit mieux dessus elle veiller,
Sonder, courir, espier, travailler,
Que du berger la veuë gardienne
Ne s'arrestoit sus son Inachienne.
Que nous nuira si nous la confortons,
Si doucement sa foiblesse portons?
Par tels moyens s'enuolera l'enuie
De faire change à sa mort de sa vie:
Ainsi sa vie heureusement traitée
Ne pourra voir sa quenouille arrestée:
Ainsi ainsi iusqu'à Romme elle ira,
Ainsi ainsi ton souci finira.
Et quant aux plains, veux tu plaindre celuy
Qui de tout temps te brassa tout ennuy?
Qui n'estoit né sans ta dextre diuine,
Que pour la tienne & la nostre ruine?
Te souuient il que pour dresser ta guerre
Tu fus hay de toute nostre terre,

CLEOPATRE,

Qui se piquoit mutinant contre roy,
 Et refusoit se courber sous ta loy,
 Lors que tu prins pour guerroyer Antoine,
 Des hommes francs le quart du patrimoine,
 Des seruiteurs la huitieme partie
 De leur vaillant: tant que ja diuertie
 Presque s'estoit l'Italie troublee?
 Mais quelle estoit sa plainte redoublée,
 Dont il taschoit embraser les Rommains,
 Pour ce Lepide exilé par tes mains?
 Te souuient-il de ceste horrible armee
 Que contre nous il auoit animée?
 Tant de Rois donc qui voulurent le suiure,
 Y venoyent ils pour nous y faire viure?
 Pensoyent-ils bien nous foudroyer exprés,
 Pour deplorer nostre ruine après?
 Le Roy Boechus, le Roy Cilicien,
 Archelaus Roy Capadocien,
 Et Philadelphie, & Adalle de Thrace,
 Et Mithridate vsoyent ils de menace
 Moindre sus nous, que de porter en ioye
 Nostre despoille & leur guerriere proye,
 Pour à leurs Dieux ioyeusement les pendre,
 Et maint & maint sacrifice leur rendre?
 Voila les pleurs que doit vn aduersaire
 Apres la mort de son ennemy faire.
 O & O gent Agrippe, ou pour te nommer mieux,
 Fidelle Achate, estoit donc de mes yeux
 Digne le pleur? Celuy donc s'effemine
 Qui ja du tout l'effeminé ruine.

Non non les plains cederont aux rigueurs,
Baignons en sang les armes & les cœurs,
Et souhaitons à l'ennemi cent vies,
Qui luy seroyent plus durement rauies:
Quant à la Roine, appaiser la faudra,
Si doucement que sa main se tiendra
De forbannir l'ame seditieuse
Oltre les eaux de la riue oubliuse.
Je vois desor en cela m'efforcer,
Et son desir de la mort effacer:
Souuent l'effort est forcé par la ruse.
Pendant Agrippe aux affaires t'amuse.
Et toy loyal messager Proculee,
Sonde par tout ce que la fame aislee
Fait s'acouster dedans Alexandrie
Qu'elle circuit, & tantost bruit & crie,
Tantost plus bas marmote son murmure,
N'estant iamais loing de telle auenture.
Pr. Si bien par tout mon deuoir se fera,
Que mon Cesar de moy se vantera.
O s'il me faut ores vn peu dresser
L'esprit plus haut & seul en moy penser:
Cent & cent fois miserable est celuy
Qui en ce monde à mis aucun appuy:
Et tant s'en faut qu'il ne fasche de viure
A ceux qu'on voit par fortune poursuiure,
Que moy qui suis du sort assez content
Je suis fâché de me voir viure tant.
Où es tu, Mort, si la prosperité
N'est sous les cieux qu'un infelicité?

CLEOPATRE,

Voyons les grands, & ceux qui de leur teste
 Semblent desia deffier la tempeste,
 Quel heur ont ils pour vne fresle gloire?
 Mille serpens rongears en leur memoire,
 Mille soucis meslez d'effroyement,
 Sans fin desir, iamaïs contentement:
 Dés que le Ciel son foudre pirouëtte,
 Il semble ja que sur eux il se iette:
 Dés lors que Mars pres de leur terre tonne,
 Il semble ja leur raur la couronne:
 Dés que la peste en leur regne tracasse,
 Il semble ja que leur chef on menasse:
 Bref, à la mort ils ne peuuent penser
 Sans sousspirer, blesmir, & s'offenser,
 Voyant qu'il faut par mort quitter leur gloire,
 Et bien souuent enterrer la memoire.
 Ou celuy-la qui solitairement
 En peu de biens cherche contentement,
 Ne pallit pas si la fatale Parque
 Le fait penser à la derniere barque:
 Ne pallit pas, non si le Ciel & l'onde
 Se rebrouilloyent au vieil Chaos du monde.
 Telle est telle est la mediocrité
 Où gist le but de la felicité:
 Mais qui me fait en ce discours me plaire
 Quand il conuient exploiter mon affaire?
 Trop tost trop tost se fera mon message,
 Et tousiours tard vn homme se fait sage.

LE CHOEVR.

Strophe.

DE la terre humble & basse,
 Esclane de ses cieux,
 Le peu puissant espace
 N'a rien plus vicieux
 Que l'orgueil, qu'on voit estre
 Hay du Ciel son maistre.

Antistrophe.

Orgueil qui met en poudre
 Le rocher trop hautain:
 Orgueil pour qui le foudre
 Arma des Dieux la main,
 Et qui vient pour salaire
 Luymesme se deffaire.

Strophe.

A qui ne sont cogneuës
 Les races du Soleil,
 Qui affrontoyent aux nuës
 Vn superbe appareil,
 Et montagnes portees
 L'une sus l'autre entees?

Antistrophe.

La tombante tempeste
 Aduersaire à l'orgueil,
 Escarbouilla leur teste,
 Qui trouua son recueil
 Apres la mort amere
 Au ventre de sa mere.

CLEOPATRE,

Strophe.

Qui ne cognoist le sage
 Qui trop audacieux,
 Pilla du feu l'usage
 Au chariot des cieux,
 Cherchant par arrogance
 Sa propre repentance.

Antistrophe.

Qu'on le voise voir ore
 Sur le mont Scythien,
 Où son vautour deuore
 Son gesier ancien:
 Que sa poitrine on voye
 Estre eternelle proye.

Strophe.

Qui ne cognoist Icare
 Le nommeur d'une mer,
 Et du Dieu de Pathare
 L'enfant, qui enflammer
 Vint sous son char le monde,
 Tant qu'il tombast en l'onde.

Antistrophe.

De ceulx là les ruines
 Tesmoignent la fureur
 Des saintes mains diuines,
 Qui doiuent faire horreur
 A l'orgueil, digne d'estre
 Puni de telle dextre.

Strophe.

A t'on pas veu la vague

*Au giron fluctueux,
Alors qu'Aquilon vague
Se fait tempestueux,
Presque dresser ses crestes
Jusqu'au lieu des tempestes?*

Antistrophe.

*Qu'on voye de l'audace
Phebus se courroussant,
Esclarcissant la trace
Qui son char va froissant,
Dessous ses fleches blondes
Presque abysmer les ondes.*

Strophe.

*Ai'on pas veu d'un arbre
Le coupeau cheuclé,
Où la maison de marbre
Qui semble auoir voulu
Dépriser trop hautaine
L'autre maison prochaine?*

Antistrophe.

*Qu'on voye un feu celeste
Ceste sime arrachant,
Et par mine moleste
Le palais trespuchant,
La plante au chef punie,
L'autre au pied demunie.*

Strophe.

*Mais Dieux (ô Dieux) qu'il vienne
Voir la plainte & le ducit
De ceste Roine mienne,*

De la chance muablè?

Antistrophe.

Cesar en quelle sorte

La voyant sans vertu,

La voyant demi-morte,

Maintenant soustiens-tu

Les assauts que te donne

La pitié qui t'estonne?

Strophe.

Tu vois qu'une grand' Roine,

Celle là qui guidait

Ton compagnon Antoine,

Et par tout commandait,

Heureuse se vient dire,

Si tu voulois l'occire.

Antistrophe.

Las, hélas! Cleopâtre,

Las, hélas! quel malheur

Vient tes plaisirs abattre,

Les changeant en douleur?

Las las, hélas! (ô Dame)

Peux-tu souffrir ton ame?

Strophe.

Pourquoy pourquoy fortune,

O fortune aux yeux clos,

Es-tu tant importune?

Pourquoy n'a point repos.

Du temps le vol estrange,

Qui ses faits brouille & change?

Antistrophe.

CLEOPATRE,

*Qui en volant sacage
Les chasteaux sourcilleux,
Qui les princes outrage,
Qui les plus orgueilleux,
Rouïant sa faulx superbe,
Fauche ainsi comme l'herbe?*

Strophe.

*A nul il ne pardonne,
Il se fait & deffait,
Luy mesmes il s'estonne,
Il se flatte en son fait,
Puis il blasme sa peine,
Et contre elle forcene.*

Antistrophe.

*Vertu seule à l'encontre
Fait l'acier reboucher:
Outre telle rencontre
Le temps peult tout faucher:
L'orgueil qui nous amorce
Donne à sa faulx sa force.*

ACTE III.

Octauien. Cleopatre. Le Chœur. Seleuque.

Octauien.

VOULEZ-vous donc vostre fait excuser?
Mais dequoy sert à ces mots s'amuser?
N'est-il pas clair que vous tâchiez de faire
Par tous moyens Cesar vostre aduersaire,

Et que vous seule attirant vostre ami,
 Me l'avez fait capital ennemi,
 Brassant sans fin une horrible tempeste
 Dont vous pensiez écerueller ma teste?
 Qu'en dites vous? Cl. O quels piteux alarmes!
 Lasque dirois-je! hé, ja pour moy mes larmes
 Parlent assez, qui non pas la iustice,
 Mais de pitié cherchent le benefice.
 Pourtant, Cesar, s'il est à moy possible
 De tirer hors d'une ame tant passible,
 Ceste voix rauque à mes souspirs meslee,
 Escoute encor l'esclave desolee,
 Las! qui ne met tant d'esper aux paroles
 Qu'en ta pitié, dont ja tu me consoles.
 Songe, Cesar, combien peult la puissance
 D'un traistre amour, mesme en sa iouissance:
 Et pense encor que mon foible courage
 N'eust pas souffert sans l'amoureuse rage,
 Entre vous deux ces batailles tonantes,
 Dessus mon chef à la fin retournantes.
 Mais mon amour me forçoit de permettre
 Ces fiers debats, & toute aide promettre,
 Veu qu'il falloit rompre paix, & combattre,
 Ou separer Antoine ou Cleopatre.
 Separer, las! ce mot me fait faillir,
 Ce mot me fait par la Parque assaillir.
 Aa aa Cesar, aa. Oct. Si ie n'estois ore
 Assez bening, vous pourriez feindre encore
 Plus de douleurs, pour plus bening me rendre:
 Mais quoy, ne veux-je à mon merci vous prendre?

Oo ij

CLEOPATRE,

Cl. Feindre *helas!* ô. Oâ. Ou tellement se plaindre
N'est que mourir, ou bien ce n'est que feindre.

LE CHOEVR.

La douleur
Qu'un malheur
Nous rassemble,
Tel ennuy
A celuy
Pas ne semble,
Qui exempt
Ne la sent:
Mais la plainte
Mieux bondit,
Quand on dit
Que c'est feinte.

Cleopatre.

Si la douleur en ce cœur prisonniere
Ne surmontoit ceste plainte derniere,
Tu n'aurois pas ta pauvre esclauue ainsi:
Mais ie ne peux égaler au souci,
Qui petillant m'écorce le dedans,
Mes pleurs, mes plaints, & mes sousspirs ardens.
T'esbahis tu si ce mot separer,
A fait ainsi mes forces retirer?
Separer (Dieux!) separer ie l'ay ven,
Et si n'ay point à ces débats pouruen!
Mieux il te fust (ô captiue rauie)
Te separer mesme durant sa vie!

J'eusse la guerre & sa mort empeschée,
 Et à mon heur quelque atteinte laschée,
 Veu que j'eusse eu le moyen & l'espace
 D'esperer voir secrettement sa face:
 Mais mais cent fois, cent cent fois malheureuse,
 J'ay ja souffert ceste guerre odieuse:
 J'ay j'ay perdu par ceste estrange guerre,
 J'ay perdu tout & mes biens & ma terre:
 Et si ay veu ma vie & mon support,
 Mon heur, mon toût, se donner à la mort,
 Que tout sanglant ja tout froid & tout blesme,
 Je rechauffois des larmes de moymesme,
 Me separant de moymesme à demi
 Voyant par mort separer mon ami.
 Ha Dieux, grands Dieux! Ha grands Dieux! Oct.
 Quoy? la constance estre hors de souci? (Qu'est-ce ci?
 Cl. Constante suis, separer ie me sens,
 Mais separer on ne me peult long temps:
 La palle mort m'en fera la raison,
 Bien tost Pluton m'ouvrira sa maison:
 Où mesme encor l'éguillon qui me touche
 Feroit reioindre & ma bouche & sa bouche:
 S'on me tuoit, le dueil qui creueroit
 Parmi le coup plus de bien me feroit,
 Que ie n'aurois de mal à voir sortir
 Mon sang pourpré & mon ame partir.
 Mais vous m'ostez l'occasion de mort,
 Et pour mourir me deffaut mon effort,
 Qui sallentit d'heure en heure dans moy,
 Tant qu'il faudra viure maugré l'esmoy:

CLEOPATRE,

*Viure il me faut, ne crains que ie me tue,
 Pour me tuer trop peu ie m'esuertue.
 Mais puis qu'il faut que i'allonge ma vie,
 Et que de viure en moy reuient l'enuie;
 Au moins Cesar voyla pauvre foiblette,
 Qui à tes pieds, & de rechef se iette:
 Au moins Cesar des gouttes de mes yeux
 Amolli toy, pour me pardonner mieux:
 De ceste humeur la pierre on caue bien,
 Et sus ton cœur ne pourront elles rien?
 Ne t'ont donc peu les lettres esmouuoir
 Qu'à tes deux yeux i'auois tantost fait voir,
 Lettres ie dy de ton pere receuës,
 Certain tesmoin de nos amours conceuës?
 N'ay-ie donc peu destourner ton courage,
 Te descourant & maint & maint image
 De ce tien pere à celle-la loyal,
 Qui de son fils receura tout son mal?
 Celuy souuent trop tost borne sa gloire
 Qui iusqu'au bout se vange en sa victoire.
 Prends donc pitié, tes glaiues triomphans
 D'Antoine & moy pardonnent aux enfans.
 Pourrois-tu voir les horreurs maternelles,
 S'on meurdriroit ceux qui ces deux mammelles,
 Qu'ores tu vois maigres & dechirees,
 Et qui seroient de cent coups empirees,
 Ont allaitté? Orrois-tu mesmement
 Des deux costeꝝ le dur gemissement?
 Non non, Cesar, contente toy du pere,
 Laisse durer les enfans & la mere*

*En ce malheur, où les Dieux nous ont mis.
 Mais fusmes nous iamais tes ennemis,
 Tant acharnez que n'eussions pardonné,
 Si le trophée à nous se fust donné?
 Quant est de moy, en mes fautes commises
 Antoine estoit chef de mes entreprises,
 Lás qui venoit à tel malheur m'induire,
 Eusse-je peu mon Antoine esconduire?
 OÙ. Tel bien souuent son fait pense amender,
 Qu'on voit d'un gouffre en un gouffre guider:
 Vous excusant, bien que vostre aduantage
 Vous y mettiez, vous nuisez d'auantage,
 En me rendant par l'excuse irrité,
 Qui ne suis point qu'ami de Verité.
 Et si conuient qu'en ce lieu ie m'amuse
 A repousser ceste inutile excuse:
 Pourriez-vous bien de ce vous garentir,
 Qui fit ma sœur hors d'Athenes sortir,
 Lors que craignant qu'Antoine son espoux
 Plus se donnast à sa femme qu'à vous,
 Vous le paissiez de ruse, & de finesses,
 De mille & mille & dix mille caresses?
 Tantost au liect exprés emmaigrissiez,
 Tantost par feinte exprés vous pallissiez,
 Tantost vostre œil vostre face baignoit
 Dés qu'un iect d'arc de luy vous esloignoit,
 Entretienat la feinte & sorcelage,
 Ou par costume, ou par quelque breuuage:
 Mesme attiltrant vos amis & flatteurs
 Pour du venin d'Antoine estre fauteurs,*

CLEOPATRE.

Qui l'abusoyent sous les plaintes friuoles,
 Faisant ceder son proffit aux paroles.
 Quoy? disoient-ils, estes vous l'homicide
 D'un pauvre esprit, qui vous prend pour sa guide?
 Faut-il qu'en vous la Noblesse s'offense,
 Dont la rigueur à celle la ne pense,
 Qui fait de vous le but de ses pensees?
 O qu'ils sont mal enuers vous adressees!
 Octauienne a le nom de l'espouse,
 Et ceste ci, dont la flame ialouse
 Empefche assez la vifte renommee,
 Sera l'amie en son pays nommee:
 Ceste diuine, a qui rendent hommage
 Tant de pays ioints à son heritage.
 Tant peurent donc vos mines & adressees,
 Et de ceux la les plaintes flatteresses,
 Qu'Octauienne & sa femme & ma sœur,
 Fut dechassée, & dechassa vostre heur.
 Vous taisez-vous, auez-vous plus de sir
 Pour m'appaiser d'autre excuse choisir?
 Que diriez-vous du tort fait aux Rommains,
 Qui s'enfuioyent secrettement des mains
 De vostre Antoine, alors que vostre rage
 Leur redoubloit l'outrage sus l'outrage?
 Que diriez-vous de ce beau testament
 Qu'Antoine auoit remis secrettement
 Dedans les mains des pucelles Vestales?
 Ces maux estoyent les conduites fatales
 De vos malheurs: & ores peu rusée
 Vous voudriez bien encore estre excusée.

Contentez

Contentez-vous Cleopatre, & pensez
 Que c'est assez de pardon, & assez
 D'entretenir le fuséau de vos vies,
 Qui ne seront à vos enfans ravies.
 Cl. Ore, Cesar, chetive ie m'accuse,
 En m'excusant de ma premiere excuse,
 Reconnoissant que ta seule pitié
 Peut donner bride à ton inimitié,
 Que ja pour moy tellement se commande,
 Que tu ne veux de moy faire une offrande
 Aux Dieux ombreux, ny des enfans aussi
 Que i'ay tourné en ces entrailles ci.
 De ce peu donc de mon pouuoir resté
 Je rends ie rends grace à ta maïesté:
 Et pour donner à Cesar tesmoignage,
 Que ie suis sienne & le suis de courage,
 Je veux, Cesar, te deceler tout l'or,
 L'argent, les biens, que ie tiens en thresor.

LE CHOEVR.

Q VAND la servitude
 Le col enchesnant,
 Dessous le ioug rude
 Va l'homme gesnant:
 Sans que lon menasse
 D'un sourcil plié,
 Sans qu'effort on face
 Au pauvre lié,
 Assez il confesse,
 Assez se contraint,

CLEOPATRE,

*Assez il se presse
Par la crainte estraint.
Telle est la nature
Des serfs déconfits,
Tant de mal n'endure
De Iapet le fils.*

Octauien.

L'AMPLE thresor, l'ancienne richesse
Que vous nommez, tesmoigne la hauteſſe
De voſtre race: & n'eſtoit le bon heur
D'eſtre du tout en la terre ſeigneur,
Je me plaindrois qu'il faudra que ſoudain
Ces biens royaux changent ainſi de main.
Sel. Comment, Ceſar, ſi l'humble petiteſſe
Oſe adreſſer ſa voix à ta hauteſſe,
Comment peux tu ce threſor eſtimer
Que ma Princeſſe a voulu te nommer?
Cuides tu bien, ſi accuſer ie l'oſe,
Que ſon threſor tienne ſi peu de choſe?
La moindre Roine à ta loy flechiſſante
Eſt en threſor autant riche & poiſſante,
Qui autant peu ma Cleopatre égale,
Que par les champs vne caſe rurale
Au fier chaſteau ne peut eſtre égalee,
Ou bien la motte à la roche gelee.
Celle ſous qui tout l'Egypte flechit,
Et qui du Nil l'eau fertile franchit,
A qui le Iuiſ, & le Phenicien,
L'Arabien, & le Cilicien,

*Auant ton foudre ore tombé sur nous,
 Souloyent courber les hommagers genoux:
 Qui aux thresors d'Antoine commandoit,
 Qui tout ce monde en pompes excendoit,
 Ne pourroit elle auoir que ce thresor?
 Croy, Cesar, croy qu'elle a de tout son or,
 Et autres biens tout le meilleur caché.*
*Cl. A faux meurdrier! a faux traistre, arraché
 Sera le poil de ta teste cruelle.
 Que pleust aux Dieux que ce fust ta ceruelle!
 Tien traistre, tien. Sel. O Dieux! Cl. O chose detestable!
 Vn serf vn serf! Oct. Mais chose émerueillable
 D'un cœur terrible. Cl. Et quoy, m'accuses tu?
 Me pensois tu veufue de ma vertu
 Comme d'Antoine? aa traistre! Sel. Retiens la,
 Puissant Cesar, retiens la doncq. Cl. Voila
 Tous mes biensfaits. hou! le dueil qui m'efforce,
 Donne à mon cœur langoureux telle force,
 Que ie pourrois, ce me semble, froisser
 Du poing tes os, & tes flancs creuasser
 A coups de pied. Oct. O quel grinsant courage!
 Mais rien n'est plus furieux que la rage
 D'un cœur de femme. Et bien, quoy, Cleopatre?
 Estes vous point ja saoule de le battre!
 Fuy t'en, ami, fuy t'en. Cl. Mais quoy, mais quoy?
 Mon Empereur, est-il yn tel esmoy
 Au monde encor que ce paillard me donne?
 Sa lâcheté ton esprit mesme estonne,
 Comme ie croy, quand moy Roine d'ici,
 De mon vassal suis accusée ainsi,*

CLEOPATRE,

*Que toy, Cesar, as daigné visiter,
 Et par ta voix à repos inciter?
 Hé si' auois retenu des ioyaux,
 Et quelque part de mes habits royaux,
 L'auroy-ie fait pour moy las malheureuse!
 Moy, qui de moy ne suis plus curieuse?
 Mais telle estoit ceste esperance mienne,
 Qu'à ta Liue & ton Octauienne
 De ces ioyaux le present ie feroi,
 Et leur pitiez ainsi pourchasseroi,
 Pour (n'estans point de mes presens ingrates)
 Enuers Cesar estre mes aduocates.
 Oct. Ne craigneZ point, ie veux que ce thresor
 Demeure vostre: encourageZ-vous or,
 Viuez ainsi en la captiuité
 Comm' au plus haut de la prosperité.
 Adieu: songeZ qu'on ne peut receuoir
 Des maux, sinon quand on pense en auoir.
 Je m'en retourne. Cl. Ainsi vous soit ami
 Tout le Destin, comm' il m'est ennemi.
 Le Ch. Où courez-vous, Seleuque, où courez-vous?
 Sel. Je cours, fuyant l'ennuimé courroux.
 Le Ch. Mais quel courroux? hé Dieu si nous en sommes!
 Sel. Je ne suy pas ny Cesar ny ses hommes.
 Le Ch. Qu'y a t'il donc que peut plus la fortune?
 Sel. Il n'y a rien, sinon l'offense d'une.
 Le Ch. Auroit on bien nostre Roine blessée?
 Sel. Non non, mais i'ay nostre Roine offensée.
 Le Ch. Quel malheur donc a causé ton offense?
 Sel. Que sert ma faute, ou bien mon innocence?*

Le Ch. *Mais dy le nous, dy, il ne nuira rien.*

Sel. *Dit, il n'apporte à la ville aucun bien.*

Le Ch. *Mais tant y a que tu as gagné l'huis.*

Sel. *Mais tant y a que ja puni i'en suis.*

Le Ch. *Estant puni en es tu du tout quitte?*

Sel. *Estant puni plus fort ie me dépite,*

Et ja dans moy ie sens vne furie,

Me menassant que telle fâcherie

Poindra sans fin mon ame furieuse,

Lors que la Roine & triste & courageuse

Deuant Cesar aux cheueux m'a tiré,

Et de son poing mon visage empiré:

S'elle m'eust fait mort en terre gesir,

Elle eust preuen à mon present desir,

Veu que la mort n'eust point esté tant dure

Que l'éternelle & mordante peinture,

Qui ja desia iusques au fond me blesse

D'auoir blesé ma Roine & ma maistresse.

LE CHOEVR.

O *Quel heur à la personne*

Le Ciel gouuerneur ordonne,

Qui contente de son sort,

Par conuoitise ne sort

Hors de l'heureuse franchise,

Et n'a sa gorge submise

Au ioug & trop dur lien

De ce pourchas terrien.

Mais bien les antres sauvages,

Les beaux tapis des herbages,

CLEOPATRE,

Les rejetsans arbrisseaux,
 Les murmures des ruisseaux,
 Et la gorge babillarde
 De Philomele iasarde,
 Et l'attente du Printemps
 Sont ses biens & passetemps.
 Sans que l'ame haut volante,
 De plus grand desir bruslante
 Suiue les pompeux arrois:
 Et puis offensant ses Rois,
 Ait pour maigre recompense
 Le feu, le glaive, ou potance,
 Ou plustost mille remors,
 ConfereZ à mille morts.
 Si l'inconstante fortune
 Au matin est opportune,
 Elle est importune au soir,
 Le temps ne se peut rassoir,
 A la fortune il accorde,
 Portant à celuy la corde
 Qu'il auoit parauant mis
 Aurang des meilleurs amis.
 Quoy que soit, soit mort ou peine,
 Que le Soleil nous rameine
 En nous ramenant son iour:
 Soit qu'elle face sejour,
 Ou bien que par la mort griesue
 Elle se face plus briefue:
 Celuy qui ard de desir
 S'est tousiours senti saisir.

Arius de ceste ville,

Que ceste ardeur inutile

N'auoit iamais retenu:

Ce Philosophe chenu,

Qui déprisoit toute pompe,

Dont ceste ville se trompe,

Durant nostre grand' douleur

A receu le bien & l'heur:

Cesar faisant son entree,

A la sagesse monstree

L'heur & la felicité,

La raison, la verité,

Qu'auoit en soy ce bon maistre,

Le faisant mesme à sa dextre

Costoyer, pour estre à nous

Comme vn miracle entre tous.

Seluque, qui de la Roine

Receuoit le patrimoine

En partie, & qui dresseoit

Le gouuernement, reçoit,

Et outre ceste fortune

Qui nous est à tous commune,

Plus griesue infelicité

Que nostre captiuité.

Mais or' ce dernier courage

De ma Roine est vn presage,

S'il faut changer de propos,

Que la meurdriere Atropos

Ne souffrira pas qu'on porte

A Romme ma Roine forte,

CLEOPATRE,

*Qui veut de ses propres mains
S'arracher des gens Rommains.
Celle la dont la constance
A pris soudain la vengeance
Du serf, & dont la fureur
N'a point craint son Empereur:
Croyez que plustost l'espee
En son sang sera trempee,
Que pour un peu moins souffrir
A son deshonneur s'offrir.*

Seleuque.

*O saint propos, ô verité certaine!
Pareille aux deſest nostre chance humaine.*

A C T E IIII.

Cleopatre. Charmium. Eras. Le Chœur.

Cleopatre.

PENSEROIT doncq Cesar estre du tout vain-
queur?

*Penseroit doncq Cesar abastardir ce cœur,
Veu que des tiges vieux ceste vigueur i'herite,
De ne pouuoir ceder qu'à la Parque dépite?
La Parque & non Cesar aura sus moy le pris,
La Parque & non Cesar soulage mes esprits,
La Parque & non Cesar triomphera de moy,
La Parque & non Cesar finira mon esmoy:*

Et

Et si i'ay ce iourdhuy usé de quelque feinte,
Afin que ma portee en son sang ne fust teinte.
Quoy? Cesar pensoit-il que ce que dit i' auois
Peust bien aller ensemble & de cœur & de voix?
Cesar Cesar Cesar, il te seroit facile
De subiuguer ce cœur aux liens indocile:
Mais la pitié que i'ay du sang de mes enfans,
Rendoyent sus mon vouloir mes propos triomphans,
Non la pitié que i'ay si par moy miserable
Est rompu le filet à moy ja trop durable.
Courage donc courage (ô compagnes fatales)
Iadis serues à moy, mais en la mort égales,
Vous auez recogneu Cleopatre princesse,
Or' ne reconnoissez que la Parque maistresse.
Ch. Encore que les maux par ma Roine endurez,
Encore que les cieux contre nous coniurez,
Encore que la terre enuers nous courroucee,
Encore que fortune enuers nous insensee,
Encore que d'Antoine vne mort miserable,
Encore que la pompe à Cesar desirable,
Encore que l'arrest que nous fismes ensemble,
Qu'il faut qu'un mesme iour aux enfers nous assemble,
Eguillonast assez mon esprit courageux
D'estre contre soymesme un vainqueur outrageux,
Ce remede de mort, contrepoison de duel,
S'est tantost présenté d'auantage à mon œil:
Car ce bon Dolabelle ami de nostre affaire,
Combien que pour Cesar il soit nostre aduersaire,
Ta fait sçauoir (ô Roine) apres que l'Empereur
Est parti d'avec toy, & apres ta fureur

CLEOPATRE,

Tant equitablement à Seleuque monstree,
 Que dans trois iours prefix ceste douce contree
 Il nous faudra laisser, pour à Romme menees
 Donner un beau spectacle à leurs effeminees.
 Et. Ha mort, ô douce mort, mort seule guarison
 Des esprits oppressez d'une estrange prison,
 Pourquoi souffres tu tant à tes droits faire tort?
 T'auons nous fait offense, ô douce & douce mort?
 Pourquoi n'approches tu, ô Parque trop tardine?
 Pourquoi veux tu souffrir ceste bande captiue,
 Qui n'aura pas plustost le don de liberté,
 Que cet esprit ne soit par ton dard écarté?
 Hastes doncq hastes toy, vanter tu te pourras
 Que mesme sus Cesar une desspouille auras:
 Ne permets point alors que Phebus qui nous luit
 En deuant sera chez son oncle conduit,
 Que ta sœur pitoyable, hélas! à nous cruelle,
 Tire encore le fil dont elle nous bourrelle:
 Ne permets que des peurs la pallissante bande
 Empesche ce iourdhuy de te faire une offrande,
 L'occasion est seure, & nul à ce courage
 Ce iour nuire ne peult, qu'on ne te face hommage.
 Cescuide pour vray que ja nous soyons prestes
 D'aller, & de donner tesmoignage des questes.
 Cl. Mourons donc, cheres sœurs, ayons plustost ce cœur
 De seruir à Pluton qu'à Cesar mon vainqueur:
 Mais auant que mourir faire il nous conuiendra
 Les obseques d'Antoine, & puis mourir faudra,
 Je l'ay tantost mandé à Cesar, qui veult bien
 Que Monseigneur i'honore, hélas! & l'ami mien.

*Abbaïſſe toy donc ciel, & auant que ie meure
Viens voir le dernier dueil qu'il faut faire à ceſte heure:
Peut eſtre tu ſeras marry de m'eſtre tel,
Te faiſchant de mon dueil eſtrangement mortel.
Allons donc cheres ſœurs : de pleurs, de cris, de larmes,
Venons nous affoiblir, à fin qu'en ſes alarmes
Noſtre voiſine mort nous ſoit ores moins dure,
Quand aurons demi fait aux eſprits ouuerture.*

*Le Ch. Mais où va dites moy, dites moy damoyſelles,
Où va ma Roine ainſi ? quelles plaintes mortelles,
Quel ſouci meurdriſſant ont terni ſon beau teint ?
Nel'auoit pas aſſez la ſeiche fiebure atteint ?
Ch. Trifte elle ſ'en va voir des ſepulchres le clos,
Où la mort a caché de ſon ami les os. (ſtreſſe.*

*Le Ch. Que ſeiournons nous donc ? ſuiuons noſtre mai-
Er. Suiure vous ne pouuez, ſans ſuiure la deſtreſſe.*

LE CHOEVR.

*L A greſle petillante
Deſſus les toits,
Et qui meſme eſt nuifante
Au verd des bois,
Contre les vins forcene
En ſa fureur,
Et trompe auſſi la peine
Du laboureur:
Neſtant alors contente
De ſon effort,
Ne met toute l'attente
Des fruits à mort.*

CLEOPATRE,

Quand la douleur nous iette
Ce qui nous poind,
Pour vn seul sa sagette
Ne blesse point.

Sinostre Roine pleure,
Lequel de nous
Ne pleure point à l'heure?
Pas vn de tous.

Mille traits nous affolent,
Et seulement
De l'enuieux consolent
L'entendement.

Faisons ceder aux larmes
La triste voix,
Et souffrons les alarmes
Tels que ces trois.

Ja la Roine se couche
Pres du tombeau,
Elle ouure ja la bouche:
Sus donc tout beau.

Cleopatre.

ANTOINE, ô cher Antoine, Antoine ma moitié,
Si Antoine n'eust eu des cieux l'inimitié,
Antoine Antoine, hélas! dont le malheur me priue,
Entens la foible voix d'une foible captiue,
Qui de ses propres mains auoit la cendre mise
Au clos de ce tombeau n'estant encore prise:
Mais qui prise & captiue à son malheur guidée,
Sujette & prisonniere en sa ville gardée,

Ore te sacrifie, & non sans quelque crainte
 De faire trop durer en ce lieu ma complainte,
 Veu qu'on a l'œil sus moy, de peur que la douleur
 Ne face par la mort la fin de mon malheur:
 Et à fin que mon corps de sa douleur priué
 Soit au Rommain triomphe en la fin reserué:
 Triomphe, dy-ie, las! qu'on veult orner de moy,
 Triomphe, dy-ie, las! que lon fera de toy.
 Il ne faut plus desor de moy que tu attendes
 Quelques autres honneurs, quelques autres offrandes,
 L'honneur que ie te fais, l'honneur dernier sera
 Qu'à son Antoine mort Cleopatre fera.
 Et bien que toy viuant la force & violence
 Ne nous ait point forcé d'écarter²⁴¹⁰ l'alliance,
 Et de nous separer: toutesfois ie crains fort
 Que nous nous separions l'un del'autre à la mort,
 Et qu'Antoine Rommain en Egypte demeure,
 Et moy Egyptienne dedans Romme ie meure.
 Mais siles puissans Dieux ont pouuoir en ce lieu
 Où maintenant tu es, fais fais que quelque Dieu
 Ne permette iamais qu'en m'entraînant d'ici
 On triomphe de toy en ma personne ainsi:
 Ains que ce tien cercueil, ô spectacle piteux,
 De deux pauures amans nous racouple tous deux,
 Cercueil qu'encore un iour l'Egypte honorera,
 Et peut estre à nous deux l'epitaphe fera.

ICY sont deux amans qui heureux en leur vie,
 D'heur, d'honneur, de lieffe, ont leur ame assouuie:
 Mais en fin tel malheur on les vit encourir,
 Que le bon heur des deux fut de bien tost mourir.

CLEOPATRE,

Reçoy reçoy moy donc auant que Cesar parte,
 Que plustost mon esprit que mon honneur s'écarte:
 Car entre tout le mal, peine, douleur, encombre,
 Souspirs, regrets, soucis, que i'ay souffert sans nombre,
 I'estime le plus grief ce bien petit de temps
 Que de toy, ô Antoine, esloigner ie me sens.

Le Ch. Voila pleurât elle entre en ce clos des tombeaux,
 Rien ne voyent de tel les tournoyans flambeaux.

Er. Est-il si ferme esprit, qui presque ne s'enuole
 Au piteux escouter de si triste parole?

Ch. O cendre bien heureuse étant hors de la terre!
 L'homme n'est point heureux tât qu'un cercueil l'enferre.

Le Ch. Auroit donc bien quelqu'un de viure telle enuie,
 Qui ne voulust ici mespriser ceste vie?

Cl. Allons donc cheres sœurs, & prenons doucement
 De nos tristes malheurs l'heureux allegement.

LE CHOEVR.

Strophe.

P L V S grande est la peine
 Que l'outrageux sort
 Aux amis ameine,
 Que de l'ami mort
 N'est la ioye grande,
 Alors qu'en la bande
 Des esprits heurez,
 Esprits asseurez
 Contre toute dextre,
 Quitte se voit estre
 Des maux endurez.

Antistrophe.

Chacune Charite

*Au tour de Cypris,
Quand la dent dépite
Du sanglier épris,
Occit en la chasse
De Myrrhe la race,
Ne pleuroit si fort,
Qu'on a fait la mort
D'Antoine, que l'ire
Transmit au nauire
De l'oubliex port.*

Epode.

Les cris, les plains

*Des Phrygiennes
Estans aux mains
Myceniennes,
N'estoyent pas tels,
Que les mortels
Que pour Antoine
Fait nostre Roine.*

Strophe.

*Mais ore i'ay crainte,
Qu'il faudra pleurer
Nostre Roine esteinte,
Qui ne peut durer
Au mal de ce monde,
Mal qui se seconde,
Tousiours enfantant
Nouveau mal sortant:*

CLEOPATRE,

On la voit deliure
Du desir de viure,
Mille morts portant.

Antitrophe.

Tantost gaye & verte
La forest estoit,
La terre couuerte
Sa Cerés portoit:
Flore auoit la pree
De fleurs diapree,
Quand pour tout ceci
Tout soudain voici
Cela qui les pille,
L'hyuer, la faucille,
Et la faulx aussi.

Epode.

Ja la douleur
Rompt la lieffe,
La ioye & l'heur
A ma Princesse,
Reste le teint
Qui n'est esteint:
Mais la mort blesme
L'ostera mesme.

Strophe.

Elle vient de faire
L'honneur au cercueil,
O quelle a peu plaire
Et deplaire à l'œil,
Plaire quand les roses

Ont

Ont esté declofés,
Auec le Cyprés,
Mille fois après
Baisotant la lame,
Qui semble à son ame
Faire les aprests.

Antistrophe.

Versant la rosee
Du fond de son cœur,
Par les yeux puissee,
Et puis la liqueur
Que requiert la cendre:
Et faisant entendre
Quelques mots lâchez,
Bassement mâchez,
Pour fin de la feste
Mellant de sa teste
Les poils arrachez.

Epode.

Elle a despleu,
Pource qu'il semble
Qu'elle n'a peu
Que viure ensemble:
Et que soudain
De nostre main
Luy faudra faire
Vn mesme affaire.

ACTE V.

Proculee. Le Chœur.

Rr

CLEOPATRE,

Proculec.



IVSTE Ciel, si ce grief malefice
 Ne t'accusoit iustement d'iniustice,
 Par quel destin de tes Dieux coniuéré,
 Ou par quel cours des astres mesuré,
 A le malheur pillé telle victoire,
 Qu'en la voyant on ne la pourroit croire?
 O vous les Dieux des bas enfers & sombres,
 Qui retirez fatalement les ombres
 Hors de nos corps, quelle palle Megere
 Estoit commise en si rare misere?
 O fiere Terre à toute heure souillée
 Des corps des tiens, & en leur sang touillée,
 As tu iamaïs soustenu sous les flancs
 Quelque fureur de courages plus grands?
 Non, quand tes fils Iupiter eschellerent,
 Et contre luy serpentins se meslerent,
 Car eux pour estre exempts du droit des cieux
 Voulurent mesme embuscher les grands Dieux,
 Desquels en fin fierement assaillis,
 Furent aux creus de leurs monts recueillis.
 Mais ces trois ci, dont le caché courage
 N'eust point esté mescreu de telle rage,
 Qui n'estoient point geantes serpentines,
 En redoublant leurs rages feminines,
 Pour au vouloir de Cesar n'obeir,
 Leur propre vie ont bien voulu trahir.
 O Iupiter! ô Dieux! quelles rigueurs
 Permetts tu donc à ces superbes cœurs?
 Quelles horreurs as tu fait ores naistre,

Qui des nepueux pourront aux bouches estre,
 Tant que le tour de la machine tienne
 Par contrepoids balancé se maintienne?
 Dictes moy donc vous brandons flamboyans,
 Brandons du Ciel toutes choses voyans,
 Auez-vous peu dans ce val tant instable
 Découvrir rien de plus espouventable?
 Accusez-vous maintenant ô Destins,
 Accusez-vous ô flambeaux ^{héraldi} argentins:
 Et toy Egypte à l'enui matinee,
 Maudi cent fois l'injuste destinee:
 Et toy Cesar, & vous autres Romains
 Contristez vous, la Parque de vos mains
 A Cleopatre à ceste heure arrachée,
 Et maugré vous vostre attente empeschée.
 Le Ch. O dure, hélas! & trop dure auanture,
 Mille fois dure & mille fois trop dure.
 Pr. Ha ie ne puis à ce crime penser,
 Si ie ne veux en pensant m'offenser:
 Et si mon cœur à ce malheur ne pense,
 En le fermant ie luy fais plus d'offense.
 Escoutez donc, Citoyens, escoutez,
 Et m'escoutant vostre mal lamentez.
 I'estois venu pour le mal supporter
 De Cleopatre, & la reconforter,
 Quand i'ay trouué ces gardes qui frappoyent
 Contre sa chambre, & sa porte rompoyent,
 Et qu'en entrant en ceste chambre close,
 I'ay veu (ô rare & miserable chose!)
 Ma Cleopatre en son royal habit,

CLEOPATRE,

Et sa couronne, au long d'un richelict
 Peint & doré, blesme & morte couchee,
 Sans qu'elle fust d'aucun glaiue touchee,
 Auccq' Eras sa femme, à ses pieds morte,
 Et Charmium viue, qu'en telle sorte
 L'ay lors blasmee: Aa Charmium, est-ce
 Noblement faict? Ouy ouy c'est de noblesse
 De tant de Rois. Egypitiens venue
 Vn tesmoignage. Et lors peu soustenue
 En chancelant, & s'accrochant en vain,
 Tombe à l'enuers, restant un tronc humain.
 Voila des trois la fin espouuentable,
 Voila des trois le destin lamentable:
 L'amour ne veut separer les deux corps,
 Qu'il auoit ioints par longs & longs accords:
 Le Ciel n'en veut permettre toute chose,
 Que bien souuent le courageux propose.
 Cesar verra perdant ce qu'il attend,
 Que nul ne peut au monde estre content.
 L'Egyppte aura renfort de sa destresse,
 Perdant apres son bonheur, sa maistrresse:
 Mesmement moy qui suis son ennemi,
 En y pensant, ie me pasme à demi,
 Ma voix s'infirme, & mon penser defaut:
 O qu'incertain est l'ordre de la haut!

Le Cœur.
PEVTON encores entendre
 De toy troupe quelque voix?
 Peux tu ceste seule fois
 De ton dueil la plainte rendre,

Veu que hélas! tant douloureuse,
 De ton support le plus fort,
 Tu ne remets qu'en la mort,
 Mort hélas à nous heureuse
 Mais prens prens donc ceste enaie,
 Sur le plus blanc des oiseaux,
 Qui sonne au bord de ses ailes,
 La retraite de sa vie,
 Et en te débordant mesme,
 Dessite moy tous les cieux,
 Dessite moy tous leurs Dieux,
 Autheurs de ton mal extreme

Non non, ta douleur amere,
 Quand i' pense, on ne peut voir
 Si grande, que quelque espoir
 Ne te reste en ta misere.

Ta Cleopatre ainsi morte

Au monde ne perira,
 Le temps la garantira,
 Qui desia sa gloire porte,

Depuis la vermeille entree
 Que fait ici le Soleil,
 Jusqu'aux lieux de son sommeil
 Opposez à ma contree,
 Pour auoir plustost qu'en Romme
 Se souffrir porter ainsi,
 Aimé mieux s'occire ici,
 Ayant un cœur plus que d'homme
 Pr. Mais que diray-je à Cesar? ô l'horreur,
 Qui sortira de l'estrange fureur!

CLEOP. TRAGEDIE.

*Que dira-il de mourir sans blessure
En telle sorte? Est-ce point par morsure
De quelque Aspic? Auroit-ce point esté
Quelque venin secrettement porté?
Mais tant y a qu'il faut que l'esperance
Que nous auions, cede à ceste constance
Le Ch. Mais tant y a qu'il nous faudra renger
Dessous les loix d'un vainqueur estrange,
Et deormais en nostre ville apprendre
De n'oser plus contre Cesarméprendre.
Souuent nos maux font nos morts desirables,
Vous le voyez en ces trois misérables.*

FIN DE LA TRAGEDIE de Cleopatre.

LES PERSONNAGES DE LA TRAGEDIE DE DIDON.

Achate.
Ascaigne.
Palinure.
Encc.
Le Chœur des Troyens.
Didon.
Le Chœur des Pheniciennes.
Anne.
Barce.



DIDON SE S'A- CRIFIANT.

TRAGÉDIE D'ESTIENNE
IODELLE PARISIEN.

ACTE I.

Achate. Ascaigne. Palinure.

Achate.



QUEL iour sombre, quel trouble, avec
ce iour te roulent
Tes destins; ô Carthage? & pourquoy
ne se souillent
Les grands Dieux, qui leur venent
leurs oreilles saintes

Aueuglent en nos maux, essourdent en nos plaintes?
Pourquoy donques, jaloux, ne se souillent de faire,
Ce qui fait aux mortels leur puissance desplaire?
Race des Dieux, Ascaigne, & roy qu'il auanture
Des Troyens liu au ciel, assenre Palinure,
Encor que nostre Ence au haur nous enuoye
Apprester au depart les restes de la Troye:
Encor que nous suivions ses redoutés oracles,
Ses songes ambigus, ses monstrueux miracles:

Encor que, comme il dit, du grand Achaïer ace,
 Mercure, soit venu se planter à sa face,
 A fin que hors d'Afrique en mer il nous remeine,
 Pour faire aussi tost fin à nos ans qu'à la peine:
 Ne lertez-vous point Peïl (lus se pourroit il faire
 Que telle pitié peust à quelqu'un ne déplaire?)
 Lertez-vous point donc l'œil sur l'amante animée?
 Sur Didon, qui d'amour & de dueil renflammée,
 (Ta destia ie la voy forcener, ce me semble,) A T
 Perdra son sens, son heür, & son Enée ensemble?
 Et dont peut estre (ha Dieux!) la miserable vie
 Auec nos fiers vaisseaux aux vents sera rauie:
 Tant que l'iniuste mort recombant sur nos testez
 Armera contre nous les meurtrieres tempestes.
 Sa peine fut horrible alors que la nuit sombre
 De son effroyde Sichee offrit à ses yeux l'ombre:
 L'ombre hideuse & palle, & qu'à ses yeux Sichee
 Décourrant une playe, une playe bouchee
 De la poudre & du sang, monstroït à la desertee
 De son frere meurtrier la cruauté couuertee.
 D'un son gresse, enseignant sa richesse enterreë:
 Dont elle auëcq' les siens parl'Afrique alteree molgubh
 Fuyant de ce cruel Pygmalion la rage, supmoh y ap mo
 Marchanda pour bastir sur ce bruyant rinage, art imp
 Ce que les siens pourroyent enuironner de place et b
 De la peau d'un Taureau, & d'une telle menace, cor T
 Ayant dressé Carthage, horreur mesme des guerres, non
 Les voisins ennemis, & les estranges terres au to
 L'autre mal la troubla, lors que Iarba le prince sup to
 Des noirs Geculiens, luy offroit sa prouince, sa

Et

Et son sceptre & sa gent, si par les torches saintes
Du mariage estoient leurs deux ames estreintes;
Sans qu'elle au vieil amour de Sichee obstinee,
Se peust faire flechir sous le ioug d'Hymenee:
Tant que ce Roy luy couue au fons de l'ame, pleine
D'un immortal courroux, une implacable haine.
Plus estrange malheur encor la vint surprendre;
Quand le pardon des flots appaisez fit descendre
Nostre troupe en Afrique: & que les yeux d'Ence
De cent traits venimeux blessèrent l'effrenee,
Lors que son hoste Amour de ses flammes mordantes,
Peu à peu deuoroit ses entrailles ardentes,
Braisillant dans son cœur, comme on voit hors la braise
Les charbons s'allumans saillir dans la fournaise:
Ou comme l'ardant corps dont se fait le tonnerre,
Lors qu'à son element il se sleue de terre
Dans le milieu de l'air, clos d'une froide nuë,
Double de cent esclairs la longue pointe aiguë.
Mais las! quand des Dieux l'ire à nostre aise s'oppose,
Nous nous sentons trainer de pire en pire chose.
Didon, qui nostre Ence (arraché de l'horrible
Massacre des Gregeois, de la fureur terrible
De Iunon aduersaire, & des hurlans abysmes)
Deslors mesme qu'un pied dans Carthage nous mistes,
Dedans sa court receut, receuant dans son ame
Parle regard coupable, & l'image, & la flame,
Pourroit elle égaller tout le mal que luy brasse
Si long temps la Fortune, au ducit qui la menace
En nostre iniuste fuite? Ainsi que l'indiscrette
Qui perdoit son Iason, ou que celle de Crete

Qui rappelloit en vain son Theſee au riuage,
 Remplira l'œil de pleurs, ſon ame d'une rage,
 Et d'une horreur ſa ville. Aſc. En memoire me tombe
 Ce qu'un iour nous diſoit mon pere ſur la tombe
 D'Anchiſe mon ayeul: Que l'amour & la haine
 Des Dieux vont bigarrant la freſle vie humaine:
 Tant qu'à peine une ioye aux mortels ſe rapporte,
 Qui n'ait pour ſa compagne une douleur plus forte:
 Mais il conſeille auſſi qu'aux choſes douloureuſes
 On s'aveugle, pour voir & gouſter les heureuſes.
 Pal. Il vaut mieux que les Dieux leurs ordonnāces gar-
 Que pour ſe deſmentir, aux dangers ils regardent: (dent,
 Et lon ne doit ſon ſiel contre les Dieux eſpoindre,
 Quand on reçoit des Dieux de deux malheurs le moindre.
 Quel malheur ſi Didon dans ſa poitrine ardente,
 Euſt peu d'un grand Enee enſeuclir l'attente?
 Tant qu'une meſme ardeur rauiſſant leur memoire,
 Peuſt rauir des Troyens & de leur chef la gloire:
 Et qu'ici s'attachant la fatale campagne
 Que le Tybre entortille, euſt pour neant d'Aſcaigne
 Attendu les efforts, voire & l'horrible race,
 Qui doit forcer ſous ſoy ce que Neptune embrāſſe?
 Un mal paſſe le mal. Aſc. Bien qu'une douce amorce
 Deſrobe bien ſouuent au ieune cœur ſa force,
 Si m'aveuglé-je au bien que j'auois, & au trouble
 D'une amante inſenſee. Il faut que lon redouble
 L'ame pour vaincre un dueil. Donc ceſte Afrique douce
 En la laiſſant, nous charme? Où le deſtin nous pouſſe.
 Suiuon, ſuiuon touſiours. Toute troupe eſt ſujette
 Au travail: le travail enduré nous rachette

Vn glorieux repos. Ach. La ieunesse bouillante
 Qui contre le souci se rend tousiours nuisante,
 Deffend à ton esprit, Ascaigne, qu'il ne ronge
 La crainte des dangers, où plus âgé ie songe:
 La haine fait le dol. Inon par les enuies
 Que sans fin irritée acharne sur nos vies,
 (Elle qui du Tonant est la sœur & l'esposée)
 Renuerse les destins: & de tout heur ialouse,
 Vent monstres que celuy tousiours son malheur traine,
 Pour qui les cœurs felons ont enfielé leur haine:
 N'auroit elle pas bien pourchassé par menée
 Que hors d'ici les Dieux exilassent Enee?
 Elle qui à son vueil Deesse se transforme,
 Auroit elle point pris de Mercure la forme,
 Pour nous oster (seignant du grand Dieu le message)
 Vne Troye desia redressée en Carthage?
 Qui plus est par l'horreur de l'hyuer, & la rage
 Des cruels Aquilons, & par le seul naufrage
 S'apaisent leurs courroux. Iupiter nous commande
 De faire desmarer la Phrygienne bande;
 Demeurant des Gregeois: car depuis que la Troye
 Fut par l'arrest celeste aux Atrides la proye,
 Ce pauvre nom nous reste, & semble qu'à cest heur
 Le Ciel vueille que rien de Troye ne demeure.
 Car veu qu'en nulle terre on ne nous souffre prendre
 Le siege & le repos, & qu'ores de la cendre
 Des funebres tombeaux les tremblantes voix sortent,
 Qui tousiours nouueau vol à nostre fuite apportent:
 Et qu'ores par les cris de quelque orde Harpye
 Nous sommes rechassés: & or de la Libye

D I D O N,

Par le fils de Maia, qui fait changer sur l'heure
 A la traistresse mer nostre seure demeure.
 Quelle belle Italie, ou quel autre heritage
 Nous promet-on, sinon l'eternel nauigage,
 Et le fons de la mer, qui par la destinee
 Veut pour vn Dieu marin recevoir son Enee,
 Enee son neveu, & de luy seul contente,
 Noyer auecques nous nos Dieux & nostre attente?
 Pal. Jamais aux bas mortels les Immortels ne rendent
 Vne assurance entiere: & tousiours ceux qui tendent
 A la gloire plus haute, ont leurs ames estreintes
 Aux soucis, aux trauaux, aux songes, & aux craintes.
 Mais en vain celuy-là se tourmente & soucie,
 Qui soit heur, soit malheur, dessus les Dieux appuye
 Le hasart de ses faits: car bien qu'au ciel ie veisse
 Les astres ennemis, & que ie me predisse
 De mes voisins dangers l'euenement moleste,
 Il vaudroit mieux, suiuant vn message celeste
 (Quand mesme il seroit faux) mettre aux Dieux ma face,
 Que suiure pour guidon ma fresle cognoissance:
 Aimant mieux en m'armant d'vne volonte pure
 Perdre tout, que d'auoir vouloir de faire iniure
 Au mandement d'un Dieu, qui veut que pour un vice
 Executé, vouloir de faillir se punisse.
 Asc. Encor oublions nous, qu'outre l'ailé Mercure,
 Plus seurs encor nous doit rendre vn celeste augure,
 Alors qu'au sac piteux nostre Troye estoit pleine
 Du feu, de pleurs, de meurdre, vne flamme soudaine
 Vint embraser mon chef, qui comme nostre Anchise
 L'expliqua, nous chassoit bors de la Troye prise.

*Je iure par l'honneur de ceste mesme teste,
Par celle de mon pere, & par la neufue feste
Que le tombeau d' Anchise adiouste à nostre annee,
Qu'vn mesme embrasement m'a ceste matinee
Donné le mesme signe: & qu'on nous tient promesse
De reuënger bien tost la Troye de la Grece.
Ach. Sus sus doncques haston: l'entreprise est heureuse
Qu'on n'execute point d'une main paresseuse.
Haston sans aucun bruit au labeur nostre troupe:
Que tout se trouffe au port, que les rameaux on coupe
Pour couronner les masts: qu'aux vens on prenne garde:
Aux fustes, aux esquifs, qu'aux armes on regarde: :
Qu'il n'y ait mast, antene, ancre, voile, ou hune,
Qui ne soit pour souffrir les hasards de Neptune.
Mais tourne l'œil Ascaigne, & voy l'estrange peine
Où ton pere tout morne à l'écart se pourmene.
Las, faut-il qu'en amour l'audace la plus prompte
Pour vne peur, qui tient tousiours le frein, se domtè?
Enee. Du fer, du sang, du feu, des flots, & de l'orage
Je n'ay point eu d'effroy, & ie l'ay d'un visage,
D'un visage de femme, & faut qu'un grand Enee
Sente plus que Didon sa force effeminee:
Non pas tant pour l'amour qui ait en moy pris place,
Que pour ne pouuoir pas comment souffrir sa face.
Iene m'effroyay point quand la Grece outragée
Fit ramer ses vaisseaux iusques au bord Sigee,
Ou des Atrides fiers, où Achille inuincible,
Où Ajax, où Vlysse, entre tous eux nuisible,
Par ses trompeurs efforts, d'une voix enflammée
Encourageoit au sac leur bien conduite armee:*

D I D O N,

Et que de la muraille, on les vit sur la rive
 Menacer de trainer nostre Troye captiue
 Parmi les flots marins: à fin d' orner Mycenes
 De ce riche butin, salaire de leurs peines:
 Ier' assouray soudain ma raison esclancee,
 Lors que ma mere on vit fatalement blessée
 D'un trait de Diomedé: & ne m'estonnay gueres
 Du destin accompli, quand les dextres meurtrieres
 De deux hardis Gregeois, dans le sang se souillerent
 De Dolon, & de Reze: & vainqueur emmenerent
 Les cheuaux Thraciens, auant qu'on les vist boire
 Dans le Xanthe, duquel viuroit encor la gloire,
 S'ils en eussent gousté. Moins encor fut troublée
 Ma raison dedans moy, lors que Panthasilee,
 Roine Amazonienne, en son camp déconfite,
 Le reste de son ost fit sauuer à la fuite.
 Mesmes la mort d'Hector (Hector seule deffenje
 De nos murs & de nous), ne força ma constance:
 Ny mesme de Pallas l'image gardienne
 Prise de l'ennemi, ny ceste nuit Troyenne,
 Ceste effroyable nuit, où les Dieux nous monstrerent
 Que pour neant dix ans les Troyens resisterent:
 Rien qui peüst telle nuit s'offrir deuant ma veüe,
 Ne trouua de son sens mon ame despourueüe.
 Bien que du grand Hector l'effroyable figure,
 Ayant les cheueux pris & de sang & d'ordure,
 S'apparust deuant moy, pour lors aussi hideuse
 Qu'estoit le corps d'Hector, par la trace poudreuse
 Qu'il empourpra de sang tout au tour de la ville,
 Trainé par les cheuaux de son meurtrier Achille:

Bien(dy-ie) que sortant hors de la maison mienne,
Je veisse en mon chemin la prophete Troyenne
Entre les mains des Grecs miserablement serue,
Tirer par les cheueux du temple de Minerue;
Et bien qu'à tant d'amis par le fer & les flâmes
Je veisse saccager les maisons & les âmes:
Bien(dy-ie) qu'en entrant dans la maison royalle
Auecq' les Grecs, ie veisse Hecube froide & palle
De femmes entôyree, & de cris & de rages,
Dessous vn vieil laurier embrasser les images
Des pauüres Dieux vaincus, & comme condamnée
Tendre le pauvre col à toute destinee:
Voire son Roy vieillart, qui d'une main dépite
Tâchoit venger le sang de son enfant Polite,
Frappé de mesme main, tout petillant & blesme
Deuant l'autel sacré resspandre son sang mesme.
Mais quand aurois-ie dit les troubles qui m'auindrent
Ceste effroyante nuit, qui pourtant ne me tindrent
Esperdu que bien peu? Tant de fois voir ma mere
Se planter tout soudain deuant moy: voir mon pere
Pesant de la vieilleffe, & mon enfant debile;
Qu'il falloit nonobstant arracher de la ville:
Voir en chemin ma femme amoindrir nostre nombre,
Et se perdre de moy, puis tout soudain son ombre
Reuenant, se ficher deuant mes yeux, me dire
L'adieu qu'elle deuoit. Hé qui pourroit suffire
A compter tous ces maux, & encor les affaires
Que m'ont fait rencontrer les destins aduersaires
Depuis ce cruel sac, sans que le Ciel m'estonne
Des cas auantureux que pour nous il ordonne?

La voix de Polydore au taillis entendue,
 Rendit elle ma voix autrement esperdue,
 Que ie n'ay de coustume? Et lors que tous malades
 Du tourment de la mer, dans les isles Strophades
 Nous prîmes nostre port, & que par la Harpye
 (Monstre horrible & puant) fut ma troupe aduertie
 Du malheur qui nous suit, vit on que ie changeasse
 De beaucoup mon visage, & mes sens ie troublasse
 De si rares hideurs? L'horrible prophetie
 Des trauaux qu' Helenus predict sur nostre vie:
 Le monstrueux Cyclope, à qui nous arrachasmes
 Le pauvre Achementide, & au port le menasmes:
 Le trespas de mon pere, à qui la sepulture
 Nous fîmes à Drepan, bien qu'encor i'en endure,
 M'ont ils fait monstrier autre? Et mesmes qu'ad nos testes
 Ie vey quasi couurir des dernieres tempestes
 Que nous eusmes en mer, de quelle contenance
 Me peut on voir monstrier un deffaut d'assurance?
 Toutesfois maintenant hors quasi de tout trouble,
 Ie palli, ie me pers, ie me trouble & retrouble:
 Ie croy ce que i'ay veu n'estre rien fors qu'un songe,
 Duquel ie veux piper la Roine en mon mensonge:
 Et bien que ie la sçache entre tous estre humaine,
 Ie me la feins en moy de rage toute pleine.
 Il me semble desra que les sœurs Eumenides
 Pour tantost m'effroyer, seront les seules guides
 De ces cris effrenez, me faisant miserable
 Moymesme estre enuers moy, de trahison coupable:
 Ou bien si sa douceur à l'œil ie me presente,
 Plus encor sa douceur de moymesme m'absente:

*Veu que i'aurois vne ame estrangement cruelle,
 Si la iuste pitié qu'il me faut auoir d'elle,
 Ne me faisoit creuer & rompre l'entreprise,
 Qui la loy de l'amour infidèlement brise.
 Si ne le faut-il pas: il faut que ma fortune
 S'obstine contre tout, & faut que toy Neptune
 Portes dessus ton dos, quoy qu'ores il aduienne,
 Du royaume promis la troupe Phrygienne:
 Le conseil en est pris, à rien ie ne regarde.
 ..Vne necessité à tout mal se hasarde.*

Le Chœur des Troyens.

LES Dieux des humains se soucient,
 Et leurs yeux sur nous arrestez,
 Font que nos fortunes varient,
 Sans varier leurs volontez.
 Le tour du Ciel qui nous rameine
 Apres un repos vne peine,
 Vn repos apres un tourment,
 Va tousiours d'une mesme sorte:
 Mais tout cela qu'il nous rapporte
 Ne vient iamais qu'inconstamment.
 Les Dieux tousiours à soy ressemblent:
 Quant à soy les Dieux sont parfaits:
 Mais leurs effects sont imparfaits,
 Et iamais en tout ne se semblent.
 Les deux peuples diuers, qu'ensemble
 L'immuable fatalité,
 Pour ce seul iour encore assemble
 Dans les murs de ceste cité:

D I D O N,

*Les Troyens sous le fils d' Anchise,
 Tes Tyriens deffous Elyse;
 Monstrent assez à tous viuans,
 Qu'il n'y a que l'audace humaine
 Qui face, que le Ciel attraine
 L'heur & le malheur se suiuan.
 Nostre heur auroit vne constance,
 Si voulans tousiours hault monter,
 Nous ne taschions mesme d'oster
 Aux grands Dieux nostre obeïssance.
 Mais eux qui toutes choses voyent,
 Exempts d'ignorer iamais rien,
 Ont veu, comme il faut qu'ils enuoyent
 Aux mortels le mal & le bien.
 Et d'un tel ordre ils entrelacent
 L'heur au malheur, & se compassent
 Si bien en leur iuste equité,
 Que l'homme au lieu d'une assurance,
 Ne peult auoir que l'esperance
 De plus grande felicité:
 Pendant que chetif il espere,
 (Chacun en sa condition)
 La Mort oste l'occasion
 D'esperer rien de plus prospere.
 Ainsi les hauts Dieux se reseruent
 Ce poinct, d'estre tous seuls contens:
 Pendant que les bas mortels seruent,
 Aux inconstances de leur temps.
 Des euenemens l'inconstance,
 Engendre en eux une ignorance:*

Tant qu'aucuglez par le desir
 Auquel trop ils s'assuiettissent,
 Pour l'heur le malheur ils choisissent,
 L'ombre du plaisir pour plaisir.
 Mais quoy? veu telle incertitude,
 L'homme sage sans s'esmouuoir
 Reçoit ce qu'il faut recevoir,
 Mocqueur de la vicissitude.
 Car si toutes choses qui viennent,
 Auoyent parauant à venir,
 Si les douleurs qui en prouiennent
 Par un malheureux souuenir:
 Ou bien, la crainte qui deuanee
 L'euenement de telle chance,
 Ne nous peuuent apporter micux:
 Grands Dieux, qu'est-ce qui nous fait faire
 Plus malheureux en nostre affaire,
 Que mesme ne nous font les Cieux?
 Heureux les esprits qui ne sentent
 Les inutiles passions,
 Filles des apprehensions,
 Qui seules quasi nous tourmentent.
 Tout n'est qu'un songe, une risée,
 Un fantosme, une fable, un rien,
 Qui tient nostre vie amusée
 En ce qu'on ne peut dire sien.
 Mais ceste marâtre Nature,
 Qui se monstre beaucoup plus dure
 A nous, qu'aux autres animaux,
 Nous donne un discours dommageable,

D I D O N,

*Qui rend vn homme miserable,
 Et auant & apres ses maux.
 Et plus les bourrelles Furies
 Voyent que nous sommes en heur,
 Et plus apres nostre malheur
 Monstre sur nous leurs seigneuries.
 Ceste ineuitable Fortune,
 Qui renuersa nostre cité,
 N'eust point esté tant importune
 Contre nostre félicité,
 Si auant que les tristes flames
 Eussent raui les cheres ames
 De nos superbes Citoyens:
 Ceste vangeresse muable,
 N'eust point esté tant favorable
 Aux murs, & au nom des Troyens.
 Mais qui eust peu brider sa rage,
 Voyant que le Ciel gouverneur
 Souffroit qu'on saccageast l'honneur
 Des villes, & des Dieux l'ouurage?
 Ainsi n'eust pas esté saisie
 Par les trois infernales sœurs,
 L'ame de ce grand Roy d'Asie,
 Voyant les Grecs estre vainqueurs:
 Si ce grand Priam nostre prince
 N'eust apparu dans sa prouince,
 Comme Roy de tous autres Rois.
 L'Ire n'est point en la puissance
 Des princes: & l'Impatience
 Contraint leur cœur de sous ses loix.*

*Quel horreur, quand la gloire haute
Tresbuche, & que les royautez
Se tournent en captiuité,
Soit par hasart, soit par leur faute?
Toymesme Hecube infortunee,
Qui cruellement des Gregeois
Pour esclauue fus entrainee,
Comment maintenant tu dirois.
Quels brandons, & quelles renailles
S'acharnent dessus les entrailles
De ceux, qui deuant triomphans,
Voyent soudain choir les orages,
Et ensanglanter leurs visages
Du sang mesme de leurs enfans?
Nous mesmes qui dessous Enee
Cherchons nostre bien par nos maux,
Disons qu'auecq' les cœurs plus hauts
La plus grande misere est nee.
Mais qui veut voir un autre exemple,
Soit du destin, ou soit du mal,
Que l'homme en souffre, qu'il contemple
En ce departement fatal,
Comment la Fortune se iouë
D'une grand' Roine sur sa rouë.
I'ay grand' peur qu'aucune raison
Voyant le sort tant variable,
(O pauvre Didon pitoyable!)
Ne demeure dans ta maison.
Vne impatience est plus grande
Que tout mal que lon puisse auoir:*

D I D O N,

*Mais la mort a souvent fait voir,
Qu'impatience au mal commande.*

A C T E II

Didon. Chœur des Pheniciennes.

Anne. Enee.

Didon.

DIEUX, qu'ay-ie soupçonné? Dieux, grands
Dieux qu'ay ie sceu?
Mais qu'ay-ie de mes yeux moymesmes ap-
perceu?

*Veut donc ce desloyal avec ses mains traistresses
Mon honneur, mes bienfaits, son honneur, ses promesses,
Donner pour proye aux vents? Je sens ie sens glacer
Mon sang, mon cœur, ma voix, ma force, & mon penser.
Las! Amour, que deuiens ie? & quelle aspre furie
Se vient planter au but de ma trompeuse vie?
Trompeuse, qui flattoit mon aueugle raison,
Pour en fin l'estouffer d'une estrange poison?
Est-ce ainsi que le Ciel nos fortunes balance?
Est-ce ainsi qu'un bienfait le bienfait recompense?
Est-ce ainsi que la foy tient l'amour arresté?
Plus de grace a l'amour, moins il a de seurte.
O trop fresle esperance! ô cruelle iournee!
O trop legere Elise! ô trop pariure Enee!*

*Mais ne le voici pas? sus sus, escartez-vous,
Troupe Phenicienne: il faut que mon courroux
Retenant ce fuitif, desor' se desaignisse:
Ou que plus grand' fureur mes fureurs amoindrissse.*

Toymesme (ô chere sœur) laisse moy faire essay,
 Ou d'arrester ses naus, ou bien les maux que l'ay.
 Il n'aura pas, ie croy, le cœur de roche: & celle
 Qu'il dit sa mere, est bien des Dieux la moins cruelle.
 Il faut que la pitié l'arreste encor ici,
 Ou que ma seule mort arreste mon souci.
 La mort est vn grand bien: la mort seule contenté
 L'esprit, qui en mourant voit perdre toute attente
 De pouuoir viure heureux. Le Ch. Qui ne verroit con-
 L'amour croist son pouuoir de son empeschement?
 Mais souuent d'autant plus qu'on fait on remédie,
 Et plus en vain dans nous s'ancre la maladie.
 Did. Quoy t'esmerueilles-tu si ma iuste fureur,
 O parure cruel, remplit mes mots d'horreurs
 Et qu'outre mon deuoir, deçà delà courante
 Il semble que ie face à Thebes la Bacchante,
 Qui sentant arriuer les iours Trieteriques,
 Fait forcener ses sens sous les erreurs Bacchiques.
 T'en esbahis-tu donc, ven qu'assez tu scauois,
 Las! que tu rendois telle & mon ame & ma voix.
 Car bien que ton depart tu me dissimulasses,
 Bien qu'à la desrobée aux vents sacrifiasses,
 Et au pere Ocean: bien que sans te changer
 Tu m'eusses fait fier du tout à l'estrangeur,
 Sans que iamais ont eust mescreu de telle faute:
 Esperois tu pourtant, ô ingrat ingrat hôte,
 Aueugler tous nos yeux en telle lâcheté?
 Les cieux sont ennemis de la mechanoeté.
 La terre malgré soy, soustient vn homme lasché,
 Et contre le mechant la mer mesme se fâche.

Quand mesme ton dessein ce iour ie n'eusse veu,
 Nyentendu des miens, le Ciel ne l'eust pas teu:
 Ma terre en eust tremblé, & iusques à Carthage
 La mer le fust venu sonner à mon riuage.

Mais qui te meult, Cruel? pourquoy trop inhumain
 Laisse tu celle la qui t'a mis tout en main?
 Nostre amour donc, hélas! ne te retient-il point,
 Ny la main à la main, le cœur au cœur conioint
 Par vne foy si bien iuree en tes delices?

Que si les iustes Dieux vangent les iniustices,
 Tes beaux sermens rompus rompront aussi ton heur.

Fais tu si peu de compte encor de mon honneur,
 Las! qui t'enrichissant d'un superbe trophée,
 Tiendra ma plus grand' gloire en moy mesme estouffée?
 Ne te meut point encor un horrible trespas,
 Dont ta Didon mourra, qui aussi tost ses pas
 Bouillante hastera dedans la nuit profonde,
 Que les vents hasteront tes vaisseaux parmi l'onde?

Or si tu n'es (hélas!) de mon mal soucieux,
 Sois pour le moins (Ingrat) de ton bien curieux.
 En quel temps sommes nous? n'as tu pas veu la gresle
 Et la neige & les vents, tous ces iours pesle-mesle
 Noircir toute la mer, & tant qu'on eust cuidoé
 Que plus le grand Neptune aux eaux n'eust commandé,
 Tant les vents maistrisoient les grand's vagues enflees,
 Qui iusqu'au Ciel estoient horriblement soufflees?
 Celuy ne s'aime pas, qui au cœur del'hyuer,
 Hasardant ses vaisseaux & sa troupe en la mer,
 Prodigue de sa vie, attend qu'un noir orage
 Dans l'eau d'Oubli luy dresse un autre nauigage.

Sans

*Sans crainte de la mort on suiuroit tout espoir,
S'on pouuoit plusieurs fois la lumiere reuoir.*

*Prends encor que les eaux se rendissent bonnaces
En ton departement, crains tu point les menaces
Du Dieu porte-trident irrité contre toy,
Infidelle à celuy qui n'aura plus de foy?
Toutes les fois qu'en mer les flots tu sentiras
Contre-luter aux flots, pallissant tu diras,
C'est à ce coup, ô ciel, ô mer, que la tempeste
Doit iustement vanger ma foy contre ma teste.
Et si tu t'attens lors, que de Troye les Dieux
Portez dans ton nauire, appaisent & les cieux,
Et l'onde courroucée: Il te viendra soudain
Dans l'esprit, que tout Dieu laisse l'homme inhumain.
Vn Dieu mesme perdroit l'Ambrosie immortelle,
Prié de deité, s'il estoit infidelle.
Tu gaignas leur secours par vne pieté,
Leur secours tu perdrois par vne cruauté.*

*Songes tu point encor, que mesme en la marine
L'Amour voit honorer sa puissance diuine?
Neptune sçait il pas, que c'est que de sentir
Le brandon que ses eaux ne peuuent amortir?
Glaucque le fier Triton, & la troupe menüe
De ces Dieux, ont ils pas la force en soy cogneuë
Dont Amour leur commande? & son diuin flambeau
Ard-il pas les poissons iusques au creus de l'eau?
Mesmement quant aux vens: le fier vent de Scythie
Se vit il pas flechir sous l'amour d'Orithye?
Voyant donc maintenant tous ces Dieux obeir
Aux loix d'Amour, voyant qu'ores tu veux hair*

V

DIDON,

De celle là la vie, à qui mesmes la tiennne
 A iamais sera deuë, à ceste heure te vienne,
 Qu'il te vienne vn remors de t'estre en l'esprit mis
 De vouloir dans la mer à tous tes ennemis
 Te fier de ta vie, en irritant ton frere,
 Ton puissant frere Amour, en irritant ta mere,
 Qui tous deux te feront sçauoir à tous les coups,
 Qu'en pechant contre Amour nous pechons contre nous.
 Si encores ta Troye & les grands tours cogneuës
 De ton Priam, dresseioient le chef iusques aux nuës:
 Si des murs que bâstir Apollon, tout le clos
 N'estoit point couuert d'herbe, & de pierres, & d'os,
 Qu'entreprendrois-tu plus des pais estrangers?
 Chercherois-tu le tien parmi plus de dangers?
 Lairois-tu quelque terre heureuse & bien aïmee,
 Pour voir par cent perils de Troye la fumee?
 Craindrois tu point l'hyuer, ny mesme Cupidon,
 Pour la foy pariuree à quelque autre Didon?
 Et maintenant (bons Dieux!) qu'en toy tu deliberes,
 Cruel, de faire voile aux terres estrangeres,
 Laisant si douce terre, & si doux traictement,
 Pour suyure pour ton but vn hazard seulement,
 Que fault-il que ie songe? helas, doy-ie pas croire
 Que dessus vn amour la haine aura victoire?
 Veu que tu me fais tant, qu'à fin de t'estranger
 De Didon, tu ne crains de suiure aucun danger.
 Me fuis tu? me fuis tu? ô les cruels alarmes
 Que me donne l'Amour, par ces pitieuses larmes
 Qu'ores deuant ta face espandre tu me vois!
 Larmes, las! qui se sont maistresses de ma voix,

Qui hors de moy ne peut ne peut. An. Quand l'innocente
 Flechit sous le coupable, & plus forte lamente
 Deuant le foible, hélas! le Ciel au englément
 Donnant à l'un le crime, à l'autre le tourment,
 Fait-il pas voir qu'il faut s'accompagner du vice,
 Qui traine incessamment l'innocence au supplice?
 Did. Par ces larmes ie dy, que te monstrant à l'œil
 Combien l'amour est grand, quand si grand est le ducil:
 Et par ta dextre aussi, puis que moy miserable
 Ne me suis laissé rien qui ne soit secourable
 Par les feux, par les traits, dont ton frere si bien
 A vaincu ma raison qu'il ne m'en reste rien:
 Par nostre mariage, & par nos Hymenees
 Qu'auoient bien commencé mes rudes destinees:
 Par les Dieux, que deuôt tu portes avec toy,
 Compagnons de ta peine, & tesmoins de ta foy:
 Par l'honneur du tiers Ciel que gouverne ta mere:
 Par l'honneur que tu dois aux cendres de ton pere,
 Si iamais rien de bon i'ay de toy merité,
 Si iamais rien de moy à plaisir t'a esté,
 Iete pry prens pitié d'une pauvre famille,
 Que tu perdras au lieu d'acheuer vne ville,
 Comme nous esperions, & d'assembler en vn
 Deux peuples asserruis dessous vn ioug commun.
 L'esperoir flattelà vie, & doucement la pousse,
 L'estranglant à la fin d'une corde moins douce.
 Nostre esperoir est il tel? pourrois-tu faire voir
 Qu'entre tous les malheurs il n'y a que l'esperoir,
 Qui engendré à la fin luy mesme son contraire?
 Vn cœur se doit flechir, & l'homme est aduersaire

D I D O N,

*Des hommes, & des Dieux, lors que d'un mechant cœur
Fuit plus tost la pitié que son propre malheur.*

T'es tu changé si tost? oste oste moy desfores,

(Si quelque lieu me reste aux prieres encores)

Le cœur enuuenimé, qui te deguise ainsi.

Las! ie ne te cogneu iamais pour tel ici:

Ie t'ay cogneu pour tel, que iustement surprise

I'ay mesprisé l'amour en tous autres éprise:

L'amour trop mise en vn, comme ie l'ay dans toy,

Est la haine de tous, & la haine de soy.

I'ay pour t'auoir aimé la haine rencontrée

Des peuples & des Rois de toute la contree:

Mesmes les Tyriens de ton heur offensez

Conuent deffous leurs cœurs leurs desdains amassez.

La Princeesse aime bien, qui beaucoup plus regarde

A vn seul, qu'à tous ceux qu'elle a pris en sa garde.

Qui plus est pour toymesme (ô Soleil me peux tu

Voir veufue de Sichee, & veufue de vertu?)

Pour toymesme (ô Enee) éprise de tes feux,

I'ay mon honneur esteint, ma chasteté, mes vœus:

Pour toy (dy-ie) ô Enee, on verra tost esteindre

Ma renommée aussi, qui se vantoit d'atteindre

D'un chef braué & royall la grand' voûte, où les Dieux

D'un ordre balancé font tournoyer les cieux:

Qui, peut estre, m'ostant du nombre des Princeesses,

M'eust mise apres ma mort au nombre des Deesses.

A qui (ô trop cher hôte) à qui, ô seul support

De ma Carthage, à qui prochaine de la mort

Laisse tu ta Didon? Il faut que ma mort oste

Mes haines d'entour moy, si ie pers vn tel hôte,

Hoste, puis que ce nom me reste seulement
 En celuy, qui m'estoit mari premierement.
 Qu'atten-ie plus sinon que mes murs de Carthage,
 Sentent de mon cruel Pygmalcon la rage?
 Ou que hors de ce lieu que tu auras quitté,
 Mon dur malheur me iette en la captiuité
 Du Roy Getulien? Rien n'espargne l'enuie:
 Et iamais un malheur ne vient sans compagnie.
 Aumoins si' auois eu quelque race de toy,
 Auant que de te voir arracher d'avec moy:
 Et si dedans ma court, du pere abandonnée
 Je pouuois voir iouër quelque petit Enee,
 Qui seulement les traits de ta face gardast,
 Et m'amusant à luy mes soucis retardast:
 Je ne penserois point ny du tout estre prise,
 Ny du tout delaissee. Alors que l'ame éprise
 Ne peut auoir celuy qui toute à soy l'attirait,
 Elle se paist aumoins quelquefois du pourtrait:
 Et bien qu'un souuenir m'embrasast d'auantage,
 L'asseurerois au moins ma debte sur ton gage.
 Mais ores que feray-ie? ay-ie un autre confort,
 Sinon que d'oublier Enee par ma mort?
 Et sans m'attendre au temps, qui souuent desenfle,
 Me despestrer d'esperoir, de l'amour, & de l'ame?
 L'amour fait que lon doit du Soleil s'ennuier,
 Si la seule eau d'oubli peut ses flames noyer.
 Mais pourquoy tant de mots? doy-ie donc satisfaire
 A celuy qui se doit plustost qu'à moy complaire?
 L'amour l'amour me force, & furieusement
 M'apprend, Que qui bien aime, aime impatiemment.

Qu'en dis-tu? En. Je ne puis (ô Roine) qui proposes
 Parlant d'un tel courage, & mille & mille choses,
 Faire que ton parler ne me puisse esmouvoir,
 Ny faire que ie n'aye esgard à mon deuoir:
 Ces deux efforts en moy l'un contre l'autre battent,
 Et chacun à son tour coup dessus coup abbatent:
 Mais lors que l'esprit sent deux contraires, il doit
 Choisir celuy qu'alors plus raisonnable il croit.
 Or la raison par qui enfans des Dieux nous sommes,
 Suit plustost le parti des grands Dieux que des hommes.
 Tu veux me retenir: mais des Dieux le grand Dieu
 N'a pas voulu horner mes destins en ce lieu.
 Le Ciel qui moyennant mon courage & ma peine,
 Promet un doux repos à ma race, me meîne
 De destin en destin, & monstre que souuent
 La celeste faueur bien chèrement se vend.
 Ainsi qu'ores à moy, que le destin repousse
 Hors d'un repps acquis, hors d'une terre douce,
 Hors du sein de Didon, pour encores ramer
 Les bouillons escumeux des gouffres de la mer,
 Pour voir mille hideurs, tant que cent Hippolytes
 En seroient mis encor par morceaux en leurs suites.
 Mais soit que ceste terre, où ie conduy les miens,
 Semble estre seul manoir des plaisirs & des biens,
 Soit que l'onde irritée, & mes voiles trop pleines
 Repoussent mes vaisseaux aux terres plus loingtaines:
 Soit encor que Clothon renouë par trois fois
 Le filet de ma vie, ainsi qu'au vieil Gregeois:
 Soit qu'apres mon trespas ma mere me rauisse,
 Ou qu'aux loix de Minos ma pauvre ombre flechisse,

*Iamais ne m'aduiendra, tant que dans moy j'auray
Memoire de moymesmes, & tant que ie seray
Enee, ou bien d'Enee vne image blefmie,
De nier que Didon & de Roine, & d'amie.
N'ait passé le merite, & iamais ne sera
Que ton nom, qui sans fin de moy se redira,
Ne m'arrache les pleurs, pour certain tesmoignage.
Que maugré moy le Ciel m'arrache de Carthage.
Mais quant à ce depart dont ie suis accusé,
Ie te respons en bref: Ie n'ay iamais usé
De feintise, ou de ruse en rien dissimulee,
A fin que l'entreprise à tes yeux fust celee.
L'amour ne se peut feindre: & mon cœur, dont tesmoins
Sont les Dieux, me forçoit au congé pour le moins.
Celuy n'est pas mechant qui point ne recompense:
Mais mechant est celuy qui aux bienfaits ne pense.
Ie n'ay iamais aussi pretendu dedans moy,
Que les torches d'Hymen me ioignissent à toy.
Si tu nommes l'amour entre nous deux passée,
Mariage arresté, c'est contre ma pensée.
Souuent le faux nous plaist, soit que nous desirions
Que la chose soit vraye, ou soit que nous courions
Sous vne honneste mort, & la honte, & la crainte:
Mais dedans nous le temps ne doit pas d'une feinte
Faire vne verité: la persuasion
Gesne, esclau, en l'amour la prompte affection.
Ce n'estoit ce n'estoit dedans ta court royale,
Où les Troyens cherchoient l'alliance fatale;
Si les arrests du Ciel vouloient qu'à mon plaisir
Ie filasse ma vie, & me laissent choisir*

D I D O N,

Telle qu'il me plairoit, au moins une demeure
 Qui gardast que du tout le nom Troyen ne meure:
 Si ie tenois moymesme à mon souci le frain,
 Ie ne choisirois pas ce riuage lointain:
 Ie bastirois encor sur les restes de Troye,
 I'habiterois encor ce que les Dieux en proye
 Donnerent à Vulcan, & de nom & de biens
 Ie tascherois vanger les ruines des miens:
 Les temples, les maisons, & les palais superbes
 De Priam & des siens, se vangeroyent des herbes
 Qui les couurent desia: nos fleuues qui tant d'os
 Heurtent dedans leur fons, s'enfleroient de mon los:
 Moymesme d'un tel art que Phebus & Neptune,
 De Pergames nouueaux i'enclorrois ma fortune.
 Le païs nous oblige: & sans fin nous deuons
 Aux parens, au païs tout ce que nous pouuons.
 Et qu'eussé-ie plus fait pour moy ne pour ma terre,
 Qu'en me vengeance venger son nom de telle guerre?
 Mais les oracles saints d'Apollon Cynthien,
 Et les sorts de Lycie, & le Saturnien,
 Qui d'un destin de fer nostre fortune lie,
 Me commande de suiure une seule Italie.
 En ce lieu mon amour, en ce lieu mon païs,
 Là les Troyens vainqueurs ne se verront haïs
 Des Dieux, comme deuant: là la sainte alliance
 Sortira des combats: là l'heureuse vaillance
 De neueus en neueus iusqu'à mil ans & mil
 Asseruiront sous soy tout ce païs fertile:
 Et le monde au païs. Si toy Phenicienne
 Tu te plais d'habiter ta ville Libyenne,

Quelle

Quelle enuie te prend, si ce peuple Troyen
S'en va chercher son siege au port Ausonien?
N'as tu pas bien cherché ceste terre en ta fuite:
Et pourquoy, comme à toy, ne nous est-il licite
De chercher un Royaume estrange, quand les Dieux
Presque bon gré, maugré, nous chassent en tels lieux?

An. Que la malice peut ingenieux nous rendre,
Quand elle veut son tort contre le droit deffendre:
Plus le vainqueur Thebain sur l'Hydre s'efforçoit,
Et plus de ses efforts l'Hydre se renforçoit:
Si nostre conscience enuers nous ne surmonte,
Iamais par la raison la malice on ne doute,
Voudroit-on engluer le Griffon rauisseur,
L'Aigle, ou le Gerfaut? l'homme mechant est seur
Qu'il n'est né que pour prendre, hélas! mais quelle proye?
Que ne prens tu, Troyen, sur ceux qui ont pris Troye?

En. Quant à la foy que tant on reproche: iamais
Tay-je donné la foy, que ce lieu deormais
Emmurant ma fortune, ainsi que tu t'emmures,
Finiroit des Troyens les longues Auantures?
Lors que tu me faisois les troubles raconter
De ceste nuict, qui peut par un dol emporter
La ville, à qui dix ans, à qui des grands Dieux l'ire,
A quil'effort des Grecs n'auoit encor sceu nuire:
Te dy-ie pas qu'auant que les Dieux eussent mis
Telle fin au trauail des vainqueurs ennemis,
Souuentes fois Cassandre en changeant de visage,
Toute pleine d'un Dieu, qui mesloit son langage
De mots entrerompus, & dont les saints efforts
La faisoient forcener pour les pousser dehors,

DIDON,

Nous auoit dit, qu'après la Troyenne ruine,
 Après les longs trauaux soufferts en la marine,
 Je viendrois replanter nostre regne, & mon los,
 En la terre qui tient Saturne encore enclos?
 Te dy-ie pas qu'ainsi les effroyans oracles,
 Les songes, les boyaus, & les soudains miracles
 Des cheueux de mon fils, mesmement le discours
 Que le bon Helenus me fit sus tous mes iours,
 Voire iusqu'à la voix de la salle Harpye,
 Appelloient à ce but ma trauaillante vie?
 As tu donc oublié, que quand nous abordaſmes,
 Et qu'humbles deuant toy long temps nous harangasmes
 De ce qui nous menoit, & quel estrange sort
 Nous auoit faict alors ancrer dedans ton port,
 Nous dismes dessus tout, que desja sept anne'es
 Nous auoient veu cherchans la fin des destine'es,
 Qui l'heureuse Italie à ma race donnoient,
 Et qui là les labours des Phrygiens bornoient?
 Tu ne peux ignorer que toute humaine attente
 Ne soit tousiours au lieu, qui tout seul la contente:
 Et que ie n'eusse sceu, voyant deuant mes yeux
 Sans fin sans fin ce but ou me tiroient les Dieux,
 Par vn nouueau serment autre promesse faire,
 Que i'eusse veu du tout à mon esprit contraire.
 Car qui est celuy-là, qui scachant vrayement
 Qu'il faulsera la foy de son traistre serment,
 Aura plustost en foy de refuser la crainte,
 Que l'eternel remors d'auoir sa foy contrainte
 Outre son esperance? Il ne faut donc penser
 Que i'aye iamais sceu la promesse auancer.

Qui pourroit (ie suis tel) si telle elle estoit faite,
 Bon gré maugré les Dieux empescher ma retraite?
 Je ne dy pas qu'en tout inculpable ie sois,
 Vn seul deffaut me mord, c'est que ie ne deuois
 Arrestant si long temps dans ceste estrange terre,
 Te laisser lentement prendre au laqs qui te serre:
 Mais prens t'en à l'Amour, l'Amour t'a peu lier:
 Et l'Amour m'a peu faire en ta terre oublier.
 Amour, non à son fait, mais à son feu regarde:
 Et le danger le prend quand moins il y prend garde.
 Si tel amour tu sens, ie le sens tel aussi,
 Qu'encores volontiers ie m'oublirois ici:
 Tesmoins me sant nos Dieux, que iamais les nuicts som-
 Ne nous cachent le ciel de leurs espesses ombres, (bres
 Que de mon pere Anchise en surfant ie ne voye
 L'image blemissante, & qu'elle ne m'effroye,
 Souuent m'effroye aussi Ascaigne, dont le chef
 Je voy comme dans Troye embraser de rechef.
 Tout cela nonobstant n'a point eu tant de force
 Qu'a eu ce iour le Dieu, qui au depart me force.
 Je iure par ton chef, & par le mien aussi,
 Que manifestement i'ay veu de ces yeux ci:
 Mercure des grands Dieux le messager fidelle,
 Entrant dans la cité, m'apporter la nouuelle
 Enuoyé du grand Dieu, qui fait sous soy mouuoir
 Et la terre & le ciel, pour me tancer, d'auoir
 Seiourné dans Carthage, oubliieux de l'iniure
 Que ie fais à Ascaigne, & à sa geniture.
 Or cesse cesse donc de tes plaintes vser,
 Et mesme en t'embrasant tascher de m'embraser.

D I D O N,

La plainte sert autant aux peines douloureuses,
 Que l'huile dans un feu: les rages amoureuses
 S'apprehendent au vif lors que nous nous plaignons,
 Et les desespoirs sont des regrets compagnons.
 Ce n'est pas de mon gré que ie suy l'Italie:
 Mais la loy des grands Dieux les loix humaines lie.
 Ne me remets donc rien en vain deuant les yeux,
 Je m'arreste à l'arrest de mes parens les Dieux.
 Did. Les Dieux ne furent oncq tes parens, ny ta mere
 Ne fut oncq celle là, que le tiers Ciel tempere
 Le plus benin des Cieux: ny oncq (traistre menteur)
 Le grand Dardan ne fut de ton lignage auteur.
 Le dur mont de Caucase, horrible de froidures,
 (O Cruel) t'engendra de ses veines plus dures:
 Des Tigresses, ie croy, tu as sucé le lait,
 Ou plustost d'Alecton le noir venin infect,
 Qui tellement autour de ton cœur a pris place,
 Que rien que de cruel & mechant il ne brasse.
 N'allegue plus le Ciel guide de ton espoir,
 Car ie croy que le Ciel a honte de te voir:
 Sans tels hommes que toy le Ciel n'auroit point d'ire,
 Iupiter n'auroit point de ses tonneaux le pire.
 Voyez si seulement mes pleurs, ma voix, mon dueil,
 Ont peu la moindre larme arracher de son œil?
 Voyez si il a sa face ou sa parole esmeue?
 Voyez si seulement il a flechi sa veue?
 Voyez si il a pitié de ceste pauvre amante,
 Qu'à grand tort un amour enraciné tourmente,
 Plus qu'on ne voit Sisyphe aux enfers tourmenté,
 Sans relâche contraint de son fardeau porté?

Voire plus que celuy qui sans cesse se rouë,
 Emportant de son pois & soy mesme & sa rouë.
 Car tousiours aux enfers vn tourment est égal:
 Mais plus ie vais auant, & plus grand est mon mal.
 Toutesfois ce cruel n'en a non plus d'atteinte,
 Que si mon vray tourment n'estoit rien qu'une feinte.
 Qu'on ne me parle plus des Scythes, ny des Rois,
 Qui ont tyrannisé Mycenes sous leurs loix:
 Qu'on ne me parle plus des cruautéz Thebaines,
 Lors que des bas enfers les rages inhumaines,
 Semans vn feu bourreau des loix, & d'amitié,
 Se faisoient elles, mesme en leur rage, pitié.
 Qu'on ne m'estonne plus de tout cela, que l'ire
 Des hommes peut brasser: tu peux tu peux suffire
 A monstrier qu'un seul homme a d'inhumanité
 Plus que cent Tigres n'ont en soy de cruauté.
 Car en tout ce qu'on peut raconter des Furies,
 Qui sembloient se iouer & du sang & des vies,
 La cruauté naissoit de quelque deplaisir,
 Et ta cruauté naist de t'auoir faict plaisir:
 Voire vn plaisir, hélas! dont la moindre memoire
 Dessus vn cœur de marbre auroit bien la victoire.
 O Iunon, grand Iunon, tutrice de ces lieux,
 O toymesme grand Roy des hommes & des Dieux,
 Desquels la maïesté traïstement blasphemee,
 Assoura faulxement ma pauvre renommee:
 Qu'est-ce, qu'est-ce qui peut or' me persuader,
 Que d'enhan vous puissiez sus nous deux regarder
 D'un visage equitable? Ha grans Dieux, que nous som-
 Vous & moy bien trahis! la foy la foy des hommes (mes

N'est seure nulle part: las comment fugitif,
 Tourmenté par sept ans, de mer en mer cherif,
 Tant qu'il sembloit qu'au port la vague favorable
 L'eust ietté par despit, souffreteux, miserable,
 Le l'ayie l'ay receu, non en mon amitié.
 Seulement, mais (helas! trop folle) en la moitié
 De mon royaume aussi: l'ay ses compagnons mesme
 Ramené de la mort: ba une couleur blesme
 Me prend par tout le corps; & presque les fureurs
 Me iettent hors de moy, apres tant de faueurs.
 Maintenant maintenant il vous a les augures
 D'Apollon, il vous a les belles auantures
 De Lycie, il allegue & me paye en la fin
 D'un messager des Dieux qui haste son destin.
 C'est bien dit, c'est bien dit, les Dieux n'ont autre affaire:
 Ce seul souci les pent de leur repos distraire:
 Je croirois que les Dieux affranchis du souci,
 Se vissent empescher d'un tel que cestuy-ci.
 Va ie ne te tiens point: va va ie ne réplique
 A ton propos, pipeur, suy ta terre Italique:
 L'espere bien en fin (si les bons Dieux aumoins
 Me peuent estre ensemble & vengeurs & tesmoins)
 Qu'avec mille sanglots tu verras le supplice,
 Que le iuste destin garde à ton injustice.
 Assez tost un malheur se fait à nous sentir:
 Mais las tousiours trop tard se sent un repentir.
 Quelque isle plus barbare, où les flots equitables
 Te porteront en proye aux Tigres tes semblables,
 Le ventre des poissons, ou quelque dur rocher,
 Contre lequel les flots te viendront attacher,

Ou le fons de ta nef, apres qu'un trait de foudre
 Aura ton mas, ta voile, & ton chef mis en poudre,
 Sera ta sepulture, & mesmes en mourant;
 Mon nom entre tes dents on t'orra murmurant:
 Nommant Didon Didon, & lors tousiours presente
 D'un brandon infernal, d'une tenaille ardente,
 Comme si de Megere on m'auoit fait la sœur,
 L'engrauera ton tort dans ton pariure cœur.
 Car quand tu m'auras fait croistre des mœurs le nombre,
 Par tout deuant tes yeux se voidira mon ombre.
 Tu me tourmentes: mais en l'effroyable trouble
 Où sans fin tu seras, tu me rendras au double
 Le loyer de mes maux: la peine est bien plus grande
 Qui voit sans fin son fait: telle ie la demande.
 Et si les Dieux du ciel ne m'en faisoient raison,
 L'esmouurois i esmouurois l'infemale maison.
 Mon dueil n'a point de fin: une mort inhumaine
 Peut vaincre mon amour, non pas vaincre ma haine.
 Ie le sen, ie le voy, ouy grands Dieux ie le voy:
 Le mal est le degre du mal: soustenez moy,
 Entrez, ie ché ie ché, entrez. En. O saints Augures,
 Interpretes des Dieux, qui des choses futures,
 Des presentes aussi, donnez aux bas mortels
 Les soudains iugemens, paroissez orés tels,
 Que Didon puisse auoir par vous la cognoissance,
 Et du vouloir des Dieux, & de mon innocence.
 Mais quelle horreur l'esprend? comment, ô cher support
 Des peuples affligez (il faut iusqu'à la mort
 Que ie confesse ainsi) comment, ô chere Dame,
 Comment donc souffrez vous de ceste gentile ame

Euanouir la force ? O Iupiter, quel œil !
 Qui eust pensé l'Amour pere d'un si grand dueil ?
 Quelle torche ay-ie veüe en ses yeux qui me fuyent ?
 Comment avec mes yeux mes paroles l'ennuyent.
 En quelle pasmoïson la conduit-on dedans ?
 Comment son estomach de gros sanglots ardens
 Bondit contre le Ciel ? & tout despit s'efforce,
 De mettre hors son feu qui prend nouvelle force
 Du vent qu'elle luy donne ? & comme peu à peu
 Les soufflets se renflans embrasent un grand feu ?
 Maint sousspir bouillonnant qui son brasier allume,
 Fait qu'avec son humeur son ame se consume.
 Quels propos furieux m'a elle degorgez ?
 Le courroux fait la langue : & les plus outragez
 Sont ceux, qui bien souuent poussent de leurs poitrines
 Des choses, que l'ardeur fait sembler aux diuines.
 I'en suis encor confus : une pitié me mord :
 Un frisson me saisit : Mais rien, sinon la mort,
 Ne peut rendre celuy des encombres deliure,
 Qui veut le vueil des Dieux entre les hommes suiure.
 Et semble que le Ciel ne permette iamais
 La vraye pieté s'assembler à la paix.
 O Amour, ô Mercure, ô Didon, ô Ascaigne,
 O heureuse Carthage, ô fatale campagne
 Où Iupiter m'appelle, ô regrets douloureux,
 Obien heureux depart, ô depart malheureux !
 Le Ch. Quel heur en ton depart ? En. L'heur que les
 miens attendent.
 Le Ch. Les Dieux nous ont fait tiens. En. Les Dieux
 aux miens me rendent.

Le Ch. La seule impieté te chasse de ces lieux.
 En. La pieté destine autre siege à mes Dieux.
 Le Ch. Quicōques rompt la foy encourt des grans Dieux
 En. De la foy des amās les Dieux ne font que rire. (l'ire.
 Le Ch. La pieté ne peut mettre la pitié bas.
 En. La pitié m'assaut bien, vaincre ne me peult pas.
 Le Ch. Par la seule pitié les durs destins s'esmeuent.
 En. Ce ne sont pas destins si flechir ils se peuent.
 Le Ch. Vn regne acquis vaut mieux que l'esperoir d'estre
 En. Nō cestuy, mais vn autre est destiné pour moy. (Roy.
 Le Ch. Quel païs se rendra scachant ta deceuance?
 En. I'ay non pas au païs, ains au Ciel ma fiance.
 Le Ch. Que la Religion est souuent vn grand fart.
 En. La religion sert sans art & avec art.
 Le Ch. Sans la Religion viuroit vne Iphigene.
 En. Sans celle aussi viuroit & Troye & Polyxene.
 Le Ch. Ton pauvre Astianax sentit bien son effort.
 En. Les Grecs ne sont point seurs chez eux que par sa
 Le Ch. A Diane elle fait des hommes sacrifice. (mort.
 En. Diane par le sang humain nous est propice.
 Le Ch. Que d'autres meurdres las! elle a mis en ce rang.
 En. Le Ciel aussi requiert obeïssance ou sang.
 Le Ch. Tu feras que Didon en augmente la bande.
 En. Ha Dieux, ha Dieux, tay toy, vn remors me com-
 Bien qu'il soit sans effet, de rompre ce propos, (mande,
 I'amaïs homme n'aima sans haïr son repos.

LE CHOEVR.

Q VELLE orde peste recelee,
 D'une feinte dissimulee,

Yy

DIDON,

Seul masque de nos trahisons,
 Qui dessous vn serain visage
 Couue dans le traistre courage
 Mille renaissans poisons,
 Et tant de mal aux autres donne,
 Qu'en fin son maistre elle empoisonne?
 Tel souuent nourrit vne haine,
 Qui emmielle sa langue pleine
 De toute ardente affection:
 Tel bien souuent les Dieux mesprise,
 Qui pour bastir son entreprise
 Ne bruit que de Religion:
 L'un ainsi les esprits amorce,
 L'autre ainsi peu à peu prend force:
 Tandis & l'une & l'autre feinte
 Donne mainte mortelle atteinte:
 Carl'esprit qui se pense aimé
 Se prend & se plaist en sa flame,
 Tant qu'il sente le corps & l'ame,
 Le bien & l'honneur consommé.
 En son repas l'oiseau s'engluë:
 D'un apast le poisson se tuë:
 Et l'autre qui du tout se fie
 Des biens, de l'honneur, de la vie,
 Sus celuy qui pense estre saint,
 Voit en fin l'ame ambitieuse,
 Vne ame en fin seditieuse,
 Qui tout vif iusqu'au vif l'atteint:
 Le vipere meurt, pour sallaire
 Detrop à sa vipere plaie.

*Alors tant plus de force on use,
Quand on voit la traistresse ruse,
Et souuent plus on se fait tort:
Vn mal vient plus soudain abbatre
Ceux, qu'on voit le plus se debatre:
Comme vn sanglier qui tant plus fort
Pousse, escume, gronde, & enrage,
S'enferme tousiours d'auantage.*

*Dy, qui ne seroit descouuerte,
Ceste ame en toute feinte experte,
Dont ce Troyen nous abusoit,
Alors que d'un amour extreme,
Alors que de ses grans Dieux mesme
La pauvre Didon amusoit?
Autour du miel pique l'abeille,
Et l'aspic dans les fleurs sommeille.*

*Cependant, ô sort improspere,
O Amour traistre, avec ton frere
La pauvre Roïne se paissant,
De ceste feinte variable
Reçoit par vn feu veritable
Vn trespas cent fois renaissant.
Ainsi donc les colombes meurent:
Ainsi les noirs corbeaux demeurent.*

*Les yeux sanglans, la face morte,
Le poil meslé, le cœur transi,
Efforce sa force peu forte,
Et sus son liét petille ainsi,
Qu'Hercule arrachant sa chemise,
Qui ia iusqu'à l'ors estoit prise.*

DIDON,

*Mais comment se pourroit-il faire,
Que le Ciel vn iour n'enuoyast
De ces trahisons le salaire,
Qui son maistre en la fin payast?
Ainsi la vipere tortue
Nourrit en soy ce qui la tue.*

ACTE III.

Didon. Anne. Ence. Achate.

Didon.

ROIBLE, palle, sans cœur, sans raison, sans
haleine,
Anne mon cher support, maugré moy ie me
traine

*De rechef çà & là, mal apprise à souffrir
Vn repos qui me vient l'impatience offrir:
Tant que quand tu verras sus la prochaine rive,
La mer qui se tenoit dedans ses bords captiue,
Lors qu'un Aquilon vient dessus ses flancs donner,
Bruire, bondir, courir, iusqu'au ciel bouillonner,
Et sans aucun arrest pousser iusqu'aux campagnes,
De ses flots depitez les suivantes montagnes,
Tu verras tu verras l'estat où vn trompeur
A fait estre le corps & l'ame de ta sœur.
Et bien que ie ne semble estre tant effreece,
Que quand ie rambarray de mes propos Ence,
Plus i'ay perdu dans moy de despit rigoureux,
Et plus i'ay regaigné de tourmens amoureux.*

Alors que contre nous la fortune s'efforce,
 Du décroist d'un grand mal l'autre mal se renforce:
 Tant que ie croy les Dieux contre mon chef iurer,
 De plus en plus me faire en mes iours endurer.
 Mais, las! si ie desplais au Ciel, & si l'enue
 D'une Alecton mutine en veut tant à ma vie,
 Que ne vient on changer à ma mort ma langueur?
 Si de mon heur l'amour ne veut qu'estre vainqueur,
 Si Venus quelquefois par Iunon outragée,
 Ne veut que par ma mort estre d'elle vangée,
 Que ne m'ont ils permis en ceste pasmoison,
 D'où ie reuiens, d'entrer en la noire maison?
 I'eusse appaisé d'un coup par l'extreme allegance
 Mon tourment, leur dedain, leur enuie & vengeance.
 Auec mon sang se fust mon brasier refroidi,
 Auec mes sens se fust mon travail engourdi.
 O malheureuse ardeur, qui reuiens en mes veines!
 O malheureux resueil, qui me rends à mes peines!
 Qu'heureusement i'estois oublie de moy!
 Que maugré moy ie prens le iour que ie renoy!
 Ie sens, Anne ma sœur, ie sens, veu la racine
 Que mon mal incurable a pris dans ma poitrine,
 Que rien ne me scauroit, non pas la mesme mort
 Favoriser au mal, qui redouble si fort.
 Si le courroux ardent, & la haine irritée
 Contre un, duquel on a l'amorce trop goustée,
 Pouuoit l'ardent effort de l'amour à mortir,
 Le courroux m'eust l'exil de l'amour fait sentir:
 Veu qu'un tel creuaceur s'est aigri dans mon ame,
 Que moindre que mon ire on eust peus ma flame.

Mais le feu n'est iamais du feu l'allegement:
 Et le despit du mal nous cause un tiers tourment.
 Ou bien si la douleur vivement engrauee,
 Pouuoit faire mourir la personne aggrauee,
 Je mourrois sur le champ: veu qu'on ne peut parler
 D'une douleur qu'on peust à la mienne égaler.
 Mais tant plus que le vent combat contre la flamme
 Pour la tuer soudain, & plus elle prend d'ame.
 C'est en vain, c'est en vain, guarir tu ne te peux
 (O Didon) ny mourir lors que mourir ta veux:
 Il faut que malgré toy, en ton mal tu te tiennes;
 Il faut que malgré toy aux larmes tu reuiennes.
 Rabaisse toy mon cœur, sans que plus ton courroux
 Puisse triompher d'un, qui triomphe de nous.
 Mais quoy? faut-il qu'ainsi mon bon cœur degenerate?
 Faut-il que la vertu flechisse à la misere?
 Verra ton sous le serf la Roine sousspirer?
 Veux-je encor de ce poinct mon honneur empirer?
 Faut-il qu'enuers une amie outre mesure ingrate,
 Je face de rechef la priere aduocate?
 Je ne puis, je ne puis. An. Arreste, ô chere sœur;
 O sœur qui de ta voix me peux tirer le pleur,
 Et le cœur tout ensemble, arreste la carriere,
 Serrant plus fort la bride à ta douleur trop fiere:
 De peur qu'avant le temps tu ne perdes ainsi,
 Toy, ta sœur, ta douleur, & ton Enee aussi:
 L'espoir sert de remede: en esperant, les Cieux
 Te feront la raison: ou l'espoir gracieux,
 Quand mesme tu perdrois la chose pretendue,
 T'aura tousiours plus saine avec le temps rendue.

On doit tout esprouuer, lors que nous cognoissons
 En nos extremes maux que rien nous ne laissons;
 Qui nous puisse apporter l'heureuse deliurance.
 Nous forçons nos ennuis aux loix de la constance;
 Mais la douleur ne peut son relâche trouuer,
 Quand on sçait qu'on endure à faulte d'esprouuer.
 Tout ce qui peut seruir: car ce qui plus nous oste
 Le moyen de guarir, c'est d'y voir nostre faulte.
 Du premier coup le bœuf au ioug ne s'apprend pas:
 Le fier poulain ne reigle au premier coup ses pass.
 Mais ores on les flate, ores on éguillonne,
 Tant quel'un au colier, l'autre au frain se façonne.
 Crois tu pas que si Phedre eust tasché plusieurs fois
 D'embraser Hippolyte, & de pleurs & de voix,
 Conduisant sagement son embusche dresse,
 Qu'ils se fussent sauuez tous deux de mort forcee?
 Achille courroucé, si tost ne reuint pas
 Pour les presens d'Atride, aux Phrygiens combats,
 Et que sçais tu si c'est vne feinte rusée,
 Dont ce Troyen te veut rendre plus embrasée?
 Car comment cognoist-on un Pin estre constant,
 Sinon qu'en vain le Nord va ce Pin combatant?
 Mais souuent estonnez du premier choc qu'on donne,
 Nous laissons le butin que le hasard nous donne.
 Il faut suiure, il faut suiure. Did. Helas! las quelle feinte?
 Ce cruel ne m'a veu iamaïs que trop atteinté.
 Il ne feint point la fuite à fin de m'embraser,
 Mais il feint un oracle à fin de m'abuser.
 Toutes fois puis qu'il faut à mon malheur complaire,
 Puis que ie voy ma vie en la main aduersaire,

Puis que mon destin semble auoir remis ce iour,
 Tout mon bien dessus l'arc ou de mort, ou d'amour,
 Anne mon seul espoir, Anne qui mieux apprise,
 Peux tirer des enfers ta pauvre sœur Elise,
 Fay fay moy, pour tout bien, le vaincre en un seul point,
 Dont le plus ennemi ne m'escondiroit point.
 Tu vois desia les naus d'oluiers couronnees,
 Tu vois qu'un vain espoir des faulses destinees,
 Pousse, & presse au labeur ces fuitifs estrangers,
 Comme un noir escadron de fourmis mesnagers:
 Tu vois que mon Enee, entalenté de faire
 Que du bien que i'ay fait mon mal soit le salaire,
 Preside sus la troupe, encorés moins esmeu
 Des vents, que de mes pleurs qui mouuoir ne l'ont peu,
 Constant en son propos, autant qu'en l'alliance
 Qu'il a fait avec nous il monstre d'inconstance:
 S'il est ainsi, ma sœur, que ton conseil premier
 M'a fait mettre ma vie en la main du meurdrier:
 S'il est ainsi qu'encor ta pauvre sœur tu aimes,
 Qui t'aime tousiours plus quelle n'aime soy mesmes:
 S'il est ainsi qu'Enee entre tous t'honorast,
 Et en tous ses secrets vers toy se retirast:
 S'il est ainsi que seule entre tous tu cogneuisses
 Les addresses vers l'homme, & que les temps tu sceusses,
 Vama sœur & luy dy, dyluy, ma sœur, qu'he las
 Miserable Didon, de ceux ie ne suis pas
 Qui pour les fils d'Atree en Aulide iurerent
 La ruine Troyenne, & leur force y menerent:
 Ie n'ay hors du tombeau la cendre bien aimée
 De son bon pere Anchise, au gré du vent semée:

Je ne luy ay pas faict, pour tascher de vanger
 Iunon contre Venus, son Ascaigne manger:
 Pourquoy veut il bouscher l'oreille à ma parolle?
 Où court-il? est-ce ainsi qu'une amante on console?
 S'il se repent si tost de promettre à Didon
 Le reste de ses iours, aumoins vn dernier don,
 Vn dernier don aumoins à moy lasse, s'ottrøye,
 Moy pauvre amante, hélas! que sa rigueur foudroye,
 C'est, qu'il vueille le temps attendre seulement,
 Qu'il pourra dans la mer s'embarquer seurement:
 Qu'il attende le temps, qu'avec ma fortune
 Nous voyons appaiser & les vens & Neptune.

Adieu Hymen, adieu mariage ancien,
 Puis qu'Enée en trahit le mal-noüé lien:
 Je ne luy requiers plus, que pour sa simple hostesse,
 Albe, Romme, Italie, & tout le monde il laisse:
 Qu'il s'en voise bastir toutes telles citez,
 Dont il a (se le croy) les beaux noms inuentez:
 Je ne veux plus en rien me rendre à luy contraire,
 Tant pour mollir son cœur il me plaist de luy plaire:
 Rien plus ie ne requiers, fors qu'un temps qui est vain,
 Pour espace & repos de mon tourment certain:
 Je ne requiers sinon que ce dernier relâche,
 A fin que ma fortune enuieuse, qui tâche
 Me faire vaincre à moy, m'apprenne à me douloir,
 Non d'une douleur faire vn hideux desespoir.

La (chere Sœur) la donc, prens peine, ie te prie,
 De mes pleurs, de mes cris, de mes feux, de ma vie:
 Feins en toy d'estre moy, & vien gesner tes sens
 Pour vne heure du mal qui me poind si long temps:

D I D O N,

Tu n'auras si tu sens tant soit peu mes alarmes,
 Pour ce marbre amolir, que trop que trop de larmes:
 Plus pitoyablement encor ie t'instruirois,
 Si tous pleurs n'empeschoient l'accent piteux des voix.
 O Amour, traistre Amour, ô Amour! Ah. Le dueil serre
 Et mes pleurs, & ma voix, lors que ta voix m'enferme
 Jusqu'au plus creus de l'ame: ha faux Amour, ie sens
 Que ta fiere rigueur n'en veut qu'aux innocens.
 Pourtant, pourtant Amour, si toy mesme & ton frere
 N'estes fils d'un Pluton, conceus d'une Megere,
 Si tous deux ne portez autour d'un cœur mutin,
 L'expugnable fort d'un roc diamantin:
 Si l'Enfer ne vous preste à la dolente terre,
 Pour reuenger ses fils accablez du tonnerre
 Par mille impietez: si encor de vous deux
 Le Ciel n'a plus d'effroy, qu'ensemble de tous eux,
 Je croy que la pitié de mon humble barangue,
 La pitié de mes pleurs, faisant tort à ma langue,
 Fera, que comme nous tu l'atteignes au vif.
 L'humble douceur commande au cheual plus retif,
 Non le rude esperon. Mais sois sois nous propice,
 Venus, mere d'Enee: ainsi pour sacrifice
 Du feu des aubespins, soit ton autel orné,
 D'un myrte & d'un rosier vermeil encourtiné,
 Le Cygne & le Pigeon en ton offrande tombe,
 Et tousiours en honneur soit d'Anchise la tombe.
 Did. Nostre ame, quand l'horreur des filles de la nuict
 De propos en propos, de pas en pas la suit,
 Or de brandons ardents, or d'ardantes tenailles,
 Et or de noirs serpens deuorant nos entrailles:

Combien qu'enuers le Ciel inculpable elle soit,
 Tousiours enuers soy mesme une coulpe conçoit,
 Se condamnant sans fin des choses qui suruiennent,
 Croyant que pour cela les rages la retiennent.
 Encor qu'enuers le Ciel ie n'aye commis rien,
 Qui le face auioirdhuy me priuer de tout bien.
 Si est-ce qu'en oyant mes parolles dernières,
 Par qui ma sœur dressoit à Venus ses prières,
 A fin que l'obstiné se ployast à mon gré,
 (Cest obstiné que i'ay sans fin au cœur ancré)
 Ie me suis condamnée, en iugeant que la faulx
 De n'auoir tout ce iour à la maiesté haute
 De Venus Cyprienne, offert mes hables vœux,
 A refroidi son fils & rembrassé mes feux.

Il faut donc que dressant vers les cieux la lumiere,
 Ie t'appaise, ô Deesse, ô grand' Deesse, mère
 De tout estre viuant, qui as tousiours esté
 Des hommes & des Dieux la seule volupté.
 Alme Venus qui tiens sous la grand' spheré blonde
 Des signes porte-iour, le plus beau ciel du monde:
 Où les Amours archiers, les folles très desirs,
 Les Charites, les jeux, les assurez plaisirs,
 Où de tous animaux les moules, la figure,
 Que Dieu par toy, sa fille, ottrøye à la Nature,
 D'un accord mesuré se roulent plaisamment,
 Inspirant maince vie en leur sainct mouuement
 Toy, le but de Nature, à qui ne se sauroit plaire
 De defaire aucun œuvre, ains tousiours de refaire,
 Et qui dessus la Mort gaignes sans fin le pris,
 Luy faisant rendre autant qu'elle en a tousiours pris.

D I D O N,

*Afin que depeuplant & repeuplant la salle
 De Pluton, l'entretien de ce monde s'egalles:
 Toy qui fais les oiseaux se plaire dedans l'air,
 Les bestes en la terre, & les poissons en mer:
 Toy par qui nous voyons les maisons, & les villes,
 Le loix, les amitez, les polices civiles:
 * Toy qui fais differer tout estre terrien,
 Selon le plus & moins que tu leur fais de bien,
 Seul bien uniuersel, où les hommes aspirent,
 Soit que bien, soit que mal, aucuglés ils desirent:
 Toy qui meslas ta force avec le Ciel, & fis
 Sortir mon grand vainqueur, ton indomtable fils,
 Qui, combien qu'on en face vn autre, dont la dextre
 Le grand Caos meslé remit en meilleur estre,
 Monstre de iouren iour (vainqueur mesme des Dieux)
 Combien peut dessus tout son arc victorieux.
 Toy de qui maintes fois mainte & mainte louange
 Ie retins d'un vieillard, que d'un pais estrange
 La Fortune m'auoit en Phenice amené,
 Pour polir mon esprit du sien endoctriné:
 Toy (dy-ie) las! qui vois les piteuses merueilles
 Qu'on exerce sur moy: & qui n'astes oreilles
 (Au moins comme ie croy) closes à mon parler,
 Qui vois, qui vois mon corps d'heure en heure escouler,
 Sous la cruelle ardeur d'Amour, qui me martyre:
 Comme deuant le feu on voit fondre vne cire:
 Comme l'ardent metal par rougissans ruisseaux
 On voit couler en bas des eschauffez fourneaux:
 Ou comme on voit couler la neige des montagnes,
 Et les ruisseaux glacez au trauers des campagnes:*

Puis que ie n'ay iamais refusé de ployer
 Sous les loix qu'il t'a pleu de ton Ciel m'enuoyer,
 Puis que ie nay sacré vne ingrate Jeunesse,
 Au travail inutile de ta sœur chasseresse:
 Si, humble, i'ay perdu pour vn hommage saint,
 A ton Autel sacré mon chaste demy-ceint:
 Si au son de ton nom i'ay receu ton Enee,
 Si ie me suis, hélas! toute à son gré donnée,
 Ployant deffous ton ioug: si pour l'amour de toy
 I'ay mieulx faiçt aux Troyens qu'à ceux qui sont à moy,
 Tourne en ce lieu ta veüe, & la misericorde
 De toy, de la fortune, & de tes fils accorde,
 Pour iustement changer mon travail au repos.

Voy, Venus, le venin qui tient à tous mes os:
 Voy tantost vn brasier, & tantost vne glace,
 Qui soudain me r'enflamme, & soudain me r'englace:
 Voy mon ame offusquée en tous autres objets,
 Fors qu'en ton fils, qui rend tous mes sens ses sujets.
 Voy sortir de mes yeux, & les larmes coulantes,
 Et les brillans esclairs de mes flammes bruslantes:
 Voy Didon sans hument, voy Didon se iettant
 A genoux deuant toy, voy Didon sanglotant.
 Prends pitié, prends pitié, Deesse Idaliene,
 Paphienne, Erycine, Vndeuse, Gnidienne,
 Prends prends dunque pitié, & ne permets iamais
 Que d'un tort detestable on paye mes bienfaits.

Si tu crois que ie t'aye autrefois fait offense,
 D'auoir fait à Iunon plus qu'à toy reuerence,
 Amoli toy de pleurs, appaise toy de vœux:
 Je iure tes yeux noirs, ie iure tes cheueux,

D I D O N,

*Qu'en receuant ce iour par toy ce benefice,
 Je payeray l'vsure à ton saint sacrifice.
 Je requiers peu, mais las! toutes telles fureurs
 Pour bien peu de relais perdent beaucoup de pleurs.
 En. Les ennuis dereiglez, les maux insupportables,
 Qu'on voit sur un esprit se rendre insatiables:
 La raison qui nous peut deffous ses loix forcer,
 Et la pitié qui peut nos raisons effacer,
 Les mots entrerompus par les larmes meslees,
 Et les sousspirs tesmoins des ames desolees,
 Ne peuuent rien sinon qu'en vain nous esmouuoir,
 Lors qu'en un fait les Dieux nous ostent le pouuoir.
 Anne, si les ennuis & si l'angoisse extreme
 Me pouuoient arrester, l'angoisse de moy mesme,
 Sans que ton œil piteux tesmoignast tant de maux,
 Seroit la corde & l'ancre à retenir mes naus:
 Veu que nul ne scauroit la peine assez comprendre,
 Que sans cesse en l'esprit mon amour me r'engendre.
 Mais les Dieux sont si forts, & du destin la loy
 Se rend si saintement inuiolable en moy,
 Que les pleurs de Didon, que les larmes piteuses,
 Qu'en mon piteux adieu mes larmes angoisseuses,
 Voire des Tyriens les pleurs ensemble vnis,
 Voire les pleurs des miens avec les autres mis,
 Bref, de tous les mortels & les pleurs & les plaintes,
 Ne pourroient pas des Dieux combattre les loix saintes.
 Cessons donc de plorer, tant plus nous plorerons,
 Et plus nostre tourment dans nous nous grauerons.
 Le pleur qui peu à peu sus nostre face coule,
 Et iusqu'à l'estomach, sa ressource, se roule,*

Pour de rechef entrant & montant au cerueau
 Redescendre par l'œil, nous mange, comme l'eau
 Qui aux iours pluvieux des goustieres degoute,
 Mange la dure pierre en tombant goutte à goutte.
 Cessons cessons. An. Enee, ô Enee obstiné,
 Tu as bien ce propos contre toy ramené,
 Pour monstrier que ton cœur que haineux tu reserres
 Sans l'ouurir à pitié, est plus dur que les pierres.
 La pluye goutte à goutte vn marbre caueroit,
 Et quasi vn torrent de nos yeux, ne scauroit
 Mordre dessus ton cœur, plus selon que ie cuide
 Qu'un cœur de Diomedé assommé par Alcide,
 Cœur qui souffroit du sang des hostes saccagez
 Voir abbrenuer chez soy ses cheuaux enragez:
 Plus cruel qu'un Procuste, & tous ceux dont la guerre
 De Thesee & d'Hercule a deliuré la terre.

Mais qui me fait ainsi ceux ci ramentenir,
 Si ce n'est la fureur qu'on me fait concevoir?
 Est-il possible, hélas! qu'en l'ame feminine
 Vne fureur tant aspre & sans bride domine?
 Et qui pourroit (bons Dieux) se garder de fureur,
 Quand on voit qu'on ne peut rien faire par le pleur?
 N'ay-ie sceu donc rien faire? & n'ay-ie point l'adresse,
 De faire la pitié sur ta rigueur maistresse?
 Se perd doncqu'en l'air tout ce dont i'ay ploré?
 Tout cela dont i'aurois l'aimant mesme attiré?
 Cela, pour qui les Dieux, que ton dol nous raconte,
 Seroyent, ie croy, meschans, s'ils n'en tenoyent point conté?
 Cela pour qui tout cœur humain ne craindroit pas,
 Plüstost qu'y resister, de souffrir cent trespas,

D I D O N,

Faut-il qu'ainsi ie perde? & faut-il que ie voye
 Que les Dieux iustement ont puni ceux de Troye?
 Me faut-il voir encor que ny moy ny Didon
 N'auons iamais pensé au vieil Laomedon?
 Si de tromper les Dieux cestuy-la print l'audace,
 Ha que nous falloit-il esperer de sa race?
 Que porté-ie à ma sœur, fors le venin dernier,
 Qui la va faire voir l'infernal Nautonnier?
 Puis-ie encor à ses yeux me monstrier en la sorte,
 Moy qui ouure à ses maux & à sa mort la porte?
 Puis-ie puis-ie me voir moy mesme le corbeau
 De ma sœur, luy portant l'augure du tombeau?
 Hé que sçais-tu (Cruel!) qui donnes telle atteinte
 A ceux qui te font bien, si de ton fait enceinte
 Elle ne cache point maintenant dedans soy
 (O fardeau malheureux!) vne moitié de Roy?
 Veux-tu qu'auant que voir du monde la lumiere,
 Ton propre enfant se face vn cercueil de sa mere?
 Veux-tu pour rendre Ascaigne, & les siens triomphans,
 Faire estouffer ainsi l'autre de tes enfans?
 Las si les meres sont en vostre endroit coupables,
 (Grāds Dieux) qu'en peuuēt mais les enfans miserables?
 Quant aux meres, ie croy, que tu es coustumier
 (O le loyal espoux) d'en estre le meurdrier.
 Si lon demande où est la mere à ton Ascaigne,
 Elle est où tu veux mettre vne autre, que dedaigne
 Tellement ta fierté, qu'il semble que le Ciel
 Dedans ton lâche esprit n'ait versé que du fiel:
 Et qu'il se gaye ainsi, que de tout temps tu rompes
 Avec la foy, la vie, à celles que tu trompes.

Hé

*Hé qui croira iamaïs qu'on puisse refuser
 Vn delay seulement? mais ie ne fais qu'vser
 Et ma langue & mes yeux en mes vaines reproches.
 En vain taschent les vents de combattre les roches.
 Voila l'heureux loyer: penſes, que pour vn tel,
 Ma ſœur deuoit ſentir d'amour le dard mortel:
 Penſes, que ie deuois miſerable & deceuë
 Pour vn tel donner force à la flamme receuë.
 Ie deuois bien luy plaire au vouloir d'vn mechef:
 Nous deuions bien orner de fueilles noſtre chef,
 Pour faire aux Dieux, ſeigneurs des ſacrez mariages,
 Pour vn tel que ceſtuy, les ſaincts ſacrez hommages:
 Ie deuois bien luy faire vn Sichee oublier,
 Pour au lieu d'vn eſpoux à Pluton l'allier.
 Deuions nous mille honneurs, mille careſſes rendre,
 A celuy qui filoit le cordeau pour nous pendre?
 Ha ie ne puis, alors qu'vn ſi dur ſouuenir
 Me reuient, ie ne puis mon ame retenir.
 Ie me fauls à moy meſme, & ſans l'ire enſlamee
 Qui m'aigriſt & ſouſtient, on me verroit paſmee.
 Ie m'en vais, ie le laiſſe, ô rigueur incroyable,
 Que ceſt homme inconstant en nos malheurs eſt ſtable!
 En. O quel tumulte, Achate. Ach. Amour fait la dif-
 corde.
 En. Vois tu point de remede? Ach. Avec la Roine ac-
 corde.
 En. Dois-ie pour accorder diſcorder au deſtin?
 Ach. Va donc: Celuy fait bien qui fait à bonne fin.
 En. Pourquoi me geſne donc ma conſcience encore?
 Ach. C'eſt l'Aigle qui le cœur ſur Caucaſe deuore.*

AA

D I D O N,

En. O grand Ciel, que voit-on au monde d'arresté?
 Ach. Le Ciel a retiré toute tranquillité.
 En. Quel bon heur donque reste au môde pour les hômes?
 Ach. De n'estre pas long tēps ce que chetifs nous sommes.
 En. Qu'attendons-nous pour fin & loyer des traux?
 Ach. La mort est le loyer de nos biens & nos maux.
 En. Nul donques ne peut-il ici bas heureux estre? (naistre.
 Ach. Celuy que pour heureux les grands Dieux ont fait
 En. Je croy que le bon heur des humains ne leur plaist.
 Ach. Pource que leur honneur bien souvent nous deplaist.
 En. Je pense voir le iour que la colere ardente
 De Iunon redoutée, enuoya la tourmente
 Contre nos pauvres naus, & qu'à voir vn tonnerre
 Espouuenter la mer, & desplacer la terre,
 Les esclairs redoubler, & des vens aduersaires
 Les gosiers s'aboyer, & resiffler contraires,
 Les flots monter au ciel : il sembloit que les ondes
 Taschassent de raur aux abysses profondes,
 Ceux qui s'estoyent sauuez de la Troyenne cendre:
 Quand vn feu nous pardône vne eau nous vient attēdre.
 Durant l'orage tel mes naus vireuoltees,
 S'écartans çà & là, de tous costez iettees
 A la merci du vent, sans suiure route aucune,
 Ore deuers le Nord, attendoyent leur fortune,
 Ore deuers le Sud par le Nord ramenees,
 Et ore deuers l'Est se voyoyent destournees
 Par l'Ouest opposé: tant que la mer bonace
 De ses freres bandeꝝ appaisant la menace;
 Nous enst poussez à bord: Je sens de mesme sorte
 (Ore que ma fortune arreste que ie sorte)

Agiter mon esprit, qui çà qui là se vire
 De cent troubles diuers, comme au vent le nauire.
 D'un costé le proffit, la peur me tient de l'autre,
 Soit la peur de sa mort, soit la peur de la nostre:
 Didon & la saison sont d'une fureur mesme:
 Mais la plus grand' fureur c'est la fureur supreme.
 Ach. Quoy? où reuenons nous? quoy, toy qui as pour mere
 Vne Venus, faut-il tenir du tout du pere?
 En. Ha foy, ha stable foy, seul gage inuiolable
 Des hommes & des Dieux, cent fois est punissable
 Celuy qui t'offensant de certaine science
 Amortit l'éguillon que sent sa conscience!
 Il luy deuroit sembler, lors que le Ciel tempeste,
 Qu'il ne s'emeut sinon que pour briser sa teste:
 Il luy deuroit sembler, lors que la mer s'irrite,
 Que contre luy tout seul son courroux se dépite:
 Mesme au moindre combat chetif, il deuroit croire,
 Que le Ciel l'a desia priué de la victoire,
 Puis qu'il a hasardé auec sa foy premiere,
 L'assurance, le sens, la force coustumiere.
 Car de toutes les peurs, la peur la plus extreme
 C'est la peur d'un esprit coupable enuers soy mesme,
 Qui s'espoouuante tant, que mesme sans encombre
 Se voit suivre sans fin de la peur de son ombre.
 Faut-il que maugré moy les peurs en moy s'empreignent?
 Faut-il que maugré moy les durs remors m'estreignent?
 Faut-il que maugré moy, voire en mon innocence
 Je m'accuse à grand tort d'une execrable offense?
 Ach. Si tu ne sçais assez, que nous imprudens hommes,
 De nous mesme tousiours les aduersaires sommes,

D I D O N,

*Les Juges, les bourreaux, tu te le peux apprendre
 Du mal que ton esprit pour soy mesmes engendre.
 Ta seule opinion est de ta crainte mere:
 La crainte du remors: le remors est le pere
 D'une autre opinion, que tu prens quand tu penses
 Offenser griefuement, lors que point tu n'offenses:
 Mais moy qui soucieux à tout danger regarde,
 Je sens une autre peur: i'ay peur que trop on tarde
 Dans ce haure, tu sçais combien est monstrueuse
 D'un courroux feminin l'ardeur tempestueuse.
 Nous verrons tout soudain les troupes Tyriennes
 Darder le feu vangeur dans les naus Phrygiennes:
 Nous verrons tout frémir, & ces riuës mouillees
 De sang & de corps morts hideusement souillees.
 Partons donc au plus tost. En. Aussi tost que les sommes
 Auront un peu ce soir rafraieschi tous nos hommes,
 Je feray que lon singe: Aa quoy qu'il en sorte,
 Un pesant fais de maux avecques moy i'emporte.
 Las! nous faut-il voguer sans sçauoir quelle issue
 Sortira d'un amour qui son amante tue?
 Pauvre Didon, helas! mettras tu l'assurance
 Sur les vaisseaux marins, qui n'ont point de constance?*

L E C H O E V R.

*C E V X que Fortune exerce aux trauaux de ce mode,
 N'ont pas beaucoup d'effroy, si leur faut dessus l'ode
 Sans relâche ramer:
 Veu que mesme au millieu du repos & des villes,
 Les humains vont souffrant, au lieu d'estre trāquilles
 Une eternelle mer.*

Nostre Prince porté par la mer incertaine,
 Sentira dans l'huyér vne mer plus humaine
 Que la mer du foudi.
 Didon, qui dans sa ville avec les siens demeure,
 Sent vne horrible mer plus cruelle à ceste heure,
 Que n'est ceste mer ci.
 Malheureuse cent fois celle qui abandonne
 A l'estranger son cœur, son liét, & sa couronne:
 Le murmure nouveau
 De son peuple, l'adieu du mari qui s'absente,
 Et son dur desespoir, luy seruent de tourmente,
 Enfondrant son vaisseau.

ACTE IIII.

Annc.

Barce.

Didon.

Annc.

A TIL donques bien pense renforcer de sorte,
 Qu'à toutes passions il ferme ainsi la porte?
 At elle donc bien peu s'affoiblir tellement,
 Que de se laisser vaincre à l'effort du tour-
 Elle meurt, elle meurt: Ia ja dans son visage, (ment?
 De la mort pallissante on voit peinte l'image:
 Encor tant les amans se nourrissent de pleurs,
 Et tant les furieux se plaisent aux fureurs.
 Elle a voulu que seule en son mal on la laisse:
 Las veut elle forcer la mort par la destresse?
 Deust elle pas trouuer, mesme en la trahison
 Qui la fait forcener, sa propre guarison?

AA iij

D I D O N,

*En s'egayant plus tost de perdre vn tel pariure,
 Que faire pour vn traistre à son repos iniure?
 N'eust-il pas deu plustost, que de la courroucer,
 De quelque moindre, offense aimer mieux trespasser?
 Peut-il voir que par luy la vie soit rauie
 A celle, dont il tient & son heur & sa vie?
 Puis qu'il n'estoyent plus qu'un en celaqs d'amitié,
 Penferoit-il apres durer sans sa moitié,
 En sentant mesmement l'implacable furie,
 De l'auoir pour loyer luy mesme ainsi meurdrie?
 Las las! on voit mes sens, Barce espouuente toy:
 Barce, chere nourrice, assemble auecques moy
 L'estonnement, l'horreur, les plaintes, & les larmes,
 Et s'il est oncq possible, en si cruels alarmes
 D'vser d'aucun conseil, conseille le moyen
 De bannir hors du cœur de ma Sœur ce Troyen.
 L'âge tousiours apprend, & n'est pas qu'ancienne
 Tu n'ayes pratiqué l'horreur magique:
 Donc à l'escart tournant trois ou sept ou neuf tours,
 De beaux vers remacheZ en charme les amours.
 L'amour qui plus qu'au corps en nostre ame domine,
 Ne se guarist iamais du ius d'une racine:
 Mais on dit que le vers qui est du ciel appris,
 Domine sus l'amour & dessus nos esprits.
 Si par son art Medee en la fin n'eust de soy
 Chassé l'amour bourreau, de Corinthe le Roy,
 Sa fille Glaucque aussi, ne fussent mis en cendre:
 De ses propres enfans la gorge encore tendre,
 N'eust caché insqu'au manche vn cousteau maternel,
 Ains pour se depestrer du mal continuel,*

Changeant sa serue vie avec la mort plus gaye,
Le sang, l'amour, & l'ame, eust vomie par sa playe.
Mais voyant que le vers qu'elle ainsi remachoit,
Du lourd fardeau d'amour son ame depeſchoit,
Desploya son courroux sus ceux qui l'offenserent,
Et comme son dragon ses amours s'enuollerent.
Bar. J'ay trop d'estonnement, ie n'ay que trop d'horreurs,
Trop de plaints en la bouche, & trop aux yeux de pleurs:
Mais quant à ce conseil, miserable Nourrice,
Ie ne sens rien en moy qui ce mal diuertisse.
Des vers magiciens ie n'ay l'usage appris,
Et les vers n'auoyent pas sus un tel mal le pris:
Fust qu'avec cent pauots un repos i'excitasse,
Fust qu'avecque les cieux les enfers i'appellasse,
Pour charmer la poison maistresse de ses os,
Rechassant par un charme un charme au cœur enclos.
O Manes de Sichee, ô Dame bien-heureuse,
Dont le meurdre souilla la dextre conuoiteuse
De ton frere inhumain, sans que moy qui t'auois
Nourri de ma mammelle, & qui las! ne pouuois
Recevoir plus de dueil, eusse sus ta lumiere
Rabbatu de mes doigts l'une & l'autre paupiere.
Helas pauvre ombre (dy-ie) encores t'est-il mieux
D'auoir ainsi volé sus le bord oublieux
Par un meurdre soudain, que non pas à ta femme
Mourir à petit feu, d'une amoureuse flamme,
Qui l'animant tousiours d'une ardeur par dedans,
Et la vie, & la mort, luy laisse entre les dens.
Et moy chetive, hélas! qui suis seule laissée,
Depuis que la nourrice à Didon est passée

D I D O N,

*Auecques toy là bas, ne la puis secourir:
 Non plus; hé! que tu peux te garder de mourir.
 Puis-ie sans larme dire en quel poinct ie l'ay veüe?
 Pourra ma foible voix de sa fureur conceüe
 Exprimer les accens? pourray-ie assez bien plaindre
 Les yeux qu'on voit flamber & puis soudain s'esteindre,
 Comme s'ils estoient ja languissans dans la mort,
 Et soudain reflamber encores de plus fort?
 Mais plaindre ce beau poil qu'au lieu de le retordre,
 Elle laisse empestrer sans ornement, sans ordre,
 Sans presque en abstenir les sacrileges mains:
 Mais, las! plaindre ce teint, l'honneur des plus beaux teins,
 Qui tout ainsi qu'on voit la fumee aZuree
 Du soulfhre, reblanchir la rose coloree,
 De moment en moment, par l'extreme douleur
 Change avec vn effroy sa rosine couleur:
 Mais las las! sur tout plaindre vn beau port venerable,
 Vn port, hélas! au port des Deeſſes semblable,
 Qui se sent arracher du front la déité,
 Pour avec cent fureurs changer sa maieſté.
 Vous diriez à la voir qu'insensee elle semble
 La Lyonne outragée, à qui le pasteur emble
 (Lors que de sa cauerne elle s'absente vn peu)
 Ses petits Lyonneaux, & la poursuit au feu,
 Effroyant d'vne torche vn fier regard colere,
 Qui effroyablement de mainte torche éclaire.
 O l'heure malheureuse en qui ces Phrygiens
 Vindrent premier floter aux sables Lybiens!
 Dés lors mon cœur iugea qu'auant la departie,
 A grand' peine on verroit Çarthage garantie*

D'vn

D'un mal inespéré: car on veut s'outrager
Quand d'un recueil prodigue on reçoit l'étranger:
Toujours vient une perte, un regret, une honte,
Quand plus des étrangers que des siens on tient conte.
Mais qui eust pensé, las! qu'une desloyauté
Eust contre tant d'efforts meschamment résisté?
Qui l'eust pensé (bôs Dieux!) An. Je croy que la malice
Nous aveugle au conseil, puis nous liure au supplice:
Croit-on qu'un Enee oubliast de penser
Ce qui peut son dessein & sa vie offenser,
Avant qu'entrer en mer? sans qu'à rien il regarde
En une mer de maus chetif il se hasarde.
Prent-il point garde, avant qu'avoir en soy fermé
L'arrest de ce dessein, à ce monstre emplumé,
Qui soucieux de tout iamaïs ne se repose,
Et qui de bouche en bouche espad chaque chose
Du Nil Egyptien iusqu'aux eaux d'Occident,
Et du Scythe gelé iusques au More ardent,
Prompt d'agrandir un fait, ce monstre hasardeux
(Dy-ie) qui éguisa naguères sur eux deux
Ses langues, & ses yeux, quand l'amour effrenée
Couverte du manteau d'un trompeur Hymenee,
Commença par augure à mille fois monstrier,
Qu'un bien léger fait l'homme en cent malheurs entrer,
Quand le présent plaisir qui moins qu'un songe dure,
Oste le sentiment de la peine future?
Prent-il point (dy-ie) égard aux encombres que peut
Conspirer sur les grands ce monstre quand il veut?
C'est aumoins, c'est aumoins, que telle renommée
Rendra contre son nom toute terre animée?

BB

D I D O N,

Et tant que rencontrant son forfait en tous lieux,
 Ne luy restra que d'estre à soy mesme odieux.
 Prent-il point garde encor qu'à grand' peine en leur âge
 Les siens pourront à chef mettre vne autre Carthage?
 Et que ces beaux destins, ces oracles rendus,
 Ces miracles, ces feus, ces beaux Dieux descendus,
 Ne sont qu'illusions, ou Demons qui nous peinent,
 Et ministres du Ciel en nos malheurs nous meinent?
 Prent-il point garde encor, ie croy, qu'en vn plain iour
 Vn peché nous ennuicte aux forces qu'à l'amour,
 Dont il rompt les conseils, qu'on cache & qu'on euenté?
 Hé! qui s'ose vanter de tromper vne amante?
 Hé! qui s'ose promettre en la trompant ainsi,
 Qu'au eulement luymesme il ne se trompe aussi,
 Pensant qu'on permettra sans en rien l'outrager,
 Sortir hors d'un pais l'outrageux estranger?
 Nos peuples Tyriens auroyent-ils plus qu'Enée
 Et les bras engourdis, & l'ame effeminee?
 Mais toutesfois deliure & de honte & de peur,
 Rend de la prenoyance vn seul hasard vainqueur.
 O au eulement entreprise, ô trahison ouuerte,
 Qui semble auoir esté pour l'une & l'autre perte
 Mise en ce chef pariure, à fin qu'il fust certain
 Par l'exemple des deux, que Cupidon en vain
 Nous repaist quelque temps, pour faire apres repaistre
 Nostre cœur aux serpens que dans nous il fait naistre.
 Que plaindray-je premier? plaindray-je le forfait
 Que mon conseil, hélas! à son honneur a fait?
 Voire aux Manes sacrez de son loyal Sichee,
 Voire aux pourchas de ceux, dont i'ay tant veu cherchée

*Avec Didon fuitiue, en ce port eſtranger,
 Vne alliance (helas!) franche d'un tel danger?
 C'eſt moy Barce, c'eſt moy: qui pourroit ſans plore
 Le confeſſer, c'eſt moy qui la fais endurer,
 C'eſt moy qui ay banni de ſon ame la honte,
 Par qui ſeule d'amour la force ſe ſurmonte.
 C'eſt moy qui pour ſa mort, ay le bois entaſſé,
 C'eſt moy qui ay dans elle un braſier amaſſé:
 C'eſt moy qui ay touſiours telle flamme nourrie,
 Qui ne peult ſans Didon ſe voir iamais perie:
 C'eſt moy à qui touſiours ſe venoit adreſſer
 Ce deſloyal trompeur, qui ne craint de bleſſer
 Ny les Dieux, ny ſa foy, ny l'amante embrasée,
 Que ſa foy, que les Dieux, ont en fin abuſée.
 Mais ſera-t'il donc vray? (bös Dieux!) permettrez vous
 Que ce pipeur ſe iouë & de vous & de nous?
 Que t'auons nous donc fait, ſaincte troupe celeſte?
 Mais que t'auons nous fait, ô eſtranger moleſte?
 Vangez ſ'il y a faute: Ha Dieux elle n'a pas
 Trop inhumaine hoſteſſe, en un ſalle repas
 Souillé d'un corps humain voſtre diuine bouche.
 Ell' n'a pas egorgé Iupiter dans ſa couche,
 Changeant ſon cœur de femme au cœur d'un Lycaon:
 De rien ne l'a ſçauroient charger les Dieux, ſinon
 D'auoir tout au rebours hoſteſſe trop humaine,
 Trop bien fait à celui, las! grands Dieux, qui à peine
 Trop ingrat s'en ſoucie, & qui l'abandonnant,
 Fait iniure à ſoymeſme, iniure au Dieu Tonant:
 A ce Dieu qui d'en haut les pariures regarde,
 Et des hoſtes a pris la iuſte ſauuegarde.*

D I D O N,

Bar. Plaise donc à ce Dieu iettant l'œil au besoin,
 Ou de l'un ou de l'autre auoir bien tost le soin,
 Soit que d'elle le mal pitoyable il cherisse,
 Ou soit que le peruers Iusticier il punisse:
 Souuent ce Dieu vengeur de tous humains forfaits,
 Permet que mille torts par les mechans soyent faits,
 A fin que par celuy se punissent nos vices,
 Qui plus dessus sa teste amasse de supplices.
 Mais ainsi que les Dieux qui semblent estre oisifs
 A venger les forfaits, sont bien souuent tardifs,
 L'ay peur qu'ils soyent aussi tardifs à ce remede,
 Et que ce mal au mal de là seule mort cede:
 Si c'est mal que mourir, lors que de cent trespas
 Vn trespas nous deliure. An. Helas! ie ne croy pas
 Qu'il aduienne autrement, & sans cesse m'effroyent
 Les signes monstrueux que les Dieux m'en enuoyent:
 Ce qu'en dormant aussi mes songes me font voir,
 Trouble mes sens, esmeus d'un pareil desespoir.
 Le Songe est fils du Ciel, & bien souuent nous ouure
 Ce qu'encore le temps dessous son aile couure.
 Il m'a semblé la nuit que d'un ardent tison
 J'auois deçà delà semé par la maison
 Vn feu, que d'autant plus ie m'efforçois d'esteindre,
 Et plus iusqu'au sommet il s'efforçoit d'atteindre:
 Mes sens ne se sont point de ceci despestrez,
 Qu'aussi soudain n'y soyent d'autres songes entrez.
 Je voyois un chasseur, duquel la contenance
 Et de face. & de corps, empruntoit la semblance
 D'Apollon, quand tout seul pour chasser quelque part
 Ou de Dele, ou de Cynthe, ou d'Amathonte il part:

Sus l'espaule luy bat sa perruque doree,
Sus le costé sa trouffe en biais ceinturee,
Sa fleche est en la coche, & son arc en plein poing:
Tout ainsi mon chasseur qui s'écartoit bien loing,
Dedans l'espais d'un bois s'offroit dedans ma veüe,
Tant qu'au bord d'un taillis vne biche il ait veüe:
Il décoche, il l'atteint, elle demi-mourant
Fait du sang qui ruisfelle vne trace en courant,
Le fer tient dedans l'os, & pourneant euite
Ce qui luy tient (helas!) compagnie en sa fuite,
Tant que sous un Cyprés ayant porté long temps
Et sa fleche & sa playe, ait auachi ses sens.
Les pieds faillent au corps, le corps faut à la teste:
Et comme la pitié de l'innocente beste
Me sousleuoit le cœur, plustost que ses sanglots,
S'est perdu parmi l'air mon songe & mon repos.
Combien de fois ces iours encor toute tremblante,
Ay-ie en sursaut repris mon ame trauaillante?
Lors que mon palle frere en dormant reuenoit
Me prendre les cheueux, & cruel me trainoit,
Comme il m'estoit aduis, hors du liét pour m'apprendre
D'auoir fait à sa femme un autre parti prendre.
Mesmement vne nuiét, lors que Iarbe le Roy
De nos peuples voisins sortoit presque de soy,
Tant l'amour le brusloit: scachant qu'à cet Enee
Fut de ma sœur la terre & l'ame abandonnee,
Pource que nous tenions mille propos meslez
Du monstre qui si tost nous auoit decelez.
Un songe vint saisir en dormant ma memoire
Sus celle qui fait tout, soit bien soit mal notoire:

D I D O N,

*Je brouillois en l'esprit deçà delà roulant,
 Tout ce qu'on m'auoit dit de ce monstre volant,
 L'un me sembloit compter que dès qu'en leur pensee
 Ceux de Tyr proiettoient leur ville commencee:
 Ce monstre ne cessoit, & puis haut, & puis bas
 De volleter sur nous, y prenant ses appas,
 Nous apportant sans fin quelque trouble des autres,
 Ou bien à nos voisins portant sans fin des nostres.
 Vn autre me sembloit parlant obscurément,
 Descire à son propos ce monstre hautement,
 Ce monstre enfant du Temps, en tout aussi muable
 Qu'en ses effets diuers son pere est variable.
 Qui sans aucun repos fait, defait, & refait
 Son rapport, tout ainsi que son pere son fait,
 Et circuit en rien le Ciel, la Terre, & l'onde,
 Comme le vol du temps circuit tout le monde.
 Tous deux sont souhaittez, tous deux ne mourront point,
 Et ne sont differens tous deux que d'un seul poinct.
 Iamais rien ce vieillard qui ne soit vray n'apporte,
 Le faux, le vray, sa fille aux oreilles rapporte.
 Or ce pendant qu'en moy ce propos s'embrouilloit,
 Et que mainte autre chose aux propos se mesloit,
 Je vey de mes deux yeux ceste femme vollage,
 Se planter sur les tours de la neuue Carthage,
 Salle, maigre, hideuse, & soudain embouchant
 La trompe qu'elle auoit, sonner vn piteux chant:
 Voire & me fut aduis que de la trompe mesme
 Sortoit & sang, & feu, tant qu'esperdue & blesme
 De ce cruel spectacle au resueil me troublay,
 Et de long temps apres mes sens ne r'assemblay.*

Las! Barce qu'en dis tu? Barce, hélas! Bar. On se ronge
En vain son veut auoir la raison de tout songe.
An. De mes songes encor ie ne m'effroirois point,
Si rien plus grand n'estoit à mes songes. conioint:
I'ay veu ces iours passez sur le haut du chasteau
Signe fatal de mort, croüasser maint corbeau,
Le hibou porte-mort, l'Orfayemenaissante,
Et la voix du Corbeau dessus nous croüassante,
Ne me chanter que mal, & m'a fait frissonner:
Le vin que ce matin en sang i'ay veu tourner,
Aumoins ce m'a semblé, lors qu'en la coupe sienne,
Didon sacrifiant à Iunon gardienne,
Le tenois pour espandre aux cornes du Taureau:
Outre ce iour hideux m'est un effroy nouveau:
Car tout ce iour Phebus à sa face monstree,
Telle, comme ie croy, que quand le fier Atree
Fist bouillir les enfans de son frere adultere
Leur faisant un tombeau du ventre de leur pere.
Encores outre ce temps embrouillé lon oit bruire
La mer plaintiue aux bords, & sembler nous predire
Que les Dieux qui iamaïs rien constant ne permettent,
Enuoyent sur nos chefs ce que leurs feux promettent:
Mesme cest arc en Ciel Iris Thaumantienne,
Messagere à Iunon, de ce lieu gardienne,
Apparoissoit tout hier de noir sang toute teinte,
Non pas de cent couleurs, comme elle souloit, peinte.
Bar. Lors que lon voit un mal obstinément espris,
Et que la froide peur se saisit des esprits,
Il nous semble que tout nous donne tesmoignage.
De ce que nous craignons: mais d'un serain visage

D I D O N,

*Je voy venir la Roine. O l'heureux changement,
 Si auecques la face est changé le tourment.*
*Did. I'ay trouué le moyen, ma sœur, qui me peut rendre
 Ce fuitif outrageux, ou qui me peut deffendre,
 Me depestrant du Dieu qui iusqu'à mort me touche.
 Vers la fin d'Océan où le Soleil se couche,
 Sont les Mores derniers, pres l'echine foulee
 Du grand Atlas portant la machine estoilee:
 De là lon m'a monstré la sage enchanteresse,
 La vieille Beroé, Massyline prestresse,
 Qui le temple gardoit aux filles Hesperides,
 Apastant le dragon de ses douceurs humides,
 Et d'oublicieux pavots, & prenant elle mesmes
 La garde du fruit d'or des soucis plus extremes:
 Ainsi qu'elle promet, la vie elle destie,
 Ou bien d'un soin cruel elle empestre la vie:
 Elle arreste à sa voix la plus roide riuiere,
 Et fait tourner du ciel les signes en arriere:
 Les ombres de là bas en hurlant elle appelle,
 Tu orras rehurler la terre dessous elle:
 Tu verras des hauts monts les plantes deualees,
 Et les herbes venir de toutes les vallees.
 I'appelle (chere sœur) les Dieux en tesmoignage,
 Toy & ton chef aussi, quel'ancien usage
 De l'art magicien maugré mon cœur i'esprenue:
 Mais puis que ma fureur ce seul remede treuue,
 Va, & au plus secret de ceste maison nostre
 Vn grand amas de bois dresse moy l'un sus l'autre:
 Quel'espee de l'homme en la chambre fichee
 Où i'ay brisé la foy de mon espoux Sichee:*

Que

Que toute la despouille & le liét detestable,
 Le liét de nos amours, dont ie meurs miserable,
 Soit par toy mis dessus. Car la prestresse enseigne
 Que tous ces demourans, de mes fureurs l'enseigne,
 Soyent abolis au feu. Quand la pile entassée
 Quand sus elle sera toute chose amassée,
 D'if, de buis, de cyprés faisant mainte couronne,
 Je veux que maint autel ceste pile enuironne.
 Là tout ainsi qu'on voit Medee charmeresse,
 Renouuellant d'Eson la faillante vieillesse,
 Tu me verras la voix effroyable & tremblante,
 La cheueleure au vent de tous costez flotante,
 Vn pied nû, l'œil tout blanc, la face toute blesme,
 Comme si mes esprits s'écartoyent de moy mesme:
 Lors de feuilles ayans vos testes entourées,
 Et d'un nœud coniuéré par les reins ceinturées,
 Vous m'orrez bien tonner trois cens Dieux d'une suite,
 Et Enfer & Chaos, & celle qui herite
 Nos esprits à iamais, la trois fois double Hecate,
 Diane à triple voye: il faut que ie combatte
 Pour moy contre moy mesme, il faut que ie m'efforce
 De forcer les efforts, à qui ie donnois force.
 Hastez doncq, laissez moy, à fin que ie remâche
 Toute seule à part moy, tout cela qui relâche
 Les amours furieux, & que tout i'appareille
 Pour commencer mes vœus, dès que l'aube vermeille
 Aura demain rougi l'humide matinee,
 Le Ciel, le Ciel m'orra. An. Toy donc qui vois Enee
 (O grand Ciel) opposer à tes loix sa malice,
 Sois pour nous, & prospere en tout ce sacrifice.

D I D O N,

Did. Puis-je donc forcenée encor me laisser vivre,
 S'il n'y a que la mort qui d'un tel mal delivre?
 Laisé-je triompher ceste flamme bourrelle,
 Lors que ma main, ma main, peut bien triompher d'elle?
 Qu'entreprendrois-je (ô Mort!) Mort que seule ie nôme
 Contre les Dieux vangeurs la vengeance de l'homme?
 Qu'entreprendrois-je (dy-je) alors qu'en moy s'assemble
 Tout ce que les enfers ont de rages ensemble,
 Tout ce que le Vésuve a d'ardeurs recelees,
 Tout ce que la Scythie a de glaces gelees,
 Tout ce qu'on feint là bas de peines eternelles
 S'ordonner par Minos aux ames criminelles,
 Sinon avecq' ma vie en moy ja dedaigneuse
 De faire creuer tout par vne playe heureuse?
 Pourrois-je bien encor me voir vne esperance
 De me pouuoir guarir, pour chercher l'alliance
 Des Nomades voisins, par moy ja mesprisee?
 Serois-tu bien encor, Didon, tant abusée
 Que d'allonger le fil de ta vie ennemie,
 En suiuant par la mer celuy qui t'a trahie?
 Prends encores, à fin que ta dextre couarde
 N'ayant pitié de toy, sur toy ne se hasarde,
 Qui te soit beaucoup mieux de suivre l'aduersaire,
 Que de fuir ta vie à tout repos contraire:
 Suiurois-tu toute seule auueugle & dereiglee,
 Ou bien le suiurois-tu encor plus auueglee,
 Si tu le pensois faire avec toute la suite
 Qu'à grand' peine tu as iusqu'en ces lieux conduite,
 L'arrachant de Sidon? Et puis, hé condamnée,
 Pauvre femme, ie croy, en despit du Ciel née,

N'as tu point eu encor assez de cognoissance
 Quel fut Laomedon, & quelle est son engeance?
 Non non, meurs meurs ainsi, Didon, que tu merites,
 Appreste toy donc, Parque, & toy qui tant irrites
 Mes fureurs contre moy, Fortune insatiable,
 Appreste toy pour voir le spectacle execrable:
 Tu net'es peu saouler, m'ayant tousiours foulee,
 Mais bien tost de mon sang ie te rendray saoulee.
 L'amour mange mon sang, l'amour mon sang demande,
 Ie le veux tout d'un coup repaistre en mon offrande:
 SoyeZ au sacrifice, ô vous les Dieux supremes,
 Ie vous veux appaiser du meurdre de moy mesmes:
 Vostre enfer, Dieux d'enfer, pour mon bien ie desire,
 Sçachant l'enfer d'Amour de tous enfers le pire:
 I'irois i'irois desfor, mais il me faut attendre
 L'occasion des vœus que ie feins d'entreprendre.

LE CHOEVR.

TROUPE Phenicienne
 Qui prenois bien ton mal:
 Et toy troupe Troyenne
 Serue d'un desloyal:
 Vous le Ciel & la terre,
 Voyez voyez ce iour,
 Combien traistrement erre
 L'iniustice d'amour.
 O grands Dieux, si le vice
 N'a point en vous de lieu,
 Amour plein d'iniustice
 Peut-il bien estre Dieu?

Toute chose il deteste,
Et tout luy est ami.

Songons aux trois qu'on prise
Pour plus auantureux,
Et qu'en toute entreprise
Les Dieux ont fait heureux,

Jason, Thesee, Hercule:
Les Dieux leur ont presté .
Grand faueur, crainte nulle,
Toute desloyauté.

Tous trois ainsi qu'Enee,
En trompant leurs amours,
Ont fait mainte iournee
Marquer d'horribles tours.

Tous trois trompeurs des hostes,
Tous trois, ô inhumains,
Ont veu soit par leurs fautes,
Soit mesme de leurs mains,

Leurs maisons effroyees
D'auoir receu les cris
De leurs femmes tuees,
De leurs enfans meurdris:

Mais la faueur supreme
Les pouffoit toutesfois,
Et croy que la mort mesme
Les a fait Dieux tous trois.

Tu sçais bien (ô Enee)
Peste des grands maisons,
Qui d'une destinee
Farde tes trahisons:

Tu sçais, ô implacable,
 Homme lâche, homme fier,
 Que ce tour detestable
 N'est des tiens le premier.

Le Ciel, la mer, la terre,
 Nonobstant sont pour toy,
 Rien ne te fait la guerre,
 Tu la fais à ta foy.

Didon qui s'humilie
 Deuant les Dieux, sans fin
 Va trainant vne vie
 Serue d'un dur destin.

Si ce n'est iniustice
 De nous traiter ainsi,
 Rien ne peut de ce vice
 Les sauuer que ceci:

C'est que pecheurs nous sommes,
 Et le Ciel se faschant,
 Fait pour punir les hommes
 Son bourreau d'un mechant.

ACTE V.

Didon. Barce. Le Chœur.

Didon.

MAIS où me porte encor ma fureur, qui me garde
 De me depestrer d'elle ? & quel malheur retarde
 Mes secourables mains, qui allongeâs d'une heu-
 Mon miserable fil, font que cent fois ie meure ? (re

Plus cruels sont les coups dont l'amour aiguillonne,
 Que ceux là que la dextre homicide nous donne.
 Mais quoy? mourrons nous donc tellement outragees?
 Mourrons nous, mourrons nous sans en estre vangees?
 Le mechant a singlé dès que l'aube esueillée
 Par ma veüe tousiours sans repos decillée
 S'est descouuerte au Ciel la pauvre aube ie cuide
 Qui prent pitié de moy: i'ay veu le port tout vuide,
 I'ay i'ay veu de ma tour sous le clair des estoiles,
 Les vens qui se iouoyent de ses traistresses voiles.
 Se iouer de la foy lâchement pariuree,
 Se iouer de l'honneur de moy desesperee,
 Se iouer du repos d'une pariure veufue,
 Se iouer du bon heur de ma Carthage neufue,
 Et qu'on verra bien tost se iouer de ma vie,
 Par qui sera soudain ceste flotte suivie,
 Las las! sera-ce ainsi? Toy bruslante poitrine,
 Faut-il que dedans toy tout le mal ie machine
 Contre moy seulement? vous vous cheueux coupables
 Que ie rompts à bon droit, serons nous miserables
 Tous seuls, sans qu'aucun mal sente le mechant mesme,
 Qui vous fait arracher, & enrager moy mesme?
 Iupiter Iupiter, ceste gent tromperesse
 Doncques se moquera d'une Roine & hostesse?
 Sus Tyriens, sus peuple au port au port, aux armes,
 Portez les feux, courez, changez le sang aux larmes,
 Iettez-vous dans la mer, accrochez moy la troupe,
 Que d'un bouillant courage on me brusle on me coupe
 Ces villains par morceaux, que tant de sang s'écoule,
 Que iusques à mes yeux le flot marin le roule.

D I D O N,

*Que dis-tu? où es tu, Didon? quelle manie
Te change ton dessein, pauvre Roine, ennemie
De ton heur? Il falloit telle chose entreprendre
Quand tu donnois les loix: tes forfaits t'ont peu rendre
Toymesme sans pouuoir, & ton peuple sans crainte.*

*Celuy qu'on dit porter, ô malheureuse feinte,
Les Dieux de son pais dans son nauire, emporte
Tout ce qui te rendoit dessus ton peuple forte:
N'ay-ie peu déchirer son corps dans la marine
Par pieces le iettant, tuer sa gent mutine,
Son Ascaigne égorger, & seruir à la table,
Remplissant de son fils vn pere detestable?
Mais quoy? (me diroit-on) la victoire incertaine
M'eust esté: c'est tout vn, de mon trespas prochain
Qu'est-ce que i'eusse craint? i'eusse porté les flames
Dedans tout leur cartier: i'eusse rauì les ames
Au pere, au fils, au peuple, & ja trop depitee
Contre moy ie me fusse au feu sur eux iettée.
Mais puis que ie n'ay peu, toy Soleil, qui regardes
Tout ceci: toy Iunon, qui las! si mal me gardes,
Coupable de mes maux: toy Hecate hurlee
De nuict aux carrefours: vous bande escheuelee,
Qui pour cheueux portez vos pendantes couleures,
Et dans vos mains les feux vangeurs des lâches œures:
Vous (dy-ie) tous les Dieux, de la mourante Elise
Recenez ces mots ci, & que lon fauorise
A la derniere voix qu'à peine ie desferre:
Silon permet iamais ce mechant prendre terre,
Que tout peuple sans fin le guerroye & dédaigne,
Que banni, que priué des yeux de son Ascaigne,*

En

En vain secours il cherche, & que sans fin il voye
 Renaistre sur les siens les ruines de Troye:
 Quand mesme maugré soy il faudra qu'il flechisse
 Sous vne iniuste paix, qu'alors il ne iouisse
 De regne ny de vie, ains mourant à grand' peine
 Au milieu de ses iours, ne soit en quelque areine
 Qu'enterré à demi. Quant à sa race fiere,
 • Qui sera, ie ne sçay (& la fureur derniere
 Prophetise souuent) ainsi que luy traistresse,
 Qui par dol se fera de ce monde maistresse:
 Qui de cent pietez, ainsi que fait Enee,
 Abusera la terre en ses loix obstinee,
 Et qui tousiours feindra pour croistre sa puissance,
 Avec les plus grands Dieux auoir fait alliance;
 S'en forgeant bien souuent de nouueaux & d'estranges,
 Pour croistre avec ses Dieux ses biens & ses louanges.
 Qu'on ne la voye au moins en aucun temps paisible,
 Et que quand peuple aucun ne luy sera nuisible
 Elle en vueille à soy mesme, & que Rome greuee
 De sa grandeur, souuent soit de son sang lauee:
 Que sans fin dans ses murs la sedition regne,
 Qu'en mille & mille estats elle change son regne,
 Qu'elle face en la fin de ses mains sa ruine,
 Et qu'à l'enui chacun dessus elle domine,
 Se voyant cōsp sus coup saccagee, rāuie,
 Et à mille estrangers tous ensemble asserruie.

Quant à vous Tyriens, d'une eternelle haine
 Suiuez à sang & feu ceste race inhumaine:
 Obligez à tousiours de ce seul bien ma cendre,
 Qu'on ne vucille iamais à quelque paix entendre.

DIDON,

*Les armes soyent tousiours aux armes aduersaires,
 Les flots tousiours aux flots, les ports aux ports cōtraires:
 Que de ma cendre mesme un braue vangeur sorte,
 Qui le foudre & l'horreur sus ceste race porte.
 Voila ce que ie dy, voila ce que ie prie,
 Voila ce qu'à vous Dieux, ô iustes Dieux ie crie.
 Mais ne voici pas Barce? il faut que ie l'empesche,
 Et que seule de soy desor' ie me depesche
 De l'esprit ennuyeux. Barce chere nourrice,
 Va & laue ton chef, il faut que ie finisse
 Ce que i'ay commencé, cherche moy ce qui reste
 Pour parfaire mes vœus contre la mort moleste:
 Puis appellant ma Sœur, qu'on la laue & couronne,
 M'apportant tout cela que la prestresse ordonne.
 Va donc. Bar. A moy (ô Royne) à moy donques ne tienne
 Qu'on ne voye soudain la deliurance tienne.
 Mais quelle couleur, Dieux! toutes sacrifiantes
 Rendent elles ainsi leurs faces effroyantes?
 Quoy que soit, ie crains tout, las vieilleſſe chetive!
 Comment se fait que tant par tant de maux ie viue?
 Did. C'est à ce coup qu'il faut, ô mort, mort voici l'heure.
 C'est à ce coup qu'il faut que coupable ie meure:
 Sus mon sang, dont ie veux sur l'heure faire offrande,
 Qu'on paye à mon honneur tant offensé l'amende:
 I'ay tantost dans l'espais du lieu sombre & sauuage,
 Pres l'autel où ie tiens de mon espoux l'image,
 Entendu la voix gresle & receu ces paroles,
 Didon Didon viens t'en. O amours, amours foles,
 Qui n'auex pas permis qu'innocente & honneste
 Le reuoise vers luy, mais ja ma mort est preste.*

Pour t'appaiser Sichee, il faut laver mon crime
 Dans mon sang, me faisant & prestresse & victime:
 Je te suy ie te suy, me fiant que la ruse,
 La grace, & la beauté de ce traistre m'excuse,
 La grand' pile qu'il faut qu'à ma mort on enflamme,
 Desteindra de son feu & ma honte & ma flamme.
 Et toy chere desponille, ô desponille d'Ence,
 Douce desponille, hélas! lors que la destinee
 Et Dieu le permettoient, tu receuras ceste amie,
 Me depestrant du mal qui sans fin me rentame.
 I'ay vescu, i'ay couru la carrière de l'âge
 Que Fortune m'ordonne, & or' ma grand' image
 Sous terre ira: i'ay mis vne ville fort belle
 A chef, i'ay veu mes murs, vengeant la mort cruelle
 De mon loyal espoux, i'ay puni courageuse
 Mon aduersaire frere: heureuse, ô trop heureuse,
 Hélas! si seulement les naus Dardaniennes
 N'eussent iamais touché les riués Libyennes.
 Sus donc allons, de peur que le moyen s'ensfuye:
 Trop tard meurt celuy-là qu'ainsi son viure ennuye.
 Allon & redison sur le bois la harangue,
 Arrestant tout d'un coup & l'esprit & la langue.
 Le Ch. Dynous Barce, où vas tu? Bar. Au chasteau ie
 retourne.
 Le Ch. La Roine y vient d'entrer, & comme le vent
 tourne
 Les fueillars dans les bois, lors que libre il s'en ioue,
 L'amour comme il luy plaist en cent sortes la roue.
 A qui n'eust point fendu le cœur d'impatience,
 Voyant tantost de loing changer ses contenance.

D I D O N,

Ores nous la voyons les paupieres baïſſees
 Refuer à ſon tourment: ores les mains dreſſees,
 De ie ne ſçay quels cris, deſquels elle importune
 Et les Dieux peu ſoigneux, & l'auugle Fortune,
 Faire tout retentir: ores vn peu remiſe
 Se racoiſer, & or de plus grand' rage épriſe
 Se battre la poitrine, & des ongles cruelles
 Se rompre l'honneur ſainct de ſes treſſes tant belles:
 Le pleur m'en vient aux yeux. O quel hideux augure,
 Pour de nos murs nouueaux teſmoigner l'auanture!
 Bar. Sieſt-ce que ie vois vers elle en eſperance,
 Que bien toſt de ſes maux elle aura deliurance.

L E C H O E V R.

L'AMOUR qui tient l'ame ſaiſie,
 N'eſt qu'une ſeule frenaiſie,
 Non vne deïté:
 Qui, comme celuy qui trauaille
 D'un chaud mal, poinçonne & tenaille
 Vn eſprit tourmenté.
 Celuy dont telle ſieure ardente
 La memoire & le ſens tourmente,
 Souffre ſans ſçauoir quoy:
 Et ſans qu'aucun tort on luy face
 Il combat, il crie, il menace,
 Seulement contre ſoy.
 Son œil de tout objet ſe faiſche,
 Sa langue n'a point de relaiſche,
 Son deſir de raiſon:
 Ore il cognoiſt ſa faute, & ore

Sa peine le rauengle encore,
Fuyant sa guarison.
Tel est l'amour, tel est la peste,
Qu'il faut que toute ame deteste:
Car lors qu'il est plus doux
Il n'apporte que seruitude,
Et apporte, quand il est rude,
Toujours la mort sur nous.

Barce.

O Moy pauvre, ô Ciel triste, ô terre, ô creus abyssmes!
Quand est-ce qu'ici bas pareil horreur nous vismes?
Que suis-ie? où suis-ie? où vois-ie? est-ce la dont l'offrande
Que l'homicide Amour pour s'apaiser demande?
O crime! ô cruauté! ô meurdre insupportable
Que l'amour a cōmis! Le Ch. Quel trouble espouventable
T'a fait si tost sortir (ô Barce) quel iniure
Peut encor conspirer la fortune plus dure?
Bar. Quelle quelle (grans Dieux!) estes vous dōc absentes?
Estans seures au port riez vous des tourmentes?
La Roine s'est tuee, au moins avec sa flame,
Par un coup outrageux les restes de son ame,
Sanglotant durement à grand' force elle pousse:
Voila la fin qu'apporte vne amorce si douce.
Le Ch. O iour hideux, ô mort horrible, ô destinee
Cent à cent fois mechante, ô plus mechant Enee!
Mais comment? cōment Barce, hélas! Bar. Sous vne feinte
Qu'elle a fait de vouloir rendre sa peine esteinte,
Par l'heur d'un sacrifice elle a couuert l'enuie
De chasser aux enfers ses travaux & sa vie!

DD iij

D I D O N,

*Sur un amas de bois, feignant par vers tragiques
D'enchanter ses fureurs, elle a mis les reliques
Qu'elle auoit de ce traistre, un pourtrait, vne espee,
Et leur coupable liēt. Or à fin que trompee
Auec Anne ie fusse, ailleurs on nous enuoye,
Lors seule dans son sang ses flammes elle noye,
S'enferrant du present que luy fist le pariure.
Anne court à son cri, qui presque autant endure:
Voyant mourir sa sœur, son viure elle dédaigne,
Et de la mort veut faire vne autre mort compaignie.*

*Est-ce ainsi donc (ô Sœur) que ta feinte nous trompe?
Verray-ie que sans moy ta propre main te rompe
Le filet de ta vie? Est-ce ici le remede?
Est-ce le sacrifice à qui ton tourment cede?
Sont-ce les vœus, les vers dont tu m'as abusée?
Es tu tant contre nous & contre toy rusée?
Ainsi sa sœur en vain, laue & bousche sa playe.
Elle s'oyant nommer, tant qu'elle peut s'essaye
De sousleuer son chef, qui tout soudain retombe,
Ne cherchant qu'à changer son liēt avec la tombe.
Opiteux liēt mortel! ô que d'horrible rage
Le Soleil à ce iour attraine sur Carthage!*

L E C H O E V R.

ARRACHEZ vōs cheueux, Tyriens, qu'on maudisse
De mille cris enflez l'amoureuse iniustice,
Rompez vōs vestemens:
Escorchez vōstre face, & soyez tels qu'il semble
Que lon voye abysser vōus & Carthage ensemble:
Redoublez vōs tourmens.

*Redoublez les tousiours, & que la mort cruelle
De la Roine mourante, en vos cœurs renouvelle
Mille morts desormais.
Pleurez, criez, tonnez, puis que si mal commence
L'heur de Carthage, Il faut, ô peuple, qu'on la pense
Malheureuse à iamais.*

Barce.

*M*AIS, que seiournons nous? sus sus, ô pauvre bande,
Bande, las! sans espoir, allons, & ceste offrande
Arrousons de nos pleurs, & souffrons tant de peine,
Qu'avec elle le dueil presque aux enfers nous meine.
Nul viuant ne se peut exempter de furie,
Et bien souuent l'amour à la mort nous marie.

FIN DE LA TRAGÉDIE
DE DIDON.



ODE DE LA CHASSE.
AV ROY.

EN quoy me sen-ie ores pousser
Dans ce bois, remerquant les places
Où ie t'ay veu ces iours chasser
(SIRE) estant present à tes chasses?

Sus quitton nostre Lyre, allon
Quester, chasser, poursuiure, ô Muse,
Suy moy, Deesse, & ne refuse
D'imiter ton frere Apollon:
Qui bien souuent ayant sonné
Des Dieux la gloire, & la nature,
Et du grand Monde façonné
Par eux la cause & la structure:
Ou bien sonné les fiers Geans,
Qui par son pere à coups de foudre
Furent en quartiers & en poudre
Espars dans les champs Phlegreans.
En sa main, dont si doctement
De son archet sa Lyre il touche,
Accompagnant son instrument
Des diuins accords de sa bouche,
Prend soudain l'arc d'argent, & va
Chasser dans vn bois solitaire,
Ou bien quelque monstre deffaïre,
Ainsi que Python il tua.
Comme ce celeste sonneur
Ie sonnoy d'un grand Dieu les gloires,

Et

Et de mon Roy l'heur & l'honneur,
 Attendant sonner les victoires
 Tant d'un tel Dieu que d'un tel Roy,
 Sur ceux qui leuent leur audace
 Contre eux: mais ie sens d'une Chasse
 L'ardeur ores bouillir dans moy.
 Dés l'autre iour l'humeur m'en print,
 SIRE, en suivant ton assemblée,
 Et depuis l'ardeur qui m'éprint
 Est tousiours en moy redoublée,
 Non pas pour seulement quester
 Bestes fauves, noires, ou autres,
 Qui repairent aux forests nostres,
 Mais pour d'autres monstres domter,
 Sans ensuiure pourtant ce Dieu
 Chasseur, & Harpeur, & sans prendre
 Au lieu de ma Lyre un épieu,
 J'aime mieux ma Lyre retendre,
 Et sur elle chanter si bien
 La chasse qu'ores ie projette,
 Que mesme à l'œil ie te la mette
 Pour le proffit & plaisir tien.
 Car en tout ce que i'ay vouloir
 (SIRE) de rechercher ou faire,
 De dire, escrire, ouïr, & voir
 La fin qui seule m'en peut plaire,
 C'est d'y pouuoir avecq' plaisir
 Perdre un proffit d'esprit ensemble:
 Car quand ce double fruit s'assemble,
 C'est le but parfait d'un desir.

*Aussi mesme en ce que ie veux
 Offrir aux grands, ie me propose
 De leur faire ensemble ces deux.
 Cueillir en vne mesme chose:
 Le plaisir remuant les cœurs
 Leur attrait, l'esprit, & l'oreille,
 Et l'autre leur deuoir éueille
 Aux conseils, aux faits, & aux mœurs.*

*Si dans mes vers tu ne uoulois
 Chercher que la fueille agreable
 Sans fruit, l'escorce sans le bois,
 Le bois sans le suc profitable,
 I'aimerois mieux te voir tousiours
 Baller, courre, escrimer, t'esbatre
 A cent jeux, & faire combattre
 Dans ta court ton Once & tes Ours.*

*Ou bien chasser, non pas ouir
 La Chasse qu'ici ie t'ay faite,
 La Musique ouir, non iouir
 D'une Musique plus parfaite,
 Par laquelle ta chant chasser
 A cor & cri nostre manie,
 Ie veux la paisible harmonie
 Faire, à tes sujets embrasser.*

*Ou bien i'aimeroy mieux te voir
 Amuser d'une masquarade,
 Vuide de sens & de sçauoir,
 Te passant de vaine brauade:
 Ou t'amuser par des bouffons
 De ce qui par eux Comedie*

Se nommeroit, ou Tragedie,
 Et des deux n'auroit que les noms.
 J'ay le premier de ces deux ci
 L'honneur en ta France fait naistre,
 Qui des Rois, qui du peuple aussi,
 Deux diuers miroirs souloyent estre:
 Si les premieres n'ont esté
 Parfaites pour mon trop ieune âge,
 Je me suis en ce double ouurage
 Moymesme depuis surmonté.
 J'ay (pour n'esloigner mon propos)
 Maint grand labeur tâché parfaire,
 Pour ce bien du commun repos
 Distrain de nous, à nous retraire,
 Tant pour domter l'opinion,
 L'abus, & l'ardeur auenglee,
 Qu'en la police dereiglee
 Chercher la reigle & l'union.
 Mais sur ma Lyre ie ne veux
 Maintenant chantant vne Chasse,
 Que dresser quelques petits vâns
 Sur le mal qu'il faut que lon chasse,
 Et dedans mes vers rapportant
 L'une & l'autre poursuite & queste,
 Faire que ce chant que i'appreste
 T'aille doublement contentant.
 Car comme du plaisir i'ay dit,
 Si en cela que ie te donne
 Tu recherchois le seul proffit
 Et le maintien de ta couronne,

Tu serois mieux en ton royal
 Conseil, arresté du langage,
 D'affaires, & du saint visage
 Du graue & doctel'Hospital.
 La Jeunesse, la Royauté,
 Et des Princes la nourriture,
 Font que toute seuerité
 Repugne fort à leur nature:
 Mais si faut-il qu'armes & loix,
 Honneur, vertu, sçauoir, prudence,
 Fust-ce entre le festin, la dance,
 Et le ieu, s'apprennent des Rois.
 Un Prince se peut destourner
 Tant de l'amour que de l'estude,
 De tout ce qui peut plus l'orner,
 Que son sceptre: soit par trop rude
 Coustume de l'assujettir,
 Soit par face, ou façon, ou faute
 De pouuoir l'humeur brusque ou haute,
 En y consentant diuertir.
 Par faute de mesler le ieu
 Et les gais mots, par la doctrine
 Se faire plaire, & peu à peu
 Luy faire plaire la diuine
 Racine de tout heur & bien,
 Fascheuse quand on la propose:
 Mais qui ne sçait qu'en toute chose
 Qui bien ne gouste n'aime rien?
 Or sus donc(SIRE)excite toy
 D'une course de Cerf, chantée:

Briefuement, & mesme la croy

Vraye, & non pas representee.

Ie te voy ja (SIRE) appresté:

Car ayant ceste matinee

A la volerie donnee,

A cheual ty es remonté.

Le buisson au matin s'est fait,

Faisant beau reuoir & cognoistre,

Et qu'un bon chien estoit au trait

Dans la main d'un veneur adextre,

Qui voyant, iugeant, defaisant

La nuit, parlant, & faisant feste

Au chien, qui vouloit de la beste,

Et tousiours ça & là brisant:

Conduit tant par l'assentement

Du chien, que par sa propre veüe,

Soit que par le pied seurement,

Le temps, & la route il ait veüe,

Qu'il ait les portees, ou bien

Les foulees, les reposees,

Ou autres choses aduisees,

En son mestier n'oubliant rien.

A destourné son Cerf, & fait

Son rapport, sans que les fumees

Apporté dans sa trompe il ait,

Pource que se trouuans fermées

En Aoust & Iuillet seulement,

Par troches en Iuin, & encores

Par platreaux en May, du tout ores

Elles sont hors de iugement.

O D E

a departis sont les Relais,
 Et pendant que moy d'ainsi dire,
 Toy d'ainsi m'ouir tu te plais,
 Nous sommes ja paruenus (SIRE)
 Au laisser-courre, il faut penser
 De piquer tant que tout tu voyes:
 Voila, le Veneur sur les voyes
 Tient son limier prest à lancer.
Ce limier l'auoit mené droit
 Aux brisees, tant il est sage,
 Puis a tousiours suui son droit:
 Tant peut la nature & l'usage
 Les bestes mesme façonner.
 La meute des chiens ne demeure
 Guerres loin apres, pour à l'heure
 Bien decoupler & bien donner.
Ce Cerf, pauvre Cèrf qui caché
 Dans l'épais du buisson se pense,
 Où ce mastin l'a rembusché:
 Ce mesme limier qui le lance,
 De sa vie en ses pieds dispos
 Se fie, tous ces bois resonnent
 D'un long gare-gare, & se sonnent
 Par ce tien Veneur deux longs mots.
Tout soudain que ce lancement
 A nos oreilles se vient rendre,
 On fait le prompt decouplement
 Par quatre ou cinq longs mots entendre:
 Toute ame se peut asseoir
 A ses sens: mais l'œil, & l'oreille,

Contens ici, par nompareille
 Force nous peut poindre & raurir.
 Voy-le-ci (SIRE) dans ce fort,
 Aller par ces portees mesme:
 Il rompt, il brise, il bruit, il sort,
 Et de sia de viffesse extreme
 Secourt, se presse à cri & cor,
 Suiui de la meute courante,
 Tout ensemble apres luy parlante,
 Attendu des relais encor.
 Tu vois ces prompts piqueurs brusler
 D'ardeur, & tantost par bruyeres,
 Tantost par fustayes voler,
 Par champs, par forts, & par clairieres:
 Des mots de leur trompe animans
 Ensemble les chiens & la beste,
 Et au plaisir de la conqveste
 Plus qu'à la proye s'enflammans.
 Je ne m'estonne d'Orion,
 Ny d'Adonis, ny d'Hippolyte,
 Ny du miserable Acteon,
 Ny d'Atalante, ou de la suite
 Que Diane souloit mener:
 Car ce plaisir dompteur des vices,
 Passe tous plaisirs & delices
 Qui ne nous font qu'effeminer.
 Tant que ceux-ci, qui nuict & iour
 Menans leur vie chasseresse,
 Fuyoyent le casanier sejour,
 Qui se couplant à la paresse

Se fait l'engendreur de tous maux,
 Outre leur deduit & leur queste
 Auoyent l'heur de la vie honnesté
 Pour grand loyer de leurs trauaux.
 On feiūt les plus forts Dieux chasseurs,
 Ainsi qu' Hercule, & Phebus mesme:
 Car tousiours la grandeur des cœurs,
 La force & la Noblesse s'aime
 Aux chasses, qui peuuent dresser
 Beaucoup, & maint les sçait bien faire,
 Qui peut en guerre l'aduersaire,
 Et en paix les crimes chasser.
 Mais retourner au Cerf il faut,
 Qui d'une longue randonnee
 Forlongeant, fait estre en defaut
 Toute nostre meute estonnee:
 Il faut que ces chiens ja branlans
 Tousiours en crainte se retiennent,
 Tant qu'eux-mesme aux voyes reuiennent,
 Apres leur Cerf tousiours allans.
 Il fait ses ruses maintenant
 Que luy a peu son âge apprendre,
 Aux hardes des bestes donnant,
 Pour faire aux chiens le change prendre:
 Ou bien querir (peut-estre) il va
 D'autres Cerfs, que tousiours il chasse
 Deuant soy, par si long espace
 Qu'il face suiure vn de ceux là.
 Ou n'ayant qu'un seul Cerf trouué
 Dedans sa reposee, à l'heure

Il le chasse: & d'où s'est leué
 C'est autre, le nostre demeure:
 Ou tout au bout d'un long fuyant
 Bondist au fort, ou bien il use
 Encores de mainte autre ruse
 Sur luy fuyant & refuyant.
 Si pas un de tes chiens n'a sceu
 Defaire la malice sienne,
 Et que relancer nel'ait peu,
 Il faut que le limier on prenne,
 Et qu'on commence à requester
 Depuis la brisée dernière,
 Où lon a veu les chiens derriere
 Leur proye bransler & doubter:
 Suivre les voyes, aduiser
 Fort bien s'il demeure, ou s'il passe,
 Songer comme il a peu ruser,
 Tant que ses ruses on defface:
 Et qu'en parlant alors ainsi
 Qu'au laisser-courre on le relance.
 Or sus donques chacun s'avance
 Pour y estre, & toy (SIRE) aussi.
 De la trompe les mesmes mots
 Que j'ay dits paravant, se sonnent
 De mesmes cris, mesmes propos
 Tous les lieux d'alentour resonnent:
 On le recourt, rebaudissant
 Les chiens, grande est la randonnee:
 Mais la beste en fin maumenee
 Perd son haleine en se lassant.

Ce pauvre presté de si pres

*Par la mente qui le mau-meine,
Veut gagner quelque eau tout expres,
Pour fraîcheur reprendre & haleine:
Mas las! chetif il apprendra
Tout au rebours que la vistesse
Dedans l'eau nuisible se laisse,
Et tost les abois il rendra.*

*Quelques Cerfs se font par les eaux
Porter, de peur que les chiens viennent
Les assentir: dans les roseaux
Quelques autres cachez se tiennent:
Vn autre porter se fera
Sur le dos de quelque autre beste,
Mais de cestuy la mort est preste,
Peu apres que sorti sera.*

*Aux trousses ja les chiens ardans
Le tiennent, il est ja par terre,
Ils le tirassent de leurs dents,
Iouissans du fruit de leur guerre:
Les larmes luy tombent des yeux.
Et bien que pitié presqu'il face,
Si faut-il que de telle chasse
Sa mort soit le pris glorieux.*

*La mort du Cerf se sonne, alors
Les monts, les vaux, & les bois, rendent.
Les bruyans & hautains accors,
Que les trompes dans l'aire spandent.
On coupe & leue vn des pieds droits,
On abat l'orgueil de sa teste,*

*Qui sont (SIRE) de ta conquête
Les enseignes & premiers droits.*

On se met (peut-estre) à parler

Voyant cesteste ramee

De frayer, brunir, & perler,

De bien sommee, & bien paumee,

De bien roïce, & si elle a

Marrein, andouilliers, & goutieres

D'un fort vieux Cerf, & cent manieres

De dispute outre celles là.

Si lon auoit premierement

Bien iugé qu'il fut Cerf courable,

S'il est Cerf dix cors ieunement,

Ou fort vieux Cerf & fort chassable:

Sile pied monstroït bien que c'est,

Et tous signes qu'on a peu prendre,

En ton retour tu peux entendre,

Tout tel deuïs qui aux grands plaist.

Là souuent du particulier

On tombe à parler de la chasse

En commun, comme du Sanglier,

Soit que lors du Vautray lon face,

Ou d'autres façons de discours:

Quand par grands leuriers que lon iaque,

Au sortir du fort il s'attaque

Ducosté qu'on a fait l'accours.

Ces animaux grondans, fumans

Agueule ouuerte, armez d'horribles

Deffenses, bauans, écumans,

Et plus dangereux que terribles,

Se peuvent à cheual tuer
 De l'espee: mais iem'asseure..
 Que l'espien est l'arme plus seure,
 Soit pour atteindre ou pour ruer.
 On parle des loups que lon prend
 A la huee, ou d'autre sorte,
 Du carnage par qui lon rend
 La gloute beste prise & morte:
 On parle des cheureuls, des daims,
 Et d'autres, soit pour courre, ou tendre,
 Ou pour épiant les surprendre
 D'un plomb, ou bien d'un trait attaints:
 Ainsi que l'Ours qui ne court sus
 Aux gens, tant que mal on luy face,
 Ains attend le coup de dessus
 Vn haut arbre. Or quand on le chasse
 De ses cauernes, les grands trous
 On bousche, & bien qu'il grimpe, & rue
 Des pierres, qu'il serre, & qu'il tue,
 Cede en fin aux chiens & aux coups.
 Puis du caut Renard buissonnier,
 Qui tousiours entre les chiens use
 De tours rusez, mais du leurier
 La dent finit en fin sa ruse:
 Ou de petits chiens lon se plaist,
 Comm' au Blereau luy faire guerre,
 On escoute, on houë la terre
 Droit sur l'accul quand il y est.
 Parler aussi du Lieure on peut
 Qu'à force on prend, ou d'une sorte

Rare, quand le Leopard veut
En quatre ou en cinq sauts l'emporte:
Mesme on peut discourir combien
A leurretter on se peut plaire,
Quand en plaine rase on voit faire
Au lieure & aux lieures fort bien.
Pour le quester on va marchant
Par rang dedans telle campagne,
Le Pelaud part : on va lachant
Les leuriers, les cheuaux d'Espagne,
Et les vistes courtaus apres
Font poudroyer leur longue trace:
Il se court, s'atteint, se bourrasse,
Tant il a son ennemi pres.
Point ne luy fait perdre le cœur
L'atteinte d'atteinte suiuite,
Ses pieds sont elez par la peur,
Qui seuls peuuent sauuer sa vie:
Il est mis en fin au nouët,
Dont quelquefois mesme il eschappe
Par bonds quelquefois il se happe,
Et criant roidit le jarret.
Des animaux plus estrangers
On peut en bref toucher la chasse,
Comme des bien ramez Rangers,
Ou des Lyons qu'au seulon chasse,
Des Tygres qu'on trompe au miroir,
Des Elephans qu'aussi lon trompe,
Et dont ne peut la forte trompe
Contre l'esprit humain valoir.

Tels propos s'enflent estans pleins
 De mots propres à ce langage,
 Dont les Grecs, & dont les Romains
 N'eurent iamais si riche usage:
 Là sonnent ces mots de limier,
 Chien-courant, dogue, chien-d'attaque,
 Epagneu, chien d'Artois, & braque,
 Barbet, turquet, allant, leurier.

Là des chiens oublier ne faut
 La race, couleur, & maniere,
 Les noms, comme Miraut, Briffaut,
 Tirebois, Cleraude, & Legere:
 Et en leuriers, Iason, Volant,
 Cherami, Cigoigne, Cibelle:
 Et cent noms dont on les appelle,
 De toutes les sortes parlant.

D'établir, de rere, d'aller,
 De bontems, de fraye, gaignage,
 Du contre-pié, de suraller,
 D'os, de pinces, du viandage:
 Bref, de tout autre iugement
 Qu'il faut que lon face à toute heure,
 D'entree, sortie, demeure,
 Suitte, dressement, lancement.

Des diuers langages qu'on doit
 Dire aux chiens, diuers mots de trompe,
 Et diuerses voix que lon oit
 Du change, auquel il faut qu'on rompe
 Les chiens, ou de leur long défaut
 De bien remeuter, de vifstesse,

De creance, voire sagesse,
 Qui sur tous aux chiens blancs ne faut.
 Du cours de Chasse, & des abois,
 Des testes, meulles, cheuilleure,
 De perches, couronnes, epois,
 Andouilliers, trocheure, & paumeure,
 Puis des traces, & du souillard,
 Des marches, laïssées, fumées,
 Et tant d'autres accoustumées
 Façons de parler en tel art.
 On oit de toiles, de haler,
 De bloquer, crochetter, d'enceindre
 De harts, & de perches, parler
 D'épieux, que diuers sang peut taindre
 Sans en vser: parler de pans,
 De maïstres, de nappe, de mailles,
 Du fauve, du noir, de bichailles,
 De layes, marcaffins, & fans:
 De broquars qui les dagues ont,
 Puis des bestes de compagnie,
 Ou qui au tiers ou quart an sont,
 Et tous les mots de Venerie:
 Ou d'autres chasses, soit pour voir,
 Pour quester, pour poursuivre, ou prendre,
 Et que nul vers ne peut comprendre,
 Sont pris là pour vn grand sçauoir.
 Là quelqu'un (peut-estre) ialoux
 De ces longs discours, & encore
 Piqué du plaisir que sur tous
 Il aime, il exerce & honore;

Subtilement destourner,
 Le propos hors de Venerie,
 Et haut & dru de Volerie,
 Mais en bref pourtant parlera.
 L'occasion se peut choisir,
 Sur cela que lon t'a fait prendre
 Ce matin aux oiseaux plaisir,
 Avant que par course entreprendre
 De forcer ce Cerf, & premier
 D'Austrucher sera la parole;
 Soit qu'en saison propre se vole
 Le perdreau par un Espreuier.
 Soit que d'autres oiseaux de poing
 On vole aussi pour champs, à l'heure
 Que ces perdreaux font ja plus loing
 Leurs vols, d'aile aussi roide, & seure
 Que pere & mere, ou quand ils sont
 La perdrix, qui vieilles deuiennent:
 Pour tel vol sur le poing se tiennent
 Les Autours, qui guerre leur font.
 Ou bien leurs Tiercelets qu'on croit
 Faire mieux, & que plus on aime,
 Mesme souuent dresser on voit
 L'oiseau de leurre à ce vol mesme:
 Vn Lanier dans l'air se soustient
 Sans fin, & roüant ne s'écarte,
 Jusqu'à tant que son gibbier parte,
 Mesme un Faucon long temps s'y tient.
 Qui plus est, un Sacre, un Gersaut,
 Se dresse à ceste mesme proye,

Qu'au

Qu'auparavant ietter ne faut
 Que partir leur proye on ne voye:
 Tous ces oiseaux ne bloquent pas
 Lors que les perdrix ils remettent
 Mais tous, quand ils sont bons, les mettent
 Au pied, fondans soudain en bas.
 Soit oiseau de leurre, ou de poing,
 De petits chiens pour la remise,
 Sages & bons, lon a besoing,
 Que peu ardents, & à la prise
 Iamais assés, lon doit choisir:
 Leur deuoir, avec l'aile bonne
 De l'oiseau, aux cuisines donne
 Du gibbier, & aux yeux plaisir.
 Je te diroy bien comm' apres
 Il suiura le vol pour riuiere,
 Et quand de mares on est pres,
 Ou ruisseaux, en quelle maniere
 Les oiseaux alors decouverts
 Se iettent à mont, là où vaine
 Est l'attente, son ne prend peine
 Que leurs gibbiers soyent bien couverts.
 De quels cris on use, & quels mots,
 De quel regard & patience,
 Pour faire tourner à propos
 D'un oiseau la teste, où lon pense
 Qu'il ait mieux sur sa proye l'œil,
 De crainte que lon ne foruide,
 Comme on croise, comme lon vuide,
 Contentant & l'œil & le vueil.

*Les Ridanes sont le gibbier,
 Les Varriens, & les Sarcelles,
 Sur tout le Canard, qu'un Lanier,
 Ny qu'un Faucon à tire-d'ale
 Ne peut r'auoir, si quand il part
 Il ne l'arreste, & lors en terre
 Fondant roide comme vne pierre,
 Assomme sous soy le Canard.*

*Je te feroiy encor iouir
 Du plaisir, que telle personne
 Pourra donner, faisant ouir
 Le plaisir qu'aux grands seigneurs donne
 La haute Volerie, au lieu
 Ou ore pour Milan, & ore
 On vole pour Heron encore,
 Pour Chat-huan & Fauverdieu.
 Si tost que le Milan se voit
 Vn haut cri la veüe accompagne,
 Le Duc que porté lon auoit
 Est ietté dessus la campagne,
 Pour faire le Milan baisser,*

* *

*Au ciel comme luy se trousser.
 Quelques autres Sacres à mont
 Sont iettez, & mainte venue,
 Presque iusques dans le ciel vont
 Donner à leur proye cogneuë,*

*

Quand ceste meslee au ciel faite

Se perd quasi de l'œil, qu'on iette
 Apres tous autres le Gerfaut.
 L'un braue & fort, depuis le bas
 Jusqu'au plus haut de pareille aile,
 Ne de façon ne monte pas
 Que les Sacres: mais en eschelle
 Roide & soudain se voit hausser,
 Droit au Milan, que par la force
 D'une seule venue, il force
 Du haut de trois clochers baisser:
 Puis hausser, & faire on luy voit
 Des fuites, mais en toute place
 Nouvelle venue il reçoit,
 Tant qu'en fin la cheute se face
 Souuent bien fort loing: Mais avant
 Que commencer, dès que la proye
 S'est venüe, tousiours on enuoye
 Quatre ou cinq piqueurs sous le vent.
 Du Milan la cuisse se rompt
 Aussi tost que la cheute est faite,
 Puis soudain la curee ils font,
 Et chacun y pique, & souhaite
 D'arriuer premier, pour auoir
 De ce Milan la queue, pource
 Que c'est le pris de telle course,
 Qu'en son leurre on fait apres voir.
 Or combien le vol pour Milan
 A celuy pour Heron ressemble,
 Pour Fauperdieu, au Chat-huan:
 Et combien tout differe ensemble,

O D E

Par ce mesme homme se diroit,
 Et i'en reciteroy la sorte:
 Mesme puis qu'au faire'elle apporte
 Plaisir, le recit en plairoit.

Je diroy qu'un heron souuent
 Dans l'air, souuent se trouue en terre,
 D'où l'on le fait partir, auant
 Que dans l'air on luy face guerre:
 Et qu'on peut de Faucons s'aider
 Pour une telle volerie,
 Ou de Sacres comme lon crie
 Pour de son bec faire garder.

Je diroy qu'en ce vol il faut
 Des leuriers, pour le Heron prendre,
 Et qu'à l'heure qu'il chet d'enhaut,
 Les oiseaux que lon a peu rendre
 Si sages, crainte aucune n'ont
 Des Chiens: & ces chiens qui se dressent
 Ainsi si bien, iamais ne blessent
 Ces oiseaux qui communs leur sont.

Je diroy cela qu'estans pris
 Par leur bec, quelques herons rendent,
 Puis la curee, & puis le pris
 Que les mieux faisans en attendent:
 Les bouts des ailes de l'oiseau
 Pour son leurre quelqu'un remporte,
 Et au Seigneur la houe on porte
 Pour en decorer son chappeau
 Le Fauverdieu, & l'autre aussi,
 Dont l'un comme un Milan s'arreste

Bien peu en terre: l'autre ainsi
 Qu'un Lieure par les champs se queste,
 Dans la terre où il se blottit,
 Et leurs vols ne different guere
 De l'une & de l'autre maniere,
 Dont en bref par mes vers i'ay dit.
 Je pourroy toucher nonobstant
 Les differences qui se treuvent:
 Puis d'ordre i'iroy recitant
 Tous les autres vols, qui se peuvent
 Par un tel homme raconter,
 Comme du Geay, de la Corneille,
 De la Pie, qui fait merueille
 De craqueter & caqueter:
 Mais bien de l'Allouëtte, estant
 Mesme au nombre du haut vol mise,
 Qui se perd de tout œil, montant
 Droit dans les cieux, où elle est prise
 Par le gentil Emerillon:
 Bref, de tout vol depuis la Gruë,
 Qui quelquefois voler s'est venü
 Jusqu'à ce petit oisillon.
 J'exprimeroy mesme les mots,
 Dont comm' un autre en Venerie,
 Celuy farcira son propos
 Parlant de la Fauconnerie,
 Comme de
 Passager, oiseau d'une nuë,
 Ou de plusieurs choses cogneuë
 Tant seulement à ceux de l'art.

O D E

Comme curer, paistre, tenir,
 Avoir bonne gorge, & enduire,
 Emeutir, poiurer, deuenir
 Pantois, & d'autres qu'on peut dire
 Du traitement de tels oiseaux:
 Comme il se iardine, il s'effore,
 Pannage, main, & serre encore
 Les longues pannes & cerceaux.

Perche, gand d'oiseau, chaperons,
 Longes, iets, veruelles, sonnettes,
 Et tant d'autres si propres noms
 Des choses ou d'actions faites:
 Et or' pour dire en general,
 Je comprendroy toutes les choses
 Qui sont en tout tel sçauoir closes,
 Des Nobles sçauoir principal.

Mais ie me sen ja trop lassé
 De ma longue course, égarée
 Hors du propos: I'ay trop laissé
 Mon Cerf sans en faire curee:
 La longueur du propos deduit,
 Le chemin de ton retour passe,
 Puis, peut-estre, quelque autre chasse
 T'amusera iusqu'à la nuit:

Qui gardera qu'en ton retour
 Te Majesté tel discours oye:
 Il faut que ce reste de iour
 A mon premier dessein s'employe:
 Je reuien, ce me semble, au lieu
 Où ce Cerf couché lon despouille,

Sur sa chasse, mort, & despoille,
 Faisant maint & maint iuste vœu.
 Je luy voy couper les *
 Puis son cuir oster ils luy viennent,
 Les *
 Avecques *

On fend son cœur pour vne croix,
 Ainsi comme lon dit, y prendre,
 On cherche en luy tes menus droits
 Qu'en ton crochet (SIRE) on vient pendre,
 Entre lesquels les filets sont,
 Et le francboyau qu'on assemble
 A plusieurs desia mis ensemble:
 D'autres droits les veneurs y ont.
 Tout le sang dont ce corps est plein
 Se rassemble hors de la beste,
 On met par morceaux tout le pain,
 Cependant qu'il faut que la teste
 On separe, & qu'on leue auant
 La hampe, & puis que lon partisse
 Le reste, l'une & l'autre cuisse,
 Et les deux espauls leuant.
 Les costes, le petit simier,
 Que le cinq & quatre on appelle,
 La piece du simier dernier
 Qui la venaison monstre en elle:

Le pain trempé au sang s'estend
 Sur le cuir, la curee on sonne,
 Qui avant qu'aux chiens on la donne,
 Tant qu'ils y soyent tous, se deffend.
 Tout cela qui nous rend ardans
 A le suivre, & qui pour la gloire
 Nous poind, & nous ard au dedans,
 Nous trauaillant pour la victoire,
 Donne aux vainqueurs vne fierté,
 Tant soit de petit pris la prise,
 Vn triomphe, vne ioye éprise,
 Qui s'entremesle d'aspreté:
 Decela tous ces chiens se font
 Vn exemple assez conuenable,
 Qui plus aspres & plus fiers sont:
 Et de mainte façon merquable
 Semblent recognoistre leur fait,
 Triomphans du pris de leurs peine:
 Ceste mesme victoire amaine
 Les Veneurs à pareil effect.
 Qui plus resiouis, plus gaillards,
 Et brauans de leur peine prise,
 Sont plus ardans d'auoir leurs parts,
 Que si grand' chose estoit conquise:
 Chacun n'oublie à se vanter
 De cela qu'il a sceu mieux faire,
 Tâchant pour son plus grand salaire
 La gloire chez soy remporter.
 Or ie voy qu'en ce temps diuers
 Ta principale Chasse (SIRE)

Doit estre des Discords peruers,
Renuerseurs de tout grand Empire,
Pour en les pourchassant chasser
La ruine qui nous menace,
Comme ja telle heureuse chasse
Dieu t'a fait si bien commencer.

Je sçay mesme qu'en émouuant
Tant soit peu quelque eau croupissante,
Sort grand' puanteur: & qu'un vent
D'un peu de braise languissante
Excite souuent grand's ardeurs,
Et pour tels dangers ie ne cuide
Qu'encor' nostre France soit vuide
De souffleurs & de remueurs.

Je suis seur que les grands sont pleins
Souuent de grande haine & pique,
Ne suiuant pas de ces Romains
La doctrine & la gloire antique,
Qui moins de triomphe auoient mis
A vaincre les forts aduersaires,
Qu'à vaincre les propres choleres,
Nos plus familiers ennemis.

J'ay grand' peur qu'une Ambition
Soit d'Ambition resuiuite:
Ie sçay qu'en nostre nation
Naturelle & propre est l'enuie,
Et que tout cela qui en un
Nous doit estreindre d'auantage,
CHRIST, le Païs, le parentage,
Et d'un Roy le lien commun:

O D E

*C'est cela qui seul au reboars
Nourrist en nous la haine & noïse,
Parce monstre Enuie, tousiours
Maniant nostre humeur Françoisse,
Nous piquant plus contre la loy
De tous ces liens qu'on separe,
Que contre le Iuif, le Barbare,
L'Incogneu, l'ennemi du Roy.*

*Ce vice à nous particulier,
Comme aux autres païs un vice
Est tousiours propre & familier,
Nous fait (voulans faire service
Au Roy) luy nuire: car ialoux
Et piquez à qui estre, & faire
Pourra le plus, par un contraire
Discord, nous perdans luy & nous.*

*Outre encor, ie voy (car ie veux
Presque toutes les causes rendre,
Qui me font concevoir ces vœus
Sur ce Cerf que tu viens de prendre)
Que mainte persuasion
Qu'en tout on croit & sainte & bonne,
Soit par Zele ou ruse, se donne
Pour l'une & l'autre faction.*

*Qui (peut-estre) trouuant desia
En nous la rencontre opportune,
Qui est l'ambition qu'on a,
Compagne de ceste rancune:
Nous eguisant, nous desfermant
L'esprit & l'œil, au soustien d'elle*

En toutes choses, fors icelle,
 Va nos sens & nos yeux charmant.
 C'est ce qui fait que nous trouuons
 Du tout bon ce qui est des nostres,
 Que nous hayons & dédaignons,
 Fut-il bon, ce qui est des autres:
 Puis les uns se voulans hausser,
 Peut-estre, sur les proches Princes,
 Et tant du Roy que des prouinces
 Toutes les charges embrasser.
 Les autres se voulans sentir
 Du mespris qu'on fait à leur race,
 Pour les premiers aneantir,
 Affrontent l'audace à l'audace,
 Et CHRIST (qui n'en peut mais) est pris
 Pour bon droit, ou pour couleur belle:
 Nos brouilleurs sont de là querelle,
 Par icelle épians leur pris.
 Mesme ainsi que maint enflammateur,
 Asspre & plein de pedanterie,
 Retenant de sa vieille humeur
 D'eschole ou bien de moynerie:
 Ou d'autre costé maint criant,
 Qui dedans sa chaire exterminie
 Et brusle vn chacun, & mutine
 Le peuple, par zele ou par ardeur,
 Ou tasche à faire des discords
 Des grands, leur proffit, & leur gloire,
 Et du sang des grands hommes morts,
 Couronner en fin leur victoire.

Plusieurs seigneurs (peut-estre) aussi
 On tasché par telle dispute,
 De frapper le blanc de la butte,
 Où ils tiroient deuant ceci.

Les aucuns pour hausser leur rang,
 Les autres pour chercher vengeance:

Les vns pour s'assouir de sang,

Dont mesme l'enorme abondance

Asses encor ne les repaist:

Ceux-ci ont la mutinerie

De nature, & la pillerie

Plus que Dieu mesme à ceux-là plaist,

Quant à maint autre, ou à credit,

Ou par quelque pique legere,

Ou par des grands n'estre point dit

Avoir vne ame casaniere:

Ou par un deuoir, dont il sent

Sa vie à un seigneur estreinte:

Ou par la force, ou la contrainte

Des crimes qu'il void ou entend:

Ou pour la deffence du bien

Que sa maison tient en l'Eglise:

L'Auarice trouue moyen

De se couvrir sous la feintise:

Ou par un éguillonement

De femmes, d'amis, de lignage,

Ou bien pour quelque autre auantage,

Ruse, égard, ou transportement,

A sans rien poiser espousé

Soudain l'une ou l'autre querelle:

Et quant à ceux qui ont usé
 En cela d'un bon & vray Zele,
 Le nombre est grand, mais ie ne sçay
 Si des autres le nombre ils passent:
 Et quoy qu'ils pretendent ou facent,
 En estime ie ne les ay.

Car quant aux vns, ils sçauent bien
 Que CHRIST est un Roy pacifique,
 Dieu de paix, & seul entretien
 D'unité dans son corps mystique:
 Que CHRIST veut puis qu'il n'est permis
 (Disent-ils) gloser l'Ecriture,
 Que nous aimions ceux qui iniure
 Nous font, & nous sont ennemis:
 Qu'à celuy qui va souffletant
 L'une des iouës, l'autre on baille:
 Que quand on nous va tourmentant
 D'une ville, en l'autre on s'en aille:
 Que les saints anciens n'ont pas
 Deffendu leur cause par armes,
 Mais leur ieusne, priere, & larmes,
 Et leur mort estoient leurs combats.

Que ceux-ci mesmes *
 Nagueres ceux, qui d'un courage
 Trop charnel en auant mettoient,
 Qu'il falloit reponsser l'outrage,
 Disans, que bien qu'en l'ancien
 Testament guerre & resistance
 Fut permise, telle licence
 N'est point du Testament Chrestien.

ODE DE LA CHASSE.

*Mais que CHRIST par afflictions,
 Par tourmens, croix, & vitupere,
 Veut qu'en l'ensuiuant nous entrons
 Au royaume de Dieu son pere:
 Du sang des saints l'effusion,
 Et semence continuelle
 De l'Eglise, & la merque d'elle,
 N'est que sa persecution.
 Tant que par leur dire voulans
 Faire cesser par force & armes,
 Les maux, les assauts violens,
 Persecutions, & alarms
 En leur Eglise, ils font cesser
 La merque qui la fait cognoistre:
 Et ce nom en eux ne peut estre
 Qu'à eux seuls ils vouloyent laisser.*

* * *

ODE A M. LE COMTE DE
DAMMARTIN.

B IEN que de ta maison le tige, & l'ornement,
Du sceptre de Hongrie ait pris commencement,
Qui de mainte alliance

Dans la maison d'Anjou, d'Angleterre, & Bourbon
A prouigné son fruit, & sa gloire, & son nom,
Rare honneur de la France.

Bien que de tes ayeuls & les faits, & les cœurs,
Bien que le pere tien qui des grands belliqueurs
Amortit la memoire:

A ceste grand' noblesse accouplans la vertu,
Ayent pour toy la mort & le temps combattu,
Deux meurdriers de la gloire.

Bien que ta gloire aussi, qui si ce n'est en bien,
Aumoins à tes ayeulx en vertu ne doit rien)
Soit de telle hauteſſe,
Qu'il semble qu'à tous coups elle deust dédaigner
Vn chetif comme moy sans trop s'accompagner
D'une humble petitesse.

Si est-ce toutesfois que te voyant ainſi
Avoir de moy sans feinte, & sans ceſſe ſouci
D'une amiable chere,
M'ouurant ſi priuément ton ſecours & ton cœur,
Qu'il ſemble proprement qu'au lieu de mon ſeigneur
Tu te rendes mon frere.

Eſprouuant meſmement qu'en cent & cent diſcours,
Que des abus humains nous faiſons tous les iours,
Comme par ſympathies,

*Tu as avecques moy semblable opinion,
 Semblable liberté, semblable affection,
 Guide de nos deux vies.*

*Je croiray que les Dieux, qui soin de nous ont pris,
 Avant nostre naissance accoupleroient nos esprits
 D'une alliance telle,
 Qu'au pris de telle couple, au pris d'un si grand heur,
 C'est bien peu que les corps, les biens, & la grandeur,
 Qui n'est rien que mortelle.*

*Je croiray quand le Ciel à ton corps remesla
 Ton ame, qui premiere ici bas deu ala
 Du monceau des Idees,
 (Pardonne si i'accorde au Platonicien)
 Ne peut, nous separant, rendre de tout leur bien
 Nos deux ames fraudees.*

*Ains comme Pollux fait pour la fraternité,
 Je recommuniquois une diuinité
 Aux ans de ton enfance:
 Ou bien comm' un Demon ministre de nos Dieux,
 Maugré le corps massif ie rapportoy des cieux
 L'obscur preuoyance:*

*Ou ie croiray plustost (me pardonne un Chrestien,
 Si ie me mets au rang Pythagoricien)
 Que quand tu vins à croistre,
 I'estoy quelque Vieillard, qui pour lors te hantoy,
 Et qui de iour en iour doucement t'incitoy
 De te vouloir cognoistre.*

*Et quand ie renasqui, que Clotho (qui pour nous
 Des douces amitez fila le nœu plus doux)
 D'un charme inuiolable,*

Deffendit

Deffendit & au Temps, & à sa tierce Sœur
De ne trancher au fil de l'acier rauisseur,
Ce lien perdurable.

Mesmement qu'en viuant ie n'ay du ciel receu
Aucun bienfait, sinon que quand ce seul bien i'en
Que ie te recogneusse.

Cessent donc mes malheurs, cessent les tiens encor,
T'ayant, i' auray tousiours vn eternal thresor,
Bien que pauvre ie fusse.

Car bien que mille maux le ciel me face auoir,
T'aimer, & t'honorer, & sans fin conceuoir,
L'heur d'une amitié douce
M'est plus qu'une Nepenthe enchantemēt des yeux,
Ou bien que de Circé le beau fruit oublieux
Qui le souci repousse.

Si doncques tout entier ie me trouue dans toy,
Si doncques à toy seul moy mesme ie me doy,
Sepourroit-il bien faire
Que rien peust eschaper de moy qui ne fust tien,
Veu que telle amitié fait qu'en tout ie te tien
Auteur de mon affaire?

Qu'on cherche autre que moy, qui par menteurs écris,
Pour belistrer le bien qui gesne les esprits,
Promette vne autre vie
Aux Rois, qui meurdriſſans eux mesmes leur renom,
Feroient que lon verroit mon œuvre avec leur nom
Dans l'eau d'Oubli rauie.

Qu'on cherche autre que moy qui iuge son bon heur
En l'honneur, & non pas au merite d'honneur:
Et qui d'une apparence

En se trompant soy mesme, aime mieux decevoir
 Tout le monde avec soy, que iustement se voir
 Trompé d'une esperance.

Qu'on cherche autre que moy qui traine un repentir,
 Pour auoir trop voulu au peuple consentir,
 Peuple qui tousiours erre:
 Ven que de cent remors repiqué ie seroy,
 Et qu'éternellement moy mesme ie seroy
 A moy mesme la guerre.

Je ne suis de ceux là, qui pour estre inconstans
 Vont, par mille moyens leur fortune tentans,
 Qui comme une nauire
 Les tournoye en la mer, qui en souffrir les pent.
 L'esprit qui contenter en soy mesme se veut,
 Rien que soy ne desire.

Je suis encore moins de ceux là, qui souuent
 Miserables, belas! se repaissent du vent,
 Entretienans leur vie
 De cet heur malheureux, qu'ils ont pour esperer,
 Et de voir sous les Rois à iamais martyrer
 Leur raison asseruie.

Moins ie me sens encor de ceux là, qui se font
 Eux-mesmes leur poison, par le dépit qu'ils ont
 De la gloire d'une autre.

Car si la gloire n'est qu'un ris & qu'un souci,
 Rions & desirons une gloire estre ici
 Plus aux autres, que nostre.

Et combien moins seroy- ie encore de ces fous,
 Qui pour se contenter s'appastent à tous coups
 D'un bien qu'ils fantastiquent,

Et se flattans en l'heur, qu'ils n'ont point merité,
Veulent que leurs esprits dessus la faulseté
La verité practiquent.

La verité me plaist, le bien qui m'est present
Me contante en ce monde: Et le souci cuisant,
Soit des choses passees,
Ou de celles qui sont, ou qui viendront un iour,
Ne sera, sçie puis, mon eternal vantage,
Bourreau de mes pensees.

C'est pourquoy de mes sons l'artifice immortal
A tousiours esté veu ne sentir rien de tel:
Car la liberte douce
Qui ne me veit iamais dessous le ioug ravier,
Ne me permet aussi que ie puisse affermir
Mes cordes, ny mon pouce.

Et c'est pourquoy le bien qui seulement me plaist,
Et c'est pourquoy le bien qui vraiment me paist,
Maugré la Parque blesme
Reniure se verra dans mes viuans escrits:
Hé, rien de bon peut-il sortir de ces esprits
Contraires à soy mesme?

O douce amitié donc, ô pardurable foy,
Qui mes soucis mordans accable dedans moy,
Et d'une sainte audace
Va tousiours s'opposant à mon plus fier malheur,
M'allegeant du fardeau que ie sens sous l'erreur
De ce vil populace.

C'est ceste amitié donc (bien que ce nœu fatal
Soit du petit au grand, Et du maistre au vassal)
C'est ceste amitié sainte.

O D E.

*Qui dedans la Memoire où rien ne peut le Temps,
 Empreinte se verra, d'autant que ie la sens
 Dedans mon cœur empreinte.*
*Ceste amitié m'est plus que le bien mendié
 Des Princes reflattez, ou qu'un los épié
 Sous un masqué visage:
 Ou qu'un proffit qu'on a pour sçauoir retracer
 Les pas d'un populaire, & gesnant son penser
 S'asseruir à l'usage.*
*Bref, pour repeter tout, elle me rend contant
 Du tout en tes faueurs, sans que i aille tentant
 Ma fortune en l'orage:
 Et fait que l'esperance, appast du plus chetif,
 Ne me vient point seduire, ou d'un remors plaintif
 De l'enuieuse rage.*
*Elle ne paist d'un bien fantastiq' mes esprits,
 Bastissant dans la nuë, ains pour but & pour pris,
 Et pour gloire derniere,
 Elle s'ose vanter de l'immortalité,
 Si i'obtien ce seul bien de ma fatalité
 Que ie sorte en lumiere.*

FIN DV PREMIER VOLUME
DES OEUVRES ET MESLANGES
D'ESTIENNE IOELLE.



CE QVI EST A CORRIGER en ce premier volume.

Le premier nombre demonstre le feuillet: les lettres a,b, la premiere
& seconde pages: le troisieme, les lignes d'icelles.

En l'aduertissement page 2. ligne 2. lisez, Origines & des Temps, lequel
on attribue à Caton, & à vn Archiloch,) 1. b, 12. Des flambans) 2. a, 4.
qu'en l'austerité) 13. a, 7. Que les temps ne corr.) 15. a, 27. Est porté) 24. a,
10. feu charmé charme) ib. 15. Que moindre.) ib. b, 27. qui nous comm.) 32.
b, 19. Tout le) 54. b, 30. estois cogneu d'eux:) 55. b, 12. le respire dans) 68.
b, 24. des mal-nez poe.) 72. b, 16. L'v'sance antique -- s'effaceri) 74. b, 14.
faire aux leurs) 77. a, 23. beau masque d'Ast.) 78. a, 28. Euc, en tels) 85. b,
13. de la renoir,) 111. b, 12. Seul l'excrete au) 121. a, 30. Mes vers) 142. b, 1.
par ses inc.) 154. b, 6. Et dont on puisse) 166. a, 16. sont supposet, encor)
299. a, 21. veriu se fait de) 177. b, 30. flagror) 189. b, 19. vn escrit) 198. a,
3. séent) 206. a, 7. qu'aue) 220. b, 25. Florimond) 231. a, 20. paye en
l'inf.) 234. a, 30. qu'vne) 244. b, 2. des fiers Ro.) 269. b. 4. renaiſſantes)
270. a, 9. De qui) 291. a, 28. Prendre vn) 293. b, 19. ce matin l'a rembusché
Ce) 297. a, 6. aux leuriers fort) 301. b, 26. Ta Ma.



TABLE DE CE QVI EST CON- TEN V EN CE PREMIER VOLV- me des œuures d'E. Iodelle.

SONNETS.

Admirant sa blancheur	10. b	Auec ton cher pourtrait	5. b
A fin qu'en cet ouurage	5. b		
A fin que ceux qu'enuie	111. a	Bien que tu sois grand' Royne	85. a
Alle mes vers, enfans	9. a	Bien que l'allusion	113. a
Amour vomit sur moy	3. a		
Après tant d'autres maux	73. a	Ceci qu'à l'impourueu	87. a
Aux communes douleurs	12. a	Ce iour que tu viens, stre	82. a
Aux plaintes que ma Muse	78. b	Ce iourd'huy d'un trait mesme	87. b

T A B L E.

Celle qui est au vis	8.a	Iadis la France a veu	88.a
Ce qui denoit le plus	73.a	L'aimé le verd laurier	4.b
C'estoit grand bien	187.a	L'aimé ne peut nostre ame	110.b
C'est aux ministres seuls	73.b	Le croy qu'estant, Madame	84.b
C'est horreur que n'osans	80.b	Le hay qu'estans tous presque	75.b
C'est beaucoup voir les Dieux	87.a	Le te rens grace, Amour	7.a
C'est vn grand heur à toy	110.a	Le m'esmerueille fort	73.b
C'estoit assez, ce semble	72.a	Le ne crains pas que Dieu	74.b
Chasque temple en ce iour	12.b	Le me trouue & me pers	11.b
Christ, pacifique Roy	80.a	Le ne suis de ceux là	ib.
Combien que Mars, ce semble	90.b	Le pense encore voir	79.a
Combien que veu ton sang	110.b	Le sçay que mille escrits	77.b
Comme qui s'est perdu	8.b	Le viuois, mais ie meurs	6.a
Comme vn docte artisan	111.b	Il faut que pour ton may	9.a
		Il faut qu'un cours du ciel	77.a
Des maux qu'un desespoir	7.b	Iusqu'aux autels	4.b
De moy mesme ie suis	11.a		
Depuis que j'ay leur cause	80.b	La fille à ce Cesar	85.b
De quel Soleil, Diane	1.b	L'amitié qui me lie	112.a
De quatre dons Amour	88.b	L'arc d'Apollon	114.a
Des astres, des forests	1.b	La roche de Caucaze	7.a
Des deux grands Rois d'Europe	85.b	Le dol long temps couué	69.b
Des nations que Christ	76.b	Les hauts esprits, qui m'esme	74.a
Des trois sortes d'aimer	6.a	L'eternité que Christ	81.a
De ton dueil ie ne veux	85.a	Lors que ie iuge en tout	114.b
Dieu, ce Dieu qui promet	70.a		
Dieu, Madame, a permis	84.a	Madame, c'est à vous	1.a
Dieu vueille qu'en ce iour	82.a	Madame j'ay regret	4.a
Du Croissant de Henry	187.b	Maudiray-je, Madame	5.a
		Maudiray-je, cher Comte	111.b
Encor que toy, ta France	83.b	Mars en guerre effroyable	71.b
Encor que toy Diane	2.a	Minerve se peut dire	88.b
En ce iour que le bois	7.b	Mon bui d'ainsi sans cesse	75.a
En la douceur de paix	87.b	Mon Roy sçait-il pas bien	70.b
En l'autre S. Michel	82.b		
En mon cœur, en mon chef	8.b	Ne les à ton peu donc	79.b
En songant aux moyens	78.a	Ne m'est-ce assez, helas	72.b
Et quoy? tu fus, Amour	8.a	Nonobstant tout m'espris	113.b
En tous maux que peut faire	12.b		
Est-ce Christ, ou Satan	79.a	O moy pourtant heureux	79.b
Estre fils d'un Henry	71.b	On vante assez	112.a
Extreme est la grandeur	90.a	Ore qu'en ce beau parc	70.a
		Ou soit que la clarté	3.b
Homere, qui diuin	88.a		

T A B L E.

Par mes feux iustement	89.b	Si quand tu es en terre	2.a
Par moy l'Amour	112.b	Si quelqu'un veut sçavoir	3.a
Par quel sort, par quel art	12.a	Si tant de mal se peut	76.a
Passant dernièrement	3.b	Si ta paix est honneste	81.b
Pendant qu'en mes discours	72.a	Soit donc par ta main	90.b
Pique d'une acré humeur	78.a		
Plustost la mort	4.a	Tant bien chercher aux cieux	115.a
Pour monstrier que la paix	89.a	Toyant ce iour parler	69.b
Pour deborder les maux	77.b	Tout cet hyuer, par l'aspre	10.a
Pourrois-je voir l'heureuse	9.b	Tout mon regret n'est pas	76.b
Pour vrayment m'esjouir	89.b	Tous les saints mandemens	80.a
		Troupe d'enfans diuins	70.b
Quand ton nom ie veux faire	2.b	Tu es seul que ie pense	188.a
Quand ton nom ie veux feindre	10.b	Tu n'as pas seulement	187.b
Quand seul sans toy ie suis	110.a	Vn fort & seur esprit	76.a
Quand ie te voy sur toy	84.a	Vous Charles, Catherine	83.b
Quand le Chien d'Erygone	113.b	Voyant la beauté grande	114.a
Que ie ry quand ie voy	81.a		
Quel debat sur ceci	83.a	CONTR'AMOURS.	
Quel d'sin fait que ceux	75.a	Combien de fois	64.b
Quel heur, Anchise, à toy	6.b	Des que ce Dieu	63.b
Quel humeur, mais quel crime	ib.	Je m'esloy retiré	64.a
Que de ce siecle horrible	77.a	Myrthe brusloit iadis	64.a
Que n'ay-je mes esprits	5.a	O Toy qui as	63.b
Que ce conseil me plaist	81.b	O traistres vers	64.b
Que t'ont, ô Dieu, mesfait	74.b	Vous, ô Dieux, qui à vous	63.a
Quelque lieu, quelque amour	2.b		
Qu'Hymen, Amour	90.a	CHANSONS.	
Quiconque aura bien sceu	74.a	Aux fables ma passion	31.a
Qui croiroit de trouver	75.b	Amour n'est point	37.a
Quoy que ces eshonte	73.b	Faut-il, Chançon	39.a
		J'ay sans nulle occasion	42.b
Race des Dieux, Henry	83.a	Je suis parmi le trouble	47.b
Recherche qui voudra	9.b	L'aspre & l'estrange flame	24.a
		L'esprit auquel les Dieux	17.b
Sans pleurer (car ie hay	10.a	Les vers des amans	40.a
Sapphon la docte Grecque	11.a	Ma passion	27.b
Si aux extremes maux	111.a	Maistresse, que sans fin	34.b
Si de l'honneur le nom	121.b	O bel œil, ô blanc sein	45.b
Si ce bien dont ta race	71.a	Quand nostre passion craint	33.b
Si ie suis bien cogneu	187.a	Sans estre esclau	25.a
Si ie t'ay discours	71.a		
Si Orlande sceut bien	121.a		

TABLE.

CHAPITRES.		A M.le Comte de Dampmartin.
<i>Amour qui quelquefois</i>	13.a	306.a
<i>Je croy lors que nostre ame</i>	16.a	
<i>Quand en espoir on peut</i>	20.b	EPITHALAMES.
<i>S'il faut que tes chansons</i>	118.a	
<i>Tu sçais, ô vaine Muse</i>	134.a	De Madame Marguerite sœur du Roy Henry II. 52.a
		Du Roy Charles IX. 91.a
ELEGIES.		
<i>Madame, si jamais ma douce liberté</i>		DISCOVRS.
48.b		
<i>Sur ce que tourne le Ciel</i>	115.a	De Iules Cesar. 135.b
		Contre la Riere-Venus. 65.a
<i>Epistre à M. Marguerite.</i>		
<i>Si deormais vers toy</i>	116.a	Vers recitez à la Mascarade faire à Paris 1558. 103.b
<i>Fantasie.</i>		
<i>Chanter ce vers</i>	112.b	
		TOMBEAUX.
<i>Epigrammes.</i>		
<i>Voyant Madame</i>	113.a	De M. Simon l'Archer. 175.a
<i>Les vieux Gaulois auoyent</i>	121.b	De Peronne le Grefle. 177.a
		De M.le Comte de Brisfac. 178.a
		De Jeanne de Loynes. 180.b
		De M. Bourdin. 181.b
		De M. Despençe. 181.b
		De M.de Mont-falez. 184.a
		De M. Theuet. 185.a
ODES.		
<i>Sur la devise de Nœu & de Feu.</i>		COMEDIE.
51.a		
<i>Sur la naissance de Madame</i>		L'Eugene. 189.a
100.a		
<i>Sur la traduction de P. Emile.</i>		
122.a		
<i>Sur le Monophile d'Estienne</i>		
<i>Pasquier.</i>	128.a	
<i>Sur les Singularitez de la France</i>		
<i>Antarctique.</i>	130.a	TRAGEDIES.
<i>A C. Colet, sur le 9. d'Amadis.</i>		
131.a		Cleopatre captiue. 223.a
<i>Aux cendres dudit Colet.</i>	133.a	Didon se sacrifiant. 252.a
<i>De la Chasse.</i>	290.b	

F I N.







